

江苏省通志 稿邦交志

繆荃孙

文硕阁

wenshuoge.com

目录

关于我们	3
序	5
第一卷 周至明	6
第二卷 道光	41
第三卷 咸丰(上)	67
第四卷 咸丰(中)	88
第五卷 咸丰(下)	108
第六卷 同治(上)	127
第七卷 同治(中)	142
第八卷 同治(下)	158
第九卷 光绪(上)	182
第十卷 光绪(下) 宣统	199
第十一卷 上海租界	214

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

序

苏省邦交，其在春秋，实始吴晋。会祖之后，遂遍中夏，勾践承之。周王致伯，无疆之败，地属于楚，不专苏境，自可不录。吴淞既王，亦通诸粤。七国之变，削弱宗藩，南边诸郡，不隶王国，邦交遂绝。汉鼎三分，孙吴为国，蜀汉而外，颇通外徼。西晋灭之，邦交之重，复归中朝。东晋南渡，天光分曜，自是江左，复有邦交。宋齐梁陈，其与北朝，本如列国。隋人统一，海东诸域，直达司宾，苏无可纪。唐代日本，使道来往，多在明越。其达雍京，难舍苏境，然鲜可书。北宋同之，有外馆者，苏郡而已。华亭互市，略有所录。高宗都杭，又如列国。金使之来，不能舍苏。榷场之列，则在皖境。元明以还，渐市申浦。清惩郑氏，始禁通海。既得台湾，诸国胥至。沪有市舶，后毆归粤。五口之约，上海为冠，爰订《江宁》。咸丰再盟，始议于沪，庚申成约。通商之节，江左总之。半壁归重，环球注观。中外大计，往往参知。金陵、镇、苏，均为口岸。江海之榷，国用资之。侨客日多，万方萃集。领事有馆，传教有堂。皇华来往，什九道沪。交涉之繁，至不胜书。庚子互保，隐如独立，砥柱东南，功迈匡合，汇而录之。盛衰兴废，胥由于兹，未可忽已。

。

第一卷 周至明

周定王六年六月，楚为众舒叛，故伐舒蓼，灭之。楚子疆之，及滑汭，盟吴越而还。

周简王二年，吴伐郟，郟成。楚子重、子反杀巫臣之族，而分其室。巫臣自晋遗二子书曰：“尔以谗慝贪婪事君，而多杀不辜，余必使尔疲于奔命以死”。巫臣请使于吴，晋侯许之。吴子寿梦说之，乃通吴于晋。以两之一卒适吴，舍偏两之一，与其射御，教吴乘车，教之战阵，教之叛楚。置其子狐庸，使为行人于吴，吴始伐楚、伐巢、伐徐。子重奔命。马陵之会，吴人州来，子重自郑奔命。子重、子反于是一岁七奔命。蛮夷属于楚者，吴尽取之。是以始大，通吴于上国。

周简王十年十一月，晋士燮、齐高无咎、宋华元、鲁叔孙侨如、卫孙林父、郑公子鳅、邾人会吴于锺离，始通吴也。

周灵王二年，晋为郑服故，且欲修吴好，将合诸侯。六月，单子、晋侯、宋公、鲁侯、卫侯、郑伯、莒子、邾子、齐世子光、同盟于鸡泽。晋侯使荀会迎吴子于淮上，吴子不至。

周灵王四年，吴子使寿越如晋，辞不会于鸡泽之故，且请听诸侯之好。晋人将为之合诸侯，使鲁卫先会吴，告师期。夏，鲁仲孙蔑、卫孙林父会吴于善道。

周灵王九年，晋侯、宋公、鲁侯、卫侯、曹伯、莒子、邾子、滕子、薛伯、杞伯、小邾子、齐世子光会吴子寿梦于祖。

周灵王十一年九月，吴子寿梦卒，鲁侯临于周庙(《经》作吴子乘，今从《传》)。

周灵王十三年春，晋士匄及诸侯之大夫会吴于向。吴告庸浦之败于晋，会于向，为吴谋楚。士匄数吴伐楚丧，为不德，以退吴人。

周灵王二十五年十二月，吴以吴子遏卒，讦于诸侯。

周景王元年五月，吴以阖杀吴子余祭，讦于诸侯。

吴使季札聘鲁、齐、郑、卫、晋。

《左传》：吴公子札来聘，说叔孙穆子，观周乐。其出聘也，通嗣君，遂聘于齐，说晏平仲。聘于郑，见子产，如旧相识，与之缟带，子产献衣。谓子产曰：郑之执政侈，难将至矣。子为政，慎之以礼，不然，郑国将败。适卫，说蘧瑗、史鳅、公

子荆、公叔发、公子朝曰：卫多君子，未有患也。适晋，说赵文子、韩宣子、魏献子曰：晋国其萃于三族乎。说叔向，将行，谓叔向曰：吾子勉之，君侈而多良，大夫皆富，政将在三家，吾子好直，必思自免于难。

周景王三年，吴子使屈狐庸聘於晋，通吴晋之路。赵文子问曰：延州来季子，其果立乎？巢陨诸樊，阖戕戴吴，天似启之，何如？对曰：是二王之命，非启季子。若天所启，其在今嗣君乎？

周景王八年，楚子率诸侯伐吴。楚子以驛至于罗内，吴子使其弟蹇由犒师。

周景王十八年正月，吴以吴子夷末卒，赴于诸侯。

周敬王五年春，吴子使延州来聘季子于上国，遂聘于晋，以观诸侯。四月，吴公子光杀其君僚。季子至，复命，哭墓。

周敬王十四年，楚自昭王即位，无岁不有吴师。蔡侯因之，以其子乾与其大夫之子为质于吴。冬，蔡侯、吴子、唐侯伐楚，入郢，楚子奔随。吴人从之，谓随人曰：“周之子孙在汉川者，楚实尽之。天诱其衷，致罚于楚，而君又窜之，周室何罪？君若顾报周室，施及寡人，以奖天衷，君之惠也，汉阳之田，君实有之。”随人辞曰：“以随之辟小而密迹于楚，楚实存之。世有盟誓，至于今未改。若难而弃之，何以事君？执事之患，不惟一人。若鸩楚竟，敢不听命。”吴人乃退。

周敬王二十六年，楚之围蔡，请迁于吴。

吴王夫差败越于夫椒，遂入越。越子以甲盾五千保于会稽，使大夫种因吴太宰嚭以行成，吴子将许之。伍员曰：“不可。树德莫如滋，去恶莫如尽。勾践能亲而务施，施不失人，亲不弃劳，与我同壤而世为仇讎，克而弗取，将又存之。违天而长寇讎，后虽悔之，不可食已。姬之衰也，日可俟也，介在蛮夷而长寇讎，以是求伯，必不行矣”。弗听。退而曰：“越十年生聚，十年教训，二十年之外，吴其为沼乎”。三月，越及吴平。吴之入楚，召陈怀公。怀公朝国人而问焉。逢滑当公而进曰：“国之兴也以福，其亡也以祸。今吴未有福，楚未有祸，楚未可弃，吴未可从。若以晋辞吴，若何？”陈侯从之。及夫差克越，修先君之怨。秋八月，吴伐陈，修旧怨也。

周敬王二十七年，吴泄庸如蔡纳聘，而稍纳师。师毕入，众知之。蔡侯告大夫杀公子驪以说。冬，蔡迁于州来。

周敬王三十二年夏，鲁哀公会吴于郕。吴来征百牢，子服景伯对曰：“先王未之有也”。吴人曰：“宋百牢我，鲁不可以后宋。且鲁牢晋大夫过十，吴王百牢，不亦

可乎？”景伯曰：“吴将亡矣，不与，必弃疾于我”。乃与之。

秋，鲁伐邾。八月己酉，以邾子益来，囚诸负瑕。邾茅夷鸿以束帛乘韦，自请救于吴。曰：“鲁弱晋而远吴，凭恃其众，而背君之盟，辟君之执事，以凌我小国。邾非敢自爱也，惧君威之不立。若夏盟于郕衍，秋而背之，四方诸侯，其何以事君？且鲁赋八百乘，君之贰也。邾赋六百乘，君之私也。以私奉贰，惟君图之。”

周敬王三十三年，吴伐鲁，为邾故。子泄率从武城克之。吴师克东阳。而进舍于五梧。明日，舍于蚕室。公宾庚、公甲叔子与战于夷，获叔子与析朱，献于王。王曰：此同车，必使能，国未可望也。明日，舍于庚宗，遂次于泗上。吴人行成，将盟。子服景伯曰：“楚人围宋，易子而食，析骸而，犹无城下之盟。我未及亏，而有城下之盟，是弃国也。吴轻而远，不能久，将归矣，请少待之。”弗从。吴人盟而还。

六月，齐侯使如吴，请师，将以伐鲁。乃归邾子，邾子又无道。吴子使太宰子余讨之，囚诸楼台，梏之以棘。诸大夫奉太子革为政。

周敬王三十四年春，齐侯使公孟绰辞师于吴，吴子曰：“昔岁寡人闻命。今又革之，不知所从，将进而受命于君。”

秋，吴城邗沟通江淮，注于邗江。（筑城穿沟，东北通射阳湖，西北至末口入淮。通粮道也。今广陵韩江是。）

周敬王三十五年春，鲁侯会吴子、邾子、郯子伐齐南鄙，师于郕。齐人弑悼公，赴于师。吴子三日哭于军门之外。徐承率舟师将自海入齐，齐人败之。吴师乃还。秋，吴子使来复僂师。

周敬王三十六年五月，吴子会鲁侯伐齐，齐国书帅师及吴，战于艾陵，齐师败绩。吴将伐齐，越子率其众以朝，王及列士，皆有馈赂，吴人皆喜。惟子胥惧，曰：“是参吴也。越在，我心腹之疾。壤地同而有欲于我。夫其柔服，求济其欲，不如早从事。得志于齐，犹获石田，无所用之。越不为沼，吴其泯矣。”弗听。使于齐，属其子于鲍氏，为王孙氏。反役，王闻之，使赐之属镂以死。

周敬王三十七年，鲁侯会吴于橐皋。吴子使太宰嚭请寻盟，公不欲。使子贡对曰：“寡君以为苟有盟焉，弗可改也。若犹可改，日盟何益？”乃不寻盟。

吴征会于卫。初，卫杀吴行人且姚而惧，谋于行人子羽，子羽曰：“吴方无道，乃辱吾君，不如止也。”子木曰：“吴方无道，国无道，必弃疾于人。吴虽无道，犹足以患卫，往也。”秋，卫侯会吴于郕，鲁侯及卫侯、宋皇瑗盟，而卒辞吴盟。吴

人藩卫侯之舍。子服景伯谓子贡曰：“吴不行礼于卫，而藩其君之舍以难之。子盍见太宰？”乃请束锦以行。语及卫故，太宰嚭曰：“寡君愿事卫君。卫君之来也缓，寡君惧，故将止之。”子贡曰：“卫君之来，必谋于众。其众或欲或否，是以缓来。其欲来者，子之党也，其不欲来者，子之仇也。若执卫君，是堕党而崇仇也。夫堕子者得其志矣。且合诸侯而执卫君，谁敢不惧？堕党崇仇，而惧诸侯，或者难以霸乎？”太宰嚭说，乃舍卫侯。

楚申包胥使于越。勾践曰：“越国南则楚，西则晋，北则齐，春秋皮币玉帛子女以宾服焉，未尝敢绝”。求以报吴。

三十八年夏，鲁侯会单子、晋侯及吴子于黄池。六月丙子，越子伐吴，为二队。畴无余、讴阳自南方先及郊，吴大子友、王子地、王孙弥庸、寿于姚自泓上观之。弥庸见姑蔑之旗曰：“吾父之旗也，不可以见仇而弗杀也。”大子曰：“战而不克，将亡国，请待之。”弥庸不可；属徒五千，王子地助之。乙酉，战，弥庸获畴无余，地获讴阳。越子至，王子地守，丙戌复战，大败吴师，获大子友、王孙弥庸、寿于姚。丁亥入吴。吴人告败于王，王恶其闻也，自剄七人于幕下。秋七月辛丑，盟。吴晋争先。吴人曰：“于周室，我为长”。晋人曰：“于姬姓，我为伯。”赵鞅呼司马寅曰：“日旰矣，大事未成，二臣之罪也。建鼓整列，二臣死之，长幼必可知也。”对曰：“请姑视之。”反，曰：“肉食者无墨，今吴王有墨，国胜乎？大子死乎？且夷德轻，不忍久，请少待之。”乃先晋国，吴公先歃，晋侯次之。吴人将以鲁侯见晋侯，子服景伯对使者曰：“王合诸侯，则伯帅侯牧以见于王；伯合诸侯，则侯帅子男以见于伯。自王以下，朝聘玉帛不同，故敝邑之职贡于吴，有丰于晋，无不及焉。今诸侯会而君将以寡君见晋君，敝邑将改职贡，鲁赋于吴八百乘，若为子男，则将半邾以属于吴。而如邾以事晋，且执事以伯召诸侯，而以侯终之。何利焉？”吴人乃止。既而悔之，将囚景伯。景伯曰：“何也？立后于鲁矣，将以二乘与六人从，迟速惟命。”遂囚以还。及户牖，谓太宰嚭曰：“鲁将以十月上辛有事于上帝先王，季辛而毕，何世有职？自襄以来，未之改也。若不会，祝宗将曰吴实然，且谓鲁不共，而执其贱者七人，何损焉？”太宰嚭曰：“无损于鲁，而只为名，不如归之。”乃归景伯。冬，吴及越平。

周敬王四十年夏，楚子西、子期伐吴，及桐汭，陈侯使公孙贞子吊焉，及良而卒，将以尸入。吴子使太宰嚭劳，且辞曰：“以水潦之不时，无乃廩然陨大夫之尸，以重寡君之忧，寡君敢辞。”上介芋尹盖对曰：“寡君闻楚为不道，荐伐吴国，灭厥民人，寡君使盖备使，吊君之下吏。无禄，使人逢天之戚，大命陨坠，绝世于良，废日共积，一日迁次，今君命逆使人曰：‘无以尸造于门’，是我寡君之命委于草莽也。且臣闻之曰：‘事死如事生，礼也。’于是有朝聘而终、以尸将事之礼，又有朝聘而遭丧之礼，若不以尸将命，是遭丧而还也。以礼防民，犹或逾之。今大夫曰死而弃之，是弃礼也，其何以为诸侯主？先民有言曰：无秽虐士，备使奉尸将命，苟我寡君之命，达于君所，虽陨于深渊，则天命也，非君与涉入之过也。”吴人纳

之。

周元王元年，吴公子庆忌骤谏吴子曰：“不改，必亡。”弗听。出居于艾，遂适楚，闻越将伐吴。冬，请归平越，遂归。欲除不忠者以说于越，吴人杀之。十一月，越围吴，赵孟降于丧食。楚隆曰：“三年之丧，亲暱之极也，主又降之，无乃不可。”赵孟曰：“黄池之役，先主与吴王有质，曰好恶同之。今越围吴，嗣子不废旧业而敌之，非晋之所能及焉，吾是以为降。”楚隆曰：“若使吴王知之，若何？”赵孟曰：“可乎。”隆曰：“请尝之。”乃往造于越军曰：“吴犯间上国多矣，闻君亲讨焉，诸夏之人，莫不欢喜，惟恐君志之不从，请入视之。”告于吴王曰：“寡君之老无恤，使陪臣隆敢展谢其不共。黄池之役，君之先臣志父，得承齐盟，曰：‘好恶同之’今君在难，无恤不敢惮劳，非晋国之所能及也。使陪臣敢展布之。”王拜稽首曰：“寡人不佞，不能事越，以为大夫忧。拜命之辱，与之一簞珠。使问赵孟曰：勾践将生忧寡人，寡人死之不得矣。”

周元王三年，越人始聘于鲁。

周元王四年四月，邾隐公自齐奔越，曰：“吴为不道，执父立子。”越人归之，太子革奔越。

越灭吴，上征上国，宋、郑、鲁、卫、陈、蔡执玉之君皆入朝。

周元王五年八月，鲁叔青如越，始使越也。越诸鞅来聘。

周元王六年，邾子又无道，越人执之以归。而立公子何，何亦无道。

闰月，鲁侯如越，得太子适郢，将妻公而多与之地。公孙有山使告于季孙，季孙惧。使因太宰嚭而纳赂焉，乃止。

周元王七年，卫诸师比、公孙弥牟、公文要、司寇亥、司徒期因三匠与拳弥以作乱，皆执利兵，无者执斤，使拳弥入于公宫。而自太子疾之宫，谋以攻公。卫侯出将适蒲，弥曰“晋无信不可。”将适鄆，弥曰：“齐晋争我，不可。”将适泲。弥曰：“请适城以钩越，越有君。”乃适城。弥曰：“卫盗不可知也。”乃载宝以归。卫侯为支离之卒，因祝史挥侵卫，卫人病之。公文要、公孙弥牟逐祝史挥，馆诸外里，遂有宠，使如越乞师。六月，鲁侯至自越。

周元王八年五月，叔孙舒帅师会越，皋如、后庸、宋乐茂纳卫侯。文子欲纳之，懿之曰：“君愎而虐，少待之，必毒于民。”乃睦于子，侵外州，大获。出御之，大败。掘褚师定子之墓，焚之平庄之上。文子、公孙弥牟使王孙齐私于皋如曰：“子将大灭卫乎？抑纳君而已。”皋如曰：“寡君之命无他，纳卫君而已。”文子致众而

问曰：“君以蛮夷伐国，国几亡矣，请纳之。”众曰：“勿纳。”曰：“弥牟亡而有益，请自北门出。”众曰：“勿出。”重赂越人，申开守陴，而纳卫侯。不敢入，师还。立悼公，南氏相之，以城与越人。司徒期聘于越，卫出公攻而夺之币。期告越王，王命取之。期以众取之，出公怒，杀期之甥为太子者，遂卒于越。

周元王九年春，越子使后庸来聘，且言邾田封于骀上。二月，盟于平阳。鲁侯欲以越伐鲁，而去三桓。八月，如公孙有山氏，因孙于邾，乃遂如越。国人施公孙有山氏。(按：越灭吴，尽有吴越之地，凡吴所通中夏诸国，越皆通之。但自《左传》哀公二十七年后，史策不传，无可征考。今

但录《史记·越王世家》及《正义》所引《竹书纪年》，以见邦交之概。)

《地理志》：吴地斗分野，今之会稽、九江、丹阳、豫章、庐江、广陵、临淮郡皆吴地。会稽海外有东鯀人。分为二十余国，以岁时来献见云。

《后汉书·东夷传》：会稽海外有东鯀人，分为二十余国。又有《夷洲》及《澶洲传》，言秦始皇方士徐福将童男数千人入海求蓬莱神仙，不得。徐福畏诛，不敢还，遂止此洲。世世相承，有数万家。人民时至会稽市。会稽东冶县人有入海行，遭风流，移至夷洲者。所在绝远，不可往来。(注：沈莹《临海水土志》曰：“夷洲在临海东南，去郡二千里。土地无霜雪，草木不死。四面是山谿，人皆髡发穿耳，女人不穿耳。土地饶沃，既生五谷，又多鱼肉。有犬尾，短如麋尾状。此夷舅姑子妇卧息共一大床，略不相避。地有铜铁，惟用鹿格为矛、摩厉青石以作弓矢。)

建安二十六年，吴王遣都尉赵咨使于魏。魏文帝欲封吴王子登，吴王以登年幼，上书辞封，遣西曹掾沈珩陈谢。

黄武元年，魏以不遣任子来伐，吴王临江拒守。十二月，使太中郑泉聘于蜀汉，始复通也。然犹与魏往来，至后年乃绝。

黄武二年十一月，蜀使中郎将邓芝来聘。(《吴志》注，吴历曰：蜀致马二百匹，锦千端及方物，自是之后，聘使往来以为常，吴亦致方物答其厚意。)

黄武三年夏，遣辅义中郎将张温聘于蜀，蜀遣尚书邓芝来聘，重结盟好。

黄龙元年六月，蜀汉遣卫尉陈震庆践位，乃分天下。豫、青、徐、幽属吴，兖、冀并凉属蜀，司州之土，以函谷关为界。造为盟曰：“古建大事，必先盟誓。汉之与吴，虽信由中，然分土裂境，宜有盟约。诸葛丞相德威远著，翼戴本国，典戎在外，信感阴阳，诚动天地。重复结盟，广诚约誓，使东西士民，咸共闻知。故立坛杀牲，昭告神明。再歃加书，副之天府。天高听下，灵威棐谏。司慎司盟，群神群祀

，莫不临之。自今日汉吴既盟之后，戮力一心，同讨魏贼。救危恤患，分灾共庆，好恶齐之，无或携贰。若有害汉，则吴伐之；若有害吴，则汉伐之。各守分土，无相侵犯。传之后叶，克终若始。凡百之约，皆如载书。信言不艳，实居于好。有渝此盟，创祸先乱，违贰不协，悞慢天命，明神上帝，是讨是督，俾坠其师，无克祚国。于尔大神，其明鉴之。”

嘉禾元年三月，遣将军周贺、校尉裴潜之辽东。十月，魏辽东太守公孙渊遣校尉宿舒、郎中孙综称藩，并献貂马。帝大悦。

嘉禾二年三月，遣太常张弥、执金吾许晏、将军贺达将兵万人，金宝珍货九锡备物，乘海授公孙渊，封为燕王。举朝大臣，自顾雍以下皆谏，以为渊未可信，而宠待太厚；但可遣吏兵护送舒综而已。不听。公孙渊知吴难恃，乃斩张弥、许晏等首，传送于魏，悉没其兵资珍宝。十二月，魏拜渊大司马，封乐浪公。帝闻之，大怒，欲自征公孙渊。陆逊、薛综、陆瑁皆谏。乃止。

从张弥等之中使秦旦、张群、杜德、黄疆等，公孙渊置之玄菟郡。旦、疆等议曰：此郡形势甚弱，若一旦同心，焚烧城郭，杀其长吏，为国报耻，伏死无恨。为部中张松所告。群、德、疆等皆逾城走。得达勾骊，因宣诏于勾骊王宫及其主簿。诏言有赐为辽东所攻夺，宫等大喜，即受诏命。宫遣皂衣二十五人送旦等还，奉表称臣，贡貂皮千枚，鸕鸡皮十具。

嘉禾四年，遣使者谢宏、中书陈恂拜勾骊王位宫为单于，加赐衣服珍宝。恂等到安平口，先遣校尉陈奉见宫，而宫受魏幽州刺史，讽旨令以吴使自效，奉闻之，还。宫遣主簿笮咨带固等出安平，与谢宏等相见。宏即缚得三十余人，质之。宫于是谢罪，上马数百匹。宏乃遣咨固奉诏书赐与宫。是时，宏船小，载马八十匹而还。

秋魏使以马求易珠玕、翡翠、玳瑁。帝曰：“此皆孤所不用，而可得马，何苦而不听其交易。”

是年，汉使右中郎将宗预来聘，帝问曰：“东之与西，譬犹一家，而闻西更增白帝之守，何也？”预对曰：“臣以为东益巴邱之戍，西增白帝之守，皆事势宜然，俱不足以相问也。”帝大笑，嘉其抗直，甚爱待之，见敬亚于邓芝。（《宗预传》：预复东聘吴，权捉预手，涕泣而别曰：“君每衔命，结二国之好。今君年长，孤亦衰老，恐不复相见。”遗预大珠一斛。注：吴历曰：预临别曰：“蜀土僻小，虽云邻国，东西相赖，吴不可无蜀，蜀不可无吴。君臣凭恃，陛下重垂神虑）。

遣宣化从事朱应、中郎康泰通西南徼外，其所经及传闻，有百数十国。

扶南大将范寻自立，遣康泰、朱应使于寻国。国人犹裸，惟妇人著贯头。泰应谓曰

：“国中实佳，但人褻露可怪。”始令国内男子著横幅，大家乃截锦为之，贫者以布。

黄武三年，大秦贾人秦论来到交趾，交趾太守吴邈遣使诣帝(原作权)。帝问风土谣俗，论具以事对。时诸葛恪讨丹阳，获黝歙短人。论见之，曰：“大秦稀见此人。”帝以男女十人，差吏会稽刘咸送论，咸于道物故，论乃径还本国。(扶南王范旆遣亲人苏物使其国，从扶南发，投拘利口，循海大湾中正西北入历湾边数国，可一年余，到天竺江口，逆水行七千里乃至。天竺王差陈、宋等二人，以月支马四匹报旆。其时吴遣康泰等使扶南，及见陈、宋等，具问天竺土俗。)

永安六年十月，汉以魏见伐来告，使大将军丁奉督诸军向寿春，将军丁封、孙异如沔中，皆救汉，汉主禅降魏问至，乃罢。

元兴元年，司马昭为魏相国，遣昔吴寿春城降将徐绍、孙彧衔命赍书，陈事势利害以申喻。

甘露元年，后主遣使随绍、彧报书：“知以高世之才，处宰辅之任，渐导之功勤亦至矣。孤以不德，阶承统绪。思与贤良，共济世道，而以壅隔，未有所缘。嘉意远著，深用依依。今遣光禄大夫纪陟，五官中郎将弘璆，宣明至怀。”绍行到濡须，召还，杀之，徙其家属建安。始有曰绍称美中国者故也。

宝鼎元年正月，遣大鸿胪张俨、五官中郎将丁忠吊祭晋文帝。乃还，俨道病死。忠说皓曰：“北方守战之具不设，弋阳可袭而取。”镇西大将军陆凯曰：“今强敌并巴蜀，有兼土之实，而遣使求亲，欲息兵役，不可谓其求援于我。而欲徼幸求胜，未见其利。”车骑将军刘纂曰：“天生五才，谁能去兵，谲诈相雄，有自来矣。宜遣间谍以观其势。”后主阴纳纂言。且以蜀新平，故不行，然遂自绝。

咸康二年正月庚申，高句骊贡方物。

三年十月丁卯，慕容皝自立为燕王。

四年四月癸丑。慕容皝征北大将军。

六年十月，林邑献驯象。

七年二月，慕容皝求假燕王章玺，许之。

建元元年十二月，高句骊遣使朝献。

永和四年九月，慕容皝死。子隼嗣伪位。

永和五年四月，假慕容隼大将军幽平二州牧、大单于、燕王。

永和八年四月慕容隼僭帝号於中山，称燕。

升平元年正月，扶南、天竺、旃檀献驯象。

隆和元年五月，遣北中郎将庾希、竟陵太守邓遐，以舟师救洛阳。

咸安二年正月，百济、林邑王各遣使献方物。

六月，遣使拜百济王余句为镇东将军。

太元二年六月，林邑贡方物。

七年三月林邑范熊遣使献方物。

义熙元年十一月，凉武昭王玄盛遣使奉表称藩。

九年，高句骊、倭国献方物。

十年九月，林邑献方物。

元嘉三年四月，魏遣散骑常侍步堆等来聘。

元嘉九年五月，帝遣使者赵道生聘於魏。

元嘉十年十二月，魏宁朔将军卢玄来聘。

元嘉十四年三月，帝遣散骑常侍刘熙如魏议纳币，会帝女亡而止。

元嘉十七年二月，魏假通直散骑常侍邢颖来聘。

元嘉十八年八月，魏遣散骑常侍张伟来聘。

元嘉十九年九月，沮渠无讳据高昌，遣常侍汜隼奉表诣建康。十月，柔然遣使诣建康。

元嘉二十二年正月，魏使散骑常侍宋愔来聘。

《魏书·岛夷·刘裕传》：傅亮立义符弟荊州刺史义隆，号年元嘉，遣使赵道生朝贡。(按：宋魏敌国，凡《魏书》称朝贡者，皆宋来聘魏。《魏书》盖据魏史原文，不如南北史书法之平。)

三年八月，义隆使其殿中将军吉恒朝贡。

神䴥二年，遣殿中将军孙横之朝贡。

三年，遣殿中将军田奇朝贡。

延和元年五月，义隆遣赵道生朝贡。

二年二月，诏遣散骑常侍宋宣使于义隆，且为太子结亲。九月，义隆遣赵道生贡驯象。

太延二年三月，义隆遣使曾元绍朝贡。

三年三月，义隆遣其散骑常侍刘熙伯朝贡，且论纳币。六月，义隆女死，不果为婚。

四年五月，义隆遣使黄延年朝贡。

五年十一月，义隆遣使黄延年献驯象。十二月，又遣黄延年朝贡。

九年正月，义隆遣献孔雀。

十一年十一月，世祖车驾出下邳，登于瓜步。义隆遣黄延年朝于行宫，献百牢，贡方物，并请和，求进女于皇孙。世祖以师婚非礼，许和而不许婚，使散骑常侍夏侯野报之。

正平元年正月，世祖飨会于瓜步，既许和好，遂班师。十月，义隆遣其将军孙益等朝贡。

和平元年，骏遣散骑常侍明僧曷朝贡。

三年三月，使其散骑常侍严灵护朝贡。

皇兴元年，或遣其散骑常侍贝思、散骑侍郎崔小白朝贡。

二年，或遣其员外散骑常侍李丰朝贡，遣员外散骑常侍王希涓朝贡。

四年，遣员外散骑常侍刘航朝贡。

延兴元年，遣田廉及员外散骑常侍刘惠秀朝贡。

子昱立，改元元徽。遣员外散骑常侍田惠绍、员外散骑常侍刘惠秀朝贡。

四年，遣员外散骑常侍明昙徽、员外散骑侍郎江山图朝贡。五年，遣员外散骑常侍李祖、员外散骑侍郎鱼长跃朝贡。

立昱弟安成王准，改年升明，遣员外散骑常侍李祖、员外散骑侍郎陶贞宝朝贡。

二年，遣员外散骑常侍何、员外散骑侍郎孔汤朝贡。

三年正月，遣员外散骑常侍殷灵诞、员外散骑侍郎荀昭先朝贡。

《宋书·鲜卑吐谷浑传》：景平中，吐谷浑阿豺(树洛干之弟)遣使上表献方物，诏可督塞表诸军事、安西将军、沙州刺史、浇河公。弟慕立。元嘉六年，上表，诏可督塞表诸军事、征西将军、沙州刺史、陇西公。九年，慕遣司马赵叙奉贡献，加使持节散骑常侍、都督西秦河沙三州诸军事、征西大将军、西秦河二州刺史、领护羌校尉，进陇西王。诏慕南国将士，昔没在佛佛勃勃者，并悉致。慕遣送朱旻之等五十五户，一百五十四人。弟慕延立，遣使奉表，除都督河沙三州诸军事，西秦河二州刺史，陇西王。十六年，封河南王。二十七年，遣使献乌丸帽、女国金酒器、胡王金钏等物。慕延死，树洛干子拾寅立。

二十九年。以拾寅为安西将军、河南王。余官如慕延。

大明五年，遣使献善舞马、四角羊。

泰始三年，晋号征西大将军，又进号车骑大将军。屈真川有盐池，白兰土出黄金铜铁。

《林邑传》：世祖孝建二年，林邑遣长史范龙跋奉使贡献，除龙跋扬武将军。大明二年，林邑王范神成遣长史范流奉表，献金银器及香布诸物。太宗泰豫元年，遣使献方物。

《扶南传》：太祖元嘉十一、十二、十五年，国王持黎跋摩遣使奉献。《诃罗陁传》：元嘉七年，遣使奉表曰：伏愿圣主远垂覆护，市易往返，不为禁闭，敕广州时遣舶还，不令所在有所侵夺。

《诃罗单传》：治阁婆洲，元嘉元年，遣使献金刚指环、赤鹦鹉鸟、天竺国白叠古贝、叶波国古贝等物。元嘉十年，诃罗单国王毗沙跋摩奉表。十三年，又上表。二十六年，太祖诏曰：诃罗单、槃皇、槃达三国，频越遐海，款化纳贡，可并加除授，乃遣使策命。二十九年，又遣长史槃和沙弥献方物。

《槃皇传》：元嘉二十六年，国王舍利槃罗跋摩遣使献方物四十一种，太祖策命之，为槃皇国王。二十八年，复贡献。世祖孝建三年，又遣长史竺那槃智奉表献方物。大明三年，献赤白鹦鹉。太宗泰始二年，又遣使贡献。

《槃达传》：元嘉二十六年，国王舍利不陵伽跋摩遣使献方物，太祖策命之为槃达国王。二十六年、二十八年、复遣使献方物。

阁婆槃达国，元嘉十二年，国王师黎槃达陀诃罗跋摩遣使奉表曰：大宋扬州大国，大吉天子安处其中，绍继先圣，王有四海，阎浮提内莫不来服，我虽在远，亦沾丰润。

《师子国传》：元嘉五年，国王刹利摩诃南奉表，十二年，又遣使奉献。

天竺《伽毗黎传》：元嘉五年，国王月爱遣使奉表，献金刚指环，摩勒金环诸宝物及赤白鹦鹉。太宗泰始二年，又遣使贡献。

元嘉十八年，苏摩黎国那邻那罗跋摩遣使献方物。

世祖孝建二年，斤陀利国王释婆罗那邻陀遣使献金银宝器。后废帝元徽元年，婆黎国遣使贡献。

凡此诸国，皆事佛道。佛道自后汉明帝，法始东流。自此以来，其教稍广，自帝王至于民庶莫不归心。经诰充积，训义深远，别为一家之学焉。

大明二年，有昙标道人与羌人高阁谋反，世祖因是下诏沙汰。

《高句骊传》：高句骊王高琨于晋安帝义熙九年，遣长史高翼献赭白马。以琨为使持节都督营州诸军事、征东将军、高句骊王、乐浪公。高祖践阼，诏琨可征东大将军。三年，加琨散骑常侍，增督平州诸军事。少帝景平二年，琨遣使诣阙献方物，遣使慰劳之。琨每岁遣使。元嘉十六年，太祖欲北讨，诏琨送马；琨献马八百匹。

世祖孝建二年，琰遣长史董腾奉慰国哀再周，拜献方物。

大明三年，献肃慎氏枯楷矢石柶。七年，诏可车骑大将军开府仪同三司，持节都督如故。太宗泰始中、后废帝元徽中，贡献不绝。

《百济传》：义熙十二年，以百济王余映为使持节都督百济诸军事、镇东将军、百济王。高祖践阼，进镇东大将军。少帝景平元年，映遣长史张咸贡献。元嘉二年，太祖遣使慰劳。其后每岁遣使献方物。七年，百济王余毗复修贡职，以映爵号授之。二十七年，上书献方物，表求易林式占腰弩，太祖并与之。毗死，子庆立。世祖大明元年，遣使求除授，诏许。太宗泰始七年，又遣使贡献。

《倭国传》：高祖永初二年，诏曰：倭赞万里修贡，远诚宜甄，可赐除授。太祖元嘉二年，遣司马曹达奉表献方物。弟珍立，遣使贡献，自称使持节都督倭、百济、新罗、任那、秦韩、慕韩六国诸军事、安东大将军、倭国王。诏除安东将军、倭国王。珍又求除正倭随等十三人平西征虏辅国将军号，诏并听。二十年，倭国王济复遣使贡献，复以为安东将军、倭国王。二十八年，加使持节都督倭、新罗、任那、加罗、秦韩、慕韩六国诸军事，安东将军如故。拜除所上二十三人军郡。济死，子兴遣使贡献。世祖大明六年，诏授安东将军、倭国王。兴死，弟武立。自称使持节都督倭、百济、新罗、任那、加罗、秦韩、慕韩七国诸军事、安东大将军，倭国王。顺帝升明二年，遣使上表。曰：东征毛人五十五国，西服众夷六十六国。渡平海北九十五国，而句骊无道，图欲见吞，虔刘不已，欲练甲治兵，申父兄之志。若以帝德覆载，摧此强敌，克靖方难，无弃前功。窃自假开府仪同三司，其余咸假授以劝忠节。

建元三年七月，上使后军参军车僧朗于魏。甲子，僧朗至平城。宋升明中，遣使者殷灵诞、荀昭先如魏。闻上受禅，灵诞谓魏典客曰：“宋魏通好，忧患是同。宋今灭亡，魏不相救，何用和亲。”及刘昶入寇，灵诞请为昶司马。不许。九月，魏阅武于南郊，因宴群臣，置车僧朗于灵诞下，僧朗不肯就席曰：“灵诞昔为宋使，今为齐民，乞魏主以礼见处。”灵诞遂与相忿詈。刘昶赂宋降人解奉君，于会刺杀僧朗。魏人收奉君诛之，厚送僧朗之丧，放灵诞等南归。

永明元年七月，魏使假员外散骑常侍李彪来聘。八月庚申骁将军王洪范自柔然还，经途三万余里。十月丙寅遣骁骑将军刘缵使于魏，魏主客令李安世主之。魏人出内藏之宝，使贾人鬻之于市。缵曰：“魏金玉大贱，当山川所出。”安世曰：“圣朝不贵金玉，故贱同瓦砾。”缵初欲多市，闻其言，内惭而止。

永明二年五月，魏遣员外常侍李彪等来聘。十月高丽王琰遣使入贡。十二月庚申，魏遣李道固等来聘。

永明三年六月，遣给事中邱冠先使河南，并送柔然使。十月辛酉，魏员外散骑常侍李彪等来聘。

是岁，柔然部真可汗卒，伏名敦可汗立，改元太平。

永明四年，氐王杨后起卒。丁未，诏以白水太守杨集始为北秦州刺史、武都王。

五年五月甲午，以宕昌王梁弥承为河凉二州刺史。

永明七年八月乙亥，魏遣员外散骑常侍邢产等来聘。十二月，平南参军颜幼明聘于魏。

永明八年四月，魏遣兼员外散骑常侍邢产等来聘。

永明九年二月，散骑常侍裴昭明、散骑侍郎谢竣如魏，吊冯太皇太后之丧，欲以朝服行事。魏主客曰：吊有常礼，何得以朱衣人凶庭？以衣帛给昭明等使服以致命。己丑，引昭明等人见，文武皆哭尽哀。

三月甲戌，魏员外散骑常侍李彪等来聘，为之置宴设乐，彪辞乐。彪凡六奉使，上甚重之，将还，上亲送至琅邪城，命群臣赋诗以宠之。

十一月乙亥，魏假通直散骑常侍李彪等来聘。

十二月，初，林邑王范阳迈世相承袭，夷人范当根纯攻夺其国，遣使献金簪等物，诏以当根纯为缘海诸军事、林邑王。

永明十年正月，散骑常侍庾荜聘于魏，魏主使侍郎成淹等引荜等于馆南行礼。

五月甲戌，魏遣兼员外散骑常侍宋升等来聘。

是月，柔然伏代库者可汗立，改元大安。

十二月，司徒参军萧琛、范云聘于魏。

是岁林邑王范阳迈之孙诸农，率种人攻范当根纯，复得其国。诏以诸农为都督缘海诸军事、林邑王。

永明十一年正月，魏遣员外散骑常侍邢峦等来聘。

隆昌元年二月，司徒参军刘等聘于魏。

《南齐书》：

太祖建元三年，高丽王高琬遣使贡献，乘舶泛海，使驿常通。

隆昌元年，高丽王乐浪公高云为征东大将军。

建武二年，百济王牟大遣使上表。

建元元年，加罗国王牟知使来献。

建元元年，进倭国王武为镇东大将军。

建元元年，将军王世武使芮芮。

建元元年，河南王拾寅遣使来献，诏升号，遣将军王世武拜授，别牒锦采丝紫碧绛黄青等绫各十匹。

建元二年、三年，芮芮主(即柔然)频遣使贡献貂皮杂物与上书，欲伐魏虏，谓上“足下”，自称“吾”。(按书称足下可证非贡献，乃聘。)

建元三年，河南王世子易度侯为使持节、都督西秦河沙三州诸军事、领护羌校尉、西秦河二州刺史、河南王。

永明二年，扶南国王闍耶跋摩遣使上表。

永明六年，宕昌王梁弥机使求军仪及伎杂书。

永明九年，林邑人范当根纯立为王，遣使贡献。

永明十年，林邑王范诸农为使持节督缘海诸军事、安南将军、林邑王。

《齐书高丽传》：宋末高丽王乐浪公高琬为使持节都督营平二州诸军事、车骑大将军、开府仪同三司。太祖建元元年，进号骠骑大将军。三年，遣使贡献，乘舶泛海，使驿常通。亦使魏虏，然强盛不受制。虏置诸国使邸，齐使第一，高丽次之。永明七年，平南参军颜幼明、冗从仆射刘思使虏。虏元会与高丽使相次。幼明谓伪主客郎裴叔令曰：“我等衔命上华，来造卿国，所为抗敌，在乎一魏，在除外夷，理不得望我黠尘。况东夷小貊，臣属朝廷，今日乃敢与我蹶踵？”思谓伪南部尚书李思

冲曰：“我圣朝处魏使，未尝与小国列，卿亦应知。”思冲曰：“实如此。但主副不得升殿耳。此间坐起甚高，足以相报。”思曰：“李道固昔使，正以衣冠致隔耳，魏国必纓冕而至，岂容见黜。”幼明又谓虜主曰：“二国相亚惟齐魏，边境小狄，敢躐臣踪。”高丽俗服穷袴，冠析风一梁谓之幘，知读五经，使人在京师。中书郎王融戏之曰：“服之不衷，身之灾也，头上定是何物？”答曰：“此即古弁之遗像也。”高琫年百余岁卒。隆昌元年，以高丽王乐浪公高云为使持节散骑常侍、都督营平二州诸军事、征东大将军、高丽王、乐浪公。

大同二年十二月壬申，魏请通和，诏许之。

三年五月，东魏遣兼散骑李谐来聘，以吏部侍郎卢元明、通直侍郎李业兴副之。七月谐等至建康，上引见，与语，应对如流。谐等出，上目送之，谓左右曰：“朕今日遇劲敌，卿等尝言北间全无我物，此等何自而来？”时南北通好，务以俊义相夸，衔命接客，必尽一时之选，无才地者，不得与焉。每梁使至邺，邺下为之倾动，贵胜子弟，盛饰聚观，礼赠优渥，馆门成市。宴日，高澄常使左右觐之。一言制胜，澄为之拊掌。魏使至建康，亦然。

十二月，遣散骑常侍张皋等聘于东魏。

大同四年五月甲戌，东魏遣散骑侍郎郑伯猷来聘。十月，散骑常侍刘孝仪等聘于东魏。

五年十一月乙亥，东魏使散骑常侍王元景、魏收来聘。

大同六年七月丁亥，东魏使散骑常侍李象等来聘。

大同七年二月乙巳，以梁弥定为河、凉二州刺史、宕昌王。

五月遣兼散骑常侍明少遐等聘于东魏。

十二月，东魏遣兼散骑常侍李骞来聘。

大同八年四月丙寅，东魏使兼散骑常侍李绘来聘。

十二月辛亥，东魏使遣散骑常侍杨斐来聘。

大同九年八月，东魏遣散骑常侍李浑等来聘。

大同十年五月，东魏遣散骑常侍魏季景来聘。

大同十一年正月，东魏遣散骑常侍李奖来聘。

十月乙未，东魏遣中书舍人尉瑾来聘。

中大同元年七月，东魏遣散骑常侍□□来聘。

太清元年四月，东魏遣散骑常侍李系来聘。

《魏书·萧衍传》：先是益州傅和以城降衍，衍资送和，令申意于齐献武王，求通交好。王志绥边远，乃请许之。天平四年冬，衍遣其散骑常侍张皋，通直散骑刘孝仪，崔晓朝贡。二年夏，又遣散骑常侍沈山卿、通直散骑常侍刘研朝贡。兴和二年春，又遣散骑常侍柳豹、通直散骑常侍刘景彦朝贡。其年冬，又遣散骑常侍陆晏子、通直常侍沈景徽朝贡。三年夏，又遣散骑常侍明少遐、通直郎谢藻朝贡。四年春，遣散骑常侍袁甲、通直散骑常侍贺文发朝贡。其年冬，遣散骑常侍刘孝胜、通直散骑常侍谢景朝贡。武定元年夏，遣散骑常侍沈众、通直散骑常侍殷惠卿朝贡。其年冬，又遣散骑常侍萧确、通直常侍陆缅朝贡。三年秋，遣散骑常侍徐君房、通直常侍庾信朝贡。四年夏，遣散骑常侍萧搓、通直散骑常侍贺德朝贡。五年春，遣散骑常侍谢兰、通直常侍鲍至朝贡。朝廷亦遣使报之。六年，司徒侯景反，遣使通衍，惑其游说，遂绝贡使。慕容绍宗、高岳等大破衍众寒山。衍既惭愧悔，复遣使羊珍、孙款关乞和，并修吊书于齐文襄王。文襄王欲以威德怀之。许其通而不复书。衍于是遣其散骑常侍谢班、通直常侍徐陵朝贡。班等未及还，而侯景举兵袭衍。

《梁书》：

天监九年，林邑王范天凯遣使献方物。

天监十二、十三年，累遣使献方物。子弼摩奉表贡献。

普通七年，林邑高式胜遣使贡献。

中大通二年，行林邑王高式律陀罗跋摩遣使贡献。

中大通六年，高式律又遣送珊瑚佛像。

天监二年，扶南王侨陈如阇邪跋摩遣使贡献。

天监十三年，遣使贡献。其年死，庶子留陀跋摩立。

天监十六年，遣使奉表贡。

天监十八年，遣使送天竺旃檀瑞像、婆罗叶，并献火齐珠、苏合等香。

中大通二年，并遣使贡献。

大同五年，复遣使献生犀。

大通元年，盘盘国王遣使奉表。(有曰“常胜天子足下”)

中大通元年，遣使贡牙像及塔。

中大通六年，遣使送菩提国真舍利及灵塔。

中大通二年，丹丹国王遣使奉表送牙象及塔并献火齐珠、吉贝、杂香药等。

大同元年，遣使献金银、琉璃、杂宝、金药等。

天监元年，干陀利国王遣使奉表献玉盘等物。

天监十七年，干陀利国王毗邪跋摩遣使奉表。

普通元年，干陀利国复遣使献方物。

天监十四年，狼牙修国王婆伽达遣使奉表。

天监十六年，婆利国王陈如遣使奉表献金席等。

普通三年，婆利国王频伽遣使贡白鹦鹉、青虫、兜鍪、琉璃器、吉贝、螺杯、杂香药等数十种。

天监初，中天竺王屈多遣长史奉表，献琉璃唾壶、杂香、吉贝。

大通元年，狮子国王伽叶伽罗诃梨邪使奉表。

天监七年，诏高丽王乐浪公云，贡驿相寻，可抚东大将军、开府仪同三司、持节、常侍、都督、王，并如故。

天监十一年及十五年，累遣使贡献。十七年，云死，子安立。

普通元年，诏高丽王安纂袭封爵。七年，安卒，子延立。遣使贡献，诏袭爵。

中大通四年，六年，大同元年，七年，累奉表献方物。

天监元年，进百济王牟大车骑大将军。

普通元年，百济王余隆遣使奉表。

中大通六年，百济王明累遣使献方物。

大同七年，百济王复遣使献方物。

普通二年，新罗王莫泰始遣使随百济献方物。

天监十三年，河南王休运筹遣使献金装玛瑙钟二口。

天监十五年，遣使献赤舞龙驹及方物。其使或每岁再三至，或再岁一至。其地与益州邻，常通商贾。民慕其利，多往从之。

普通元年，河南王遣使献方物。

大通三年，河南王诃罗真为西秦河二州刺史。

大同中，高昌王曲坚圣遣使贡盐、枕蒲、陶甃甃等物。

天监十五年，滑国王夷栗陀遣使献方物。

普通元年及七年，周古柯国遣使随滑国献方物。

普通三年，阿跋檀、胡密丹、白题等国遣使献方物。

普通二年，龟兹王遣使奉表贡献。

天监九年，于阗国王遣使贡献

中大同元年，渴盘陀国遣使献方物。

普通五年，且末国遣使贡献。

中大通二年，波斯遣使贡献。

天监四年，宕昌王梁弥博来献甘草、当归。

天监五年，邓至王舒彭遣使献黄耆。

天监十四年，芮芮遣使献乌貂裘。

普通元年，芮芮遣使献方物。是后数岁一至。

《梁书·林邑传》：天监九年，范文质子(林邑王范文质)天凯奉献白猴。诏曰：“林邑王范天凯介在海表，乃心王室，远修职贡，良有可嘉。宜班爵号，被以荣泽。可持节督缘海诸军事，威南将军，林邑王。”十年、十三年，天凯遣使贡方物。俄而病死，子弼毳跋摩立，奉表贡献。普通七年，王高式胜凯遣使贡献方物。诏以为持节都督缘海诸军事、绥南将军、林邑王。大通元年，又遣使贡献。中大通二年，行林邑王高式律陀罗跋摩遣使贡献。诏以为持节都督缘海诸军事、绥南将军、林邑王。六年，又遣使贡献。

天嘉元年三月，初，高祖遣毛喜侍安成王顓诣江陵，梁世祖以喜为侍郎，没于长安，与衡阳王昌俱还，因进和亲之策。上使侍中周弘正通好于周。

天嘉二年六月，周使御正殷不害来聘。十一月，周人许归安成王顓，使司会上土杜杲来聘，上悦，即遣使报，并以黔中地及鲁山郡归周。

天嘉三年闰月，上遣书寿阳，欲与齐和亲，行台尚书卢潜以其书奏齐朝，仍上启请且息兵。齐主许之，遣散骑常侍崔瞻来聘，且归南康愍王昙朗之丧。

二月丙子，安成王顓至建康，上曰：“家弟今蒙礼遣，实周朝之恩。然鲁山不返，亦恐未能及此之。”杲对曰：“安成，长安一布衣耳，而陈之齐弟也，其价岂止一城而已。□朝敦睦九族，恕已及物。上遵太祖遗旨，下申继好之义，是以遣之南归。今乃云□□常之土，易骨肉之亲，非使臣之所敢闻。”上甚惭曰：“前言戏之耳。”待杲之礼有加。顓妃柳氏及子叔宝犹在穰城，上复遣毛喜如周请之。周人皆归之。

四月，齐遣使来聘。

七月，上遣使聘齐及周。

十月丁丑，齐遣兼散骑常侍封孝绰来聘。

天嘉四年，齐主使散骑常侍崔子武来聘。十月，遣使聘周。

天嘉五年四月，齐使兼散骑常侍皇甫亮来聘。

庚子周主遣使来聘。

九月，遣使聘周。

天嘉六年六月，齐主使兼散骑常侍王季高来聘。十一月，遣使聘周。

天康元年正月，周遣小载师杜杲来聘。

十一月，周遣使来吊。

光大元年四月，齐遣敬骑常侍司马幼之来聘。

光大二年正月，齐使兼散骑常侍郑大护来聘。

十一月，齐遣散骑常侍李谐来聘。

太建元年十二月，自华皎之乱，与周人绝。至是，周遣御正大夫杜杲来聘，请复修旧好。上许之，遣使如周。

太建二年正月，齐使兼散骑常侍裴猷之来聘。

太建三年正月，齐使兼散骑常侍刘环俊来聘。

五月，周使纳言郑诩来聘。

建德元年七月，遣使如周。

十月，周遣小匠师杨勰齐驭唐则来聘。

太建五年正月，齐遣崔象来聘。

九月，遣使聘周。

太建六年十月，周遣御正杨希，礼部卢恺来聘。

太建七年十二月，(即周建德四年)遣使聘周。

八月，周遣使来聘。

太建十三年四月，使散骑常侍韦鼎等聘于周。

辛丑，至长安，隋已受禅，隋主致之介国。

十一月，隋遣兼散骑侍郎郑来聘。

太建十四年正月甲寅，高宗殂。丁巳，太子叔宝即位。戊辰，遣使请和于隋，归其胡墅。

二月己丑，隋主诏高颍等班师。

六月，隋遣使来吊。

至德元年二月，遣散骑常侍贺彻等聘于隋。三月，隋遣兼散骑常侍薛舒、王劼来聘。

十一月，遣散骑常侍周冢，通散骑常侍袁彦聘于隋。帝闻隋主状貌异人，使彦书像而归。帝见大骇曰：“吾不欲见此人，亟命屏之。”

十二月己卯，隋遣兼散骑常侍曹冷则、通直散骑常侍魏澹来聘。

至德二年，遣散骑常侍谢泉等聘于隋。

八月，将军夏侯苗请降于隋，隋以通和，不纳。

十一月，隋主遣散骑常侍薛道衡等来聘，戒道衡当识朕意，勿以言辞相折。

至德二年七月，遣散骑常侍王华等聘于隋。九月，隋使李若等来聘。

至德三年四月己亥，遣周礪等聘于隋。八月，隋遣散骑常侍裴豪等来聘。

贞明元年二月，遣散骑常侍王亨等聘于隋。四月，隋遣兼散骑常侍杨同来聘。

八月，梁主叔父太傅安平王岩弟、荆州刺史献等遣使诣荆州刺史陈慧纪请降，九月庚寅，慧纪引兵至江陵城下，辛卯，岩等驱文武男女十万口来奔。

十一月丙子，以萧为东扬州刺史，萧□为吴州刺史。

初，隋主受禪以来，与陈邻好甚笃。

祯明二年正月，遣散骑常侍袁雅等聘于隋。

三月隋遣兼散骑常侍程尚贤等来聘。

戊寅隋主下诏来伐，暴帝二十恶，仍散写诏书三十万纸，遍谕江外。

天祐五年，吴遣将军万全感赍书诣晋及岐，告以嗣位。

七年二月，万全感自岐归。王承制兼中书令，嗣吴王。

十四年，遣使遗火油于契丹。

吴宣王武义元年七月，大封王入贡。八月，归无锡之俘于吴越，欧阳江往修好。吴越亦遣使请好。

吴睿帝顺义元年，王遣使劝晋王称帝。

三年十月，唐帝致书用敌国礼，来聘者为引进副使王彦询。王遣司农卿卢苹献金器二百两，银器三千两，罗锦一千二百尺于唐。又遣使张景祖聘，称大吴国主上书大唐皇帝，词礼如笺表。

十二月，复遣卢苹献下礼物于唐。上皇太后金花、银器、衣缎。

四年，遣左卫上将军许确进贺郊天银绮。

十二月，遣贺正使王权进唐金花、银器、锦丝、缎绉及太后礼物。

十二月，与吴越绝，以国名同。

六年二月，遣右骁卫将军苏虔献金花、银器、锦绮于唐。五月辛卯，诏为同光帝辍朝七日。

乾贞元年四月，遣雷绮进白金、罗绮于唐，修重午之礼。

五月，南平王高季兴请举镇来附，听称藩于唐。

九月，遣如唐献应寿节。

乾贞二年二月，遣通事舍人刘传忠使于唐。

唐臣安重诲以我国非礼，遂绝。

五月，与楚和。

六月，南平王高季兴复请称臣，进季兴秦王。

十二月，秦王高季兴薨，以其子从诲为荆南节度使。

大和二年三月，高从诲遣使告绝。

六年正月，遣使求好于闽。

南唐升元元年，吴主禅位于齐。

十月庚子，遣使如汉、闽、吴越、荆南，告即位。

升元二年正月甲子，荆南使庞有规来贺即位。

二月壬戌，闽使朱文进来贺即位。

四月己未，汉使邹禹谟来贺即位。

五月，高丽来聘，宴其使于崇英殿。

三年二月乙卯，改齐为唐。

己卯，契丹使昌鲁来齐，以兄事帝；蜀使来贺即位。

四年三月，汉人、闽人来聘。

九月，契丹来聘，致狐白裘。

十二月，契丹献马百匹。

五年四月，聘契丹，假道于晋，不能达而返。

汉遣使约伐楚，中分其地，帝不许。

十一月，于阗贡瑞玉。

六年正月，闽使林弘嗣来聘。

六月，汉使萧规来告哀，废朝三日。

契丹来聘献马。

七年正月，契丹使达杂干等来聘。

保大六年三月，闽使来吊祭。

是岁，使公乘航海使契丹。

二年三月，闽朱文准自称闽王，遣使来告。

保大五年正月，契丹以入晋告捷，且请会盟于境上。辞不赴，遣工部郎中张翼聘之。

保大六年遣汉主书，请通商。

八年十月，吴越归查文徽。

九年二月，马希颢来贡。

十一月，迁马希颢及马希崇于金陵。

十年二月，周人以我助叛，有责言。帝命先得中国人，皆礼而归之。

保大十二年正月，遣使援慕容彦超，至淮北，为舟师所败，俘我将校，已而释之归。

七月，契丹使修好，夜宴清风驿，盗斩其首，亡去。自是契丹不至。

十三年六月，周入侵秦凤，蜀遣使来告难。

十四年二月，周师破滁州，遣泗州牙将王知朗奉书至徐州求成，不报。

己卯，遣户部侍郎锺谔、工部侍郎孙晟使周，奉表至下蔡，称臣奉贡，并犒军。

三月，复遣孙晟等使周，请比两浙、湖南；奉正朔，进金千两，银十万两，罗绮二千匹，犹未许。

交泰元年三月壬辰，周耀兵京口。遣枢密使陈觉奉表贡方物，请传位太子弘，冀国为附庸。周主始采唐回纥故事，答我玺书，敬问江南国主，帝遣合门承旨刘承遇上表，称唐国主。尽献江北郡县之未陷者，鄂州汉阳、汉川二县，在江北者亦割献，岁输土贡数十万两。

庚子，周贻书于我，允奉正朔，罢兵，而止其传位。

甲辰，遣同平章事冯延巳等使周，献银绢钱谷共百万以犒，及买宴表。

显德五年闰月己酉，始命太仆卿冯延鲁，卫尉少卿锺谔使于唐，赐以御衣玉带等，及犒军帛十万，并今年钦天历。刘承遇之还至金陵。

建隆元年正月乙巳，赐书南唐。

二月丙辰，南唐主李景遣使以御服锦绮金帛来贺。

十月乙丑，南唐进白金，贺平泽、潞。

丁卯，南唐进贡乘舆御服物。

十一月戊申，扬命诸军习战舰于迎銮，南唐主惧甚。其臣杜著、薛良，帝疾其不忠，斩著下蜀市，配良卢州牙校。

乙卯，南唐主遣使犒师。庚申，遣其子从镒来朝。

二年二月丁丑，南唐进长春节御衣金带及金银器。

三月壬辰，南唐谢赐生辰金器罗绮。

八月，南唐主李景卒，子煜嗣，请追尊帝号。从之。

三年三月乙亥，赐南唐主生日礼物。

五月，诸道邮传以军率遁。

七月庚申，南唐遣其臣翟如璧谢赐生辰礼物，贡金银锦绮方物。

壬戌，放南唐弱卒千人归国。

十一月丙寅，南唐遣其臣顾彝入贡。

乾德元年，正月己未，遣使赐南唐橐驼羊有差。

十一月，南唐进贺南郊尊号银绢万计。

十二月己巳，南唐主上表，乞呼名，不允。

二年二月甲戌，南唐进改葬安陵银绢各万计。

六月，始于江北置折博务，禁商旅过江。

十一月壬寅，遣魏丕如江南，吊祭周昭惠后。

甲子，南唐主遣使来修贡。

十二月，南唐贡银二万两，金银器皿数百事。

三年二月癸卯，南唐进献长春节。

四年五月，南唐贺文明殿成。

十月，遣染院副使李光嗣如江南吊祭。

辛酉，诏以江南游饥，许百姓过江樵采。

开宝元年五月，赐南唐米麦十万斛。

四年四月辛卯，南唐主遣其弟从谏来朝贡。

十一月癸巳朔，南唐主遣其弟从善以郊祀来朝，乞去国号，呼名。从之。

五年二月，上既平广，渐欲经理江南，因郑王从善入贡，遂留之。

闰二月癸巳，以江南进奉使李从善为泰宁节度使，赐第京师。上使李从善致书江南国主，调入朝。国主不从，但增岁贡而已。

六年四月，遣卢多逊为江南国主生辰国信使。多逊至江南，得其臣主欢心。及返，舣舟宣化口，使人白国主曰：“朝庭重修天下图经，独江东诸州，原各求一本以归。”主亟令缮写，命中书舍人徐锴等通名讎校送与之。多逊乃发。

六月，江南国遣常州刺史陆昭符入贡。

七年九月，遣左拾遗李穆使江南，谕国主入朝。国主称疾固辞，且言谨事大国者，盖报全济之恩；今若此，有死而已。江南国主复遣其弟江国公从鉴、水部郎中龚慎修重币入贡，且买宴。皆留之。不报。

九月癸亥，命义成军节度使曹彬等伐江南。

十月甲申，江南进绢数万，御衣金带器用数百事。

十二月，金陵始戒严，下令去开宝之号，公私籍记，但称开宝年。

八年十月，润州平，外围愈急。国主始谋遣使入贡，求缓兵，募民为兵。民以财及粟献者，官爵。

十一月乙未，金陵城陷，曹彬整军至于宫城，国主乃奉表降。

十二月己亥，江南捷书至，凡得州十九，军三，县一百有八，户六十五万五千六十有五。

《宋史·食货志》：宋初循周制，与江南通市。乾德二年，禁商旅毋得渡江，于建安、汉阳、蕲口置三榷署，通其交通贸易。内外群臣辄遣人往江浙贩易者，没入其货。缘江百姓及煎盐亭户，恣其樵渔。所造屨席之类，榷署给券，听渡江贩易。开宝三年，徙建安榷署于扬州。江南平，榷署虽存，止掌茶货。

政和中，置务设官于华亭县。后江浦湮塞，蕃舶鲜至，止令县官兼掌署。

《吴郡图经续记》：

近岁高丽人来，圣朝方务绥远，于城中辟怀、远二亭，及盘、阊之外，各建大馆，为宾饯之所。

高丽人来朝，过郡，郡有燕劳，其从者皆坐于廊下。此而不葺，非所以革弊示远。元丰六年，太守朝议大夫章帖以是说谋于转运使，得羡钱二百万，又以公使钱助之。于是易以修廊，覆以重屋，费省功速，明年春，落成。

熙宁四年五月，通州言，高丽使民官侍郎金悌入贡，至海门县。诏集贤校理陆经假知制诰馆伴，左藏库副使张诚一副之。

熙宁九年九月乙卯，权发遣两浙转运使苏瀚言：秀州华亭县(元明清均属松江府)有外国幸建等二十人至青墩南阳，语难辨问。令书字与中国同，称高内国，语音略同高丽。及将文字仿佛辨认：因乘船遇风，漂泊海岸；止说金堤水军队纳米事务。诏秀州始参验，实非奸细。即居于官舍，给食。候有本国入朝，取旨。其后王徽使至，因赐帛遣归。

《宋史·高丽传》：往时高丽人往反皆自登；七年，遣其臣金良鉴来言，欲远契丹乞改由明州诣阙。从之。按《长编》：熙宁四年，高丽使悌已至通州之海门，则已改道。又史传言：政和以来，人使岁至，淮浙之间苦之。盖由明而杭、湖、秀至苏州而常、润，过江达扬、楚而泗、汴，循李翱南《吴郡图经续记》：州宅高丽人来朝过郡，郡有燕劳，其从者皆坐于廊，此而不葺，非所以革弊示远。近岁高丽人来贡，圣朝方务绥远，又于城中辟怀安流二亭，及盘阊之外，各建大馆，为宾饯之所。政和中，置务，设官于华亭县。后江浦湮塞，蕃舶鲜至。至是，复置官专领。(宣和元年)

《日本传》：乾道元年，始附明州纲首，以方物入贡。淳熙十年，日本七十三人复飘至秀州华亭县，给常平义仓钱米以赈之。绍熙四年，泰州及秀州华亭县，复有倭人为风所泊而至者，诏勿取其货，出常平米赈而遣之。庆元六年，至平江府，诏给钱米遣归国。

《攻愧集·北行日记》：乾道五年十月九日辛卯，邸报，仲舅侍郎充贺正使，曾总管觐副之。十日壬辰，蔡兴以仲舅书来，辟充书状官。十一月二日，同去伪习仪都亭驿。八日，发行李上船。十二日，过永乐，行二十七里，至秀州。十三日，行六十里，过平望。行四十五里，过吴江。又行四十五里，至平江，船由城外至阊门。一夕行九十里。十四日早，到无锡，行九十里，深夜去昆陵数里泊。十五日，晤苏李别于荆溪馆。行十里过船，三十六里过奔牛。又十八里，过吕城。夜行五十四里，过丹阳县。十六日，行二十七里，小泊新丰。又二十七里，过丹徒镇。行三十六里，到镇江。以水涩良久抵丹阳馆。十八日四更，天微明，即从使副到江干，先登舟，薄暮至扬。水涩，更余方出城。十九日，四更行，辰时至邵伯埭(去扬州才四十五里)。行三十里，过露筋。二十里，夜过塘头。二十日，三十里，过界首。二十五里，过泛水。三十五里，至宝应。三十里，过黄蒲。二十里，过平柯桥。二十一日到楚州。入城，登熙台。三十里，过磨磬。三十里，夜过淮阴。三十里，过闻家峰。二十二日，三十里到洪泽。三十里过渎头，使副上庙，张挂幡。又过数里，舟胶而止。二十三日，东北风大作，过欧家渡，去渎头十五里，一行人欢呼而行，且感神祝。行十五里，以风大，不可出淮，泊山下。二十四日出淮。三十里，至盱眙，泊燕馆下。二十五日，游第一山玻璃泉，冰不可酌，遍观磨崖古刻。二十八日，掌

仪引接等渡淮，传衔。少顷，同北引接礼信司高琚等传到接伴使副名衔，正使昭武大将军行尚书吏部郎中上轻车都尉彭城郡开国伯食邑七百户唐括安德，副使朝奉大夫侍御史骑都尉广德县开国男食邑三百户赐紫金鱼袋高德裕。使副坐燕馆，须其至，犒三杯而去。移舟燕亭上。二十九日，天明，雪作。使副以下巳时渡淮，至泗州草馆，望拜如仪，各就幕次。

元世祖至元十四年，立上海市舶司。帝既平江南，凡邻海诸郡，与番国往还。互易舶货者，其货以十分取一，粗者十五分取一，以市舶官主之。其发舶回帆，必著其所至之地，验其所易之物。大抵皆沿宋旧制而为之法。立司舶司三于庆元、上海、澈浦。每岁招集舶商于番邦博易珠翠香货等物，及次年回帆，依制抽解，然后听其货买。时客舡自泉、福贩土产之物者，所征亦与番货等。上海市舶司提控王枬以为言，于是定双抽单抽之法。双抽者，番货也，单抽者，土货也。

十五年十月，诏谕沿海官司，通日本市舶。

三十年四月，定市舶抽分杂禁。行大农燕公枬、翰林学士承旨留梦炎言：“泉州、上海、澈浦、温州、庆元、广东、杭州置市舶司，凡七所。上海等皆十五取一，独泉州三十分取一。自今诸处以泉州为定制”。从之。

八月，定市舶法则二十二条。

大德元年，并澈浦、上海入庆元市舶提举司，直隶中书省。

洪武二年，占城、安南入贡。

十月，遣使贻元帝书。

三年十二月癸亥，复贻元嗣君书。

占城、爪哇、西洋入贡。

四年，安南、渤泥、高丽、三佛齐、暹罗、日本、真腊入贡。

五年十二月，贻元嗣君书。

琐里、占城、高丽、琉球、乌斯藏入贡。高丽再至，谕自后三年一贡。

六年，暹罗、高丽、占城、真腊、三佛齐入贡。命安南陈叔明权知国事。

七年，遣崇礼买的里八剌归，遗元嗣君书。

阿难功德国、暹罗、琉球、三佛齐、乌斯藏、撒里、畏兀儿入贡。

八年，撒里、高丽、占城、暹罗、日本、爪哇、三佛齐入贡。

九年，览邦、琉球、安南、日本、乌斯藏、高丽入贡。

十年，占城、三佛齐、暹罗、爪哇、真腊入贡。高丽五至，以嗣王未立，却之。

十一年，阇婆、暹罗、高丽、琉球、占城、三佛齐、朵甘、乌斯藏、彭亨、百花入贡。

十二年，占城、爪哇、暹罗、日本、安南、高丽入贡。高丽贡黄金、白金万两，以不如约，却之。

十三年，琉球、日本、安南、占城、真腊、爪哇入贡，日本以无表却之。

十四年，暹罗、安南、爪哇、朵甘、乌斯藏入贡。以安南寇思明，不纳。

十五年，爪哇、琉球、乌斯藏、占城入贡。

十六年，琉球、占城、暹罗、须文达那入贡。

十七年，琉球、安南、暹罗入贡。

十八年七月甲辰，封王里禡为高丽国王。

高丽、琉球、暹罗、安南入贡。

十九年，高丽、琉球、暹罗、占城、安南入贡。

二十年，琉球、安南、高丽、占城及真腊、乌斯藏入贡。

二十一年，高丽、占城、琉球、暹罗、撒马儿罕、安南入贡。诏安南三岁一朝，犀象之属无献。

二十二年，高丽、安南、占城、暹罗、真腊入贡。

二十三年，墨刺哈、梅里、高丽、占城、真腊、琉球、暹罗入贡。

二十四年，琉球、暹罗、别失八里、撒马儿罕入贡。以占城有篡逆事，却之。

二十五年九月，高丽李成桂幽其主瑤而自立，以国人表来请命，诏听之，更其国号曰朝鲜。

二十五年，琉球、高丽、哈里入贡。

二十六年，琉球、爪哇、暹罗入贡。

二十七年，乌斯藏、琉球、缅甸、爪哇、撒马儿罕入贡。安南来贡，却之。

二十八年，朝鲜、琉球、暹罗入贡。

二十九年，琉球、安南、乌斯藏入贡。

三十年，琉球、占城、朝鲜、暹罗、乌斯、泥八剌入贡。

十月，停辽东海运。

三十一年四月，廷臣以朝鲜屡生衅隙，请讨。不许。

暹罗、占城入贡。

永乐元年二月，赐书鬼力赤可汗，许其遣使通好。

乙丑，遣使征尚师哈立麻于乌斯藏。

八月，遣中官马彬使爪哇诸国。

十一月朔，颁历于朝鲜诸国，著为令。

闰月，封胡为安南国王。

朝鲜入贡者六，自是岁时贡贺为常。琉球、暹罗、占城、爪哇、日本、刺泥、安南入贡。

二年，占城、别失八里、琉球、爪哇、真腊、暹罗、日本、琉球入贡者再。

八月，安南国王陈日烺弟天平来奔。

三年正月，遣使责谕安南。

六月，中官郑和帅舟师使西洋诸国。

庚寅，胡烺谢罪，请迎陈天平归国。

十二月，命都督佥事黄中等以兵纳陈天平于安南。

是年，苏门答刺、满刺加、古里、渤泥来贡。

四年三月，胡袭杀陈天平于芹站，黄中等引兵还。

是年，暹罗、占城、于阗、渤泥、日本、琉球、中山、山南、娑罗入贡。爪哇、东西真腊入贡者再。别失八里入贡者三。琉球进阉人，还之。回回结牙曲进玉碗，却之。

五年六月癸未，以安南平，诏天下，置交趾布政司。

九月，郑和还。

是年，琉球娑罗、日本、别失八里、阿鲁、撒马儿罕、苏门答腊、满刺加、小葛兰入贡。

六年，渤泥国王来朝。瓦剌、占城、于阗、暹罗、撒马儿罕、榜葛刺、冯加施兰、日本、爪哇、琉球入贡。

七年六月辛亥，给事中郭骥使本雅失里，为所杀。

是年，满刺加、哈烈、撒马儿罕、火州、古里、占城、苏门答腊、琉球入贡。暹罗、榜葛刺入贡者再。

八年二月辛丑，以北征诏天下。乙丑，大阅。三月甲戌，次鸣銮戍。四月庚申，次威虏镇。五月丁卯，更名胘胸河曰饮马河。追之己卯及于斡难河，大破之。本雅失里遁。丙戌还，次饮马河。诏移师征阿鲁台，大败之。六月己酉，班师。七月丁卯，次开平。壬午，至北京。

是年，渤泥、吕宋、冯嘉施兰、苏门答刺、榜葛刺入贡。琉球入贡者三。

九年六月乙巳，郑和还自西洋。

是年满刺加王来朝，爪哇、榜葛刺、古里、柯枝、苏门答刺、阿鲁、彭亨、急兰丹、南巫里、暹罗入贡，阿鲁台贡马、别失八里献文豹、琉球入贡者三。

十年郑和复使西洋。

是年，渤泥、占城、暹罗、满刺加、榜葛刺、苏门答刺入贡。南渤利，琉球入贡。

十一年七月，封阿鲁台为和宁王。

十一月，瓦剌马哈木兵渡饮马河，阿鲁台告警。

十二月，马哈木弑本雅失里，立答里巴为可汗。别失八里、满刺加、占城、爪哇西王入贡。琉球、中山入贡者四、琉球山南入贡者再。

十二年二月，亲征瓦剌。三月庚寅，发北京。四月甲辰朔，次兴和。六月戊申，次忽兰失温，马哈木率众来犯，大败之。追至土刺河，今日图拉河，马哈木宵遁。庚戌，班师。

是年，泥八剌国沙的新葛来朝，封为王。彭亨，乌斯藏入贡，真腊贡金缕衣，琉球贡马，榜葛刺贡麒麟。

十三年，琉球、爪哇西王、占城、古里、柯枝、南渤利、甘巴里、满刺加、忽鲁谟斯、哈密、哈烈、撒马儿罕、火州、土鲁番、苏门答刺、俺都淮、失刺思入贡。麻林及诸番贡麒麟、天马、神鹿。琉球入贡者再。

十四年三月，阿鲁台败瓦剌，来献捷。

十二月丁卯，郑和复使西洋。

十五年，西洋苏禄东西嗣王来朝。琉球、别失八里、真腊、渤泥、占城、暹罗、哈烈、撒马儿罕入贡。

十六年，暹罗、占城、爪哇、苏门答刺入贡。

十七年七月庚申，郑和还。是年，哈密、土鲁番、失刺思、亦思弗罕、真腊、占城、哈烈、阿鲁、南渤利、苏门答刺、八达黑商、满刺加入贡者再。(按永乐十八年成祖迁都北京，改为京师。十九年以后，各国朝贡者皆至京师，与南京无涉。志为苏

作，理当弗录。)

第二卷 道光

江苏巡抚陶澍奏抚恤日本漂船折(道光六年五月十五日)

为日本国夷船漂收镇洋县境，照例抚恤，拨船指引出洋回国，恭折奏闻事。据镇洋县知县郑光伟禀称：“道光六年四月十五日，经甘草司巡检禀报，十三日问炮台汛兵丁瞭见浏河口外随风驶到一船，似外夷模样，随即会同巡洋官兵往看，实系夷船。言语不通，给与纸笔，令其书写。据称系日本国人，船主源太郎，本国北地越州人，同水手喜助、藤兵、卫门大右、卫门平七、木八、曾兵、卫清三郎、小五郎、六助、平助等十人，装载昆布、烟草货物，于本年三月初四日开船往本国江州销售。因附近卖货并无牌照，放洋后，突遇大风，迷失海道，随风漂荡，见有渔船跟随行驶，于四月十三日到岸。现在船、货、人均无损失，恳求指引送出大洋。一遇西风，即可回国。随即查看该夷船人数并所装昆布、烟草，俱与所写相同。委系涉海遇风，迷失洋面，查无别故。”等情，通禀前来。当即札委太仓州知州范博文，会同营员驰往复查无异。臣查嘉庆十五年，海门厅境内曾有日本国夷人遭风坏船，因渔船拯救到境，当经委员护送至浙江乍浦口交办铜商船，附搭回国。今该国夷人源太郎等十一人，装载该国货物，因迷海道飘入内洋，恳求指引回国，自应俯顺夷情，俾资还楫。当经臣札飭该州县照例抚恤，选拔熟悉海道商船指引。并飭浏河、吴淞各营派委巡洋官兵妥为防护。令该夷人等乘坐原船，由吴淞海口出洋，早归该国，仰副圣主怀柔远人至意。现据宝山县等报称，该夷船由浏河开行，于五月初二日已抵吴淞海口寄泊，一等风顺，即行出口等情，所有日本国夷船漂收镇洋境，护送出洋归国缘由，谨会同两江总督臣琦善恭折具奏，伏乞皇上圣鉴。谨奏。

陶澍等会奏英船驱逐开行折(道光十二年十一月二十一日)

为夷船驱逐开行，现飭舟师押赴浙洋并分别飭查防范缘由，恭折奏祈圣鉴事。窃臣等前因英吉利国夷船复至江省洋面，当将督饬晓谕缘由，附片具奏在案。臣林则徐先于接准提镇咨会时，即委候补知府善庆、太湖办副将鲍起豹驰赴海口，随同镇道，并会同上海、宝山两县，酌赏该夷人猪羊酒食，以奖其救护难民。仍剴切晓谕不准违例销货。并将难民徐胜等十二名收回，讯取确供，交保分领回籍。正在催令开行间，钦奉上谕：据国祥等奏：十月初二日，在隍城岛遥见西南海面有英吉利国夷船一只，行驶甚速。着严飭沿海州县及水师营弁管带兵丁驾驶船只，于该夷船过境，立即驱逐，不许令其停泊登岸将货物与民人交易，致令滋生事端。至米粮尤不许沿海居民私行卖给接济，等因。钦此。臣等恭录钦遵，复飭文各员妥速驱逐，并严禁沿海居民不许以米粮私卖接济。旋据禀复，海口行商铺户，因奉严谕，公立议单，同诣天后神前焚香设誓，悉皆凜遵法度，概不与夷人交易。该夷人见货不能销售，且官兵稽查森严，即粮食亦无从私买，心生畏惮。旋向营船声称：“前在洋中搭救商船，致将梢篷折损，求赏木板铁钉，赶紧修舱。一俟雨雪稍止，即当开行。”等语。当经苏松镇关天培、苏松太道吴其泰酌卖木板铁钉，催令赶修。兹据报称：

该夷船于十一月十五日起碇，挂帆乘风开行。臣等责成该镇关天培督率将弁兵船押逐南行，凜遵前奉谕旨，务令与浙省舟师明白交替，不敢稍任含混。并飞咨浙省抚臣、提臣一体押逐回粤。第夷情狡狴，或于押赴东南深水外洋之后，料知师船不能寄碇，仍复绕越过北，亦须预防。一面咨会山东抚臣分饬沿海县营严行堵截，以防窜越。至此次夷船内懂华语之夷人甲利一名，即系前次胡夏米船内夷夥。臣等以胡夏米前船窜往高丽之后，尚未得实在下落；今既认有前次夷夥，且系自北而来，则该船自即系胡夏米之船，当经移行提镇并饬府县确切查复。旋据金称：“此次夷船比胡夏米之船小至二丈有馀，檣桅亦少一道，细加查认，并非原船。因即诘询甲利从何处来？其胡夏米原船究往何处？据甲利声称，此次刘罗之船，于七月十八日自天竺国开行，原欲径赴广东，因南风甚大，吹到越南口岸。适胡夏米之船到彼相遇，胡夏米乘坐原船回去，伊即搬过刘罗船上，从直东深水大洋乘风向北。十月初间到关东盖州洋面，天寒冰冻，不能停留，随又乘风南行，复至江南”等语。查该夷人一面之词，原难凭信。即使所言属实，其为包揽指引已属显然。此次因有救护难民，希图借通贸易，今货物仍不准销，谅可杜其妄念。据称十月初间在关东盖州洋面，似即系隍城岛所见之船被逐折回，但即非胡夏米原船，则胡夏米究竟曾否回国，尚未可知。臣等现饬水师将弁押送至浙省明白交替之后，仍须在洋时加瞭探。倘复有夷船窜至，立即堵截回南。并饬沿海县营随时防范，不得以此次夷船业已开行，即为了事。一面咨会广东省查明胡夏米前船，并此次刘罗之船，果否回粤，统饬该国大班管束外，所有夷船业已押逐开行，并饬查防范缘由，谨合词恭折具奏，伏乞皇上圣鉴。谨奏。

(十二月二十日，奉上谕：陶澍等奏夷船驱逐开行，现饬舟师押赴浙洋，并分别饬查防范一折，此次英吉利夷船向营船声称，前在洋中搭救商船，致将梢篷折损，求赏木板铁钉修舱，当经苏松镇总兵关天培等酌赏木板铁钉，已于十一月十五日起碇，挂帆开行，仍着该督等责成该镇督率将弁兵船押逐南行，务令与浙省舟师明白交替，勿许含混。并著飞咨浙江省一体押逐回粤。第夷情狡狴，或于押赴东南深水外洋后，仍复绕越过北，并着飞咨山东分饬沿海县营严行堵截，以防窜入。再此次夷船比胡夏米船小至二丈有馀，檣桅亦少一道。据甲利称，胡夏米乘坐原船回去，伊即搬刘罗船上。其为包揽指引已属显然。惟既非胡夏米原船，曾否回国，尚未可定。该督等仍饬水师将弁押送浙省明白交替后，在洋瞭探。倘复有夷船窜至，立即堵截回南。并着沿海县营随时防范，仍遵前旨，不许令其停泊登岸将货物与人民交易，至米粮尤不许沿海居民私行卖给。并着咨会广东查明胡夏米及刘罗船果否回粤，统饬该国大班管束。将此谕令知之。)

又附片

英吉利夷船复来，严饬堵截情形附片。再臣等先后接据苏松镇关天培、苏太道吴其泰等转据外洋总巡署游击刘桂林禀称：十月二十八日瞭见佘山直东洋面有夷船一只行驶，前往查逐等情，该镇即带同署吴淞营参将林明瑞赶往。至高家嘴洋面，见该

夷船竖立三桅，船面载有炮械，桅上有旗一面，写天竺国商船字样。随向查询。该夷船有能说华语之人。据称天竺国系英吉利属国。船户名刘罗，在船舵水八十名。船内装载呢羽等物。并称在直东大洋见有江南遭风船只，经该夷救起水手十二名，现要送交等语。林明瑞见答话之人，认系前次胡夏米船内之夷伙甲利，即问其因何复来？又称前船已经回南，现又跟随刘罗同来，求通贸易等语。并据该夷将难民徐胜、何耿扬、姚显章、张天贵、施正芳、倪太和、宋振贵、姚大安、倪和上、滕大兴、徐五福、徐效全，共十二名，用脚船送出。讯明均系崇明县人，在周长发船上充当水手，一共十三人，因船只遭风沉溺，遇该夷搭救十二人。尚有刘连一人，见宁波船上救去。各难民供有住址。现饬确查崇明县有无周长发商船出口，交保分领。查该夷甲利本在胡夏米船上作伙之人，且船系自北而来，似即系胡夏米由奉天折回之船。据云前船已回，此另系刘罗船只，殊不可信。其所挂天竺国商船字样，亦未必非借此为更换面目之计。惟该夷因有搭救难民之事，仍恳求销货进口，其情词尚属恭顺。臣等仰体圣主柔远之至意，当饬苏松镇道等量加奖赏，仍剴切谕以天朝定例，只准在于广东贸易。俾令恪遵功令，迅速回帆。第夷情狡诈，野性难驯，难保其不借端逗留。业已分饬沿海文武员弁，于明白晓谕之中，一面整顿声威，妥为防范，不许沿海居民，私相交接，使该夷无所希冀。现据该道吴其泰禀，连日雨雪交加，风色欠利，一遇顺风，即行押送出境。臣陶澍因远在清江浦，往返需时，即由臣林则徐，会同提臣等就近督饬妥办。除俟押送交替再行具奏外，合先附片以闻，伏乞圣鉴。（道光十二年十一月二十八日，奉上谕：陶澍等奏称十月二十八日，余山直东洋面有夷船一只，竖立三桅，船面载有说华语之人。据称天竺国系英吉利属国，船内装载呢羽等物。并称在直东大洋见有江南遭风船只，经该夷救起水手十二名，现要送交等语。并称答话之人系前次胡夏米船内之夷伙甲利。据云前船已回，此另系刘罗船只，殊不可信。该夷狡诈性成，难保其不借此为更换面目之计。且船系自北而来，甫由奉天折回，又驶至江苏洋面，诚恐其又闯入他省，着奕颢、琦善、陶澍、程祖洛、钟祥、林则徐、富呢扬阿、魏元烺等，分饬沿海文武员弁，于夷船到境时，立即驱逐，不许令其停泊登岸将货物与民人交易。至该船所需水米，尤不许沿海居民私行卖给接济。只须严密防堵，断不准用炮轰击及上船搜查货物，以致滋生事端，是为切要。该夷船一抵广东，着卢坤、朱桂损、钟祥等谕以天朝制度，只应在广东交易，务须遵守定例，不准私越各省。即饬该国大班管束，饬令迅速回国。至该夷船用脚船送出徐胜等十二名，讯均系崇明县人，在周长发船上充当水手，尚有刘连一人，见宁波船上救去，着陶澍、林则徐确查崇明县有无周长发商船出口之事，据实具奏，将此各谕令知之。）

清道光二十二年，南京和约成，英人议开辟上海租界，因指定沿黄浦一带已垦植之地为租界。商舶渐集，西人苦无卜居之地，乃出资购地建筑。地主索值昂，英领事患之，乃于二十四年与沪道订立地产章程。更会议英租界地界，华人议以河道为界，故洋泾浜之北，李家场之南为英租界。东则不以黄浦为界，而由英领事立石为界。至是规模略具，乃注意于修筑道路等事。是时，来省渐繁，情形一变。设栅守卫，秩序井然。然英人意在组织完全西人租界，不使与华人杂处，以至裁判管理之权

，所有掣肘。自地产章程实行，各国领事逐次设立，以管辖侨商。然多遇事龃龉，若美、若英、若法权限不明，时有争执，于是美法亦有自辟租界之议。先是中英吴淞之战，法人未与订定南京条约时，法人即遣舰长薛西礼至南京，欲干预之，为英人所拒，法颇怏怏。未几中法约亦告成，法领事马德尼执中法条约，要求开辟租界。美、比二领事，亦思染指。法领既与沪道磋商，要求洋泾滨以南等处为法租界，而沪道某只允以租界邻近之地。二十八年沪道去职，继任林某，法人续前请，林诺之。遂于四月六日成议，卒以南尽城河，北至洋泾滨，东至广东会馆，西近关帝庙河之地为法租界。美租界开辟于道光二十七年，由美牧师蓬恩与沪道商之旬月而成，得苏州以北之地。

三国租界既辟，领事与华官管理租界之权，仍争执不已。是时法美两界，荒芜僻陋。英界渐盛，英人咸居于洋泾滨左近，房屋湫溢，仅蔽风日，河水污浊，几不可饮，于是更择空旷地以居之。故英界日广，而商业亦兴。道光二十七年，西十一月二十七日，英领事与沪道订约，推广租界至苏州河。因重订界址，东南以洋泾滨桥为界，东北尽苏州河第一渡场，西南至周泾河，西北至苏州河滨苏宅止；且得数年争执不决之领事馆地。道光间，上海初有租界，旅居西人仅二十三人，皆住城内。越四年，乃增至一百零八人。当时所订租界章程第十五条，载明不许华人居住租界。近时刊行之通商条约诸书所载租界章程，多系后来增改之本。当日原文几无可考，然英人本所载尚如此。发捻乱作，华人避乱于租界及其附近者甚多。居民既众，一八五三至一八五四年，英美领事乃设巡捕房以司警察。由英美领事审理华人违警事件及其他民刑琐案，但案件甚少。一八五五年十月，仅二十四起，同年十二月，仅四十二起而已。当时上海租界之地位若何？几无人能知。如一八四八年十二月，美领事于租界内赁屋为领事馆，揭美国旗；而英领则行文上海道，谓租界非美领土，不能揭美国旗，宜向美领交涉阻止。而美领以开放门户，利益均沾为辞，不允。又一八五四年十一月，上海道函致上海各领事馆，嘱其报告寓居租界华人受雇于洋商者之人数及姓名；各领事复称：上海道如欲拘捕寓居租界内之华人，可开示姓名及所犯罪状，则领事可查明其人是否洋商雇用，彼此会同办理。此二事，可以想见当时华洋主客之状况。

上海自开埠以迄太平军时，三国租界，各自为政，不相为谋，倾轧掣肘，层出不已。英领事商之各领事及华官，重订租界治理之律，而使三租界同受治于地方行政部之下，因于咸丰十年颁行新律十四条。凡关于租界界线购地、订购地售地合同，以私地作公用界石，中国地丁粮以及建筑道路、掘故墓等，一以前订之地产章程为主，而略加修改。至西七月十一日，三国领事开会宣言：自兹以后，无论英、法、美等国人，一律受治于工部局之下，是为工部局设立之始。斯时太平军势正盛，华人之避难于租界者日夥，守卫之策，刻不容缓。且是时水兵已不能兼任警察，则当时所汲汲者，即警察一事，以为防范租界内外之扰乱。然警察费用太繁，苦难筹措，于是提议租界华人亦须一律纳税，除地税及码头税外，房屋亦须纳税。盖因鸠工建筑房屋，以出赁于避难华人。

十一月，各领事开会，以昔日完全西人之租界，至是乃为华人之逋逃薮，盗贼之所出没，赌徒、娼妓之所庙集，疫病、鸦片流行甚速，联名通告沪道，使之设法维持。沪道答称：昔年以条约及地产章程之故，租界内不得华洋杂处，故租界内无纷扰之弊。今者五方杂处，毫无甄别，游民盗贼之麇聚，亦固其所，租界、内地两受其弊，惟有设法防范而已。各领事乃与沪道筹商善后之策，由沪道出示，禁止人民杂居租界。虽新章中无禁止杂居明文，然为阻遏乱萌起见，不得不然。于是各领事更要求工部局使禁止华人迁入租界，工部局无以应，但禁娼妓及赌博。是时华人之侨居租界者日多，洋泾滨一带已无驻足之地，屋宇鳞比，密若繁星。西北一带，翦茅而居者尤日益繁。于是英领事爱尔可克拟设法毁华人之屋而逐之，同时复草拟取缔华人于租界中购地建屋之章程。至咸丰十一年，华官乃正式驱逐华人，并毁其屋，于是华人之流离无归者数千人，咸归咎于西人。各领事虽允偿其损失，而华人恶感终难泯灭。

耆英奏派外委陈志刚往英船会议折(道光二十二年七月一日)

窃查英逆自潜据定镇、宁波之后，未敢大肆猖獗，若彼时设法羁縻，尚易著手。迨奴才四月驰抵杭州，该逆业已退出宁波，别萌逆谋，已可概见。是以先陷乍浦，继攻上宝，逆焰日炽，骄矜日盈。奴才前同伊里布会衔发给照会，约见酋目，该逆借词推诿，并见逆觔日增，抚之一字，有所不受。奴才自恨无能，死不足惜。业于五月二十六日附片，奏蒙圣鉴在案。嗣因该逆于六月十日，大帮船只闯过甬山关，奴才一面来援京口，一面致朴鼎喳信函，遣通识陈巢送往。该通识于六月十六日持回复文内称：此事甚大，不能以往来信函可以定议。奴才奉到六月八日廷寄，当会伊里布密书照会，声明该国欲诉冤枉，大皇帝若不洞悉，焉能包荒于今日？此事原非笔墨所能商，尤非文书所能定，即应各派人员，先行会议，两国大臣再当面见善定，等因。复遣陈志刚送往，嗣伊里布遵奉谕旨即行折回乍浦之任。六月二十一日，陈志刚始行持回酋目复文，内称“彼此先行派人会议，甚属有理，惟须照所开三事，方能善定”等语。奴才查该逆要求之处，诚如圣谕，不外牟利之心，正可乘机设法羁縻。奴才随即发给单衔照会，将钦奉指示作为奴才己意，推诚布公，明白剴切，详细寄知。并飭令将所派之人开明，以便会议通商事宜等因，于六月二十三日复遣外委陈志刚驰往。该外委迄今尚未旋回，奴才正深焦灼。六月二十四日两奉廷寄，仰蒙我皇上指示：“有应行便宜从事之处，即着从权办理。此事但期有成，朕亦不为遥制等因。钦此。”奴才跪读之下，愧惧交深，五中欲裂，敢不激发天良，懍遵办理。除将密寄封固，飞咨伊里布，令其星迅前来，以便会商妥办外，惟往来传信仅外委陈志刚一人驰递，实属棘手，不胜焦闷。伏思奴才数十年来，仰荷高厚鸿慈，虽肝脑涂地，曷能图报于万一。兹当效命之日，又何敢念及身家性命，成败利钝。惟逆夷诡诈万端，反复无常，兼之汉奸唆使，逆谋叵测，不堪设想。今密筹羁縻事宜，关系甚巨，纵使奴才愚昧糊涂，尚知慎持国体，俯顺夷情，委曲筹办。究竟不知能否济事，惟有竭犬马愚诚，以冀报称。俟外委陈志刚旋回，该逆夷复信之处，再行据实奏闻。

牛鉴等奏英船大帮驶至江宁省城设法羁縻折(同年七月八日)

窃英夷大小各船八十余只，陆续驶入草鞋峡江面寄碇，臣牛鉴当将钦奉恩旨允准通商之处，专弁前往告知。臣伊里布于本月三日驰抵省城，寄与照会开导各情具奏在案。嗣该逆酋迭次复文，总称臣耆英，臣伊里布无权，不能作主，虽经具文晓谕，坚不醒悟。诂于五日忽向臣牛鉴差往之弁张攀龙声称：六日欲行开仗。该弁向其索取回文，亦不给发，当即驰回禀报，维时已过夜分。臣等焦灼异常，且虑城中闻此消息，人心定必惶惑，更恐城池不能保全，遂公同筹商，总以江宁省会，先保无虞，方为至要。当拣派太仓州知州徐家槐，外委陈志刚及张禧，持臣等照会，谕以钦差大臣耆将军日内必到，并推诚布公，复加开导。于六日天色未明时，令其一同前往。该员弁驰至江边，已见该逆各船张挂红旗，并车皆驾炮，人尽执枪，纷纷上岸排列阵式，候时前进。该员弁当将照会付给逆酋等阅看，并反复为之陈说。先尚游疑，后见众夷目公商良久，始鸣炮传令，但见各夷船红旗撒落，岸上夷兵次序回船。逆酋吗礼逊等向告：我们英吉利国吃饭养家，借与中国通商，岂敢无故得罪中国。今连年兵战，实出万不得已。现蒙大皇帝准通商，并有大臣可以作主，我们英吉利亦属情原听候商议。并令各船一色换挂蓝旗，仍给该原弁等回文。文理全体通顺，其大意则为罢兵和好之事，皇帝即有降谕，特派大臣，畀以全权，允照所讨办理。众酋众夷即得商利，且可回国，实有欣愿。是该逆称兵不息，虽专重通商牟利，其中之阴错阳差，在所不免。是日差去之员弁等旋省，始悉省城大局危而复安，实皆仰承谕旨，暂事羁縻之所致。合城绅商士庶，莫不钦感同深。臣耆英会同齐慎将后路应行防守之处，妥为布置后，即行起程，于六日巳刻驰抵省垣，遂公同熟商。如果该逆回心向化，就我范围，自可与议通商筹定大局。然臣等体察情形，该逆夷骄横之性已成，贪婪之心无厌，要求之事，断不能任其需索满欲。臣等惟有竭尽心力，设法办理，务求上持国体，下顺夷情，通盘筹算，以为永绝祸根之计。再江宁省城仪凤门最关紧要，去江面只有二三里之遥，此次该夷大帮船只，均在该处一带停泊；城门以内左右均系重冈叠岭，天然险要。提臣刘允孝，镇臣王志元带兵防守，并旗绿各营兵丁共有二千六七百名；又江西总兵李绮所带之兵一千名，在汉西、水西两门一带防守；并旗绿各营兵丁，足资堵御。臣牛鉴前已奏明在案。兹浙江拨解之大炮四十尊，苏州拨解之大炮十五尊，抬炮、鸟枪数百杆，业已到齐，并臣牛鉴所调之在苏防守河南兵丁九百数十名，亦陆续到省，当即分派兵丁三百余名，于汉西、太平两门防范，以厚兵力；余兵丁五百余名，飭令游击陈平川管带，在仪凤门内之鼓楼、老菜市屯扎。查该两处地方空阔，居民鲜少，树木丛杂，为往来行人必由要路，谆飭该游击于各要口埋伏兵丁，安设大炮。万一贼若爬城而入，前后夹击，竟可聚而歼旃。除由臣牛鉴会同将军德珠布，提督刘允孝激励将士誓死据守，昼夜倍加小心严防，以期保守城池，断不敢因现在议抚，稍存大意。臣等先行差遣佐领塔芬布同张禧驰往面见夷目，看其如何措词，再行次第派委职分较大之员，前往筹商，以昭周妥。(朱批：目前固属紧急，后虑尤当详慎，勿堕奸计为要，慎勉为之。)

耆英等奏详陈夷务情形，亲往夷船，妥为招抚折(同年七月二十六日)

窃臣等连次委员与英夷议定条款，因尚有未尽明晰之处，复饬四等侍卫咸宁、署江宁布政使、江苏按察使黄恩彤，并添委前经札调之宁绍台道鹿泽长、石浦同知舒恭受前往妥议。正在办理间，于七月十九日承准军机大臣字寄，是月十三日奉上谕：“耆英等奏，夷船大帮聚集江面，现拟设法羁縻一折，必须通盘筹算，永绝祸根，等因。钦此。”同日又奉上谕：“耆英等奏形势万分危急，恳允所请一折，必当切实议定，永杜兵萌，等因。钦此。”查夷酋朴鼎喳先有请臣等出城面见，以坚和好之约。臣等亦知事涉冒险，惟该夷性悍多疑，动辄反复，若拒绝不往，非惟示以怯懦，尤恐易启猜嫌。当即订于十五日轻舟减从，先至该夷之火轮船，复经夷目导引，缘梯而上，直至其三桅兵船。该夷酋率同夷兵摆队跨刀，作乐奉酒。虽心难揣测，而貌甚恭谨。臣当向朴鼎喳等谕以兵争之害，通商之利，现蒙大皇帝逾格施恩，自当永结和好，不得再启衅端。该夷酋等踊跃欢忻，似知感戴。旋于十九日在城静海寺，行答拜之礼，复固请入城面订和约。臣等以虑惊百姓，向其辞复；朴鼎喳声称，伊止带随从人数，不带一兵，只求派兵迎护，以示两无猜忌等语，词甚笃切。臣因大局将定，不得不俯顺其情，已定于二十一日选择公所委员妥为照料。俟入城后议定和约，再行照录呈览外，伏思臣等此次酌办夷务，势出万难，策居最下，但计事之利害，不顾理之是非，如该夷请求洋银多至二千一百万元，码头多至五处。臣等虽甚弩下，亦知经费有常，海疆至重，不宜轻有所许。第念寇势方张，据我要害，四肢之患，渐成腹心之疾，若不借此转机，速为招抚，该夷豕突狼奔，何所不至。且二年以来，合数省兵力言剿言防，总难得手。此时该夷续到兵船，较前加倍。万一江宁有失，彼得溯江而上，水深岸阔，备分兵单，炮位赶铸不及，胜负之事，已可预料。倘从此南北阻遏，祸患更难枚举。且该夷船坚炮猛，初尚得之传闻，今既亲上其船，目睹其炮，益知非兵力所能制伏。臣等前折所请捐巨费以全大局者，实出万不得已。至福州贸易一节，侍卫咸龄等前与会议时，已曾以既有厦门，无庸兼及福州，向其争辩。据吗礼逊等声称，厦门相距福州尚有数百里，虽海路可通，伊等贩卖茶叶，以福州为最便，务求准予通商等语。兹复委熟悉闽省情形之宁绍台道鹿泽长再向熟商，该夷等坚执不从。查宁波、上海、厦门等处，该夷均曾经占据，虽业已退出，而要口俱泊有夷船，倘不允所请，势必复来攻夺。残敝之余，防守尤属不易。定海之既得旋失，是其前车。臣等前折所云，与其任彼占据，孰若归我土地，与之通商者，实已见及如此。而既准贸易，即属码头举凡设领事，立夷馆，住家眷，势不可遏其所请。其平行虽属末节，于天朝体亦大有所损，惟经曲事羁縻，亦复无暇顾惜。至于善后之难于措手，他国之不免生心，亦所虑及。而害从其轻，事先所急，但得罢兵通商，方可徐图控驭。此又臣等筹之至熟，而不得不出于最下之策者也。再镇江失守时，扬州商民逃散，危在旦夕。经商人颜崇礼屡至夷船，再三央恳，并由商损银三十六万两，送给该夷收受，夷船始不北犯，并不关防守之力。现已议明，在于先交之洋银六百万两，扣除五十万元，以抵前数。该酋与臣等见面后，即将镇江被虏之兵十二人，及出差安徽致被拘留之候补知县朱子行均送还。前经掠去之洋铜商船，亦许即释放。臣等具有血气，目睹夷情纵恣，忿激难名

。第以利害相权，安危攸系，不得不降气抑心，冒死强忍，以冀事之有成，未敢逞匹夫之勇，致成决裂。惟既不能宣威殄寇，又复胆大擅专，罪难擢数，乃蒙皇上天恩，迟加诛谴。臣伊里布复蒙赏戴头品顶翎，感愧交萦，惶悚无地。(朱批：徒增忿恨，念生民之涂炭，抑遏勉从。谕军机大臣等：耆英等奏，详陈夷务情形，亲往夷船，妥为招抚一折，览奏忿懣之至，朕惟自恨自愧，何至事机一至于此!于万无可奈之中，一切不能不勉允所请者，诚以数百万民命所关，其利害且不止江浙等省，故强为遏抑，各条均准照议办理。惟该夷所请，均已允准，即当迅速定议，全数退出大江，不得任其耽延，惊扰行旅。至此外一切紧要事件，必应筹及者，均着责成该大臣等一一分晰妥议，不厌反复详明，务须永绝后患。该大臣既知善后之难于措手，他国之不免生心，即应思前顾后，预为筹画，于勉从下策之中，力求弭患未然之计。倘稍留罅隙，日后有所借口，以致别生枝节，办理掣肘，是耆英、伊里布自诿伊戚，不惟无以对朕，更何颜以对天下。再佛郎西亚国夷目则济勒到后，情形若何?甚为廑念，着并奏慰。将此谕令知之。

耆英等奏沿海之上海及广州、福州、厦门、宁波等五处通商折(同年八月二日)

窃臣等亲往夷船招抚英夷及所请各款势难拒绝缘由，业经由驿驰奏在案。道光二十二年七月二十二日，承准军机大臣字寄，是月十七日奉上谕：耆英等连日与英夷会议粗定条约一折，总在该大臣等切实定议，永杜兵萌。等因。钦此。查该夷前请入城，共订和约，以示不疑。臣等查其已就训抚，即定期七月二十一日派拨兵弁，前往迎护夷酋朴鼎喳带同亲随九人安静入城，与臣等在公所面议和好。当将前经截留江宁将军德珠市奏折一件包封交还。并将连日集议各条，撰就和约，缮出汉文呈递前来。臣等公同阅看，文理未能通畅，而大指尚属明晰。其所列各条，仍不出前请三事之外，并未续有增添，亦无远悖字句。正在核办间，接奉谕旨，指示周详，夷情向背，均在圣明洞鉴之中，臣等曷胜钦服。当即派委四等侍卫咸龄，署江宁布政使、江苏按察使黄恩彤、浙江宁绍台道鹿泽长、石浦同知舒恭寿前往夷船，宣示恩旨。并将奉旨指出各款，向其明白开导。该酋朴鼎喳闻已允准所请，极为感戴。一切解嫌释疑及修复炮台墩堡各事宜，均敬谨听从，并无异说。其商欠一节，据称广东洋行积欠伊国银两甚多，止以洋银三百万元为断，此外不敢求官为保交。至以后通商各事宜，诚如大皇帝圣谕，事甚琐屑，渠等亦不敢求官为经理。惟在广东贸易以来，深受洋行剥削，以后情愿自投行商交易，按例输税，免致暗被侵渔。渠等既蒙恩准赴各处贸易，必须设立会馆，以为贮货之所；分派领事以为总办之人，方能约束众商，勿许生事。又伊国距中国七万余里，远涉重洋，经年方能往返一次，务求准其挈眷同来，免至离散。渠等既得贸易，又有室家，益当感激天朝厚恩，安分输税，并协助官兵缉捕洋盗，以期报效。至福州乃武彝茶聚集之所，又设有海关，贩货纳税，系属最便。且其地旧有琉球馆，渠等事同一例，是以吁请施恩。今蒙大皇帝驳飭不准，仍格外加恩，谕以他处相易。惟天津密迩京都，渠等不敢妄有请求。此外滨江之区，贩茶最便无过福州。且系中国极南之地，与广州情形相等，仍求大皇帝恩准赏给等语。该侍卫等再三开导固请如何。臣等查夷人通商之所，即属码

头。向止广东一处，今既准该夷赴各处贸易，凡该夷运来之呢羽钟表及中国所产之茶叶丝绵，不能不听其互市成交。而夷货数多，断非旬月所能趸发。若限以泊船久待，漫无归著，彼之转运既滞，我之铃束尤难。似夷馆领事，均难拒其所请。至向来夷船进口，携带家眷，止准留住夷船，不许寄居会馆，立法本严。窃思夷船之所以难制者，诚以飘忽往来于洪涛巨浪之中，朝东暮西，瞬息千里，是以能为遥患，今若有室庐以居其货，有妻孥以系其心，既挟重资，又携室家，顾念滋多，控制较易。况英夷重女轻男，夫制于妇，是俯顺其情，即以暗柔其性，似更不必遇事防闲。再查武彝茶产自建宁聚于福州，行于西洋诸国为最远。该夷因贩茶求往福州贸易，尚属实情。考福州形势与广州同为海疆省会，较诸宁波、上海之逼近苏杭者，似尚有轻重之分。若坚拒不准，许易他处，该夷既以天津借口，诚恐又添枝节。臣等再四熟商，复连日侦探夷情，业经买石压舱，分船探水，为出江归海之计。又行知各兵船不准拦阻过江船只，并照会臣等委员至镇江府弹压土匪，是该夷罢兵就抚，已有实据，似未便坚执一端，致碍大局。当即订于二十四日面晤朴鼎喳，据呈出原和约四册，请臣等铃用关防，渠亦加用图印，分执为据，以示永无反复。据该夷酋声称：“蒙大皇帝逾格天恩，俯允所请，断不敢攻占长江，亦不敢滋扰他处，一俟探明水路，即行退兵”等语。查其情词实属可信。惟是臣等办理夷务，先既擅专轻许，兹复不能力争，罪无可追，应请旨将臣等一并从重治罪。再前由吴淞强占沙船前来讲和之佛郎西带兵夷目则济勒，亦于二十四日据英夷带同来见，并无所言。似因和议已成，无从置喙。知关圣尘，合并附陈。至奉旨赏给该夷银两，现即陆续交领。约计夷船在八月十日前后必可退出大江。不致误粮艘回空之限。俟江面肃清，即当恭折奏报。再朴鼎喳等前请俟和约议定，赏加御宝，以昭信守，钦奉恩旨准行，该夷酋不胜钦感。据称此时兵船尚未即退不敢遽请御宝，俟退出大江，再请铃用，以昭恭顺等语，系属尊崇敬信之意，俟届期再行妥议奏请。谨将和约另缮清单，恭请御览。

一、嗣后大清大皇帝与英国君主永存和平，所属华英人民，彼此友睦各住他国者，必受他国保佑身家安全。

一、自今以后，大皇帝恩准英国人民带回所属家眷，寄居沿海之广州、福州、厦门、宁波、上海等五处港口，贸易通商无碍。英国君主派设领事管事等官住该五处城邑，专理商贾事宜，与各该地方官公文往来。令英人按照下条开叙之例，清楚交纳货税钞饷等费。

一、因英国商船远路涉洋，往往有损坏须修补者，自应给予沿海一处，以便修船及存守所用物料，今大皇帝准将香港一岛给予英国君主暨嗣后世袭主位者常远主掌，任便立法治理。

一、因钦差大臣等于道光十九年二月间，将英国领事官及人民等强留粤省，吓以死罪，索出鸦片，以为赎命。今大皇帝准以洋银六百万两偿补原价。

一、凡英国商民在粤贸易，向例全归额设行商亦称公行者承办。今大皇帝准其嗣后不必仍照向例，凡有英商赴各该口贸易者，勿论与何商交易，均听其便。且向例额设行商等，内有累欠英商甚多无措还者，今酌定洋银三百万元，作为商欠之数，由中国官为偿还。

一、钦差大臣等向英国官民人等不公强办，致须拨发军士讨求伸理，今酌定水陆军费洋银一千二百万元，大皇帝准为偿补。惟自道光二十一年六月十五日以后，英国在各城收过银两之数按数扣除。

一、以上酌定银数共二千一百万元，此时交银六百万元。癸卯年六月间交银三百万元，十二月间交银三百万元，共银六百万元。甲辰年六月间交银二百五十万元，十二月间交银二百五十万元，共银五百万元。乙巳年六月间交银二百万元，十二月间交银二百万元，共银四百万元。自壬寅年起至乙巳年止，四年共交银二千一百万元。倘按期未能交足，则酌定每年每百元应加息五元。

一、凡系英国人，无论本国属国军民等，今在中国所管辖各地方被禁者，大皇帝准即释放。

一、凡系中国人前在英人所据之邑居住者，或与英人有来往者，或有跟随及伺候英国官人者，均由大皇帝俯降谕旨，誊录天下，恩准免罪。凡系中国人为英国事被拿监禁者，亦加恩释放。

一、前第二条内言明开关俾英国商民居住通商之广州等五处，应纳进口出口货税饷费，均宜秉公议定则例，内部颁发晓示，以便英商按例交纳。今又议定英国货物自在某港按例纳税后，即准由中国商人偏运天下，而路所经过关税，不得加重税例，只可照估价则例若干，每两加税不过某分。

一、议定英商住中国之总管大员与中国大臣无论京内京外者，有文书往来，用照会字样，英国属员用申陈字样，批复用札行字样。两国属员往来，必当平行照会。若两国商贾上达官宪，不在议内，仍用奏明字样。

俟奉大皇帝允准和约各条施行，并以此时准交之六百万元交清，英国水陆军士当即退出江宁、京口等处江面，并不再行拦阻中国各省商贾贸易。至镇海之招宝，亦将退让。惟定海县之舟山海岛，厦门厅之古浪屿小岛，仍归英兵暂为驻守。迨及所议洋银全数交清，而前议各海口均已开关，俾英人通商后，即将驻守二处军士退出，不复占据。

一、以上各条均关议和公约，应俟大臣等分别奏明大皇帝朱笔批准及英国君主判定后，即速相交，俾两国分执一册，以昭信守。惟两国相离遥远。是以另缮二册，先

由钦差大臣等及英国公使盖用关防印，各执一册为据，俾即日按照和约开载之条，施行妥办。

耆英等奏英船渐次退出详议善后事宜折(同年八月二十日)

再该夷自和约钤用关防后，陆续退出兵船共有十余只，因善后事宜尚未议定，银两亦未交清，是以大帮夷船尚未退出。其观音门一带屯扎夷兵，自八月三日后，次第登舟，并无滋扰情事，一切商贾行旅，渡江船只，该夷亦不拦阻。嗣于九日接奉恩旨，即委侍卫咸龄等前往宣示，该夷酋等感戴欢欣，手舞足蹈。即据朴鼎喳照会内称，渠因恭奉大皇帝谕旨，知前议各款，均蒙恩准施行，实属万幸，已飞飭带兵官将兵船迅速退出长江等语。当于十日为始，每日开行兵船，自三只九只至十二只不等，现在停泊尚有二十六只，较前已退大半。又据该酋照会内称，渠接本国来信，知有续来大小兵船十一只，总缘未得议和确信所致，渠现已飭阻回国。求臣等先行奏明，并咨会沿海各督抚，倘见有该国续来兵船，不必疑虑等因。现在已交给银二百九十四万两，指日全数交清，夷船即可悉退。至佛郎西夷目则济勒沙船一只，业经退去。续据苏太道巫宜禔禀称，复有夷目巴日自称系佛郎西提督，因闻英夷肆扰中华，奉国王之命前来查探等语。昨据该道续报，则济勒已於八月七日由吴淞起碇回国，惟巴日船一只驶至草鞋峡江面停泊。臣等因该夷目为查探英夷而来，自应静观其变。一面密询英夷各酋，均称该国每年到粤商船，不过二只，且与中国毫无衅隙，必不致或启争端，渠等亦不知该国来意等语。虽夷情隔膜，殊难悬揣。惟则济勒既无所借口，似巴日亦不致滋事。(谕军机大臣等：耆英等奏夷情已就驯伏详议善后事宜一折，另片奏英夷兵船陆续退出等语，览奏均悉，俱照所议办理。此外尚有应行筹议事宜，着耆英等通盘酌核，悉心妥商，毋稍留罅隙，致滋后患。惟称该夷通商，嗣后若有欠项，由管事官呈内地官著追一节，断不可行。内地居民与该夷贸易日久，难保无拖欠情节，地方官既未经手交易，日后又安能代为追欠？一经允许，遇有无着欠项，势必哓哓具禀，地方官事务甚繁，何暇办理此事？且该夷稍不如意，又将借口追欠不力，另起衅端，不可不预为筹及。着耆英等剴切晓谕该夷，仍遵前旨，只准自行清理，地方官概不与闻。至佛郎西夷目则济勒沙船一只，虽经退出，而巴日一船尚在江面停泊。英吉利与之同系夷帮，虽非该夷招之前来，岂有不知其来意之理？着该大臣等密谕英夷，两国既称和好，自应通同商办一切。现在诸务已定，佛郎西夷船何得逗留内地？务令英夷劝今起碇回国，免致别生事端。该大臣等仍应严密防范，毋稍大意，所称该夷照复国王出示晓谕英民，止准在五口贸易，不准驶往各处一节，亦应详细写明，以见此外皆非该夷所应到之处，免得日后借口影射蒙混。该国续到兵船，现已飭阻回国，并求咨会沿海督抚，谅该大臣等已妥为办理矣。)

耆英等奏江宁英船全数开行折(同年九月三日)

奏江宁夷船前已开去三分之二，经臣等于八月十六日附片陈明，嗣后每日开行夷船

二三四只不等，计截至二十五止，草鞋峡江南仍停夷船十二只，另有佛郎西夷船一只。兹据朴鼎喳照会内称，现蒙大皇帝恩准通商诸事，均已议定，拟于二十六日率同兵船迅速退出江口。旋因搬运压舱石块，耽延二日，即于二十八日早间全数开行，其佛郎西夷船亦随同驶去。现经臣等委员查明，草鞋峡至观音门一带江面，并无夷船停泊。

耆英等奏大帮英船出江入海折(同年九月十三日)

窃照英夷末帮船只，于前月二十八日起碇开江，飭委盐法道积喇明阿、浙江参将尚安泰护送出江，当经会折具奏在案。兹据积喇明阿禀报，大帮夷船于九月三日全数出江入海。并据沿江各州县禀报，夷船八十五只均已陆续出江，惟佛郎西一只其船较大，且无火轮船带领，是以八日始行驶出鹅鼻嘴，亦出江入海等情，呈报前来。伏查英夷犯顺，已历三年。此次入据长江，为我心腹之患。七月五日，该夷船全帮驶至江宁，排列江岸，计图一逞。经臣伊里布、臣牛鉴委令张喜及武举张攀龙等，冒险赴船，再三与之陈说省城大局，得免决裂。迨六日，臣耆英由丹驰至，复飭令佐领塔芬布、张喜、陈志刚等出城设法羁縻，渐期就绪。詎该夷于八日忽闻讹传，又行中变，随复换挂红旗，声言九日开仗。复经臣等飭委四等侍卫咸龄、署江宁布政使按察使黄恩彤面见该夷，剴切招抚，始得弭音来革，通市输忱。当此两番危险之时，事已在于呼吸，幸蒙训示，招抚事宜，期于必成，臣等遵循办理，大局始定。现大帮夷船业经出江入海，暂泊吴淞，行将遣散回国，皆由皇上招携怀远，文德诞敷，宽其既往之诛，即以拯我生民之困。普天臣庶，感戴同深。所有臣节次面见该夷，与之要约各条，复蒙指授机宜，逐加筹议。该夷酋诸形驯顺，就我范围。察其通商之意，实出至诚。既经受抚以后，情词亦极恭顺。即如前此八月十日恭值万寿圣节，该夷酋朴鼎喳文称：“远涉重洋，仰慕圣德，钦祝福禧延洪，”请臣代陈恭贺之忱等语。其感服之诚，尚为可信。嗣后各省抚驭得宜，断不致妄肆鸱张，又形反复，足可仰慰宸廑。

耆英等奏令黄恩彤随同赴粤与夷面商折(同年九月十三日)

查四等侍卫咸龄，署江宁布政使按察使黄恩彤两月以来，驾驭夷酋动中寂要，该夷极为信服。臣等已另折奏蒙天听。此时前赴广东，多有与夷面商之处，必须咸龄、黄恩彤始终其事，方可得免差池。刻下新任江宁布政使王庭兰，业经到省，黄恩彤即须交卸。合无仰恳天恩，俯念夷务紧要，暂令黄恩彤缓赴江苏臬司新任，即与咸龄随同臣等前赴粤东办理一切，俾得驾轻就熟，指臂收助。

允耆英等奏定约用宝谕(同年九月二十三日)

谕军机大臣等：耆英等奏定约请赏用宝一折，览奏均悉。该夷船业经全数退出长江，拟前赴广东分帮回国。朕因轸惜黎民，勉从下策，借此载兵休养生息。前已准令

该大臣从事，现在夷民相安，自应俯允所请，于呈递纸样，如式用宝。该大臣祇领后，即妥慎办理，不厌精详，永杜后患。此事所关匪细，切不可将就。日下草率了事，致令该夷他日有所借口挟制。约内添注各条，尤须斟酌尽善，为一劳永逸之计。所有条约及添注之处，均着另缮具奏。

耆英等奏变通外夷输税章程折(同年九月二十八日)

窃查外夷通商输税，旧有定章，一切则例案据，俱在粤东。其应行变通兴革各事宜，亦须到粤后体查实在情形，方能酌办。惟夷情之向背，国课之盈绌，皆系乎此，所关匪细。若过为搜剔，则窒碍难行，倘略事通融，又易滋偷漏。臣等公同商酌，大约税额一循则例，而交易务示公平。凡所索取过当杂项，暨一切应行详筹事宜，容伊里布抵粤后，查明斟酌去留，与督臣暨海关监督会商酌议，请旨遵行。此外福州等处虽与粤东各有不同，惟进口之货，以呢羽、钟表、洋布等物为大宗，出口之货，以茶叶、白糖、湖丝等物为大宗，其余懋迁有无，厥类匪一，而粤东既议定章程，自可通行各口，仿照输税。至各处添设码头，既准夷建立夷馆，携带眷属，自投行商，以示体恤。该夷既渥被恩慈，自不致复萌反侧。其未尽各事宜，应由臣耆英次第办理。其嗣后商欠，不必官为代还一层，前已与该夷议定，载入条款，俟到粤时，再与要约切实，免致日后借口。

璧昌等奏吴淞口外到有夷船听候通商折(道光二十三年正月)

原奏，现据护上海道并宝山县营禀报，吴淞口外，陆续又到有夷船五只，声称载有货物，听候通商等语，当即札飭苏州同知沈炳垣驰赴上海会同营县妥为办理。兹据禀称：十八日夷船到上海，先遣夷目二人来见，云有该夷酋黄香诗，其职比中国守备，明日亲来投文等语。次日该夷酋来面递照会，拆阅仍系定海夷酋胡姓来文。内有“前派吴上两口之兵船，以阻英船进扬子江者，不得不撤回，嗣后又不能阻之前往其江也”等语。文义不甚明晰，核与前照会不符。诘以何故？该夷酋诿为不知。询其何日开行？据答一有回文，即行开去。该护道仍照前次复文，谕令速回定海俟粤中议定章程，再来贸易。备文照复，差弁送交该夷酋黄姓，即于二十二日开行。并由该护道照钞该夷照会及回文，呈送前来。旋据署松江府及宝山县营禀报，黄姓夷船已于二十六日向东南外洋驶去。此外夷船现在陆续开行各等情。伏查本年两次由定海来吴淞口之夷船停泊多日，并未有进扬子江之说，向来内地民人与该夷交易，均系闽广人经手，镇江扬州一带并无闽广人居住，何以该夷来文，忽有此语？或因前次照会既说禁阻彼船不令进口，此次又说不能阻止，自相矛盾，遂以扬子江为词，谓能禁吴淞口之船，而不能禁扬子江之船，以巧饰其非，亦未可定。现已飞咨钦差大臣耆英，向朴鼎喳确切查询移复。惟该夷既有此语，不可不严加防范。现在鹅鼻嘴、圖山关等处，虽经臣勘定界址，拟筑炮城，惟估计兴建尚需时日，现潮汛渐旺之际，臣甚不放心。当经密飭沿江沿海文武员弁，小心防守。设有夷船驶至，不动声色，明白开导，令其速回，静候议定税则，前往上海交易，无庸在此守候。并严禁

内地奸民潜相勾串，亦毋得致涉张皇，别滋事端。

孙善宝奏税则未定码头未立暂阻夷船来沪贸易折(同年正月)

窃照本年二月三日，吴淞口外到有夷船三只，欲赴上海贸易，似系米利坚之船。经该营县谕以税则未定，码头未立，不便先行交易。该夷因修理船上器具，停泊口外。即经臣与督臣耆英飞飭苏松太道委员会同地方官剴切晓谕，令速赴广东听候钦差大臣议定税则，再行奏明请旨。嗣于十五日续来夷船一只，亦似米利坚之船，因延未开行。复经督臣飭委督粮同知沈炳垣驰往会同营县明白开导，先后驶去二只。旋于二十七日到有英吉利夷船二只，经该营县询之，系由定海开来，探听广东信息，即于三十日与前泊之夷船二只一并驶往外洋。至三月十二日，复有夷船一只，乘风顺潮，由吴淞口驶至上海城外，该营县上船查询，系花旗国即米利坚之船，由吕宋载货至此贸易。该营县谕以会议税则尚未奉有明文，该夷允回广东候信，于十六日驶去。兹复据苏松太道颜以奥禀称，三月二十一日，英吉利火轮船一只驶至黄浦江，该道正拟会营督县上船查询。次日即有夷目带同通事来至公寓，据称该国大员闻有别处之船，在于上海逗留，恐滋事端，现来押令折回舟上等语。并递呈该国驻扎定海之副将胡姓照会苏松太道来文，当即公同拆阅，与所言大略相同，并无别故。钞录照会具禀到来，臣正在查办间，据宝山营县禀报，该船即于二十三日开行出洋等情。臣查夷船往来，虽系意在通商，第恐沿海居民见而疑惧，叠经飭属妥为弹压巡防，毋稍惊扰。前驻定夷酋，恐有夷船在上海滋事，差令夷目押回，具见克敦和好。查阅照会内文义虽不甚明晰，而情词极为驯顺，所称并无别故，尚属可信。该夷船驶至之日，适前项所到各船均已开行，是以即行反棹。臣仍飭令该道县等，如有续至之船，一体妥为晓示，令其迅速开行，总候广东议定税则，奏明请旨遵办。

璧昌等奏颁给英领事章程税则钤盖印信令勘建馆基址折(同年十月)

钦奉上谕：“五口通商章程初定，头绪纷如。江苏省着璧昌、孙善宝督同咸龄、宫慕久核实办理，钦此。”伏查海关通商税则及稽查要约各条款，节次接准部议，并经钦差大臣耆英咨照前来，当即行知苏松太道宫慕久督同厅县遵照妥办。嗣闻该领事巴富尔计日可到。臣等窃以凡事难于创始，而抚驭外夷，先在折服其心，俾知因感生畏，以固边防，而崇国体。臣璧昌前在回疆筹办善后通商，禀承训示，遇事开诚布公，固宜俯顺该夷嗜利之情，尤当明示等威，以彰天朝体制。今英夷既经就抚，上海虽向系商货云集之区，而与番舶交易，事属初创，拟于开事之先，臣等二人中定一人前往上海暂住督办，庶可放心。但恐该夷领事到后，知有大员驻节，事无巨细，辄向臣等干求，转多窒碍。查朴酋屡次来文，俱经递上海道。计其派来领事，必系夷商中之能事素与粤商熟悉者，其所称官职名曰领事，亦系夷商头目，其位分总远在朴酋之下。臣等渥受殊恩，添膺封圻重寄，大纲小纪，综理敷施，万不敢惮劳畏难，而体制攸关，实未便轻举率行，致为中外民夷所玩褻。此时一切事宜，自应由该道等禀商核办。现届武闱乡试，臣璧昌例应监临典试。臣孙善宝驻扎苏州

，距上海较近，适有宝山海塘工竣，必须亲往查勘，拟即借此查工，就便与该道等筹商。其应否与该领事接见，俟到彼后酌定，再由臣孙善宝将开市日期缮折会奏。正在筹办间，钦奉上谕，以章程初定，头绪纷如，必须明干之员。仰蒙圣明指示，曷胜钦感！连日以来，接据该道等禀报，该领事请将章程税则钤盖印信颁给，以便遵守。既经该道会同参将侯攀凤、署松江府徐清照、同知沈炳垣、上海县知县蓝蔚雯与该领事将章程内有应行斟酌者，复与辩论。且告以现在暂租寓所，俟夷馆建成，即行迁移，勿稍逗留，亦不准续添人数，该领事均已应允；并云勘定建馆基址，自当按亩议租，断不强占尺寸。近日又有该夷派来夷目啦哪驶至，带有白夷数十人。询系帮同弹压夷商船只者。并据麦华陀称，巴富尔与啦哪均系该国守备之职。该道等即嘱巴富尔会同啦哪出示禁止，该船水手人等不准上岸闲游，强买食物，该领事亦已照办。该道等复派干役数名，以接递文札为词，即在巴富尔暂寓之处，就近查察，其大帮货船陆续报验，诸称安静各等情。臣等详阅该道等叠次禀报，及钞呈该夷日照会文件，其所请颁给税则，倾镕洋钱，皆为慎重税务起见，其夷馆既允勘定后，按亩议租，情词均尚驯顺，现在暂租寓舍，彼此稽查慎密，诸臻安静，足以上慰圣怀。

壁昌等奏咨会朴鼎喳令巴富尔管理该国贸易事务折(同年十月)

窃臣等前准钦差大臣耆英咨会，朴鼎喳派令巴富尔前来管理该国贸易事务，现据苏松太道宫慕久禀报，九月十七日有火轮船一只，由吴淞口驶至上海，询即英国领事巴富尔之船。旋据该领事投递照会，约期面见。该道即于十八日会督在城文武亲赴大关，与之接晤，情形极为恭顺。该领事带有夷官麦华陀一员，通晓汉语。据称，俟将章程税则逐细讲论后，即定开市日期等情。当经臣等批飭妥速定议去后。连日接据该道等禀称，已与该领事将章程税则逐条核对，反复辩论，该领事均能懍遵。惟因建造会馆，尚需时日，暂先登岸赁寓居住，并不骚扰居民，一面觅地建馆，即行搬移。并因所带洋钱种类不一，必须逐件倾熔，分别秉公估定成色，以便照数补水纳税。再该领事初到之时，吴淞口外，仅止夷船三只在彼停泊，现又续到货船四只，随即定九月二十六日先行开市等情。臣等查该领事既已到沪，货船亦有七只，自应飭令早为开市，以广招徕。惟前耆英咨会上海等关，所征西洋各国税银应与粤海关一体，以道光二十四年正月二十五日为截数之期，等因。本年开市节气已近小雪，正值西北风司令，商船大帮能否由东南续至，殊难豫必。惟上海通商，事属创始，所有抚驭外夷，以及弹压内地商民，在在悉关紧要。章程具在，必须实力遵行。臣等自应暂时亲往督办，以昭慎重。且宝山县前修沿海土石各塘，业已完竣，复有筹议捐修炮城、兵房等工，均须前诣查勘，期归核实。臣璧昌现在考校武围乡试，不克分身前往。臣孙宝善拟于拜折后，即酌定日期，赴宝山一带，查验善后各处工程，并将通商案内条约，就便与该道等再为筹商，务期悉归要善。查领事巴富尔据称系属该国守备，职分较卑；臣孙宝善到彼时，如一切通商事宜，毋庸亲与筹议，自可不必遂行接见，借示天朝体制，以别等威。设有必须面为要约之处，容俟临时察看情形，与该领事接晤一次，亦可宣布德意，用示怀柔。朱批：悉心秉公妥办

孙宝善奏英领事巴富尔到沪后通商开市折(同年十一月)

窃臣前因英吉利所派领事巴富尔到沪后于九月二十六日开市，业经奏明由臣于查验宝山海塘及炮台等工，督飭苏松太道等，将通商事宜妥为筹商。如无须与该领事当面要约之事，即可不与接见，以崇体制。并将遵旨督办及上海开市后安静情形，先后会折陈蒙圣鉴在案。臣于拜折后将署中紧要公事逐一清理，即自苏起程，于十二日行抵上海。适提臣尤渤遵照奏定章程，暂行移驻弹压，先于六日到沪。臣与提臣及苏松太道宫慕久、上海同知沈炳垣等接晤。询知开市以来，华夷尚称辑睦，一切章程该领事亦知遵守。惟内地贩运湖丝前赴上海，与该夷交易者，应查明赴粤路程，少过一关，即补纳一关税数。该领事恐丝价增昂，向该道等述及，欲见臣面求为转奏，毋庸补纳。该道等以定章难以更改，向其回复。该领事即无辞而退，并未再行求见。提臣在沪，该夷亦未求见。至建馆基地，该领事惑于风水之说，尚未勘定。前因县城内本有开设招商栈房五处，即带同夷目人等租赁暂居。每处仅止数人，情形极为安静。并将输税洋钱，补水数目，由该道等会同逐类倾熔，分别议定，照数完纳。其先后进口之船仅止七只，内有该国弹压夷商水手之兵船一只，即系奏明停泊口内之官船，兵数无多。又货船共计六只，尚无续行到沪之船。该道等已将验货收税等事照章妥办。第上海本地沙船，向以花布、茶叶等货运往关东、山东各处售卖，换买黄豆，往返生理。即闽广商船，亦以糖货为大宗。所有洋布、呢羽等货在苏州售卖，上海行销本不甚多。兹开市伊始，外来商贩尚属寥寥。缘销路尚未大通，而夷货新至，又欲居奇，且传有大帮续至之说，是以商情不无观望。臣已出示晓谕，用广招徕。并据该道等面禀，必须设立公估处所，华商夷商各选数人，将货价公同评定，俾免争执。复与奏定条款内税数、价值等项，令客商二三人同估之语，尚属相符，飭令妥速商办。并将章程税则与该道等逐细讲求，其有因地制宜之处，亦即飭令核实经理。而走私漏税诸弊，尤须实力稽查。伏思抚驭外夷，全在孚以恩信，俾其知感知畏，以期长治久安。该道宫慕久自之莅任以后，即值办理通商事务，极形繁重。该道督同上海同知沈炳垣筹办已将半载，情形日就熟悉。且其质直出于自然，廉介本乎天性，于华夷通商诸务，断不致徇私忘公，洵为实心可靠之员。臣于属员因公自沪来省，随时留心询问，众论僉同。兹臣沿途采访舆情，并于接见时聆其言论，亦与传闻无异，诚如前奉谕旨，“人颇去得。”将来咸龄遵旨赴沪，可冀持正秉公，和衷共济，于夷情、税务、地方三者均有裨益，堪以仰慰圣怀。

耆英奏上海英商报验之货仍照例完税折(同年十二月)

原奏上海开市之初，居民不免疑讶，现因领事巴富尔约束甚严，业已华英相安，一切尚称顺利，惟建造房屋，所费不貲。而上海贸易之衰旺，不可预必，是以瞻顾徘徊，不能遽定，似非另有别故。该国前有带来火药数百斤，鸟枪手枪二十余杆，欲图售卖。前署督璧昌以军火例禁携带，已来者飭收买，未来者应否查禁，函商于臣

。查澳门及广州十三行售卖火药、洋枪，向不禁止，盖恐一经查禁，不敢携带进口，即在外洋卖给匪人也。当即行令苏松太道照数收买，解省试验，酌办去后。现据该道禀报，遵批收买会营试验，均属有用之物。臣已批飭解省亲自试验明确，比较内地制造价值，会同抚提诸臣通盘筹定，酌量发营配用。又前据苏松太道禀报，有英吉利弗里隆货船一只，因上海销路疏通，不能久待，请将已经开单报验之货，照例完税，并按吨输纳船钞，仍载出口，另赴他处销售。该道因货未销售，未便收其税钞，回复领事。巴富尔以若不收其税钞，以后商船皆可随意往来，不足以杜弊端，坚请征收等情。臣查各国商船大小不等，所载货物多少不一，粤中完税章程，向于货船进口后由海关派拨丁役随地看押，就其已经起剥上栈之货查验征收，以杜偷漏。因该处商贩流通从无滞销之货，是以章程内未经议及原货出口如何办理。今上海通商伊始，何货可以畅销，何货不能流通，各该商尚未周知，自应因地因时，酌量办理。若将已验之货进口之船，因其货未全销，不收税钞，行将弊端百出。巴富尔亦见及于此，尚属晓事，禀商署督臣孙宝善，皆以为然，批飭查照办理在案。昨准闽浙督臣刘韵珂咨会，厦门亦有因货难销欲载原货出口之船，臣已查案咨复，并咨粤浙二省一体知照。至该船仍载原货出口，如何稽查透漏，应由各海关体查情形，妥协查办，总期公平交易，庶可内外相安。其一切未尽事宜，容臣会同抚臣孙善宝飭苏松太道宫慕久、候补道咸龄等随时和衷妥议，务期永久无弊，以仰副圣主训诫谆谆之至意。朱批：务期办理周妥，不可率忽。

壁昌奏英酋呈欲往各口查看所属管事是否遵守成约等情折(道光二十四年八月)

前准耆英来咨，据英酋德庇时呈称，欲往各口查看所属管事等是否遵守成约等情。当经臣札飭苏松太道宫慕久，俟德酋驶进港口，示以镇静，妥为驾驭去後。兹据该道及参将侯攀凤会禀，八月八日有英夷小火轮船一只驶到，查系德酋带同夷目梦塞一名同来，该领事巴富尔接至寓馆暂住。其登岸进馆时，俱未放炮，称为安静。九日该道将督同同知沈炳垣、知县蓝蔚雯在公所接见德酋，摘帽通款，执礼甚恭。据称伊于本年二月派赴香港接充公使，临行时该国主谕与中华文武官员和睦恪守成约。今于七月四日由粤开行来上海察看贸易衰旺，耽搁四五日，即当起程，由浙闽各口顺道回粤，并称伊前在粤管理夷务十余年，是以能说汉话，兼解汉文等语。该道等拟即查照前次英酋到沪成案，择日设席款待，以示怀柔。

壁昌奏英酋至沪恭顺等情折(同年九月)

奏前据苏松太道宫慕久等禀报，英酋德庇时于八月八日驶至上海，该道等接见恭顺安静情形，经臣附片具奏在案。兹据该道等禀称：德酋于十日赴该道署中拜谒，十二日设席款待，该酋意甚欣感，席间惟囑巴富尔恪守成约。并订于十三日起程赴浙，余无他言。该道等致送食物，该酋亦俱收领，即于十三日仍坐小火轮船驶去等情。臣查德酋此次来沪，只住五日，即据该道等所禀，其言貌极为恭谨。看此情形，英酋尚能遵守成约，即使他国前来贸易，亦惟待以诚信，不致别有枝节。

李星沅奏佛郎西黎峨等由上海回粤折(道光二十七年九月)

佛郎西欲赴通商五口，查看贸易情形之啦别耳因在朝鲜国境损坏船只，即由彼带兵先自回粤，其余黎峨巴亚潞等带回兵丁前来吴淞口换船，夷兵并不上岸。黎峨等前赴上海求见该道，情词极为恭顺，当经臣等会同驰奏在案。兹据苏松太道咸龄等禀称，八月十五日据黎峨等知会即日回粤，并呈照会一纸，查阅均系感谢之词。该道查照成案，犒给食物。该夷即于十五日未刻由浦开行，该道等选派兵役密加防范，护送至吴淞口，该夷即带同兵船二只起程，于十六日申刻出口，往西南大洋驶去。

杜绝外夷违约私入内地谕(道光二十八年三月)

谕军机大臣等：本日据李星沅、陆建瀛奏，夷船业已出江入海，沿途并未登岸一折，览奏均悉。现计耆英将抵江苏，应如何照约开导，杜绝违约私入内地之处，着即会同李星沅、陆建瀛一面体察情形，妥筹具奏，一面飞咨徐广缙晓谕夷民，相安无事。至所称上海口岸，本与德酋再三要约，以早出晚归，不准在外过夜为断，所约本属明白晓畅，以后该夷等如复不遵条例，耆英亦应预为劝谕。届时似此违约私行，致有争斗，勿议我国置之不理。该地方官于事过之后，剴切晓谕居民，设遇夷人，何足计较，勿得擅自毆伤，致启他衅。至耆英遵旨前赴上海，果否不致启该夷骄恣妄求之心，不能遥度，着该督察看情形，自行斟酌。

李星沅奏飭游击陈伯龄等密防英夷船只折(同年三月)

英夷此来控诉船小力单，江路袤延，原不难阻遏，但既借称条约，倘必勉强止之，恐彼得以有词，转生枝节，故即坦然示以不疑。惟密飭游击陈伯龄等以导领为由，沿路引之入浅，使彼节节阻滞。所涉之处，必有柴草船停泊，以为疑兵。其沿江炮堤官兵，并不戎装排列，各守各地，若见若隐。该夷颇有戒心，时以江路难行为言，或可潜消妄念。至该夷所请，除飭委大员查办之外，别无要求。臣李星沅因有臬司在彼审办完结，未准所请。该夷总以未接阿利国明文为词，且称臬司现系道员署理，再三渎恳由江宁另派大于道员者前往会查。窥其底蕴，不过意在好胜，希图加以颜色。然以藩司出省，递尔准行，又恐视为容易，不能不郑重出之，以绝冀幸。谨附片密陈。朱批：甚是。

李星沅奏英夷违约至青浦与粮船舵工水手争殴折(同年三月)

据苏松太道咸龄禀称：二月四日，英夷麦都思等三名，违约至青浦县地方散书，与看守粮船舵水手争殴，受有微伤。该县获犯二名枷责，并将麦都思等送回上海。该领事阿利国因获犯无多，派拨夷目坐小夷船由大江来臣李星沅衙门控诉等情。臣等当即飭委署江苏臬司倪良耀、候补道吴健彰驰赴上海分别查办，并飞行沿江各营县严密防范，晓谕居民，毋庸惊慌；并委素谙夷务之京口右营游击陈伯龄，署高资营

都司张攀龙同镇江府知府沈濂，由长江迎赴下游，相机拦截。查系双桅小船一只，并无后继之船。有该国翻译官夏巴能通汉语，即向询问。知因麦都思等被殴，苏太道办理缓迟，遵照章程，如无总理五口大臣之处，即赴省垣大宪处申诉。于二月十六日从上海开行，先将船上大炮门封闭，炮位横置船内，自副领事罗伯孙等下至舵工水手，共五十余人。沿途概禁登岸，不与人民交接。复经陈伯龄等告以省垣大宪已委司道前往查办，获犯多名，解赴上海，此时案必完结。即有呈件，亦可代投，令其即速回棹。夏巴口称，系奉阿利国所委，若不面见总督，必被谴责。况彼此久经和好，此番孤船伸冤，沿江炮堤官兵，亦断不肯轰击，坚欲前进。相持竟日，言貌甚恭。因江路节节浅阻，二十六日始抵附近省城之八字沟江面，不能再进。臣李星沅即于二十七日传见，据投申陈一件，复与陈伯龄等所禀相符。面询该译官夏巴，惟恳另委藩司大员，前赴上海会同案司查办，别无他求。适臣李星沅接到臣陆建瀛来信，知署臬司倪良耀行抵上海后，将滋事水手拿获，就近询办，该领事阿利国已无异言。海运米船亦经畅行无阻。当向夏巴剖切晓谕，夏巴等口虽感颂，仍以未得阿利国行知为词，且称赴省申诉，原非不得已，必委官职大于道员者，乃不枉此跋涉。因查苏松大道咸龄办理此事原欠紧速，有无措置失当，以致远不申陈，自应暂行撤任，飭委江宁藩司傅绳勋再往确查。并访有请假在籍直隶候补道陈之骥，曾任浙江宁绍台道，练习夷情，亦即派令前往，会同署臬司倪良耀详慎体察，务期日久相安。一面给予回文，赏以食物，该酋等均各欣服。仍派游击陈伯龄等即速押护出江。

陆建瀛奏赴上海至野鸡墩地方查有夷与民人互殴折。(同年三月)

原奏窃臣起程前赴上海，行抵野鸡墩地方，密加查访。麦都思系英夷传教之人，六吉系英夷行医之人，均属该夷所推重。时常私往附近厅县游行，或与人民口角齟齬，回沪时辄讳匿不言，恐人知觉无颜。此次在青浦互殴，经青浦县查知护送回沪，该夷等再三拦阻，虑为众夷所知，是以一到即结。咸道以为夷情恭顺，越日致书麦都思等问其伤痕曾否平复，该夷变羞成怒。以致领事阿利国遂谓该道不为严办斗案，转生轻侮，并欲阻止米船，遣人赴督臣衙门控诉。迨署臬司倪良耀督拿各犯解沪审办，候补道吴健彰又复明白开导，该夷目已极输服，委无另有起衅别故。惟该夷遣人赴督臣控诉之船内，有通事夏巴甚属狡黠，恐其不即转帆，已飭候补道吴健彰谕知阿利国令作夷字信缄，由臣飞寄督臣转交夏巴阅看，俾免逗留。

李星沅奏阿利国致罗伯孙夷书折(同年三月)

三月三日，准抚臣递到阿利国致罗伯孙等夷书一封，当因罗伯孙等船只，早已开行，无从付给，即封给藩司傅绳勋转送代理苏松太道吴健彰发还。至傅绳勋等沿途适遇阴雨难行，至三月十日始抵上海。现在如何查办，虽未据禀报。连得抚臣及上海各属函禀，佥称该夷罗伯孙等于三月五日回至上海，面见代理苏松太道吴健彰，情词甚为悦服，民商亦均相安，似可无事。

李星沅等奏英夷违约在青浦地方争殴折(同年四月)

上海地方通商以来，本尚安静，夷目阿利国虽不及前目巴富尔之明白，而以理劝导，亦颇折服。惟充当翻译之夏巴屡次挑唆生衅，均经苏松太道咸龄及各该地方官刚柔并用，设法开导，幸而无事。即该夷违约远行，致被我民殴逐，已非一次。该夷既虑我民与之为难，又畏其公使责以违约，每多隐忍不言。现麦都思在青浦地方与看守粮船之水手争殴一案，该夷明知粮船水手与居民气类各殊，且已奏明遣散，所留看船舵水散布各县，为数不多，无足介意，并可挟制地方官为阻海运米船之计，乃天夺其魄。夏巴来省捏诉阻风拦浅，行程不能迅速。臣李星沅、臣陆建瀛于得信后，飞飭署臬司倪良耀等星夜驰往，会同该道咸龄设法防护。水手王名付等十名，当堂枷责。向阿利国妥为劝谕，该夷目俯首无辞，海运米船开行无误。迨夏巴回至上海，则已技无可施，惟以麦都思等被抢失物为词，狡执不服。屡讯王名付等，实系因闻殴而抢夺，尚非虚诬，已照律将为首之王名付拟流，为从之倪万年拟徒，由臣李星沅咨部完结。该夷及各水手亦已无可置喙，不致再留嫌隙。苏松太道咸龄，署青浦县知县金熔办理均无不善，应请免其置议。至该夷以闻殴细故，借前有条约，赴省控诉，任意乖执，势将接踵效尤，自应以杜其入江之念为第一要义。但该夷性极狡谲，若明白不准入江，彼必以为我之所忌在此，动辄阑入，威制不可，理喻不能，终鲜善全之策。臣等公同筹议，查原定佛郎西通商条约内，倘有不平之事，该领事官径赴经理五口大臣处控诉。如无总理五口大臣，即申诉省垣大宪一条，系因钦差大臣并非常设之官，各该夷遇有事件无可控诉而设。现在钦差大臣关防系两广总督兼管，仍有总理五口大臣，该夷遇有控诉事件，应令遵照原定条约，赴总理五口大臣处申诉，不准前赴各处省垣控告，庶可折其桀骜，杜遏将来。其上海口岸，前经英夷德酋会同前任苏松太道宫慕久议定，该夷行走之地以一日往还为断。前夷目巴富尔照会苏松太道文内，亦有准其雇买船只轿马，水陆往来，均不得在外过夜之语。今青浦县离上海九十里，来回一百八十里，穷日之力，断难往返。该夷违约远行，地方官公事繁多，安能照料周遍，应遵旨预为劝谕，以免再滋衅端。惟该夷公使业已更换，新到之酋，臣耆英尚未谋面，未便贸然照会。若亲赴上海面加晓谕，则该夷一经赴省控诉，即有经理五口大臣亲临查办，诚如训谕恐启其骄恣妄求。现将大局筹定，函商臣陆建瀛意见，亦复相同。此外别无应行赴苏查办之事。臣耆英业已顺道查知为由，将原定条约，剴切申明阿利国遵照。并会同密致署两广督臣徐广缙督飭六品顶戴委员黄恩彤、运司赵长龄照会该国公使，妥为办理，以仰副皇上诰诫淳淳之至意。

李星沅奏代理苏松太道吴健彰禀报英船驶至上海折(同年七月)

据代理苏松太道吴健彰等先后禀报，六月七日，有英吉利火轮船一只驶至上海，称系该国新到公使船只，即据领事阿利国带公使文安、副领事官赞臣并翻译官一名前来道署。询悉五月二十日由广东、香港至厦门、宁波一路查看五口贸易情形，并称商等在上海生理，深蒙保护，特来拜谢等语。情词极为恭顺，体察亦无他意。即于

九日仍坐原船出口，驶赴浙江洋面而去，居民皆不惊疑等情。复查两广督臣徐广缙先后函称，该国新换公使系名文翰，曾在虎门接见，近复接准照会，将赴通商各口岸察看等语。今来上海公使系名文安，似由字音传说之讹。

李星沅奏拒绝俄船至沪祈准验卸折(同年八月)

窃据代理苏松太道吴健彰禀称：七月一日，浦江驶到俄罗斯国商船一只，由英夷领阿利国转送该国夷商李顿北禀开：该国极东亚美理驾西北地方，设有公司专管营皮货，今派拨船主装至上海销卖，祈准验卸等情。查系狐皮、麦粉，并无违禁货物。应否准其一体贸易，禀称核办前来。臣等查俄罗斯国向在北地陆路通商，不比西洋各国航海贸易，上海非该国应到之地，核与定例不符，所请难於准行。批飭该道明白开导，谕令及早回帆，船货无庸验卸。旋据该道禀称，该船主以船遇飓风，修舱略须时日，仍祈验卸货物，可否请旨遵行？又经臣批飭，事关通商大局，应俱率由旧章，未敢据情人奏，仍飭妥为劝谕上紧回帆，无再观望。并飭密谕英夷领事阿利国，上海通商西洋国已不少，若再令俄罗斯搀越贸易，甚非该国所宜，应即随同开导。兹据该道复称，阿利国函送该船主禀开，已拟放出港口，由即日起限二十天修船已毕，起碇驶回，断不有误。发还船牌、货单、人名单三张，俱已收回等情。臣复查该船舵水人等共二十八名，有炮六门，计货二百余顿，值钱二万余千，似不过希图贸易。然既违定例，即断难准行。且安知非故为尝试，夷情叵测，不可不为预防。故于禀求请旨，当即正言拒绝。使之无所觊觎，以杜后患。即据立限出口，情愿原船驶回。即批飭该道于该船起碇时，赏给食物，并派水师将官随同防护送出江苏洋面，以示怀柔。仍将该船出口日期，飞速具禀，另行奏报。朱批：所办甚是，可嘉之至。

李星沅奏俄夷商李顿北载狐皮等货船具限出口折(道光二十九年二月)

窃照俄罗斯夷商李顿北装载狐皮、麦粉等货，至上海地方恳求验卸，当经臣等将批飭开导，及该夷遵奉出口缘由，先行具奏。一面札行苏松太道督飭该管营县妥慎防护，毋许登岸，并禁止民船驶近夷船，私行交易，查明来踪去迹，禀复查办。兹据该道麟桂等禀称，该夷船于出口后，赶紧修舱，并未登岸，亦无奸民勾串往来。随经问明行期，赏给洋酒食物，该夷深为感悦，已于八月十三日乘风起碇，望东南大洋而去。当知会苏松镇总派拨兵船押护出境，第恐该夷船行驶迅速，兵船赶护不及，无从交替邻省，该道等复向英吉利、米利坚、佛郎西各夷详加讯问，佥称俄罗斯边界与西洋各国接壤，彼此互市多年，李顿北商船系由俄罗斯泛海而来，止求通市，并无别故。其起碇之际，声言仍回本国。各该夷亦皆稔之等情。臣等伏查俄罗斯为北地陆路通商之国，今复航海而来，诚恐别有隐情，密加采访，始知该国边界与西洋各国昆连，船只亦复相仿，核与苏松太道所禀无异。其为来自西洋，似无可疑。先经禀求贸易，该道等遵照批飭，明白晓谕，亦即俯首无词，具限出口，兹将原船起碇望东南大洋驶去情形，尚为驯顺。惟该商船既至上海，难保不往沿海各省希

图卸货，除飞咨浙江、福建、广东一律查探外，所有该夷船放洋驶去日期，谨合词恭折具奏。

李星沅等奏佛国公使等查办五口事件来沪折(同年二月)

臣等接据苏松太道麟桂、提标右营参将侯攀凤先后会禀，上年十二月二十九日，探报，佛郎西国派有公使大臣陆英带同水师总炮兵官格那驾坐兵船一只，驶进黄浦江，该道等率同厅县赴船查问，据该公使称，由该国派来查办五口事件，词意极为恭顺，并无要求情事，亦无夷兵水手登岸，当即以礼相待。嗣据报于本年正月十九日起碇，前赴宁波、厦门、福州、广东等处，查看通省贸易情形。该道等查照向例送给食物，该夷等意甚欣感，即于十九日辰刻乘潮出口。该夷等在沪两旬，居民亦无惊扰。现在上海地方，华夷安辑，堪以仰慰宸廑。

程懋采奏查核英夷并无入城游玩并饬麟桂申明禁约折(道光二十九年五月)

臣于本月十六日钦奉廷寄，道光二十九年闰四月六日奉上谕：给事中曹履泰奏英夷驯服，一切善后事宜当妥为筹画一折。现在英夷罢议进城，照旧通商，以后民夷自可历久相安。惟夷情好动，遇事生风，仍不可不防其渐。若如该给事中所奏，近闻英夷改装易服，前岁有人苏州游玩之事。所有五口通商地方，人烟稠密，难保不任意嬉游，潜踪溷人，甚或借端生衅，以致激成事端，所关匪细。著各该督抚密饬所属各员，于通商码头，剴切密示，常川稽查。总以遵守旧约为词，毋令夷人越境闲游，庶可永弭后患，是为至要。钦此。仰见圣主杜渐防微之意，遵即恭录转饬沿海各属，慎密稽查。伏思善后条约内载，五口英商不可妄到乡间任意游行，更不可远入内地贸易等语。臣前在江苏巡抚任内察知该夷情状，桀骜异常，在我者稍形张皇，在彼者愈肆骄恣。惟有坚持条约，以静制动，尚不致别生枝节。二十七年五月，该夷载有洋米入口，请照闽广成案，官为收买，并请免纳船钞，经前道咸龄转禀前来。臣以奏定条约，并无载洋米官为收买免税一节。展转驳斥，该夷帖然无词，复载而去。二十八年四月，访有夷人四五名，改装内地衣服，乘坐小船，潜赴浙江、湖州、南浔一带，探问丝价，当即援照条约，密饬前代理上海道吴健彰，向该领事阿利国查询。据即印送夷票，恳饬委员驰往追回，面交该领事治罪；其内地船户亦经该道从重惩处。又于六月内，有佛天主教赵方济雇内地民人，持有照会公牒投臣衙门，臣以条约内无天主教准用照会之文，遂将来文并投递之人札发该道，传同佛夷领事当堂拆阅查办。据该领事敏体呢情愿将照会收回，议定嗣后遇有公事，仍由领事与地方官商酌，不准天主教干预各在案。此因事已办结，是以仅咨督臣，未敢入奏。今该给事中奏称，英夷改装易服入苏州游玩，恐即前事传闻之讹。苏州省会地方实无该往来踪迹，人所共知。但犬羊之性，逼处海滨，到处一苇可通，而内地民人又恐利其舟资，潜引溷入，必至转生事端，自当恪遵谕旨，总以旧约为词，密饬各海口文武常川稽查，妥慎办理。一面专札现任上海道麟桂，先于无事之时，常与各该夷领事议论此条禁约，所以保护该夷，历久相妥，俾领事约束夷人，勿任违

背滋事，地方查禁船户，亦勿任勾引为奸，以期弭患无形，仰纾宸念。

陆建瀛等奏密令麟桂妥为开导催夷船回粤折(道光三十年六月六日)

查探夷目麦华陀于五月十六日驾坐火轮船，由天津驶回上海，并无动静。臣陆建瀛本拟即日驰赴上海，面为开导，因前接该酋文安文称别无他意，惟俟天津及广东船到，即定行止。夷性狡诈，稍有牵连，必将另生枝节，是以暂住苏州，密嘱麟桂等妥为开导。叠据麟桂等禀称，该酋现已情愿回粤，适有广东驶来火轮船一只，于五月二十二日到吴淞口外，该夷之妻嫌其窄小，不愿乘坐。尚有大火轮船一只，于十七日从广东开行，计期二十四五必到，该酋定于二十七八日起碇回粤。设此船必到，即将天津驶回之船，修理完整，六月一日，必能开行。现在该国夷商，均愿该酋速回广东，竭力怂恿，图省供给。臣等伏查该夷惟利是图，因原定章程有火轮船免税之条，遂以送信为由，往来各口，夹带货物，偷漏关税，是其故智。而妇言是听，尤属夷人常情。揆厥情形，尚非饰词观望。该酋回粤之意，虽决而行未定，臣陆建瀛未便远离，自应暂赴江阴、常州一带，查阅营伍，察看动静，密为防维。

陆建瀛等奏洋泾滨地方英人建之天主堂及火药被雷雨击毁折(同年六月三日)

上海洋泾滨地方，有该夷所建天主堂一所，为群夷聚居之处，中有十字大梁，梁下有一高台，上供十字架及耶苏木偶，每逢礼拜之日，各国夷人俱齐集听经。五月十四日未时，疾雨迅雷，将十字大梁及高台十字架木偶全行击毁，并其所存火药全行漂失。臣等查该夷终日戴天履地，而不知天地之高厚。其所尊礼者，惟此十字架与木偶，甚欲诱我愚民投入彼教，其居心大不可问。今天威震怒，诛其所尊，洵足褫奸夷之魄，而破愚民之惑。此皆我皇上敬天勤民，有以感召。臣等欣幸之余，更深寅畏。

陆建瀛奏禁英人驶船赴津折(同年六月十四日)

英夷现在上海合官商、兵役、男妇、大小统计不满二百人，如敢有桀骜要挟情事，则是螳臂当车，该夷愚不至此。文安先求递公文，旋复遣船赴津，臣等责以不守信义，该夷酋外虽强辩，内实惶恐。其意以为天津必有复书，迨麦华陀船回，乃诡称天津相待甚优，该夷酋佯为得意，夸耀众夷。臣等即密飭苏松太道麟桂等谕以大皇帝仁孝英武，明知天津不在五口之列，不与深究，实为曲示怀柔，此后当知感知惧，勿得违约擅往。该酋俯首无词，携眷回粤。夷性犬羊，将来或另易一人，另易一辞，复相缠绕，皆不可知。诚如圣谕，能勿早为之计？伏查各海口，如厦门、宁波，该夷不过视为侨寓。广东民气最固，彼诚未敢轻犯。上海造有夷船，积有夷货，亦未必肯自毁坏。天津则道光二十年，曾驾兵船十四只游奕海外四十八日，不能进拦沙江一步，二十三年又驾货船二只，亦未得进，是天津地利，该夷之所深悉。然而诡譎故智，如果有意挑衅，必仍以赴津呈诉为词，而取道于江南。臣等就江南海口

观之，如刘河口、斜塘口、福山口、白泖口，或外宽而内窄，或外深而内浅，大船皆不能入，是地利不必不如天津。江阴、靖江相对之处，为由海入江之口，二十二年彼即从此撞入。该两县沙洲民人，胆力可用，当时即有杀贼者，两县未遭蹂躏。是人心不必不如广东，要在措置得宜而已！夫攘外必先安内，其土匪遇事生风，恐赫良善，希冀乘机枪夺者，固难姑容，即凭空造议，托为义愤，图冒功赏者，听之不察，亦足以酿衅僨事，全在随时惩办，俾内地安而益安，庶外侮无隙可乘耳！至苏松太道麟桂，人颇机警，于轻重缓急，尚有斟酌。候补道吴健彰籍隶广东，素谙夷语，不为通事所蒙，此次先以利害晓谕夷商，故该酋无所施其伎俩。盖夷酋多以有事为荣，而钱粮出自商货，前因烧烟折本，各商情愿醵金闹事，乃两载停贸。事平以后，该夷酋又未将费给还，各商均怀悔恨。该酋等屡欲复闹而不果者，夷商不附故也。

陆建瀛奏夷酋文安携眷回粤折(同年六月十四日)

奏据麟桂等禀报，该酋文安于六月一日携眷登舟，五日起碇回粤，别无要挟情事。上海地方民夷，亦甚安谧。

陆建瀛等奏沪禁止俄国通商折(同年九月十七日)

奏俄罗斯国船只于七月二十二日来沪，臣等以俄罗斯列在北路陆地通商，上海非其应至之地，谕命及早回帆，该船于八月十二日启碇，向东南洋面驶去。(谕军机大臣等：陆建瀛等奏俄罗斯国李顿北本年七月二十二日来沪，寄泊海口，行文英夷领事阿利国，转求通商。该督等以上海非俄罗斯应至之地，转飭该道查照成案，谕令回帆，旋于八月十二日起碇，向东南洋面驶去等语。俄罗斯国李顿北，前于道光二十八年曾至上海，亦系由英夷领事转求通商，经李星沅、陆建瀛开导晓谕，起碇出口。今事隔一年，又复重来，是俄罗斯妄念未息，亦难保非英夷暗中招致。倘此次回帆以后，再来尝试，该督等惟当坚守定例，飭令回国。并严禁内地人民与之交易，以杜事端，而免覬觐。又谕：上年俄罗斯带头人私入边界，阻拦查边道路，当由理藩院咨文行咨该国，并将咨文钞给萨迎阿等阅看。据该国萨纳特衙门咨复文称，接奉咨行后，当即札交总理迤西锡毕尔边界之官，令其查明回报，俟该处查来，再行咨复，并称必不致因此事有伤和气等语。所有萨纳特原文，着钞给萨迎阿等阅看。现在哈萨克边外，该国带头人是否业已撤回，该将军等仍当随时密访，相机妥办，俟库伦接有续到咨复，再行飭知查照办理。)

陆建瀛奏山东平度州禀获传教夷人转发赵方济认明管束折(同年十月十三日)

查原案大西洋国亦名意大利亚国，罗类思系该国罗马府人，于道光二十六年冬间，驾坐夷船，前来上海。维时约年四十余岁。由佛郎西公使喇萼呢领见前任苏松太道宫慕久，称系该国派来上海主教，当经宫慕久盘诘问确，查照奏定章程，准其在上

海建堂礼拜，不得擅入内地。该夷即在上海建造天主堂，未竣，二十七年九月，另换佛郎西夷人赵方济前来主教，该夷罗类思即驾坐其夷船望南洋驶去。是年十月，准山东省解到平度州禀获传教夷人郎怀仁一名，亦照定章发交前任苏松太道咸麟，转发赵方济认明管束，并咨明总办夷务两广督臣在案。至罗类思去后，查明实未重到上海，亦无高姓其人。臣等查夷人之诡譎煽诱，固属可恶，而汉奸之改名易姓，甘心为之服役，依附挟诈，尤堪发指。即如松江府城内华亭县有常平仓二所，一在县治之西，一在娄县之东，系前天主堂基改建。本年四月佛郎西国领事敏体呢忽请拆还堂基。经苏松太道等与之辩论，再三坚执。臣等当以若无汉奸从中播弄，该夷人安能备知详细，密飭访拿。一面告以松江非通商口岸，本不在开禁行教之列，况已改为仓敖，应即钦遵前奉谕旨，毋庸查办，亦不准擅自入城。迄今数月，汉奸之主名，虽无从查实，而该夷已不敢复理前说，是其一端也。此外闽浙无赖之徒，时而朋比为奸，时而构煽生事，奸狡百出，全在地方官认真惩办。惟有督飭苏松太道及上海厅县，不动声色，密访严拿。据定章以驭外夷，执法律以惩汉奸，杜绝勾结，潜消隐念，以仰副圣主慎重海疆之至意。

陆建瀛奏飭文武印委各官认真查拿烟犯并禁邪教流弊折(同年三月二十日)

奏查该道麟桂所奏各情，前曾据其面禀。如英夷经费不足一条，缘该夷一切经费，悉取资于商税。前因广东洋行历年拖欠商本甚钜，乃于近海各省，请添口岸，以为既添五口，即可多增抽分。不意各口起造夷馆，派调领事兵目等项，用度倍蓰于前。而中国所需货物，仍只前数，所增无多，各商均不免亏折。所恃以为利者，惟在鸦片一项。该道请将吸食鸦片之犯，严行拿办，俾买食者少，则烟土无利可图，盖欲不战而屈人之兵也。但自新例既定而后，生杀之权操自朝廷。臣现在叠飭文武印委各官，于缉捕盗贼盐梟之便，遇有烟犯，认真查拿。节据京口协副将武迎吉禀报，巡江至六洲地方，见匪弃船登陆而逸，于草棚内起获烟土二箱，当即会同文武，将草棚船只烟土一并对众烧毁。又据先后擒获匪陶启运等，起出烟土四箱。并据盐卡委员，候补同知邵襄督同宿迁县县丞范炳，拿获薛和等烟土二百三十余两，均已提省审办。亦即惩一儆百，欲使警不畏死之徒，皆知法网不可悖逃之意。其佛郎西传教一条，夷目赵方济引诱沿海愚民，入其天主教会，已属可恶。遇有习教之人与安分良民结讼，该夷即出头干预，与地方官议论是非，居心尤不可问。臣凡遇此等事件，无不以严词正义，飭命该道传谕领事，严加约束，不准干预，已非一次。并以扶持正学附片陈明。仰蒙训谕：“着各直省督抚会同各该学政转飭地方官及各学教官，于书院家塾教授生徒，均以御纂性理精义圣谕广训，为课读讲习之要，使邪教不禁而自化等因。钦此。”该道麟桂驻扎上海，有抚民御夷之责，应即遵旨责成该道督飭所属，严禁邪教之干预讼案，以杜其结纳。至所请将苏松太道等缺皆用粤人一节，该道见江苏候补道吴健彰籍隶广东，凡有华夷交涉之事，委令查办，无不迎刃而解，因有此议。查夷商不通汉语，一任夷目从中播弄，吴健彰通晓夷语，能以夷语径向夷商开导，破其愚惑，夷目技无所施，故能无投不利。惟粤人未必皆能夷语，其能夷语者，未必皆属可靠。若如所请海口道员专用粤人，诚如圣谕，恐滋

流弊。

第三卷 咸丰(上)

奏禁鸦片私售以削英人之势折(咸丰元年二月十一日)

查英吉利夷人桀骜不驯，惟知贸易为务。该国官为商举，故凡关众商事务，众论如一，则该夷官无不遵办。即该国王暨各官俱任众商去留。道光二十年，该夷滋事，即因各商亏本，众议聚费雇船犯顺。二十三年就抚，求给兵费，即作归还众商之款。该夷向与各外国互争地界，俱系预先敛钱雇兵，每人以洋钱八元为率，如不得胜倍之，再不胜再倍之，不惜重费，故人皆拼命向前，总期全胜。事后即以所得该处物归还雇兵之款。其实即以他国之货财，为攻他国之兵费。此即该国攘夺逞横之故智，借此以为得计。又准五口通商，每年得中国四五千万两。自此又与印度国相争，收得三处，益觉张狂，傲睨各国。刻下各外国亦忿忿而视，该夷亦有骑虎之势。该国除收商税之外，别无钱粮，深虑经费不足，意在猎取他处，以济经费。现在各国防备甚严。中国因有五口通商，众夷商因之获利，不肯滋事，该夷无可渔猎，其技已穷。又恐中国窥其底蕴，不以彼类为意。是以近日每以进城投文等事，故作波澜，以张虚势，经圣明洞鉴，谕飭拒绝。天津既不收文，上海驱其回粤，该夷无可置喙，亦既贴耳就范。宜乘此釜底抽薪，使其自窘。一面预筹经费，选委干员，以防海为名，凡属海口，加意准备。俟内地经费充足，兵勇器械全备，即可一鼓歼尽丑类。至攻夷之法，先杜其取利，用其所忌。夷人与中国通商，惟鸦片土获利最厚，内地稽察虽严，各省地方辽阔，奸民惟利是趋，难免不偷漏私卖。吸食之例虽严，食此物者，因有烟瘾，一日不食，精神疲惫，不能动作，甚至不省人事，是以冒法偷食，行险徼倖。今请通飭各省，凡吸食之犯，一经获案审实，即照例办理。贩卖者无人，买食不驱自退。中国办内地之民，外国亦无可借口。夷人不能获利，五口夷商，经费浩繁，自不能久住。至夷人最惧粤人，且广东人深悉夷情，素称勇敢，遇事齐心，夷人虽忌而莫敢何如。即如福建厦门之兴泉永道，浙江宁波之宁绍台道，江苏上海之苏松太道皆用广东籍贯之员，加以升衔，使之妥办，使五口声气相通，夷人更生畏忌。该夷等远涉重洋，既无利可取，更多畏忌，又无可借口，即欲另生枝节，滋生事端。内地经费充足，筹备严密，文武绅民齐心，以逸待劳，该夷等自不敢故犯。但事关全局，宜缓而不宜骤，随时布置，不事张皇，厚积经费，务期充足，应请飭下部臣，妥为筹议。务使多多益善，专为防海要需，他事不得指拨。抑更有请者，夷税一项，向本无之，自通商以来，每年粤海关可得百余万，江海关可得四五十万，闽海关可得一二万，或将此款飭该各关永远封存，不得拨动，以十年为率，计有一千四五百万，以夷输之税钞，为攻夷之军需。诚能久储不动，则愈积愈多，遇事更无虞短绌。所有筹备防海事宜，早经奉旨飭办。刻下如江苏通江海口之鹅鼻嘴，添兵守卫，上海之吴淞口，亦经添雇兵勇船只，并传谕各商每船出洋，令其各带枪炮，添雇水勇，于洋面防范。明则巡洋捕盗，保护商船，暗则集勇联兵，预筹劲旅。请仍谕飭沿海各督抚，将各口要隘，某处应添炮台若干座，兵勇若干名，战船若干只，用若干经费，定以期限，一律完备。并将遵事宜，议定章程，先行绘图贴说，奏呈御览。总期实力速办，不得以目前无事，任意因循。并飭各

省大吏，妥选干员，总理其事。则内备整严，无虞外患。其米利坚不过附於英夷之末，借彼之势，其心实不相洽，而互相猜忌，尤不足虑。至佛郎西欲不以买卖为事，专在中国传教。该国素奉天主，即耶苏。而耶苏产于意大利亚国，夷人延为教化王。该佛夷国王与之行礼，尊奉甚恭。教化王以下，又名为主教，主教以下又有铎德神父之名者，分赴各国传教散书。上海先有罗类思主教，去后又来一夷名赵方济。手下铎德神父，或分赴沿海五口，传与内地无赖游民，或改装私入内地，教徒习教。正恐传布日广，渐滋事端。近有该国李绅符二人，在蒙古察哈尔地方被获，经直隶督臣奏奉谕旨，委员解送广东查办。该夷经此挫折，谅以后自知敛迹。惟上海入教之人，遇与民人争讼，每乞该主教赵方济转使该领事官，与地方官议论是非，意存偏护。虽屡经驳斥不行，究属非分要求。至该夷在上海传教，妄神道无稽之说，以惑下愚，上海虽有入教之人，尚不深信。上年五月间，各国供奉该教之天主堂，为巨雷轰击，该夷亦颇震慑天威，习教者亦因之更形涣散。刻下惟以干讼护庇教内之人，为结纳众习之计。应请谕飭各该督抚，转飭地方官，凡遇词讼案件，随到随结。如有习教之人与民人争讼之案，亦即秉公讯断，使该夷无可借口，倘复从中阻挠干预，概不准理。如此，则教内之人无可仰仗于该夷，其众心自不归附，将见其教不攻而自解矣。麟桂又奏各夷所用内地民人及习教游民，每每到处探听内地公事，为该夷等通信。机事宜密，所拟各层，应请密飭海疆大吏，不动声色，妥速筹办，庶免另生枝节。

陆建瀛奏(同年七月十二日)

窃查道光三十年四月内据苏松太道麟桂详称，佛郎西领事敏体呢，以华亭县仓廩系天主堂基址，应请给还等情，飭据前署松江府候补知府锺殿选，前署华亭县令升通州直隶州知州金咸查复。金咸援引县志，指称该县常平仓二所系天主堂改建，请将仓廩拆去，让还旧地。锺殿选援引上海县城内关帝庙系天主堂改建，道光二十四年，前升道宫慕久另购空地给还一案，请于城外空闲之处，另行购地抵还，由该道请示前来。臣陆建瀛以佛郎西原定条约，只准在五口通商地方建造礼拜堂，不得越界营谋。道光二十六年，钦奉上谕：“康熙年间，各省旧建之天主堂，除改为庙宇民居者，毋庸查办外，其原旧房屋尚存者，如勘明确实，准其给还。该处奉教之人，仍照现定章程，外国人不准赴内地传教，以示区别等因。钦此。”松江距上海一百数十里，系属内地，不在五口通商之列。其仓廩为粮储要地，较之庙宇民居更重，是否天主堂旧地，已不可考，且既经改作，亦非原旧之房屋，应即遵旨，勿庸查办，批驳不准在案。据本年六月十五日，臣在清江浦接据麟桂禀称，本月六日，探有佛郎西兵船一只，驶进吴淞口，停泊黄浦江。据该领事照会云，系该国水师提督罗格睦耳由澳门到此查看天主堂，尚有兵船二三只，随后驶来，并约八日面晤该道等。届期相见，语言虽属恭顺，而意在借兵要挟，开口便要给还松江府城内天主堂地基。如该道不允，即赴省见臣等语。臣当批飭坚守条约，妥为驾驭。一面咨行提臣暨沿海各镇，不动声色，加意严防。臣思夷性犬羊，佛郎西尤甚。扬汤止沸，不如釜底抽薪。此番饶舌，必系该夷主教赵方济与内地入教者暗中怂恿争执，当即罗列

二十四、二十六两年成案，逐条指示，并添委前署苏松太道即补道吴健彰前往，会同查办。伏读谕旨内给还该处奉教之人，自指内地而言，并非给还佛郎西；如果松江府属奉教之人要还此地，即令开具姓名住址，由地方官传案诣勘，照例核办，佛郎西不得过问。以内地民人，虽被惑入教，断不敢明开姓名住址，公然赴案，冀可不烦言而解。朱批：卿等处之，尽合机宜，俟办竣核奏可也。

陆建瀛奏(同年七月三十日)

奏佛郎西兵船驶至上海，要求给还松江府城内天主堂地基，业已严词拒绝。该夷闻臣等揭破其奸，无可借口，即于七月一日将兵船开驶出口，待风放洋。臣陆建瀛由扬州回省，孰知另有公易行夷商，托英吉利夷目麦华陀私租民地，围筑篱笆，与正月间挖道路之处切近。闽人疑其复图开路，关碍坟墓，因而聚众不依，于七月三日，编贴告白，痛詈各夷，牵及索松江府城天主堂地基一事，有鸣鼓而攻之势。各该夷情甚惊惶，佛郎西夷目敏体呢即将兵船调回，保护夷馆。适委署苏松太道吴健彰已行抵上海，即会同本任苏松太道麟桂，督饬厅县传谕闽广会馆董事，各自约束其乡人，并出示晓谕，不许滋生事端。查明公易行夷商私租之地，并未立契交价，谕令不准私租，并向各该夷领事谕以祸福，嘱其不可再犯众怒。各该夷僉称现不开挖道路，惟求好为保护，查拿匿名揭帖之人，照例惩办，情词甚为恭顺感激。该道吴健彰因佛郎西夷人专以行教为事，并无贸易，令其兵船前来，必非无故。向各国夷人密探，据称佛郎西国王为其下所逐。现在只有头目一人，副头目十二人。来沪之兵船，上年九月已泊广东之澳门、香港等处，本年五月始由香港开来，一俟风顺，即当开行。尚有二号兵船一只，火轮船一只，仍在香港。此船各处游奕，并不滋事。至松江府城天主堂地基，系敏体呢欲争为礼拜之所，借以诱人入教，已奉揭破，敏体呢亦无置喙等语。臣等查英夷之开挖道路，与佛夷之索还天主堂地基，本系各国各事，绝不相侔，因公易行之私租民地，与佛夷之借端要求，会逢其事，闽人所贴告白，遂连类而及之。该夷等各怀疑惧，颇有戒心，江苏民气柔弱，久为该夷所玩视。今得闽人此举，洵足褫该夷之魄，而鼓江苏绅民勇敢之气。现在各该夷惟求地方保护其贸易，闽广民人亦受地方官指挥，不致另生枝节。惟夷性诡谲，促之过急，则奇货可居，处之以平，即废然而返。臣等业已密饬该道等，外示镇静，内严防范，坚守成约，随机筹办。一俟该兵船出口，再行具奏。

陆建瀛奏(同年八月十日)

据苏松太道吴健彰禀报：七月十五日，为内地祭扫坟墓之期，该道以闽人前次所贴告白，系专为保护丛葬处所起见，诚恐借祭聚众，滋生事端，即督饬上海厅县，传谕闽人，止准绅商六七人前往致祭，并多派委员，妥为弹压。闽人既恪遵戒谕，夷人亦同深感激。佛郎西兵船即于十五日出口。其兵头罗格睦耳，谆托大西洋夷向该道致谢，并称已嘱该国领事敏体呢，教主赵方济，谨遵条约奉行。尚有二号兵船火轮船或来或否，均未可定。兵船出口，由浙闽至广东，稍有耽延，即行回国。

陆建瀛奏(同年闰八月一日)

据松江府详据华亭娄县绅耆士庶以天主教诱惑愚民，大为风俗人心之害，郡城旧有天主堂基，久已改建常平仓，忽闻该夷欲来清厘，人怀公愤，呈请严禁等情。除批准立案嘉奖外，惟佛郎西本无贸易，专为传习天主教，前此驶来兵船一只，虽以索还天主堂地基为词，密探实情，仍是收取教费。盖入教之人，贫者饵以微利，富者则令出钱，故其兵船各处游行，无非为利。而船内又多广东无赖，不尽夷兵。但能持以镇静，彼即无所施其伎俩。惟内地愚民，被其煽惑，竟有子弟从教，父兄阻止，而子弟转向该夷告诉之事。亦有邻里口角，该夷袒护教徒，径向地方官扛帮滋讼。此等风气，断不可长。臣等现拟申明原约，定为章程数条，咨会两广督臣，并行知苏松太道，照会各夷，妥慎办理。朱批：甚妥。

陆建瀛奏(咸丰二年六月二十二日)

据苏松太道吴建彰禀称：五月十五日，据佛郎西领事敏体呢函称，该国公使噶布当带同提督总兵人等，驾坐小号火轮船一只，兵船一只，前来上海，巡查贸易事宜，嘱令该道率同上海文武各官，于五月十九日午后，前往迎接，并询如何交接等情。该道答以中国监司大员与外国公使自应以平行礼相见，按照中国礼节，彼先来拜，再往答拜，无率同文武各官先往迎接之礼。乃敏体呢以为慢待来使，心不输服，往来辩论称，欲赴臣衙门指告等情。臣查驭夷之法，总以坚守条约为要。该国原定条约，内开佛郎西大臣与中国京内京外大臣公文来往，俱用照会等语。道员本在京外大臣之列，况该道管理海关事务，即与粤海监督体制相同，必当以平行礼接见，即飭严词开导，妥为办理。又据该道禀称，该夷自知理绌，即令同来之提督古姓，前赴道署请见，情词恭顺，礼貌卑逊，称其公使途中感冒，令伊先来致意，迟日来拜见等语。该道因其以礼先施，即传知领事敏体呢，定于二十二日前赴敏体呢寓所，以平行礼与噶布当相见。该公使颇行跼蹐，设席款待。二十七日，噶布当即往道署答拜。该道将臣批词，逐句传谕，该夷额手称是，不敢饶舌。惟云近来广东公事，诸多间阻，每有照会，迟至两三月不复，商人抱屈无伸。此次本拟赴臣衙门告诉，因有事回粤，俟后再来等语。该道告以广东公事，应就近在广东钦差大臣前诉理，两江不得越俎代庖，而该夷再三托其先为禀知而去，旋于六月二日登舟出口，五日放洋折回广东。

向荣奏(咸丰三年三月三十日)

本月二十三日，探有夷人火轮船一只，驶过镇江地面，并未开炮击贼，意殊叵测。查前接署督臣杨文定来咨，据苏松太道吴健彰禀称，夷人恐贼匪赴沪抢掠，彼国兵单，只能自保货物，不敢前往助剿，该道婉词商榷，而夷酋意不可移等语。今竟突如其来，甚不可解。适接六合县知县温绍原禀称，本月二十日，有英夷火轮船一只，驶入该县江面停泊，当飭役上船查询，见有红巾贼匪四人在内。夷酋不与该役答

话，惟交汉字未封口夷信一封，嘱令往南京贼中投递。该役不敢前去，谨将英夷原函，送呈阅看等语。臣接览之下，见原函後面有夷字两行，的系夷信无疑，殊深骇异。臣等当即筹商，总须询明该夷来历，随札飭六合县赶紧携带牛酒等物，亲上夷船，以犒劳为名，问其来意何居？复于二十四日，接署督臣杨文定函称，英夷火轮船一只于十九日行至圖山关，往赴镇江，未与我处艇船答话。各艇船亦即开船随往，贼船开炮，火轮船并不开炮。各艇船回炮轰击，坏贼船数十只，毙贼匪数百人。火轮船已径往江宁等因。臣等查度英夷现与中国通商，其来未必助逆，但该夷惟利是图，助逆助顺，究难测度。且俟六合县亲去查询前来，知其意见所在，再为设法办理。杨文定又有缮拟照会一纸，欲臣盖用钦差大臣关防，差委革员郑魁士赍送前往。臣仰蒙皇上天恩，授重任统领大兵，剿贼是臣专职，自应尊崇国体，未敢擅便。谨将夷人寄贼原信，并署督臣杨文定所拟照会一纸，照录恭呈御览，伏乞训示祇遵。仍一面飞调苏松太道吴健彰迅速前来，令赴夷船，查讯实情，再行核办。

杨文定奏(同年三月三十日)

上海通商各国，惟米利坚最为恭顺，此次贼匪窜扰，经苏松太道吴健彰约会，即发火轮船前来助剿，旋因搁浅转回。至佛郎西则专以传教为事，英吉利又强悍诡谲，惟利是视。兹英夷因恐贼匪赴沪焚掠，冒险前来，恒恐另生枝节。现于所获贼匪内搜出该夷与镇江贼目信函一件，大约言伊此来，并非帮助打仗，系有事与镇江相商，并言上海道所雇兵船，亦不与伊相干等语。旁有夷字，确非假捏。似此情形，显系该夷畏贼焚掠，欲与连和，第该夷总以胜负为从违。所幸江宁贼营已为向荣叠次攻破，扬州贼锋亦为琦善等所挫。镇江又水陆兵勇将即日夹攻，该夷探悉此情，似必退然思返。

向荣奏(同年四月二十一日)

英夷火轮船已经驶至上海，现据苏松太道吴健彰禀称：署督臣杨文定差委革员郑魁士、游击张攀龙齐带照会，飭令会商各国夷酋借用兵船一事，该道邀同郑魁士等到各夷馆会晤。据英夷领事阿利国称，彼国兵船驶往金陵，不过去探贼情虚实，并非入江帮助，亦不前去勾结。佛郎西领事仍称，公使未来，不能作主。美国公使领事称，彼处兵船曾来助战，行至江口，阻浅而回，今将与日本国打仗，不能借用剿贼。至英船前往金陵，讵称未晓其意。该道以各国无船可借，仍将署督臣照会交郑士魁带回。又闻英夷火轮船有往攻缅甸之事，均未起碇开放出口各等语。臣等查夷情谲诈，必须严为防范。现在我处师船将次致齐，堪以剿捕，外夷各船既无可借，即须停止，以免借事生波。

杨文定奏(同年四月二十四日)

臣前因英夷火轮驶至江宁，行踪诡秘，恐回转时，未必肯露实情，是以派员前往，

会同上海严密查探，并缮照会，令其齐往，嘱令各国如肯借船，始将照会递送。兹据各员禀称，夷船均不肯来，照会亦送往。并据吴健彰禀称，密探英夷亦知贼匪必不成事，故向售大炮、火药、米粮等件，均未允许，惟未露出得受贼藏之事。又据委员禀称，该夷酋曾云，嗣尚欲令火轮船入江探看，恐贼匪未能猝灭，彼国贸易不通，再来不可不虑。该夷又询及琦善、耆英、黄恩彤诸人，须请琦善设法羁縻各等情。臣思英夷惟利是视，难以空言羁縻，当此之时，亦惟亟图殄灭群丑，此燭火均可潜消。朱批：知道了。

怡良奏(同年五月十日)

据江苏苏松太道吴健彰禀称：本年三月初，据亚美理驾国公使马沙利面交致大学士文书一封，嘱递前署两江总督加封寄达。该道当以现值贼匪滋事，劝令从缓。该公使及领事以彼国主有玺投呈，先往广东，探知钦差带兵出省，今来上海，又值金陵省城被围。国书交呈已久，不能再迟，故尔寄书宰相，应如何投递，商请奏明大皇上，谕旨遵行，不为转达，自赴天津径送等语。察其词色，势不能却。查奏定通商章程三十一条内载，合众国即亚美利驾，日後若有国书递达朝廷者，应由中国办理外国事务之钦差大臣或两广、闽浙、两江总督等大臣将原书代奏，有此一节。今该公使致书大学士，尚无背理。惟适有勇目委员押送所雇夹板夷船赴江，随将文函交该委员等带呈前署总督，以现应交卸，未便越俎，将文退回。该道当向该领事告知其故。今接照会，以新任总督现闻在苏，即烦转呈等由，具禀请示遵行。臣接阅之下，批飭该道谕令该酋仍递赴广东，交原办各国通商事务之钦差大臣，应否代递，酌核定夺。并令该道妥为开导去后。于二十七日，据该道禀称，奉批遵向该国领事金能亨婉商致意，未允，必欲在苏转请代递。且言书中并无违碍事件，看其稿底，可以知悉。该酋本意在粤请投此书，因其时钦差大臣督兵出省未回，是以前来江苏，求为转递。因思若再坚拒，不允代递，难保径赴天津。当此逆匪鸱张，各省戒严之际，任令该夷赴津，未免沿海居民致生疑虑。若竟以原书代为呈递赴京，则书内所述何词，究竟有无违碍难行之处，未敢深信。是以臣即将该酋固封原书一件，咨送办理各国通商事务之钦差大臣两广督臣叶名琛，可以就近查探该夷书中所述实情，应否代为转递，酌核办理。合将该道钞来该酋原书稿底照缮，恭呈御览。

怡良奏(同年六月十五日)

臣行次苏州府属之昆山县，苏松太道吴健彰前来迎见。据称咪国素未多事，该夷酋亦不桀骜，原不妨亲至上海，与之见面，但别国效尤，纷纷前来，以请见新任总督为荣，难免别生枝节，不若即在昆山，命该夷来此一见，即可了事等语。并据该酋照会，请定以便见面前来。臣当照复去后，并命该道差人知会该酋，随于二十八日由该道带同该酋在昆山城内公所见面。所呈夷字国书一件，另译出汉文一件，均系固封，亲自交收。约一时之久而退。言词礼节，均尚恭顺。该道并将该酋译汉底稿钞来，阅其语句，尚无与条约相背之处。该酋退出公所之后，臣即同该道将固封译

汉之文，先行拆开，逐字比对，均尚符合。伏思该酋呈递国书，原与从前奏定章程相符，在该国新换公使来驻中华，欲将姓名上达天听，仍求和好，照常贸易，亦无足重轻之事。惟书内所称遣命入觐朝廷一语，即非从前奏准，而条约向亦未刊载，似难久行。查我朝臣服外藩，凡有年班及人贡诸国陪臣抵京后，应先习跪拜之仪，然后命其随班引见，从无准其陛见之例。况合众国素非臣服，以敌体自居，夜郎自大，不足与较，岂能以外藩各国视之，以致别滋事端，更不便优礼相加，致启覬覦之渐。惟有劝其恪守条约，照旧通商，以相和好，不必远道北行。但此情形，臣不敢先行宣露，以示我朝事事皆出自乾纲独断，臣下不得擅专之意，是以接收夷书时，仅答以即为代奏，命其仍回上海，静候信息。兹将该酋所递夷字国书一件，译出汉文一件，恭呈御览。

吉尔杭阿奏(同年八月二十四日)

窃照英吉利夷酋咆吟、米利坚夷酋麦莲勒毕奄于五月间前来上海，在臣处呈递节略，恳求钦差重臣查办变通贸易事宜等情，臣当将节略掷还，遵旨飭命回粤，听候两广督臣叶名琛查办。并将该夷等种种狡诈情形，缕晰密陈。旋因该酋等逾期未至，又经附片陈明在案。乃前折甫经拜发，咆、麦二酋与佛郎西夷酋布尔布隆于八月七、八等日联檣而至。臣即于九日以礼接见，询其来意。据称：咆、麦二酋遵谕前赴广东，与布酋一体照会两广总督，不特叶总督未与相见，且布酋处亦未接有回文，仅派知州张崇恪、知县陈宜之面见。翻译人口称叶总督并未奉有谕旨办理变通事宜。旋接叶总督与咆、麦二酋复文，仅云天朝臣下无权，但知谨守成约，其重大事件，必须奏明请旨，又无准于代奏之语，守候多日而回，不得不一见，即欲前赴天津，求见大皇帝及大学士申诉一切。其前呈节略内所言事理，并未提及。但据咆酋云，十二年之期已过，前定章程，皆不足为据。又据麦布二酋云，伊等在香港奉该国王之命，凡事皆由咆酋商定办理等语。臣因该酋等业已合而为一，与七月中情形又已不同，当答以英夷原定章程，名为万年和约，本无十二年变通之文，即当永远遵行，咆酋不应有此不经之谈。米佛二夷虽有十二年变通之约，而无另定新章之语。尔等欲赴天津，必须奏明大皇帝准尔前去，方可开行。否则，不过与天津镇道一见而已，仍属徒劳往返，或将前递节略所求代奏，恭候钦定，亦无不可。辩论竟日，迄无成议。十二日，该酋等三人，同翻译人麦华陀等五人，复来谒见，据云天津之行，伊等已奏明各该国王，若由贵部院代奏，而大皇帝仍令回粤，尔时再赴天津，则抗违大皇帝谕旨；若折回广东，又背国王之命，竟难中止。臣又再三开导，据云此番前去，如蒙恩准，钦派重权大臣两三人前来查办，中外利益实属不小。倘仍照旧飭回广东，伊等实属无颜，亦不敢即生异议。惟有将伊等无可如何情形，奏知该国王，待命而行，以后之事，即难预定，已择于八月十八日起碇前去。臣反复开导，该酋等坚执不移，起身即去。臣伏查该酋前次呈递节略时，曾经口称倘蒙恩派钦差大臣，指给地方贸易，其地如有贼匪，必当随同驱除净尽，并飭商补交旧税，以备军饷，事虽未可深信，而其言甚力。至此次到沪，乃置之不言，是所称助顺讨逆，不过假此以为更改章程之计。若云助逆犯顺，则长江现为贼踞，何妨借此横行

，而乃赴粤赴沪并赴天津，必待请命而行，似又并非恶意。揆厥情形，若不稍副所望，恐将乘我中原多故，以旧欠商税为经费，合各夷之力，独树一帜，不受羁縻，不完关税，伺衅而动，以图一逞，实为肘腋之患。现在不敢遽肆鸱张者，以受我朝涵育深恩，誓言在耳，故作乞恩之词，以自明恭顺。若求之不得，必将另生诡计。其称奏明该国王待命而行者，约计半年，可以集事也。夷情狡诈暴戾，历观成事，凡有所求，必得乃止。米佛二夷章程内，即有十二年变通之文，英夷章程内又有恩施别国，英人一体均沾之语，可否钦派重臣，会同两广督臣妥为查办？所求如果允准，不妨曲示包荒，许其所请。倘大为悖谬，亦不妨直言杜绝，免其覬觐。若但令其仍回广东，致任跋涉风涛，久无成议，该夷心未惬服，终恐别滋事端。所有前次擢还节略，曾经钞存备案，兹谨照录原文，恭呈御览。

吉尔杭阿奏(同年八月二十九日)

窃英、米、佛三国夷酋联檣驶至上海，不遵理谕，坚欲前往天津，当经臣恭折驰奏在案。臣于拜折后，窃思该夷酋凡有所为，一切经费，皆取之于商，而该夷商若不奉该国王之命，不遵措办，该国王尚知息事恤商。惟所设公使提督等酋，一味遇事生风，因之为利，然不禀命国王，亦不敢妄有所为，故必借端肇衅，激怒国王，方能惟其所欲。该酋等既称此番前去天津，倘奉飭回广东，伊等实属无颜，惟有奏知该国王待命而行等语，显欲播弄是非，于中取利。其旧欠商税，夏间已允设法措缴，旋又诿广东回来再办，今竟一字不提，是阳为庇商抗税，阴实饵商以利，为日后敛费之计。因飭代办苏太道蓝蔚雯诘以不能践言之故。据复：上上年八月五日起至本年正月十二日止，系前英酋文翰经管之事，咆酋本拟设法清理，无如现奉英国字寄，文翰回国时，面述内地纷纷滋扰，各商诸多亏折，上海商行，皆系自行护卫，彼此往来交接，情宜不周。该国王颇为不悦，是以将正月十二日以前各商交过税单作为废纸。该酋咆吟现将文翰所言，不甚确切，奏知该国王，候示遵行。但必须使夷商进出货物，买卖流通，该酋方能办理等语。臣复诘以文酋经管旧税，既须待命，其自正月十三日起至六月十八日开关前一日止，应完商税，无词可借，应即照数完纳。又据复称，不候国王之命，先行追缴，诚恐各商顽抗，转致濡迟。其言尚属恭顺。现于八月十九日起碇出口，约计旧欠商税，多则百万少亦有七八十万。国家少此巨款，即多掣肘。而该夷转得借此以行其诡计，更虑弊端叠起，新税亦费周章，审机量力，臣实切隐忧。即有十二年变通之约，应否因势利导，以期消患未萌。

吉尔杭阿奏(同年九月十八日)

窃惟驭夷之道，惟有钦遵节奉谕旨，坚持成约，示之以信，折之以理，抚之以恩，三者而已，舍此实无善策。现在夷人所称，助我驱贼，原难深信，而关税则确有可征。去年上海失守，夷税已亏。自英夷咆吟五月间来沪，定义开征新税，其旧税飭商筹议补交，始行赴粤。自粤回沪后，据称前在广东之英酋文翰回国，甚言中国不能庇护英酋，五港皆不安静，货物不能畅销，是以伊之国王，令将所欠旧税，勿庸

完纳。今咆吟又将中国相待公允，并未失和好之谊，报明该国主，除新税照常完纳，以符信约，并请将旧税照章，一并补交，候该国回信遵行。计自六月十八日开关起，现在适值旺月，已征收新税银四十余万两。夷税之外，别无他款可筹。深恐该酋等借端起衅，仍如文翰所为，抗税不交，则不但上海一营，立即断饷，即金陵、京口、红单船等营，亦皆无可协济。念该酋所求，系请派钦差大臣商酌变通。条约所载，原非悖谬之谈，用敢密陈宸听，并非受制于夷，曲徇所请，遽为陈奏。此外夷人尚有不情之请，臣以理折之，伊等亦不能强辩。缘其人中情怀诡秘，外貌固以循理自居，如彼理有亏，我之理直，伊等亦为屈服。今伊等谓条约届满十二年，当议变通；又因两广督臣不办不复，晓晓陈诉，臣未知粤中作何办法？只有将天津海口难容大船，及粤督此时事繁，稍缓必为查办等语，曲为开导，伊等坚不肯听。臣竟无从阻截，并非敢任其北上，不为力阻也。臣庸愚之想，以为夷人既以和好为言，正宜就此羁縻驾驭。倘蒙钦差重臣会同两广督臣查办，将贸易章程既届十二年略为变通，以副其望，且可杜其助逆犯顺之心。即从此设法，催令补完旧税，连征新税，庶军饷有措，兵民之心安，而大局可保无虞，漕务亦不致贻误。权其缓急，似觉可行。实系臣管见所及，并非被人挟制欺蒙。其该夷照会内，极称上海官员款待之优一节，查督臣与臣等接见该酋之时，皆系率由旧章，并未稍加优厚，其所谓优者，想因准其接见，即谓为优耳。又关道与各领事官按约酌议更正事款之句，似指上海失守后文卷遗失，另设新关，稽征夷税，偶有与原约未符之处，悉行照章更正而言。现在夷酋所请，尚属归命乞恩，因而抚之，并未失体。倘有违言，或生异志，再图绥辑之方，则不如早用怀柔之法。

怡良奏(同年十月二十五日)

查咆吟于九月二十六、七两日先后驶回上海，并无动静，惟闻咆酋有欲来谒见臣吉尔杭阿之语，旋又闻已定于二十九日起碇回粤，不复前来。尔时尚未奉到上谕，不知天津查办情形，恐有歧语，臣吉尔杭阿即将其欲来谒见之语，与之相约，于二十八日在公所接见。咆麦二酋云：蒙钦差大臣崇纶至天津会晤，只准三款，皆不关紧要，其重大事件，仍未代奏。伊等不要再烦中华官宪为难，已将一切情形，奏知该国王，俟回信到时，即当遵办。现在不敢多事，亦无可再议。并据将与臣崇纶等往来照会底稿取出阅看，臣吉尔杭阿见其所请各款，与在上海时呈递节略迥不相同。向其诘询，据称在上海所呈节略系七月以前之事，迨伊等遵旨回至广东，又奉国王之命，备叙条约复来上海，即赴天津，是以未能送阅。今伊等将条约呈与钦差阅看，不为代奏，伊职已尽，此后如何办理，伊等亦不敢擅专等语。臣吉尔杭阿因该酋等每往来一次，必多添要求数事，当又诘以上海欠税，该酋等始称飭商照数补完，并有公使可以不做旧税必当追缴之语，言犹在耳，何以一至天津，忽行请免，似此出尔反尔，尚复成何事体？咆酋辄称钦差大臣既不作主，伊等实属不颜。旧税既奉准免，亦无庸再提，其词似尚觖望。麦酋言虽婉转，亦不受商，惟称细事不必再议，但求另派钦差大臣前来，商办重事，以坚和好，不可迟至咸丰六年等语。臣吉尔杭阿当告以现在已经钦差大臣酌核具奏，与尔等贸易，大有裨益，而于中华税课，不

无亏损，大皇帝克己大度，怀柔远人，至深且厚。若再代为渎请，另派钦差大臣，本部院身获重谴，于尔等贸易毫无裨益。辩论至两时之久，据称既不代奏，俟明年该国回信到时，再行照办而散。而该酋等所谓重事，注意于入江贸易，并鸦片开禁纳税，此等悖谬之词，臣等惟有严词拒绝，或可杜其觊觎之念。咆酋即于九月二十九日早登舟起碇，麦酋亦于十月八日起程回粤，惟佛郎西布酋尚无回粤之信。至佛夷贸易无多，兵力甚疆，凡外夷用兵，无不借资其力。其在中华之人，专以传习天主教为事，意欲求在京都建立天主堂，准其北上传教及周游中土，已非一日，皆因严拒而止。此次哥士耆之随船北上，擅递公文，未始意不在此。现在已未南回，尚未查实。朱批：知道了。总宜事事镇定，勿任其要求，尤在驭之以严，拒之以礼，彼夷人伎俩安所施？

吉尔杭阿奏(同年十月三十日)

窃照上海逆匪之负隅不下，皆由城外自东北洋泾滨迤南起至西北三茅阁桥一带，有各国夷商错杂寄居，再三要约官兵，勿至其地，以免枪炮误伤其房屋人命，因而该逆转借夷房为藏身之固，一被官兵击败，即窜入夷房之后，官兵追至其地，夷兵即开枪轰击，以致兵夷互争激成事端，几将不可收拾。臣即在三茅阁桥，随地形曲折，开挖濠沟一道，不准官兵越濠，并不准各夷任听逆匪藏躲，衅端虽息，而该逆之由小东门、北门往来洋泾滨者，仍出入自如，我兵竟无从截击，枪炮药弹米粮食物之接济，亦由此而进。八月间，浙江抚臣黄宗汉函知有籍隶宁波告假回籍之翰林院庶吉士张庭学与在洋泾滨开张洋行之候选同知杨坊素有亲谊，可与商办。臣即飭委嘉定县知县吴煦会同张庭学、杨坊悉心筹度，于北门外沿河筑墙，约五百余丈，将桥梁道路一并堵截，则接济可冀断绝，该逆亦无从逃窜。惟该处切近城垣，非借资夷力，不能兴办。适英、佛、米三国夷酋咆吟等由粤来沪，臣当即照会该酋等转飭各领事尽力办理。因咆麦二酋已往天津，米领事吗辉以该国水师官不遵照办理为词，酋先梗议，英领事阿利国亦接踵效尤。惟佛夷布酋及领事尹担始终并无异词，因将附近佛夷住处之洋泾滨迤南至将近北门之落红桥一段，先行兴筑，小东门一路之接济从此断绝。咆酋等亦从天津南回，臣又与当面要约麦酋身任其事。十月三日，定议接筑墙垣，由米佛二夷派兵看守，不准接济火药等项，并不准各夷私行进城。孰知副贼目陈阿林假装夷人，潜至夷馆，乞怜求援，并有欲搭米夷船只窜往他处之说。经吴煦等查知密禀，臣下令搜拿，仍行潜回。臣复思夷酋尚知假信假义，可以理折，而领事人等皆奸狡百出，难以理喻，当飭乘麦酋未去之时，昼夜攒办，砌至北门大路三茅阁桥时，该夷借口七日系礼拜之期，向不办事，八日麦酋登舟，须往送行，无兵看守，停工不办。臣当以三茅阁桥为米夷聚居之所，即在北门城外，接济既便，窜逸亦易，该夷如此刁难，若任麦酋扬帆径去，则该处断难筑，臣即督同蓝蔚雯、吴煦向麦酋面加诘询。正在辩论之际，有该夷水师官手持抬枪子来云：官兵违令过濠，与贼接仗，以致枪子飞入夷房，应请查办。至三茅阁桥，伊等已派兵看守，何以尚不见信，必须筑墙堵断。其实所持枪子，系逆匪打入新砌墙垣之中，为夷兵撬挖而得，有匠役在旁目击。臣见此情形，不觉眦裂矣。诘以官兵违约越濠

，自有军法，逆贼恃尔等房屋为护符，何以并不驱逐，怒兵官而庇贼匪，其理安在？麦酋见臣词严义正，声色俱厉，亦自知理屈，即称但求以后两不侵犯，此时请勿穷追，以敦和好。三茅阁桥遵即堵断，当即谕知该水师官遵照。并称一切均须查照定章成约办理，不准稍有违抗。该水师官即唯唯听命，自定于十日将三茅阁桥砌断而去。臣因其言尚近情，亦稍加以颜色，探其意之所在。据云，前酋马沙利回国时，极言中华烽烟四起，杨逆据有江宁，已成分裂之势，谆劝该国王另作计较，该国王命伊前来察看情形。伊系初至中华，偏历五口及江宁镇江，详加查察，杨逆行为，直是强盗，不足与言，而中华官宪民人动遵理法，方知大皇帝是真命天子。伊即奏知该国王，意欲助顺效忠，是以遵旨回粤。叶总督不与见面，才赴天津，仅与钦差大臣崇纶匆匆一见，不能尽所欲言，又不肯将伊诚悃代为陈奏，实无可如何，只得据实奏知该国王，待命而行，此实由衷之言等语。臣即告以既知大皇帝是真命天子，足见深明顺逆。但尔来去不常，领事人等动辄掣我之肘，以致逆贼苟延残喘，未免败坏尔国旗号。该酋答称必当谆嘱恪守成约，不准稍有逾越，即于八日登舟回粤。九日该逆从小东门出城，沿城绕北门而至三茅阁桥，扑我营盘，一经官兵追击，即退入夷房之后，呐喊作势，诱我兵勇越濠剿捕。咪夷之兵，以护夷房为名，持枪运炮以待，幸我兵咸遵军令，仅止在濠西严阵以待，无一人越濠。十日委员人等集匠前赴三茅阁桥，接筑墙垣，米夷又出拦阻。臣当又行文该领事，严词诘责，并飭蓝蔚雯、吴煦将阿利国、吗辉传至关署，诘以拦阻筑墙之故。据称三茅阁桥迤西墙垣，尚未竣工，一俟砌至桥头，即当合拢堵塞，断不敢再有异议。至夷兵之运枪炮以待，意在保守夷房，并非庇护贼匪。并遣其通事李泰国前来臣营盘，重申前说。臣当告以兵勇不越濠沟，必当如约，倘逆匪藏匿夷房左近，尔等不即驱逐，我不能不在隔濠开炮轰击。倘尔等借口寻衅，伤我兵勇，须知兵勇积忿已深，人人思逞，莫谓我中华兵勇，不敌尔等，见仗之后，再分曲直，讲理修好，尔等业已契亏。现在我兵勇之不与尔等为难者，皆由本部院军令所在，并非畏惧，尔等其熟思之。至三茅阁桥墙垣，姑如所请，准从迤西砌起，至中间合拢，令其传谕吗辉，不得再有违误。至十三日将三茅阁桥堵砌合拢，北门之接济亦可断绝。尚有桥西数十丈，必须接筑墙垣，该处系英夷出入之所，现亦定期开工。一俟完竣，即乘此机会，刻日进攻。惟查该夷包藏祸心，有利用我中原多故乘间思逞之志，即如杨逆窃踞江宁后，该夷等往来江宁、镇江，已非一次。刘逆窃踞上海之处，各夷人数不多，兵亦无几，安居于切近城垣之地，毫无惊扰。迨至我兵云集，又请勿攻北门，留此空隙以为接济纵逃之地。然自今年八月以前，犹只暗中掣肘，百般要挟。是以臣不揣冒昧，有钦派大臣前赴广东查办之请，盖欲借以羁縻，俟克复上海，再作计较也。乃自天津返棹后，咆酋但称殊堪痛惜，并无多言，麦酋则竟明言心怀两端，其领事人等之与逆交通，更渐显露，大有不受羁縻之势。刚则顿起边衅，柔则为所挟持，又虑另起波澜，复效道光二十八年之故智，阻我海运，更属不堪设想。至佛夷哥士耆已随船南回，请为清理松江府天主堂旧基，并求陕西释放传教人方姓，此外别无所求。佛酋布尔布隆已于十月十六日起碇回粤，就现在情形而论，惟该夷尚称恭顺，然犬羊之性，不足深恃。合并陈明。

吉尔杭阿奏(同年十二月四日)

在洋泾滨筑墙，杜绝接济，惟佛夷首先听命，并无异词，其故因该夷贸易不多，无所取利，城中传习天主教之人，为贼所困，心有不甘也。米夷则公然接济，挟逆以为重，前此之遵谕，在三茅阁桥塔筑墙垣，系迫於理势，不得不尔也。故墙垣甫经筑起，而于打狗桥下挖掘地道，穿墙而过，直通夷馆后门之内，又任听逆匪在于切近该夷房屋处所起筑炮堤，转借口墙外夷房无人看守，必得官为赔偿，哓哓不已。经委员吴煦等查出地道禀知，臣严词诘责，始行钉堵。英夷执持两端，既不阻挠筑墙，亦不派兵看守，致有十月十九日夜被贼推倒墙垣之事。其贼筑炮堤，该三国互相推诿，皆不过问。臣以炮堤虽切近米夷房屋，而地势湾环，一经我兵开炮轰击，佛夷房屋，首当其冲，因向佛夷提督辣呢尔告知该逆炮堤已成，我不能不开炮轰击，尔国领事住处适当其冲，应速迁移，以免受伤；且揆度该逆之意，必系尔首先筑墙，迁怒于尔，欲假手于我，毁伤尔房屋人命，勿堕其计。该提督勃然怒云：非蒙提醒，几为逆匪所算，求拨人夫二百名，交其带兵督夫，将炮堤击毁，以破奸计，而保夷馆。该逆在城上放枪，其意殆欲击我人夫，而伤及夷兵，更触其怒，衅端遂成。英米二夷从中百计排解，不能挽回。臣又密遣妥人乘夜将该逆素恃为护符之米夷房屋两所先后焚毁，免为贼巢，该夷既莫从究诘火所由来，英夷则因该处为我兵所不到之地，亦疑逆匪与夷为难，自愿听凭官兵由陈家桥一带进攻北门，不敢固执前约。朱批：览奏各情均悉。

怡良奏(咸丰六年正月九日)

准兵部咨，礼部奏称：据朝鲜国王专差护送漂收夷人四名，来京译讯。该夷等系花旗国人，一名托默斯马斯特尔，一名额都瓦尔特巴拉里，一名达匪特巴尔那斯，一名灭勒匪勒塞。奏明护照送朝鲜难夷之例，解交臣查讯明确。如上海等处有该国来海口贸易之人，即令附便回国。奉旨：依议。钦此。由兵部将该难夷等递解到常，当即发交苏松太道查办。去后。兹据该道蓝蔚雯详称，解到难夷四名，译讯据供，均系花旗国人，在夷商者尔船上充当水手，由伊国至内地贸易，在洋遭风遇救，由朝鲜国解京等语，详复前来。臣查花旗即米利坚，该夷在五口通商上海地方，有夷目管理该国通商事务，已饬将该难夷等交该国夷目保领，听其附便回国，以副圣天子怀柔远人至意。

怡良奏(同年三月二十日)

据护苏松太道蓝蔚雯禀，据英夷李泰国呈称：福州关税偷漏甚多，有商船一只，装茶叶出口，照例约该完税银二万五千两，该船仅完税银一千七百两。又福州自设关以来，征收茶税，每担一两五钱，或一两或不及一两，较上海之每担，按照税则征银二两五钱者，大有区别。又宁波关，毫不稽查，全无税则，运米出洋，亦不阻止，以致上海商情不服，见利思迁。数月以来，上海进口各船，皆系空出，前赴宁波

装米及一切货物，上海关税必致立形短绌。议请检查上海上年装茶底帐，按数扣还，每担五钱，留抵以后税。否则，仅三个月暂准仿照福州关茶税，每担酌减五钱，俾得抵补上年之亏，以昭平允，免生事端。虽经该护道严词驳飭，而本年正二两月所收夷税，已形短少。稟请飞咨闽浙二省严行查办等情。臣等查夷情诡谲，善于蹈人之瑕，借口挟制，而其所言，又必非无因。今福州关如果短价招徕，任听偷漏，宁波关于货物米粮出洋毫无稽查，该夷惟利是视，势必舍上海而往宁波、福州，则上海关税立即短绌，宁波、福州加增无几，全局皆为掣动，适堕该夷减税之计。且我驭夷之法，不过责其恪守成约，若竟自破藩篱，彼更有词可借，寻衅生事，实在意中。而其运米出洋，更属有干例禁，相应请旨飭下福州将军、闽浙总督、浙江巡抚严查偷漏短税，责令按照税则画一征收，并限查将米卖给夷船之人，严行究办，庶五口不致办理参差，夷税不致日行短绌。

怡良奏(同年九月十二日)

窃照咸丰三年八月五日，刘逆窃踞上海，所有应征各国商税，经前任苏松太道吴健彰议令各国领事从权代为抽收。尔时逆势猖獗，各国商人，携带重货，寄棲于城外洋泾滨一带，各国领事，代为设法保护，所费不貲。迨官兵云集，剿办得手后，贸易照常，于咸丰四年六月十八日从新设关，照常稽征。所有自三年八月五日起，至四年六月十八日止，米利坚各商共未缴税钞银三十五万四千一百四十九两八钱三分。当经行文飭追，去后，旋据该国前公使麦连以商情苦累，议缴三分之一，内除失事以前已纳税银掣有号收，未及给发红单银二万七千六百七十三两八钱三分七厘，及乏商短缴，无从着追银八千余两外，实应缴银八万一千五百九十二两。臣怡良与前抚臣吉尔杭阿以已纳税银掣有号收未给红单银二万七千余两，系吴健彰任内之事，即飭司委员伴送吴健彰，前赴上海，会同接署道员三面质算，并无错误，应准其扣抵，归于吴健彰交代案内办理。至该国商情苦累，自应恳恩酌量调济。而该国应缴旧税，仅完三分之一，且将商人短缴银两归入现缴数内扣除，未免有亏国课，行令苏松太道再行妥议。去后。兹据护苏松太道蓝蔚雯详据该国前后任领事吗辉、余飞呈据该国现任公使伯驾以商力未逮，请照原议详奏前来。臣等伏查上海滋事之时，该国商人各自出资保护货物，以致商力拮据，系属实在情形。我皇上抚驭中外，一视同仁，上海地漕银米，既奉加恩分别减免，所有该国未完旧税，自应推广皇仁，一律查办，合无仰恳天恩，俯念商情苦累，所有米利坚国未完旧税银三十五万四千余两，除现缴银八万一千五百九十二两，又失事以前已纳税银未给红单银二万七千六百七十三两八钱三分七厘外，其余未缴银两，概予豁免，以示怀柔。朱批：依议。

怡良奏(同年九月十三日)

据蓝蔚雯稟报，米夷伯驾坐该国常用兵船，于七月一日至上海，十八日进谒蓝蔚雯，并未提及请改定章及欲赴天津之事。密加察访，尚有该国水师提督奄师大郎，乘

坐火轮船行抵上海，并密探得尚有火轮一只，随后即至。伯驾俟此船一到，即赴天津。该护道蓝蔚雯因前此接伯驾时，并无欲赴天津之语，恐其不告而行，适已革苏松太道吴健彰在上海商办入江助剿轮船，即于八月二十五日邀同吴健彰往晤伯驾，询其来意。据称该国王因十二年之期已满，给与国书，须入京面告大皇帝，有酌办事件，在广东动身时，已照会两广叶总督，径往天津，因风顺由福州而至上海，等待修理火轮船，是以稍有耽搁。现在轮船已到，即须北驶。该护道等告以天津并非通商口岸，前公使麦连等于咸丰四年冒昧前往，大皇帝因尔等拔涉远行，钦派大臣与尔等接见，系属曲示怀柔，曾与尔等言明。若再至天津，断不能再邀钦派大臣与尔会晤。两广叶总督，系专管五口通商之钦差大臣，无论何事，应即回粤，呈请听候查办，不必徒劳往返。据称伊奉该国王之命，务与中国和好，总要彼此有益，路过英佛两国，会其大臣，亦皆如此告知，必得另有钦差会议。若令仍赴广东，与叶大人会议，则头可断而不能前去。如到天津，不能面见大皇帝，伊亦无法，只好回来。如不教我上天津，只求两江督抚代为奏请钦差至浙江地方会议，我即在此等候亦可。蓝蔚雯等向其再三开导，辩论数时，坚执不移，飞禀请示前来。臣等查该夷酋伯驾前来上海，已逾一月，绝口不言请改约欲赴天津之事，迨火轮船到后，仍无一言，是明知我必阻其行，竟将不告而去。迨蓝蔚雯等查知，向其查询，又言词要挟，居心实属叵测。若臣等绝之已甚，彼必径赴天津，不遂所欲，则恼羞变怒，恐其别滋事端。臣等现以通商事宜，向系英米佛三国会同商办，该酋既称路过英佛二国，会其大臣，皆称必得另有钦差会议，现在英佛二国公使皆在广东，并未同来，而仅止该酋一人欲上天津，设英佛两国在粤，别有成议，则事出两歧，殊多不便，未敢代为具奏，批飭蓝蔚雯等，再行妥为开导，以冀阻其北行，杜其妄念。惟夷情狡谲，设因臣等不准代奏，径赴天津，亦未可定。

怡良等奏(同年十一月二十八日)

窃臣等于十月中旬即闻广东省城夷人滋事，叠次谆飭护理苏松太道蓝蔚雯密探确实情形驰禀。去后。兹据具禀，十一月一日接据英吉利领事罗伯逊照会，并将探报一并录送前来。臣等复加参核，英米均有占据炮台之事，钦差大臣叶名琛办理夷务一切情形，自必详细奏闻。至探报情词，不能画一。惟夷性犬羊，该领事居然自出照会，其情已属叵测。而照会以钦差大臣叶名琛办理不善，若不去位，恐百姓尚多困苦为词，尤属意图要挟，欲操天朝黜陟之柄，谬妄已极！至米酋伯驾，本有明春北上之说，恐在粤受创以后，其行未能中止。

怡良等奏(咸丰七年正月六日)

英夷在粤滋事，领事罗伯逊赴苏松太道衙门呈递照会，先经臣等恭折密奏。钦奉密谕二道，钦遵督飭苏松太道妥为驾驭在案。兹复据护理苏松太道蓝蔚雯禀呈，该国公使咆哈照会臣等公文各一件，铺叙其在粤情形，又称不附逆民之党，不准逆民傍船停泊。揆厥情形，似有悔过求和之意，而又不肯自行转圜，故夸大其词，意图要

挟，其情实属可恶。惟犬羊之性，无可理喻，似不必绝之已甚。臣等即就其照会内不忍害民，不肯助逆数语，代作转圜之词。钦遵训谕，告以从前万年和约，原为永息兵端，今因旗号细故，遽尔称兵，一经入奏，转失该酋和好本心，准其咨会两广督臣叶名琛，妥为办理，仍归和好，备文照复。一面密饬苏松太道镇静防范，设法驾驭。

怡良等奏(同年正月六日)

上海为通商码头，夹带鸦片烟土进口，诚所难免。及抽厘之议起，言利者，即有在上海抽取鸦片烟厘每年可得百万之说。耿耿虎视，意欲越俎代庖者，不止一人。臣等与前抚臣吉尔杭阿以抽厘必须官给照票，烟贩恃为护符，竟可任其所之，莫能究诘，直是弛禁，不独显违谕旨，且以夷人屡求不准之事，一旦作此掩耳盗铃之举，即使每年可得百万，尚不可行，况处处受人挟制，徒饱言利者之欲壑。归公者不过十之一二，有损国体，无裨军饷，是以坚持定见，未经准行。而言利者，直以臣为迂阔而不知权变，以致经费缺乏。彭玉雯原奏所称，上海贸易为天下第一，若认真抽厘，可得百数十万两，无如该道恐碍羨余，并不悉心经理等语，亦系误听浮言。将抽收鸦片烟厘，并而计之，实在苏松太道并无羨余可取。朱批：知道了。若明给执照，抽收烟厘，必致处处受人挟制，担虚名，受实害，甚非计之得也。

何桂清等奏(同年八月十七日)

上海地方向不贩运蚕茧，是以通商章程只载湖丝等税，则亦无蚕茧名目。本年夏间，臣等于未奉谕旨之先，访闻夷商有雇用通事挟货赴内地收买蚕茧运沪赴关报验之事，即经密札饬查。旋据护关道蓝蔚雯禀复，该商等所贩之蚕茧，讯系用火蒸烘，可以久储，因税则无名，请照估价纳税，希图减轻。此端一开，恐该夷商惟利是图，将来贩茧渐多，贩丝渐少，于税务大有关紧。惟有于出产蚕茧之处，禁其贩卖出境，业经移行浙江嘉、湖二府及苏属之太湖、吴江、震泽、常属之吴锡、金匱、镇属之溧阳等厅县，一律出示，严禁贩卖蒸烘出境。现在议立章程，应以蚕茧一斤，可得净丝若干，仍照湖丝课税，以杜趋避等情。钦奉前因，复经恭录札行钦遵去后。兹据将议定税则详复前来。臣等复加查核，此项税则，现据议定，凡烘蒸之蚕茧，不论粗细，从六月十日起，每百斤征银三两，核以湖丝论斤抽税数目，尚无轩輊。其未经议定之先报验出口之蚕茧，多系洋商私购而来，当时权照估价抽税，稍不足数，已属无从补征，而湖丝一项，例应补纳三关税银。蚕茧系络以成丝之物，此后亦应一体补纳。内惟太平一关，例载蚕茧每百斤征税银七钱二分四厘，遂就三关丝税逐一比较核计，所有应行补纳蚕茧税银，除太平关应照原例每百斤征税银七钱二分四厘外，其赣州关每百斤应征银四钱六分四厘七毫，北新关每百斤应征银四钱三分三厘五毫，示谕关卡暨内地各商遵照办理。该夷商业已无利可趋，自查办后，并无商贩运茧来沪，似可不禁自绝。至五口议令通商章程，内载夷人不准远入内地游行，近年每据各县禀报，有夷人越界远游之事，均经解送赴沪，由该关道照会各

领事领回管束。并令谆飭各夷商坚守成约，不得阳奉阴违。钦奉前因，臣等复飭该关道申明例禁，随时留心防范。一面移行各府州县转行各州厅县出示晓谕，如有不法奸民，勾串夷人，擅入内地，无论有无滋事，即由该地方官查拿，从严究惩，并将夷人押交领事，严行约束，照章惩办，以符条约，而杜弊端。

何桂清等奏(同年十月二日)

据苏松太道薛焕禀报，有俄夷船只驶至吴淞口外寄泊，询因遭风损桅，暂停修理，于二十一日修竣，向东南外洋驶去。又据报称，该夷复于九月十四日驶至吴淞口，据佛郎西翻译李梅报，系俄罗斯员外郎明常，言于十八日前来谒见。该道告以俄夷向来不在上海通商，未便接见。至十八日李梅带同明常径自来署，该道因俄夷本在北路通商之国，当即以礼接见。据明常称，在理藩院读书八年，本年二月随国使普提雅廷乘火轮船往来各国，现由日本国回棹前来上海，即日便赴日本。并呈出照会一件，报明该船现在上海，并无他语。该道告以此间并无该国通商马头，未便逗留，该夷唯唯而去。查该夷船进口投递照会，虽无求请之词，而有全权办事大臣字样，且言词恍惚，情属叵测，已飞飭沿海水师，照会各省，一体严防。

何桂清等奏(咸丰八年正月十八日)

再臣等前闻英夷有阑入广东省城掳劫督臣叶名琛之事，当因上海与广东声息相通，设被波及，则海运关税厘捐均多阻碍，所关实非浅鲜！即经密飭苏松太道薛焕密加访探，并传谕夷酋之在上海者，粤事应归粤办，上海华夷并无嫌隙，应仍照常贸易，毋稍疑惧。月余以来，尚称安静。惟据佛英等夷领事向薛焕面称，本年春融，各该国公使欲由上海而至天津，请大皇帝特派宰辅大臣，另议通商和好事宜，虽其言未可尽信，然不可不预为之防。臣等复经密飭薛焕知照，如该夷前来饶舌，即告以大皇帝已另派大臣前赴广东查办，妥为驾驭，令其折回广东，仍俟黄宗汉行抵苏常时，再由臣等察看情形，与之熟商办理。惟商情叵测，且闻俄罗斯夷船亦往来于香港日本，不知其意何居？

何桂清等奏(同年正月二十五日)

正月十日，接据署海防同知李焕文禀：英夷领事罗伯逊等以夷酋因广东之事，遣夷酋赍送照会到沪，欲赴苏州巡抚衙门面投。十一日臣赵德辙接据该夷目宫达德俄理范来文知会，即日到苏，又经照复该夷目将公文交给薛焕转递，无须来省。十二日据李焕文、富安禀，该夷目迫不及待，已于十一日在沪起程，臣赵德辙正拟束装驰赴昆山一路接见。该夷目等适已抵苏，臣赵德辙复与两司飭令署苏州府知府蔡映斗随同薛焕前赴该夷目船上，谕令在城外等候，以为携有紧要公文，必须至署面交，势难阻止。随于十三日申刻，英米佛三夷领事罗伯逊、费尔文、敏体呢与宫达德俄理范来署谒见。来到英米佛三夷酋照会臣等公文内有照会大学士裕诚公文三角，请

由臣等转递至京。臣赵德辙向该夷目等诘询，据称投送照会，系为广东之事，甚为紧要，各该公使定于二月内赴沪，如彼时大学士尚无回信，即赴天津等语。臣赵德辙当谕以现有钦差大臣黄宗汉前往广东查办，自应静候，该夷目等亦无异言。因其远道投文，若不允为转咨，又致另生枝节，旋即备具照复三角，交给销差，该夷目等欣然而去。即于十四日自苏返棹，飭令苏松道薛焕督同委员伴送回沪，情形尚为安静。臣赵德辙当即函致臣何桂清密商，并将照会大学士裕诚公文，先行拆阅，观其大意，叶名琛之办理不善，固不待言，而该夷之猖狂，亦已自认不讳，深堪发指。且欲钦差大臣于二月十七日以前赴上海会议之语，其中尤多要挟。米夷文内，附有俄夷照会军机处公文一件，情词大略相仿。臣伏查该夷酋等因在粤未能逞志，辄欲前来上海会议，其心本属叵测。而上海为海运码头，又为关税厘捐会萃之地，设因要求不遂，别滋事端，诚恐多所窒碍。屈计黄宗汉出京后，当可行抵山东、清江一带，臣等即钞录照会四件，星驰密函知会黄宗汉，酌筹办理。

何桂清等奏(同年二月二十二日)

再臣等承准军机大臣字寄，咸丰八年正月二十六日奉上谕：何桂清等密陈英米佛等夷酋投递照会公文一折。钦此。臣等当即钦遵，分缮照会，发交苏松太道，会同能通夷语之候补道吴健彰，转发各该领事去后。尚未接到照复。惟据该道等禀称，陆续到有火轮船三只，吃水不过在四尺左右，又有英夷兵船二只，俄夷兵船一只，寄泊吴淞外洋，传闻英米佛三酋不日可到，俄酋普提雅廷已在兵船之内，并无动静。臣等查咸丰四年冬，英米二夷前赴天津，呈请更定条约，奉旨飭回广东查办。米酋回至上海，曾向前抚臣吉尔杭阿云，条约不可不改，断不逾十二年之期，若因循不办，恐伤和好，曾经奏过有案。今既在广东称兵犯顺，而仍来上海投递照会，请钦差于二月十七日在上海会议，其情实属叵测。臣等密飭薛焕等，于夷酋到时，不亢不卑，待之以礼，谕以尔等所递照会，江苏省本不知所言何事，业已代为转递。接有大学士咨复之文，并非不收不递，妥为开导。但犬羊之性，难以揣测。上海为五方杂处之区，民情本极浮动，上年十一月间，骤闻广东失事之信，不开市者数日，经薛焕多方开导，妥为弹压，始能照常贸易。现在夷人兵船，陆续而来，惊惶更甚，海运漕米之出口者，仅止及半，受雇运米之沙船，尚不足数，日来鲜有进口者。设该夷妄有所求，上海情形即不可复问。更可虑者，该夷于咸丰四年本有在镇江等处设立马头之情，现在又称，如无钦差到沪，即为所欲为。镇江扬州虽为残破之区，究属南北咽喉，亦不可不防，臣等已密函知会和春、德兴阿，如有夷船入江之信，即须严兵以待，不与接仗，而能否分兵应援，殊不可知。

何桂清奏(同年二月二十五日)

英米二酋于二月十二日已到上海，各夷船放炮迎接，连络震耳者逾时。薛焕等若无所闻，静以镇之。十三日各酋会议，有不遵回粤，一俟佛酋到来即在上海滋事之谣。吴健彰因各夷凡有作为，必先遍询夷商，众谋僉同，然后举动。而夷商长途跋涉

，志在谋利，无不护惜其资本，当即设法向该夷商妥为开导。并探听夷酋之意，究欲何为，随后有无续到船只，薛焕亦派委妥人分头密探，互相印证，佯称佛夷无甚贸易，惟以传习天主教为事。而兵强炮利，遇有西洋各国与人构兵，该夷即受雇相助取值，以充饷需。英夷自五口通商，每年征收茶叶、湖丝、吗喇啤等项大宗货物税银四千余万两，作为兵费，横行中外。现因窃踞广东，兵费浩繁，急欲通商抽税，诚恐钦差大臣到粤需时，是以先于正月二十五日在广东开市，以安夷兵之心，即来上海会议，冀图迅速完结，撤兵节费。及驶抵上海，而钦差大臣业已过苏赴粤，行程纾缓，不知会议在于何时，兵费难支。本拟肆其犬羊之性，即在上海一逞，转念滋扰之后，仍无钦差大臣与之会议，必得再赴天津，为日亦久。现已定议，俟佛酋一到，即赴天津，吁恳大皇帝恩施，倘不蒙俯允，即在天津及沿江沿海滋生事端，使我措手不及，彼即为所欲为。截至二月十四日，已到英米俄三国兵船火轮船共有九只，吃水自四尺至七尺不等。传闻佛酋现赴小吕宋借拨兵船，并而计之，约有四五十号，装载夷兵四五千。臣等查，向来夷酋到口，皆由各夷领事先行知会苏松太道，定期于某日前来谒见。此番前来，先行放炮示威，不独并不知会苏松太道，即臣等照会亦不即日答复，其情实属叵测。薛焕、吴健彰等历探情形，虽多虚疑恫喝，而该夷因兵费繁重，急欲通商，不遵回粤欲赴天津之说，恐非无因。臣等已飞飭薛焕、吴健彰，妥为设法开导，诚恐该夷酋不复不见，竟赴天津。海运漕米，一过二月八日，即在崇明之十澈乘风放洋，陆续赴津，各船户遇有夷船，虽自知趋避，而已经进口及无海岛可依，所在实逼处此，殊为可虑。且内寇未平，边患又兴，设该夷竟在天津及沿海沿江肆其狂悖，则更难措手。臣等窃维该夷等既在广东称兵犯顺，而历厦门、福州、宁波以至上海，尚不敢遽肆鸱张，是其愧怍之心尚存，可否因势利导？请旨飭下直隶总督，倘有夷船到津，先行设法妥为羁縻。一面钦差熟悉夷情之大臣，与之就近议定大局，令其缴械息兵，再飭回粤，另议妥善条款，借以维持国体，而弭衅端。再据吴健彰密禀，该夷之贸易，以茶叶、湖丝、吗喇啤三项为大宗，会议时自应将此三项加重收税，而于别项货物酌予减免，则挹彼注兹，必当有盈无绌。现值军需浩繁之时，应否从权办理，恭候钦定。

何桂清奏(同年三月一日)

据苏松太道薛焕先后禀报，佛酋亦于二月十六日乘坐三桅火轮兵船一只驶抵上海，举动极为秘密，而讹言四起，有意拦阻海运，停纳关税，以要求在汉口设立码头，及自行前赴湖州、崇安收买湖丝之谣。民情甚为惶惑，土匪蠢蠢欲动。臣等飞飭薛焕会同候补道吴健彰传谕各夷商，如果有此举动，即禁止华商不准贩运货物前赴上海，亦不准贩运洋货前来内地，则上海贸易断绝，无业游民，佣趁无资，尔等数十万资本必遭抢掳，勿贻后悔。尔等在此安分贸易，已逾十年，不得不先行谕知。各该夷商尚知感畏，浮言遂息。因飭海运局，将漕米赶紧兑运，装竣一船，即押令一船出洋；驶赴崇明十澈，现已兑过十分之七。薛焕又谕令各该夷领事，尔等公使到来，向皆彼此接见，此次莫往莫来，似非和好之道，以缓其势。英米佛三夷，以容俟异日定期接见答复。惟俄遣员外郎明常先至道署谒见，约期在公所与夷酋普提雅

廷会晤，薛焕盛设仪从，如期而往，该夷放炮鼓乐，迎送甚为恭顺。所言皆系寒暄酬应之语，薛焕亦未便与之深谈而散。至二十三日，英夷领事罗伯逊带同该国水师副将沙维尔、参将嘞至苏松太道署，投递夷酋照会臣等公文一角，并将臣等前次照复令其回粤之文退回，又附寄照会大学士臣裕诚公文一角，称欲即日北上，别无他语。又探得英酋名额尔金、米酋名咧托、佛酋名噶罗。二十二日夜，已有英夷兵船一只起碇出洋，往前途探路。二十三日，又有二只径赴天津。其余各船定于二十四日下午随同英夷一路北上。共有兵船火轮船十只，大小不等，约载夷兵一千数百名。又闻英夷尚有大兵头带领兵船数只，即由大洋径赴天津，不复再至上海。臣等伏查该四酋联樯前来上海，势甚汹汹，英夷竟将臣等照复令其回粤听候查办之文退回，径行起碇北上，米佛二夷并无照复之文，其情实属可恶！且闻此次之前赴天津，英夷已在该国中议定而来，佛夷系得受雇值，随同生事。米俄二夷则乘衅附和，希冀坐收现成之利，狡谲已极。惟查阅其照会大学士臣裕诚公事，尚无违悖字样，惟以人臣无外交一语，以为轻之，借此为由，欲赴天津，可见该夷心虽为利，而其虚骄之气，惟恐为人所轻。可否仰恳皇上天恩，将机就计，简派大臣即在天津，稍加词色，与之面议大局，再饬回粤，以免另生枝节。所有英夷照会大学士臣裕诚公文一角，臣等于折阅后，因该夷将臣等照会退回，臣等若再代为转递，其势更张，是以札飭苏松太道掷还该夷。

何桂清又奏(同年三月二日)

窃正二月之交，新任两广总督臣黄宗汉道出苏常，臣等与之议论夷务，据云，恐须先剿后抚，江浙为广东后路，将来兵与饷二者，不能不借资江浙等语。臣思先剿后抚，诚不易之道。现在东南十一省，湖南、湖北、福建肃清未久，逆气不远，征调繁兴，且时有回窜之虑。浙江虽称完善，而调兵募勇，西南防江西福建，西北防江苏安徽，东面则汪洋大海。宁波为通商码头，本境之土匪，时欲蠢动，攘外安内，几与用兵省分相同。又北路捻匪出没於皖豫之间，东剿则西窜，南灭则北起，设使再启边衅，则内寇外患，交并而来，又将从何措手？此就天下大势而论也！若夫夷务情形，臣等虽未稔悉，而稽考往事，道光年间林则徐任两广总督时，其才其力，足以制夷，该夷计无可施，即逞其狡谲，犯我定海，从此反复不定，用兵数年，沿海沿江之区，无不被其蹂躏，而江苏之受害独深，究归于五口通商而后已。今该夷违背条约，窃踞我城池，掳劫我大臣，凡有血气者，无不切齿痛恨，欲食其肉而寝处其皮也。广东民情，尚气嗜利，于窃踞之初，该夷设守未坚，因民之忿，攘臂一呼，从者必将响应，歼丑类而复城池，易如反掌，乃迁延将及三月。闻该夷已在城内外修筑炮台，扼守要隘，将军巡抚为所挟制，出示解散民团，开市贸易，则民气馁矣，民利得矣。虽有公正绅士，守法良民，起义愤于崇朝，皆非习于战斗之人，诚恐此时粤东义民已不若数月以前之足恃。或者日捣其香港巢穴，即不虑其不缴还城池，而臣等详加访询，香港孤悬海外，该夷之巡防甚严，我之兵民若携枪炮而往，彼以火轮船兵船拦截，必不容我登岸，若徒手而往，安能与枪炮相敌？此就广东民情事而论也！设调浙江健将劲兵，前往剿洗，无论金陵功在垂成，未可松劲。三衢正当

吃紧，未便疏防。而且跋涉长途，兵力先疲，饷亦不继，即使竭蹶张罗，克斯抵粤，仰赖圣主如天之福，一鼓而告厥成功，恐该夷以此次奉大学士行文饬令回粤听候查办，致受创惩，必将复来上海。谓我失信，与我构兵，以积其忿，上海固首受其祸，其他沿江沿海之地，更防不胜防。江浙二省，兵无可调，饷无可筹。如是而再求援于广东，已无及矣。况广东用兵，已难期必胜，倘日久相持，或竟稍有挫折，则夷势更张，转圜更难。各路土匪，亦将蠭起。上海即幸无事，而饷源断绝。金陵大营即不可复问，天下事尚可问乎？此就江浙两省不能援济广东兵饷而论也！有此三者，则办理夷务，不得不揆度时势，以柔制刚，钦遵谕旨，设法查办，未便轻言用兵。今英米佛俄四夷，连檣前来上海，其势颇张，若非商同吴健彰用釜底抽薪之法，消沮其桀骜之气，竟有不堪设想者。其天津之行，势难阻止，而叩关请命，犹是外夷乞怜常情。仰恳皇上天恩，俯如臣等前折请钦派大臣与之接见，稍加以词色，使无衅可寻，与之筹定大局，令其缴城息兵，再饬回粤，另议条款，以纾目前之急。俟内寇稍平，饷需充裕，然后卧薪尝胆，简练水师，再相机办理，以复国仇，而伸天讨，亦不为迟。盖闻现在与我通商之国，实繁有徒，不第英米佛三夷而已也。因五口码头，为英夷所创立，米夷则能独树一帜，不受英夷钤制，佛夷则为天主教祖国，其入中国也，较英米二夷为早，亦自称雄。凡各国之前来贸易者，分附于该三夷名下，悬其旗号，该三夷即重抽其货税，一二十倍于我之关税，以为募兵争长之计。大约英夷得十之七，米夷得十之三，佛夷则不及十之一。得利既有悬殊，故有事虽合而为一，无事即各不相能。俄夷亦附于英夷，往来五口，贸易有年，既不甘英夷抽收重税，又未奉天朝之命，故不敢自立码头，遂有往来吁求之举。观俄夷前投军机处照会系附入英夷之文，是英米之不相能，俄欲舍英而就米，已有明证。犬羊之性，反复靡常，似不难之设法离间，以夷制夷，使之互相携贰，渐行削弱也。若仅用此法以制之，则一衰必有一盛，仍非善策。各该夷所恃者，船坚炮利，我之师船，断难与之争锋，惟有夺其所恃，转为我用，方能制其死命。盖该夷等惟利是视，虽至坚至利之物，亦不难以重价购而得之，我之元气既足，即用反间之计，以购买其船炮，弱者植之，使之助我，强者锄之，使之不敢恣肆，则夷患平而边衅弭矣。由今观之，似当如此。倘日后情势变迁，又不能执一而论，是在办理五口通商之钦差大臣统筹全局，随机布置，勿仅顾粤东一省，该夷虽甚狡谲，无能为也。朱批：所奏实为明晰。

何桂清奏(同年三月十一日)

据苏松太道薛焕先后禀报，探闻该夷因守候广东信息，起碇日期又已更改。并有米利坚夷目史庭柏儿，翻译秦镇西，佛郎西领事敏体呢，夷目孔犬德甫辨斐縻，翻译李梅，俄罗斯员外郎明常等，前赴道署，呈递照会臣等公文各一角，内附照会大学士臣裕诚公文各一角。俄酋普提雅廷于二月二十六日出口，英酋额尔金于二十七日出口，米酋列托于二十九日出口，佛酋葛罗于三十日出口，均驶赴天津，尚有兵船二只留泊上海等情。臣等拆阅米佛俄三夷照会臣等公文，惟请将照会大学士公文转递，并无他语。其照会大学士臣裕诚公文，亦以不自行照复为词，欲赴天津，尚无

违悖语句，自应代为转递。除咨送军机处外，谨将照会臣等之文照录，恭呈御览。至该夷本定于二十四日起碇，而又迁延数日，不知其意何居。

第四卷 咸丰(中)

何桂清奏(咸丰八年六月二十三日)

查英美佛三夷，现据留署苏松太道薛焕密禀，已于六月初二、初四、初十等日驶回上海。并据李泰国前赴道署面称所求各条，已奉谕允，许其在牛庄、登州、潮州、台湾、琼州、镇江、汉口等处设立码头，不日当奉谕旨，敕下江苏巡抚前赴上海就近会议税则等语。臣正在钦遵训谕，先行恭录明发谕旨，照会该酋令其静候间，又据薛焕禀呈，英酋照会桂良花沙纳公文一件，并据禀明该夷兵船已陆续驶回香港，亦间有收入上海者。该夷因未奉到谕旨，仍欲北上，该升道已婉为阻止。臣拆阅照会，内有到沪迄今十日，未闻江苏巡抚赵任、臬司薛奉得应许之权，并耽延时日复行北上之语。除将该夷送到原文转桂良等查收外，照录恭呈御览，钦奉明发。臣恐仅止照会英夷而不照会咪佛俄三酋，将来又有借口，是以一律照知钦遵，俟其奉到后有无动静，再行酌量办理。所有熟悉夷务之员，现在会商抚臣赵德辙密为派定，俟桂良等到苏后，再行饬调随往。至李泰国本系英国通事，能通汉文，能说汉语，行为甚为诡谲，善于探听内地时事，间亦肯将各夷奸计暗递消息。咸丰四年冬江海关更换司税，该夷面求前抚臣吉杭尔阿照会该国公使，准其充当司税，该夷尚知感激。数年来关税较旺，未始非该夷严查偷漏之力。是以历任苏松太道无不加以颜色，驾驶而用之。其现在吁请钦派抚臣赵德辙督同薛焕查办税则者，因抚臣薛焕恩信足以服之，不致以异类相视，彼即可据为奇功，夸示各夷也。天津所定通商条约及镇江等处果否准其设立码头，臣虽未见明文，而李泰国向薛焕所言，必非无因。臣辗转思维，徬徨四顾，欲善其后，惟有借会议通商税则，聊以补救。臣前此既不能挽留黄宗汉即在上海会议，致任阍人畿辅重地，肆其要求，又乏我战必克之力，出奇制胜，业已愆尤丛集，敢不会桂良等商之抚臣赵德辙，屏绝浮议，严防泄漏，上秉朝谟，维持大局，务期勿再另生枝节，杜其得步进步，以冀仰纾宵旰之忧。

桂良等奏(同年八月二十七日)

窃臣桂良花沙纳奉命驰赴江苏办理税则事宜，于七月十九日出京，八月十三日在舟次接奉寄谕，飭令兼程行进，即日解缆，于十八日渡江，十九日赶至常州，当即会同臣何桂清，悉心商酌。所有筹办事宜，先经臣派委江苏按察使薛焕督同委员候补知府吴煦与英夷威妥吗、李泰国觐面辩论，渐有端倪。嗣臣何桂清承准军机大臣密寄八月初八日上谕二道，又于八月十四日，臣明善、段承实过常时赍到发阅密件，并传谕旨会同熟商，应行宣示该夷之件，当行则行，当改则改，等因。钦此。臣等查清厘历年短收课本为笼络夷人之计，但犬羊之性，何当难保其不借此要求贴补。全免入口税课一层，亦为夷人惟利是图，给以便宜，庶易令其就范。但设关抽税，借以稽查，若听其自便，则利柄尽属该夷。奸宄且有不可胜道者，臣通同商酌，拟请将加惠该夷之恩旨，暂缓宣布，其第一最要之事。臣桂良等秉承圣训，自当谨遵酌办，惟夷性狡黠，似未便明言。两月以来，经薛焕等设法开导，似有活动之机

，臣等自当尽力设法为转圜之计。至该夷趋利若鹜，乃其本性。内江添设码头，若与办论，徒滋口舌，惟有不准其将内地货物即在内地贸迁，则无利可图，或者其利可以渐息。若夫兵费六百万，似不值与较。现在每年所征夷税，较前尚不短绌，约计不过一两年可以给清。尚有该夷欠缴咸丰三年份江海关税，或可令其酌量抵还。以彼之税，偿彼之费，于我似无大损。以上数条，新约内约略言之。当此之时，务以尊崇国体为先，尤以收回利权为要。明善、段承实于八月十七日赴苏，拟即径赴上海。臣等之意，谓必须谋定后动，庶出万全。已飞函令其在苏暂候，臣桂良等即日启程由苏赴沪，臣何桂清即将防务料理妥协，数日内亦即前往。惟有竭尽愚诚，以冀潜移默化。近闻该夷尚称驯顺，上海城内亦并无夷馆，夷人不致有意外之虞。朱批：卿等陛辞时，朕谕卿等为一劳永逸之计，若逐款与较，何异授该夷以柄，晓渎不休。况抵偿兵费一节，全括于免税之中。此时初入手即作此下策，徒令该夷气骄意得，反似有所畏忌勉强而然。何其见不能定，心总易摇，朕殊为过虑，恐其一浪未息，一浪又兴，后此作何了局。惟望卿等断不可于内定办法之外，另筹省事之法。破除情面，勿恤人言，方不致自干咎戾，无裨大局。

何桂清奏(同年九月三日)

各夷中之往来贸迁者，谓之夷商。总理各口贸易事宜，取其盈余以供国用者，彼初称为公使，今则偕称大臣，我则目之为夷酋。其领事等类，乃夷酋所属之人。是夷酋与夷商分而为二者也。江海关征收夷税，向由夷商将货物清单报明领事，转报海关稽征，明文立案，中外皆有册籍可稽，并无浮收及征多报少之弊。若清查浮冒，则该夷并无赔累，夷酋夷商均不知所感也。税出于商与夷商无涉。若免其出入口税课，夷商固属乐存，夷酋仍不知感也。鸦片烟我虽有禁，彼则仍然贩运，今欲改其名而弛其禁，则内地匪徒不至于聚重护送，酿成后患，其利系在我，与夷酋夷商均无出入也。其称兵犯顺，因夷酋不能进广东省城与钦差大臣会晤起见，故先窃据广州，而欲诣关，皆系夷酋虚骄之气，与夷商无关。驭夷之法，似应推求起衅之由，顺其性而驯之，方有把握。否则转以钦差大臣所定条约既不足凭，更坚其请觐之念，另起衅端，所关实非浅鲜。臣先向明善、段承实详细告知，而段承实先于渡江时遣派随员前赴上海，暗访明查，亦属无从下手。桂良等到常后，臣又细加密商，意见相同。现在另筹转圜之法，将第一紧要事件设法办理，以冀仰慰宸厘。朱批：知道了。已有寄谕令遵内定办法，即使有所窒碍，亦应缕晰陈明。

桂良等奏(同年九月十二日)

臣桂良花沙纳于八月二十二日行抵苏州，明善、段承实已于十八日先到，因接桂良花沙纳囑其在苏暂候之函，是以未遽往沪。嗣于八月二十五日同时由苏起程，二十八日行抵上海。督臣何桂清与藩司王桂龄亦于二十九日、三十日赶到。当即商同照会英夷，令其派人会议。旋接该夷照会，即因广东之事，辩论不休，另钞恭呈御览。臣桂良等先经密囑按察使署上海道薛焕将原议章程向其探访，看其动静如何，迅

速禀报。据该臬司面称，夷情诡谲，未可轻议条约，即将税课全免，不过夷商感恩，欲其罢弃全约，势必不行。且夷性多疑，我若持之过坚，恐致决裂。伏思该夷因臣等到迟，早有烦言，及见简派钦差四人，恐我必有更张，时借谕旨内夷船阑入天津，照会前来，晓晓置辩，是其难与商量，已可概见。即第一要事，该臬司亦未必明言商确，虽经多方感动，能否消弭，尚无把握。惟事关重大，臣等必须竭尽心力，责成该臬司等设法办理，以冀稍慰圣怀。细阅该夷照会，所重不在利益，即以税课啖之，未必能动。此时遽得宣露，恐该夷以贪利起见，佯为应允，再过一二年后，又执约中之事，向我要求，何以应付。抑或另生枝节，均不可以不虑，彼时再欲收回利权，更从何处措手。日昨承准军机大臣密寄，咸丰八年八月二十三日奉上谕等因，钦此。恭读之下，惶悚莫名。臣奉命商办税则，又蒙皇上指示机宜，自应遵照办理，无如体察夷情，参酌时势，不敢顾此失彼，贻误大局。再四斟酌，惟有因势利导，补偏救弊，和衷商办，总期无负委任。容俟有端倪，再行迅速驰报。督臣何桂清，因江北军务有须自行陈奏之处，是以未经列衔，合并声明。朱批：即使照该督之意办结，问该督能以首领保之？是该督真有把握，朕亦无不欣允。

桂良等奏(同年九月十二日)

臣等自出京后，各省文报无由得知，所有广东夷务现在办理情形，实不能得其详细。兹因英夷额尔金照会前来，臣等商之督臣何桂清及藩臬二司，一面出示晓谕各口商民人等，知中外各国永敦和好；一面飞咨两广督臣黄宗汉一体示谕地方商民，俾知天津业经议和，并嘱其知会罗淳衍等暂且停兵，俟上海商定税则后，当可永息争端。臣等届期再看该夷情形如何，另行知照两广总督办理。

附：英吉利照会：为照会事，照得顷闻钦差大臣桂花终得到沪，致本大臣怀悦矣。案查前于八月初一日发文两件，谅必得受，迄今并未见复。合以内题各节，请贵大臣略为解明外。以两广总督黄，暨罗、龙、苏三大员会同名称钦差大臣，特奉招勇帮办夷务，仍示百姓必捐饷银，招勇皆为黄总督所相帮。近仍悬赏格献外国人首，甚至总督用印出贴，有送巴领事首级，赏银三万两。迨八月十五日尚有黄总督张示，内指天津虽定条约，本大臣未知内载何事。夷兵土匪均各照旧设防，钦差三大员仍使捐需招勇，无不合理等词。该勇未知内外定和，县城事情为据，由香港派出小艇，尚有免战旗号，送人散贴示该地方民人悉。两国和定，该勇开炮伤人，只得调兵攻城，其应遭灾之勇，照常逃散。遗弃无辜小民，代受毁城大半之害。似此举动，大连天津议定和约之义，其任独在贵国皇上及各大臣。合先备文，希贵大臣立将黄总督奉命如何办理及罗、龙、苏三大员前项行为是奉何权？是为何意？以早解明。俟贵大臣见问不能照复其详之间，本大臣亦不便别议事务也。为此照会，须至照会者。

何桂清奏(同年九月十三日)

窃臣钦奉上谕一道，仰见我皇上乾纲独断，务使该夷中心悦服之至意，悚佩之余，自应钦遵妥办，为一劳永逸之计。惟夷性诡譎，得步则思进步，似应先清其源而杜其渐，方有把握。溯查从前在广东一处通商时，并无公使领事等酋居住内地，夷商往来贸迁，悉听广东洋行十三家。该洋行等于浮收勒索之外，又多亏欠商本，各夷商控诉无门，本有蠢蠢欲动之势。迨烧毁其鸦片烟土，各夷商即群鳩资馈诸夷酋，称兵犯顺。故道光二十二年在江宁所定条约，以裁撤洋行索赔商欠及鸦片烟价为请，其难发自夷商。自五口通以后，夷商与华商自行互相交易，已无洋行把持垄断之弊。其应完税课，由夷商报明领事转报海关稽查抽收，亦无冒收中饱之弊。鸦片烟则公然贩运，无从禁遏，夷商亦无间言。所以复行称兵犯顺者，系夷酋虚侨之气，为不得进广东省城与钦差大臣会晤起见。故本年在天津所定条约，首以往来礼节为请，而无一字提及海关冒收中饱。其欲更改税则章程，因今昔物价不同也。其索赔商亏二百万两者，亦据声明粤城大宪办理不善致英民受损等因，并非各口皆然也。是现在之难又发自夷酋，不涉夷商之事，与道光年间情形不同。此臣所请必清其源之情形也。该夷虽具人性，而凶狡异常，恃其船坚炮利，结之以恩，转而畏之，慑之以威，即行决裂。若全免其进出口货税，则归于夷商，所有广东商亏银二百万两或可不偿，而与夷酋无涉，其兵费仍在也。一经宣布德意，窃意更肆狡诈，以为此系大皇帝于天津条约之外，特沛恩纶于夷商，而夷酋之所仰望者更奢。不独所许各项不能全行罢议，且将并一二事而不能消弭，从此借口要求，转生枝节。至鸦片烟之弛禁与利害，全在于我，于夷酋夷商皆无出入，臣前已详陈之。倘该夷于得遂其欲之后，即扬帆而去，洵为一劳永逸之计，而后之盘踞者，仍不止五口。若不借征税为稽查，则华夷不分，更无约束，滋生事端，当不得崇朝。此臣所谓须杜其渐之情形也。臣维驭夷之法，从古以来，并无善策。当兵精饷足之时，鞭捶四夷，如使左右手，一遇中土多故，即乘间而起，无不深受其害。今各该夷尚假信义与通商，故臣欲示之以性，顺其性而驯之，使之就范围。虽日后之饶舌，诚不能保其必无。而免其税课，即能俯首听命，亦不能决其必遵。况自用兵以来，八旗绿营官兵俸饷甲米等项，发不以时，亦不足数，穷困已极。该夷布散汉奸，好行小惠，为之探听消息，即如内定办法，臣于晤见明善、段承实后始知其详，而夷商则已早有所闻。此必有汉奸佯为献策，而阴为该夷通信者。捐纳京员混迹京都，想亦不少。臣惊讶之余，实深危惶。朱批：历次寄谕朱批已剴切详明，勿庸再谕。

何桂清奏(同年九月十五日)

正封折间，接据该夷送来照复，内称谕旨降到之日，即行发交该夷领看等因。臣等现已派出藩司王有龄、臬司署上海道薛焕，会同该夷所派夷官，于本日未刻会议。俟办有头绪，即行迅速驰奏。该夷向来早半日送来照会，均书前期一日。再据臬司薛焕禀称，咪国夷酋现由日本回至上海，合并声明。

附英吉利照会：为照复事。接据贵大臣来文，披续之下，殊为骇异痛惜。查本大臣于八月三十日来文内将粤东官宪失当深重之处言明，詎贵大臣独出一议，只以前在

天津两国大臣于五月十六日商定条约，后奉五月二十四日上谕，概准依议。钦此。各缘由，迄今才行许为晓谕，使民知悉。倘若贵国彼时果怀真信，即先数月谕示布闻，显为应行，况今自不便更为耽延。但所纳者不过文件言词，则本大臣将以望和抑或望兵，实属无据。至黄总督及督办绅士举动，或由贵国背分失防，或由督宪等固愿争端，本国提督府虽经咨知和好复定，而仍肯办行，本大臣亦不庸察问。要在因顾始终之景，仅以贵国将总督离任并将绅士特奉之权削去之议，可为贵国诚存两邦永敦和好之至意。不及此法之全，则无庸议也。为此照会，希贵大臣及早照复。须至照复者。英吉利照会：为照复事。接据贵大臣来文，详细披阅，始知本大臣奉命与贵大臣在天津商定条约实心和好之至意，贵大臣尚未深信，且以出示晓谕，不便更为耽延，仅将总督黄离任并削去绅士之权，可以诚存两邦永敦和好之至意，等因。准此。查本大臣自出京以来，沿途访闻两广督部堂黄办理一切，未能妥善。业于途次具折恭奏，不久即可奉到谕旨，离任当不远矣。至该省绅士办理团练，原为防备土匪起见，各省皆有，于前次照会内言明。今贵大臣既因此怀疑，应由本大臣奏请大皇帝撤去其权，以示和好之至意。相应照复，希贵大臣查照。须至照复者。为照复事，顷接来文阅悉，因见贵大臣情原表白友睦之意，致本大臣心怀欣悦。倘贵大臣应承将黄总督离任，并罗、龙、苏三绅士特奉之权撤去，谕旨两道降到之日，即行转发本大臣接看，似此亟为照复。准此，则据八月三十日钦差各大臣来文内开派员商税并各事宜，本大臣亦欲以派委何员同商定义，备文指明也。为此照复，须至照复者。

桂良等奏(同年九月十五日)

该夷自入秋以来，虽因臣等到沪稍迟，啧有烦言，尚未闻有狂悖情状。及本月初一日照会该夷，令其派人前来议事，诿该夷置之不理，即于是日送来照会，以广东之事哓哓置辩。先以一面出示晓谕居民，一面咨明两广督臣黄宗汉母再出示，囑令绅士罗淳衍等暂且停兵，听候上海消息。诿该夷大不满意，于初三日照复前来，情词傲慢，无礼已极；另录恭呈御览。臣等与藩臬两司悉心商酌，诚难计出万全。若不允所请，不但他事不能商办，且恐立时决裂。况该夷见臣等四人同来，已有疑我背约之意，时时声言北窜，万一再至天津，大局诿堪设想。若允其所请，又与国体攸关，亦不敢冒昧从事。不得已于无可想法之中，为权宜救急之法，当即备文照复，免致生疑。告以沿途风闻两广总督办理一切未能妥协，早已具摺奏参等语。现在该夷是否静候谕旨，抑或先行商酌别事，俟其照复前来，方能定局，但愿不别生枝节，俾臣等得以尽心将第一要事设法消弭。并于税务中将赔价一款，言明按年摊扣归还，以便令其交还广东省城，暂顾目前大局。其余各事，只可从缓想法。此时若照原定章程，无论该夷断不肯全行罢议，而利权一归外国，日后夷商往来，均属无可稽查。所谓太阿倒持，授人以柄，其弊不可胜言。且不税于夷而税于商，更有许多窒碍。臣等非敢固执偏见，若稍可迁就，断无不遵照原定章程妥办之理。区区愚忱，谅可迎邀圣明鉴察。

何桂清奏(同年九月十五日)

两广总督臣黄宗汉于二月初间行抵江苏，正值各国夷船已到上海，不肯相机就近办理，以致夷船驶赴天津，酿成事端，贻误大局；又复意存观望，到任迟延，实难辞咎。至广东丁忧侍郎罗淳衍等在籍办理团练，现当议抚之后，又在上海商定税则，应否饬令该侍郎等暂缓攻剿之处？均候圣主鸿裁。

桂良等奏(同年九月二十九日)

自初六日派委藩司王有龄、臬司署上海道薛焕督同知府吴煦与该夷详定税则，连议三日，所有税务章程，业已粗有头绪。该司等于谈论之际，即用言语旁敲侧击，将驻京等事隐约其词，仍向该夷商探。惟李泰国不致从中挑剔，其何斯藩、威妥玛两夷，语多傲慢，经该司等正言折服。辄云条约以外之事，均可商量，条约既定之说，万不能动，坚持定见，矢口不移。臣等与臣何桂清及藩臬二司于初十日往洋泾滨会英酋额尔金，该酋率领各夷官迎接尚恭，即在夷楼会晤。十二日额尔金带同文武夷官十五人前来答拜，臣等仍与臣何桂清及藩臬二司公同接见，彼此往来，均未道及公事。因于十六日备文照会额尔金，告以驻京一节，诸多未便，碍难照行。当时在天津匆匆议定，不及细述颠末，此时商办税则，正好将此等不便之处，详细商量，以期永敦和好，将来办理各国务改由上海商办。该夷日前有求派钦差周历各口之请，是以告知或由钦派之大员有事随时代为陈请，往返甚速，较之由京发出查办，更为便捷。即明年互换条约，亦可以无庸远涉等语。照会去后，业已三日，尚未回复。当照会之次日，李泰国来至道署商论别事，臬司薛焕向其探询，据云，伊国条约已经奏明君主，恐难挽回。薛焕当即声言，天朝待尔等甚厚，事事俯如所请，可谓仁至义尽，若此等些须之事，均不能通融商量，恐不免从此闭关绝好，亦不收尔等税课，不如及早回头，免贻后悔。李泰国闻之，允以回去必向公使再三开导。现在能否商量，尚难预料。曾经密令藩臬两司于会商时，先将内定章程，作为己意，再向该夷透露，看其动静如何。据该司回禀，屡次微示其意，该夷曾有即使宽免税课，条约亦不能罢弃之语。若必迁就办理，仍恐利权一去，日后不能收回。此连日办理之大概情形也。伏思夷性犬羊，此番由广东启衅，借端滋事，猖狂已极。此时海内无论官绅士民，谈及夷人，莫不切齿痛恨，然皆系局外议论，倘欲因势利导，激而用之，又皆束手，此办理之所以难也。臣等奉命前来上海，示以皇上格外恩施，令其罢弃一切，仍于五口通商，该夷稍有人心，即当知感知惧，仍敢逞其私智，以为税课无关轻重，条约万不可违，穷凶极恶，罪在不赦。臣等前接僧格林沁咨文，知天津准备，一时未能停妥，设该夷允我照会，即将驻京一层于善后章程内注明，可以无庸前往。臣等拟奏恳圣恩，暂且免加诛戮，若仍怙恶不悛，臣等亦不必怒形于色，再行想法请旨遵办。至于内江一款，条约内载明除镇江一年后立口通商外，其余俟地方平靖，再由钦差大臣会议，自汉口溯流至海，仍不得逾三口。目下长江军务示清，设该夷定欲前往镇江，或至汉口，先立码头，臣等自必详加开导，止其暂缓前去。倘驻京一层，该夷允我消弭，即肯在上海商办一切事宜。惟原于镇江

、汉口两处先立码头，是否可以允许，暂为缓兵之计？臣等未敢轻议，现在事机蹙迫，若能将驻京之事，亦当可迎刃而解。特恐此机一失，再欲照此挽回，更恐无从措手。朱批：览奏已悉。

桂良等奏(同年十月二日)

所有内定章程，臣何桂清自到上海以来，屡饬藩臬二司于商办税则之时，设法引透，无如该夷总谓纵能免税，亦难罢弃条约。即臣桂良等屡奉圣训谆严，亦曾密令随员将内定办法从旁探询，实属难行，令人无计可施。藩司王有龄、臬司薛焕亦皆焦急万分，虽已精疲力竭，仍借税则故意延宕，与该夷早晚纠缠，总期能去一款，即少一款之患，乃该夷持之甚坚，难以得手。即驻京一节，且以奉到朱批，业已奏明伊国君主，不能更动为词。臣等于拜折后，接据该夷照复，另录恭呈御览。察其诡计，即能不长住京师，而“随时往来”四字，未肯改去，且必须择有一与彼有益之处，始可相抵，说至再四，方可得通。此一线尚非十分允许。臣昼夜思维，悉心商酌，总缘中国多事之秋，只可暂为羁縻。俟连年多收税课，即以该夷之财，制该夷之命，庶几不致受亏。果然省得驻京，则以后一切均归上海商办。可否由钦差大臣董率大员渐驯其性，不过多费心机，使其从容就范，较之一朝决裂不可收拾者，大相径庭。目下夷性未驯，甚难驾驭，实非臣等怯懦，希图省事，欲为将就了结之谋，益深恐祸患莫测，酿成兵端，转致上烦圣虑。现在上海火轮兵船业已不少，而自天津议和以来，夷心疑信参半，不于此时调停妥当，开年二月以后，设该夷又起戎心，虽津门海口准备已齐，一经用武，此后更难讲和。军家胜负靡常，若非兵精饷足，仅欲决成败于一战，万一兵威稍挫，更恐难以为情。且海运正当其时，无论天津、上海何处用兵，办理诸多掣肘。即不在天津而在上海，则苏州、镇江均属可虑。现在甚为浮动，臣等必当小心谨慎，妥筹办法，万不敢即时令其决裂，有碍大局。其驻京一节，拟备文照会，务令消弭。至于广东省城，亦必委婉商量，嘱其早日退还。其长江设立码头与内地游行二款，但能有法可施，无论如何为难，均须逐层妥办。惟佛国夷酋忽有驾船同赴汉口之信，闻委员探报英酋额尔金前已有欲往汉口先看地方之语，故于前折声明，今又突有三国同往之说，不敢不据实陈报。

桂良奏(同年十月四日)

目下税则虽已办有眉目，而所以迟迟未定者，原欲借此商酌条约之计耳！无如夷性犬羊，虽经饬令藩司王有龄、臬司薛焕等设法开导，又经臣等备文照会，诚难破其愚惑。臣等体察夷情，自天津议和以来，其心将信将疑，防我之念，几已无微不至。此时若仍事事将就，则后来貽患固属无穷，若稍露羁縻之形，又恐祸起目前，实深可虑。臣何桂清所以率同藩司王有龄星夜赶来上海者，正为夷性未驯，防其变生不测故也。日前扬城复陷，江北军情万分紧急，提臣张国梁已带兵渡江，大江南北军情日紧一日，臣何桂清与臣桂良等再四商量，势难强留。既拟二十五日申刻飞棹回苏，与抚臣赵德辙商酌一切，即行折回常州，察看情形再定进止。臣桂良等因夷务

正当吃紧，万不敢稍涉松劲。设该夷谓税则已定，不肯久留，一旦扬帆竟去，贻误匪轻。再四斟酌，惟有暂留藩司王有龄仍在上海，与薛焕等赶紧设法，力图补救。

朱批：知道了。该督既可离沪，王有龄何不可离？明系该员事事把持，总恐他人收效。况该督司此次办理夷务，独存成见，不准他人插手，殊属胆大。桂良等甘为其指使，更不可解。况此折铺叙粤捻各逆情形，于夷务不过寥寥数语，又不能将节经训谕之四层逐款筹办。该督此次任意之所欲为，一发莫遏，是已视朕旨如弁髦，罪有浮于耆英者。

何桂清奏(同年十月初九日)

咸丰四年二月，前任苏松太道吴健彰所雇金敦师船，碰损咪夷马眉亚商船一只，当据该夷商禀道索赔，约估修费不过洋银三四百圆，由该夷领事官照会吴健彰议赔洋银三千圆，仍令华夷各船主自行清理在案。忽于本月九月二十日，苏松太道接到咪酋照会，内称前道允赔已久，因库项支绌，未经交收，须加利洋银二百五十元，从四年二月三十日起。至该息银若干，必得克日了结，否则即将关税扣抵，务使本利全清等语。现在已由吴健彰查明华夷各船主下落，妥为办理矣。查以船主应赔之款，而索之于官，已非情理，约估修费不过洋银三四百元，而索赔至三千元，又须每日加利洋银二百五十元，迄今已四年零七个月，竟须利洋银至四十一万二千余元之多，更属匪夷所思。假使海关实有浮收情事，更不知其如何设法，是以前奉寄谕，密查各夷赔累吃亏之处，臣未敢宣露者，恐后其不可收拾之凭空要求也。至中外交涉事件，有不能凭律例以决断者，全恃条约以为范围。若不收其关税，则与万年和约及广东省原定旧章不符。一事废则百事俱废，天津之条约又作罢论，真可任其所欲为矣。如欲与之另定章程，该夷又将借口于万年和约，亦以废弃毋庸再议，就抚之凭据毫无，更难措手。此系就夷务论夷务，而未及民情商情军情也。桂良等一到江苏，即恍然大悟，正思设法补救。又欲先将长驻京城一事，无论如何为难，总求挽回以慰圣怀。至商民利柄，亦必当收回，庶江、浙、闽、广亿兆生灵衣食有资，不致另启乱萌。关税则不增不减，即以接济时艰。其各处游行，虽不能禁止，亦当严定章程以资约束，粤东省城缴回有期，凡此皆所以尊崇国体而借条约以维系之也。臣与藩司王有龄、臬司薛焕自揣力量，或尚能为。今军情大变，安危在于呼吸，臣忧心如焚，实不能再展一筹。现在三国夷酋均在上海，若不迅速了结，扬帆而去，则成了而不了之局，明年春水发生之后，非臣所能意料也。

桂良等奏(同年十月十九日)

日前英酋金向臣等云，若照近日相待之意，将来公事甚好商量。即咪佛两国亦皆愿永敦和好。本日咪酋咧卫廉因公事照会，内有中华有何需用咪国之处，定当协助相办等语。可见此时夷情，较之天津大不相同，稍堪仰慰宸厪。惟坚持条约万难商改，终夜焦虑，迄无良策。皇上圣恩宽大，责臣等以四事，并非强以所难，倘不能设

法消除，非独无以卸责，实无以仰对君父。无如夷情当甫定之秋，办理甚难著手，必与之明改章程，彼即指为背约。即如驻京一节，说至再三，方肯不长行居住，且因此款内有两“或”字，原属未定之词，彼乃语塞。若再商他款，势必不行。臣等与藩臬两司再四熟商，只得于无可想法之中，聊为釜底抽薪之法。如该夷入江，欲攫我淮盐之利，因正课杂项及商民所得，每年计数十万，恃以养命者，无数生灵，一旦被其攫夺，商贾凋敝，穷民失业，情形不堪设想，故不待其发端，先与要约明白，不准贩运。该夷仍复力争，说至旬有余日，乃得慨然许可。现在已将食盐归入违禁货物款内，不准往来装载。将来设有逾禁，亦必随时严办，以杜外夷侵越之渐，即炮弹军火，一概不准进口。山东登州与牛庄二处，以豆石、豆饼为大宗，向来皆系江、浙、闽、广商贩船户运销於东南各省，其利甚大。此项船只，共有二千余号，海运漕粮借此承运北上，其倚此为生计者，不下数千万人。臣等议明豆石、豆饼在牛庄、登州两处者，英国商船不准装载出口，屡向争论，始得允从。商船从此照旧贸易，不致遽绝衣食，海运漕粮，亦可兑运，实于漕务民生，两有裨益。前闻该夷载货数船，向牛庄、登州售卖，该处商民只肯接济食物，不肯与之交易，夷商废然而返。若往来二次，必自裹足不前。急欲与之计议，彼决不肯听从。内地游历通商一节，议明除京师不准往来外，无论何处，必须体面人方准该国领事官发给执照，由中国地方官查明签印，以便随处呈验。既有稽考，可免夷匪混迹耳。游历他方，多系传教之人，本属例所不禁，今有执照转能稽核，夷情最忌繁难，苦其累赘，日久或可不往。凡斯之类，只好渐次想法，从缓消弭。臣愚以为夷情悦服，遇事正可熟商，夷情乖违，筹办更难措手。俟中国兵精饷足，炮利船坚，惟所欲为，何事不堪罢议。为目前计，只得去其太甚者而已。现在英咪两国税则章程，已于初三日议明，佛夷亦于日内可定，因商酌之款与广东省城各事尚未定议，未敢遽行入奏。日前英咪佛三夷均有欲入长江之语，经藩司王有龄等示以通商当待军务完竣，各该夷均称此去不过往看地方，并不羁留，亦无他意。及告以沿途均有贼匪，必过不去，辄云不怕，决不至于滋事，屡经阻止，其志甚坚。臣等亲向商量，反复劝谕，至再至三，继复折以正论，咪佛两夷索然气沮，遵奉开导，不即入江。惟英夷坚执不移，无论如何说法，总云不过两旬折回沪上。再议广东之事，臣伏思该夷火轮船只，出入自如，自三年以来，曾经往来数次，无从禁止，不若示之不疑，以沿途照料为词，赶紧札道派委妥员，持文跟踪前往，观其动静。既据声称二十日内可以往还，人地生疏，又无货物贸易，亦断不能久留。沿江各督抚及带兵将帅，经臣何桂清于得信之初，已先行升咨查照，可免惊疑。臣等仍在上海静候该夷回来商办广东之事，并与斟酌各款。藩司王有龄因漕务及军饷诸事万分紧急，已于初三日星夜回苏，所有沪上现办事宜，仍由臣等督同臬司薛焕及随委各员妥办，并与督臣何桂清往返函商。

朱批：览此折不觉愤闷，尤堪痛恨。当辈此行，不但不能消弭，反不如原约，直令英夷轮船入江一行，设若不回，何处以之？

桂良等奏(同年十月二十二日)

夷船入江情形，于前折声叙明晰。该夷此时自行入口，即误有损伤，亦不能怨及中国，况经臣等与彼言明，更无异说。贼船跟踪一节，似可无虞。夷虽犬马性成，尚知顾忌，如可与贼联络，早已通同作弊。其所以必欲入长江者，实为将来设立码头希图利益起见，并非别有他意，似堪共信。臣桂良花纱纳前在天津，因值万分危急之时，不得已代该夷乞恩，原不过欲为退兵之计，及该夷必候旨允准，方肯退出海口，臣等实已计穷。此番特奉恩命，来至江苏办理税则，正可将失之东隅者，收之桑榆，岂敢视同隔膜。诚如圣谕所云，派桂良等前往上海，又命何桂清会同商办，岂真专为税则计耶！若仅希图了事，实非臣等所敢居心。迨行抵常州，接见督臣何桂清，即以内定章程实难照办，向臣等言及。臣等亦甚觉其坚执己见，然当时会衔具奏，即照督臣所议，及臣桂良花纱纳回船后私自商量，且俟到上海后查看情形如何，再为据实直陈，请旨遵办。嗣因到沪明探暗访，方知纵能免税，亦难罢弃条约，故未敢遽行宣露。诚恐税全免仍于大局无济，更觉失算。且细体督臣现所商办之意，尚属周妥。至藩司王有龄此番来沪，实系臣等公同函嘱前来，前月督臣回常，该司亦急欲还苏，臣等因诸务尚无眉目，仍留数日。兹奉严切训谕，不敢不据实直陈。臬司薛焕前因奉到谕旨，令其羁縻夷人在沪等候。该司因驻京一层最关紧要，当向李泰国等以京师土多风大，地冻天寒，与在京交出查办之件，较之由督抚奏请者，更稽时日等词，旁敲侧击，意欲令该夷废然思返。李泰国等以业经奏明君王，恐难设法为词。目下夷情虽驯服，均称愿敦和好，而一议及条约，即以背约为疑。所有奉旨谆谕四层，自当逐款商办，能否如愿，实难悬揣。其四事之外，凡有贻害甚大者，亦必随机应变，设法消弭，诚如圣谕所云，尽一分心力，即为天下消一分祸害。英酋自入江后，尚无消息，据云过二十日即回，计月内可以旋沪。日来与佛夷商议税则，兼及广东之事，该夷大约不能做主，仍须英酋回来，方可定议。黄仲畚未在上海，臣等初犹疑其躲避，嗣见黄宗汉摺内言及该员现在广东，用五品顶带在外酬应，方信其实已回粤。梁植现在上海，日前阻止咪夷母入内江，伊亦从旁传话。臣等私心揣度，倘能夷情日驯，由目前可免另生枝节，将来办理得手，然后从缓想法，渐除后患，似更妥协。总须兵精饷足，国势强壮，方可希图一劳永逸也。

何桂清奏(咸丰九年七月初六日)

通商事宜，向以英夷为领袖，咪佛各夷随同办理，现在咪夷已先进京换约，回南后必求查照新定章程办理。英佛二夷所属各国夷商，亦必借道光年间章程内有“大皇帝如有恩施于别国，各国一体均沾”之语，前来饶舌。若不允准，则夷商心存怨望，不为我用，不独无从施釜底抽薪之计，且商与酋互相比合，与我为难，兵连祸结，势将无所底止。设俯顺商情，从权开市，则英佛二夷新订之条约未换，从前之条约又有作为废纸之议，几无章程可循，领事、通事、司税人等仅可高下其手，从中舞弊。夷商既有利可图，亦暨置条约于不顾，从此夷务更不可问。而于议抚大局仍无把握，今冬海运必多掣肘。倘欲借咪夷为从中调处之，则英佛二夷现已鄙其取巧，且上年在天津英佛之就我范围，全系钦差大臣桂良等自行筹办，咪夷虽调处之言，未见实效。辗转思维，此次给发佛夷照会，实为夷务一大关键。因与抚臣徐有壬

往来密商，酌定一稿，发交署苏太道吴煦，借夷商正在抱怨普鲁斯之时，嘱令华商转告夷商。以此次天津之役，系由普鲁斯自行肇衅，与条约无干，徒于生理有碍，实属无谓。且初到上海时，钦差大臣桂良等已守候月余，应见不见，应商不商。迨抵天津，又不收文收物，硬闯海口，轰练拔椿。试问已经和好之国有此情理否？钦差大臣僧格林沁未将其船只全行击毁，非不能也，悯其愚顽也。今已小受惩创，则钦差大臣僧格林沁之用兵神速，炮台坚固，尔等谅已得知。若相持不下，尔等财货尽归乌有，所为何来。该夷商等咸以为然，纷纷议论，因之普鲁斯亦有所闻，始知众怒难犯，渐有悔心。华商复令各夷商将普鲁斯肇衅情由，寄信回国，互相传布，以杜普鲁斯之控词耸听。吴煦等因有机可乘，即遣伊担梅德尔，并由梅德尔转邀布尔布亲信最深之夷人，齐向告知。臣尚未悉佛夷亦有死伤之人，有照会令共赴津换约，并令转告英酋。如此，国王闻之，必将加罪。在普鲁斯固属咎由自取，为布尔布计，殊属不值。布尔布始尚游移，继亦恍然，答称你等所言却是为我。总督如有照会前来，断不置之不答，但不知其如何说法。且英夷系属大国，普鲁斯心存报复，伊不便独自作主，只好缓缓进言。若得何总督亦给普鲁斯一文，则更易于措词等语。梅德尔即禀吴煦等将照会发给，旋据布尔布送到照复之文，由吴煦等禀呈前来。臣细核照复之文，情词尚属恭顺，惟以未能独自作主为惜。又称该酋与普鲁斯均已纤毫无疑。揆其意见，似欲臣亦给普鲁斯一文也。臣思布尔布既欲得臣照会普鲁斯之文，为进言之具，则其力不能转圜，必借天朝威力以制之，已情见乎词。普鲁斯始则逞其桀骜之气，姑思一试，继于受创之后，为众商所抱怨，其气已馁，亦可概见。此总须议抚完结，与其专借咪佛之力，留将来借口地步，莫若俯如布尔布所请，亦给普鲁斯照会。先责以不在上海接晤，此次布尔布照会内纤毫无疑之语，诘其是否进京换约，而不言天津之事。并再照复布尔布，告其已给普鲁斯照会，仍密嘱吴煦等令梅德尔及各夷商再行设法挽回，总以尊崇国体，不露我求和之意。且视普鲁斯有无回文，再行相机办理。就现在情形而论，咪夷既以进京换约，佛夷久已疏通，则英夷之势已孤。至布尔布所称业已奏知该国王，应候回信办理，亦尚在情理之中。而夷商人等已写信回国，则普鲁斯之恃强妄为，该国亦必当有所闻知。即使尚有后言，我可就各该酋之回文与之理说，或可息事弭兵。

何桂清奏(同年七月二十四日)

臣与佛酋照会往还，彼此疑团尽释，夷酋颇知感激，寄信回国，极言普鲁士之背约肇衅，是以臣乘机给予普鲁斯照会，以期就我范围。不意适有民夷互斗之事，先是常有夷雇募内地民人出洋种地，无还乡者，因之讹言不一，无人应募，该夷即勾串中外匪徒，设计拐骗，并敢潜伺僻地，掳捉孤单行人，于是民有戒心，每于洋泾滨马路一带，集众巡查要截。六月三十日，吴煦等查有佛夷商船载送人口出洋，当即照会各国领事飭令放回，民间亦互相传播，势甚汹汹，马路一带聚人更多，适有英船水手二人路过该处，民人即指为掳人之犯，群相横殴，该水手一死一伤。英夷李泰国及英医生合信上前解劝，尔时华民人多手乱，不辨是非，将李泰国、合信一并殴伤，经道营厅县驰往弹压解散。七月初一日，有暹罗男妇六人至城隍庙闲游，适

值演戏，人皆疑其乘机拐骗，争先驱逐，致将夷人一名挤入荷池淹毙。上海县知县刘郇膏驰至，将其余五夷押回夷馆。从此民夷各怀疑惧，各夷在洋泾滨集兵安炮，民亦咸伸公愤，势将互斗。吴煦等一面出示晓谕，被害之家只准禀官查办，不准私自报复。一面会营前赴夷馆，传齐英、米、佛三国领事谕以尔等掳拐民人，肇此祸端，已成众怒难犯之势，今不将载人出口之船迅速追回，转欲与我民互斗，须知民难数计，愤极则无事不可为，勿谓江苏风气柔弱，可以威力制之也。英夷署领事密迪乐、咪夷领事士觅威良金称掳拐人口，情同强盗，佛夷船只代人载送人口出洋，以致李泰国等熙被杀伤，但求查拿误杀伤之犯，照例治罪，伊即撤炮收兵。佛夷领事伊担迫于公论，以载人者虽系佛国之船，而雇人者实系吕宋夷人之事，亦愿追回原船。至初三日伊担将原船截回。吴煦等会营督同厅县亲诣该船，限同伊担及吕宋国领事伏姓并布酋之翻译官玛姓逐一查点，共计被其拐骗上船华民一百五十七名，讯明籍贯，分别遣回，民情始觉稍定。惟提释之人皆系六月二十日以前上船者，闻尚有六月二十一日以后被骗之人，未经截回，正在侦查间。初八日英咪二夷之天主堂内有人讲说夷书，即有华民前往，告以尔等讲书系劝人为善，必须先劝自己，不可伤天害理，掳捉人口，然后再劝他人。因又互相争闹，将堂内门窗打碎，夷书烧毁。无识愚民因而纷纷迁徙，夷人既不敢轻离洋泾滨，华商亦不能进洋泾滨。十一日，在宝山县境吴淞口外，又截获驳船人口出洋之钓船一只，取出被拐民人三十四名，拿获夷人一名。是日下午，上海县东乡又有水手二人被乡民殴毙，该乡人一死一伤。臣于接报后，查上海情形，全恃华商联络夷商，惟往来贸易，能探悉彼中确信。今民夷互相猜贰，华夷各商势将杆格难通。江苏民情安分者大都畏事，其一唱百和，恃众滋闹者，类皆无借之徒，一经胁之以威，即各鸟兽散，无能为役，非若广东之可借以集事者。且所毙所殴，并非掳拐之犯。而动手之人，亦未必即系受害之家。公愤之气既不必遏，而借端生事之风，亦不可长。当即飭委留苏差遣之前任常镇道乔松年执持令箭驰往上海，会同吴煦等妥为抚绥弹压，访拿代夷拐骗几致酿成钜案之匪徒，即行就地正法。并将吴淞口所获之代夷载人钓船，锯示海滨，以昭炯戒而快人心。至掳拐奸夷，果系吕宋、佛兰西，而伤毙者系英吉利、暹罗。则因事误杀伤人，例有治罪专条，亦应缉拿凶手，照例办理，庶华夷之心，两得其平。英酋普鲁士于接臣照会后，因有民夷互斗之案，即以臣系总理通商事宜之大臣，所问条约不便相复，而以李泰国无辜被人杀伤，凶手未获照复。并据密迪乐等向吴煦云：此事该国主必以普鲁斯为办事不善，将其撤回，另换人来接办。该国官兵死伤不少，必议用兵，若得钦差大臣桂中堂给与普鲁士照会，尚可和解等语。吴煦等告以钦差大臣僧王已得制驭尔等之法，若欲用兵，衅自尔起，天朝向以曲直为胜负，并非向尔等求和，尔等尚熟思之。将照会禀呈将来，臣细加查核，虽无桀骜语句，而密迪乐之言，其为普鲁士授意无疑，俟其有无照复，再行遵旨酌量办理。所有往来照会二纸，并河北新闻纸一纸，夷人信稿一纸，照录恭呈御览。再 圖山关等处炮堤类多坍卸，所安炮位，节经兵营调用，间有归还，所存无多，额设弁兵亦不敷用。现在时异势殊，所有江防事宜，容与钦差大臣和春熟筹妥办。

何桂清奏(同年八月九日)

再上海民夷互斗，衅起夷匪掳捉华民，而掳捉实肇端于拐骗。此等拐骗断难曲从宽贷。惟推究始祸之由，尤以禁止外夷雇人为第一要义。臣前委留苏差遣道员乔松年会同抚臣徐有壬所委之候补知府吴云同往上海，分别抚绥弹压。密访吕宋等国本有买人为奴之风气，有该等并无生业之夷人，随船前来，漂流内地，谓之流田亡鬼子，各国皆有。该流田亡等即勾通内地游手，以雇人种地为名，始则拐骗，继而掳捉，将内地民人卖与各夷。现在之案，实吕宋法兰西所为。已据宝山、上海等县报复，拐犯王阿福、林彩成、徐启东、张端记等四名，由乔松年会督严讯，均籍隶宁波，各自代夷雇人，曾在各处掳掠人口二十余名至百名不等，陆续送上海或径吴淞。所得雇值，除酌给被拐之人外，余俱花用，不记确数。该犯等均向夷人诡称受雇而来，该夷于被拐者，言语不通，无从别其真伪，即间有诉辩者，该夷即疑为翻悔，不复置问，究黠不移。乔松年以该犯等稔恶最著，几至酿成事端，未便稍稽显戮，即于申明后遵照原奏，将王阿福等先行就地正法，枭首示众，钩船锯示海滨，民心为之大快。其打毁天主堂、焚烧夷书者，亦系内地无赖之徒，并已分别责惩，夷情亦均贴服。复与该领事等再三要约，嗣后不得雇人出洋，并将流氓鬼子驱逐回国。俟接到复文，仍由臣照会各夷酋一体饬禁。现在李泰国等伤已平复，惟初次误毆英夷及挤溺暹夷之正犯未获。二次毆毙，系属什腊夷人，亦由因疑致误，已饬县拘传犯证，确讯究报。所有中外未获掳拐各犯，并饬访拿由地方官及领事分别办理。察看民夷猜嫌已释，市肆均尚照常。朱批：知道了。正凶未获，总难了结，着上紧严缉，勿令漏脱。

何桂清奏(同年八月初九日)

普鲁士借上海民夷互斗为口实，搪塞照复，迄已旬余。该酋接到臣照复之文，并未另复。现在互斗之案已经委员乔松年等查办完竣。吴煦、蓝蔚雯等因民夷均已安贴，七月二十日前，吴淞口时有夷船二三只，出入不常，密探普鲁士及布尔布仍无动静，即传诚实华商，谕令作为己意，转告夷商：以天津之事，系普鲁士任性妄为，布尔布随同附和，中国将弁亦有伤亡。现闻京中王大臣公议，不令普酋进京换约，前议概作罢论，并须赔还兵费，方准通商。但衅由普酋所肇，尔等失业可悯，如该夷等自知悔悟，尚可恳求总督转乞大皇帝格外施恩，或能仿照咪夷七口通商间程办理，即在上海换约。夷商闻之，亦深疑惧。而以普鲁士等前此寄信回国，如何措词，甚为秘密，诚恐该国王调兵前来报复。现在普鲁士等业已不能自主，必须另行设法办理，方与伊等贸易无碍。华商人等因而议普鲁士等必已捏词耸听，虽有新闻及夷商家信寄回，而夷商中亦未必众口金同。该国王远隔数万里，未必即能备知实情。倘能由钦差大臣桂中堂将普鲁士前后桀骜情形，详细照会英夷宰执大臣，俾国王了然于胸，亦弭兵息事之一法。英佛两国相距近甚，如交佛夷代递，必可收到。咪夷上年在津，亦系先定和约。本年天津之事，明知英夷不肯即了，伊只图见好，允为调停，仍踵上年故智，先行换约。其居心实属巧滑，亦不易于驾驭等语。并据吴煦等将译出新闻纸抄录具禀前来。臣查阅新闻纸类有英夷船只于未开行以前，在河北一带测量水势深浅之语，即系该夷绘书天津炮台图说之诡计。咪酋在京，亦不感

激我相待优厚，是其处心积虑，不忘报复。而咪与英之貌离心合，均可概见。惟普酋等六月十六日遣船送信回国，照寻常往来程期计算，约十月间可以返棹。兹事必多议论，非仓猝所能定，恐须冬夏之交，方有回信。虽准钦差大臣桂良等咨会，咪酋已定期在北塘换约。开市之期，言明应与英佛一律，尚须回至上海再议，不致参差。又准钦差大臣僧格林沁咨，咪酋华若翰已于七月十九日由北塘启碇南旋，而此半年之间，相持不下，关税难期起色。且九月以后，即应料理海运，万一该夷拦阻沙船出口，即多掣肘。议者或云暂改河道，无论停办多年，骤议复旧，船只河道非数月所能竣工，亦无此经费。且江北捻逆交乘，耿耿虎视，更未敢冒昧从事。或又云仍行海运，而改道刘河出口，殊不知由刘河放洋，不能升越吴淞口外。咸丰四年间之改道刘河，因刘逆窃踞上海县城，其患仅在上海，本与吴淞口外无涉。今夷船停舶于吴淞口内外，与不改道何异。臣焦思中夜，几至张弛两难，是独能知人之病源，而不知用何药以治之也。咪酋华若翰已于七月二十五日返棹上海，寓居洋行，尚无动静。朱批：知道了。务须妥为筹画，明年海运事宜于万难之中，总要全数办成，责成沙船，方有把握。若有夷务搅扰，独能安稳抵津，朕必令验米大臣查明该绅耆等请旨加恩。

何桂清奏(同年八月二十二日)

查咪酋华若翰返棹后，连日与英佛二酋往来密谈，夜分始散。英领事密迪乐则因催缉杀伤英夷凶犯，向吴煦等云：天津做成圈套，诱其入港，致毙多命。咪酋入都待如俘酋，又令回至北塘换约，咪酋因势孤，不得不然。各国商人无不忿忿，明春定欲赴津报复。上海本可无事，忽又造出掳人之说，以致百姓滋闹，正凶又不拿获，明系华官故意唆使百姓为此，必致激成大变。吴煦等因其语无伦次，答以咪夷进京，待之以礼。又奉大皇帝颁发玺书，荣宠已极。尔英佛二国若不自行肇衅，亦必同邀异数，今因美而生妒，作此不经之谈，希冀播弄是非。此等伎俩，孩提之童亦能识破，言之无益。至掳人之案，虽与尔国无涉，而愚民无知，安能分别谁为何国之人，一时忿激，已成众怒难犯之势，若非地方官妥为弹压保护，尔等恐吃亏尚不止此。既许尔等缉拿要犯，决不食言。惟人多势众，并无首先起意之人，必须设法访缉，始无枉纵，不能顷刻拿获，亦不能助尔抑民也。密迪乐无词可答而退。旋据华若翰送到照会，以换约后应照新章开市，请即咨行五口并新开之潮州台湾二口晓谕商民等语，竟将前此在京与大学士桂良等往来照会抹煞，显系为英佛所唆使，意图尝试，臣当即查案照复。乃该酋后来照会，则将在京往来照会饰词狡赖，约臣于八月十九日前往上海会商，先照新章完纳船钞，并在新开之潮州、台湾二口先行互市。其余暂缓施行。且向吴煦等声称，臣如不往上海，该酋即至常州，并以此事关系甚大，亦不便与委员蓝蔚雯等商办等语。吴煦等与之反复辩论，坚不允许，将照会转呈前来。臣查天津原定条约，因各货转运内地，课税未经议定，故有限四个月为期出示晓布之语。嗣于上海议定税则，即于善后章程声明第二十八条所载，可毋庸议，则四个月期限，即在勿庸议之列。华若翰先则笼统请开新章，迨臣驳复，则所请仅止二事，一经允许，则得步进步，势所必然。且查桂良等前次照会内称：各口

通商，不止贵国一处，此时英佛条约尚未议定，未便两歧，恐碍通商大局，似俟英佛两国一律定义之后，再开新章。其如何定义，望与总理大臣会商办理等语，声叙本甚明晰。而该酋复文内则将“不止贵国一处”之语截去，仅以各口通商须归一律办理新章，取义含混照复，留为今日饶舌地步。臣现备文照复，应俟请旨遵行，视其复文如何，再作计较。惟桂良等照会该酋文内即有与臣会商之语，如其必欲见臣，一经坚拒，必致往来常州，骇人耳目。而英佛二酋既在上海，臣到彼后，不与见面，则怨望更深。拟轻舟减从，仿照前督臣怡良接见咪酋之案，订期前往昆山一带，与之一见。所谓两事，倘能待至英佛一律办理，最为妥善。否则体察情形，如无十分窒碍，再当奏请训示。万一借端欲为英佛作说客，俟有可乘之机，即当迎机以导，断不敢稍有迁就。再奉颁发玺书，已于初三日准直隶督臣恒福咨送到臣，当即备具照会派委标弁谨赍交苏松太道吴煦，据禀咪酋择于十三日祇领。上海民夷现已照常，仍勒催地方官上紧缉凶，禁止雇人出洋。

何桂清奏(同年十月十五日)

窃咪酋华若翰先请照新章开市，晓谕商民，经臣节次专折驰奏在案。迨奉到咸丰九年八月二十二日上谕，适华若翰已赴日本。臣约计该酋将次返棹，即先备文照会，告以船钞一事，尚可奏恳大皇帝加恩。该酋于九月二十二日回至上海，接阅照会，即飭夷目士觅威良往见吴煦等，声言换约后所请三事：一将咪国互换条约及先照新章征完船只吨钞，开潮、台两口等事，通行沿海各口遵照，一照新章即日定期征完船只吨钞，一于两个月内，准开潮州台湾两口，皆系约内应行之件，何以如是转折？吴煦以华酋在京，大皇帝准予先行换约，已属恩施格外。该酋照复桂中堂等，情原一律办理，并与通商大臣会同商酌，今之所商，系照案办事，有何转折。该夷目则称前云暂缓施行者，系上海续定章程，非天津原立和约。只要允此三事，其余不必提及。自申至戌，辩论多时而退。吴煦等察看情形，其意已决，将送到华若翰照会一件禀呈前来。臣察阅来文，措词既不明晰，语意亦不平正。内有应开二港向来、现在、并将来必有船只贸易，贵大臣亦有风闻之语，则明指潮州、台湾已私往贸易而言，其情尤为狡獪。伏查臣于六月间风闻潮州、汕头地方，有英夷苏里完假充司税，勾结内地奸民，在彼盘踞，冒收关税，即经分咨广东督抚、粤海关监督一体飭禁。兹准兼署广东督臣劳崇光咨，潮州、汕头因抽厘助饷，曾据委员余恩镕禀报，有番商沙黎云帮同缉私，颇为严密。今来咨之苏里完与沙黎云对音相近，是否传言附会，抑另有其人，已飭惠潮嘉道确查办理等因。又于七月内准闽浙督臣庆端咨，台湾地方时有夷船留易，飭据福州府知府照会英咪领事转谕各商，勿再赴台。据英夷麦华陀复称，英商不照和约交易，非关该领事之事等语，咨请照会该酋谕止。即经臣照会普鲁嘶，俟定义换约后，再飭商船前往。迄今杳无一复。并据吴煦等访得潮州、台湾二处，各国私自买卖，已有三年，税饷全无。从前尚属隐瞒，近时上海船到，竟有明报潮州、台湾来者。臣窃维潮州、台湾二口，本系咪酋所请，既经换约，迟早总可仰沐天恩，前往开市，惟该酋因贸易已久，欲掩其私开之迹，亟请先开，是尚知尊崇天朝，心存恭顺。若不允所请，则该酋等早在潮台两处贸易之船，

亦必不肯撤回，是该夷等转得自行其便，久将漫无限制。若准其先开，英佛各商援道光年间一律均沾之旧，亦必相率前往。惟未换之新约税则，则断不任其牵混，似大权仍自我操，不致有逾范围。至咪夷新章船钞本与英佛两夷微有区别，既据咪酋有不必提及之言，如蒙允于先开二口，则将换约后应先完船只吨钞，并开潮台二口缘由，明晰宣示，使知格外之恩，出自大皇帝，各夷不至自行其便，于体制亦极尊崇。臣因此次来文并无请见之语，是以复给一文，仍令定期至昆山相见，恐其得步进步，必须与之要约明白。兹据该酋照会，定于十月初九日前往，臣拜折后即日起程，往返不过数日。俟晤见该酋时，切实开导，除三事之外，均不得另有觊觎，始能代奏请旨；而能否允行，恩出自大皇帝，须俟奉到谕旨遵办。臣回常后，再行详细奏闻。再英佛二夷仍无动静，惟探闻粤东夷商，亦已指告普噜嘶之办理不善，各夷商揣度该国王必将另派人来议和，又虑中国另生异议，亦必准备兵船同来。其寻衅之处，有不在天津而在盛京山海关，计期总在明春之说。

何桂清奏(同年十月二十一日)

再臣于起程后，即在途次缮给咪酋华若瀚照会，允其如期相见，并先与之要约，俾有案据可稽，亦免多费唇舌。迨抵昆山晤面，华若瀚即称所请三事，如能立予施行，此外皆易商量，否则勿庸再议。臣当答以只能代奏请旨，不敢擅允照行。华若瀚又以在京所复桂中堂等照会，系七月十二日之事，既以换约，即应一律照约办事之语饰辩。臣告以北塘换约之事，议定而后陈奏，既先桂中堂等照会一律办理之议，本应全行缓办。惟念船只吨钞，本与英佛小异，潮台两口，亦系各国立议于先。是以仰体大皇帝怀柔远人之意，订期相见。并先备文将此外条约及上海善后章程税则必须俟英佛二国定议在办各节，详细告知。约俟收到复文，再行具奏。如奉旨允准，既系恩施格外，断不可再有干求，亦不得自相矛盾。与之辩论再四，华若瀚始无异言，待以酒食而散。旋据送到复文，尚有参差，请于十一月初一日以后，该国商船均按条约输纳船钞，并请俟十月初九日起，扣至两个月后，在潮州台湾开市。臣因船只吨钞，已奉寄谕，似尚可允，遂复以如期办理，仍须汇同潮台两口奏明请旨遵行。闻华若瀚拟接到复文，不日前往广东。臣与吴煦、蓝蔚雯逐细体察，既将善后章程税则等项言明缓办，止先开两口，并完吨钞，于大局尚无窒碍，如蒙俯允所请，可期该酋知所感畏。除另行恭折陈奏外，是否有当，仰恳皇上即赐明降谕旨，以便咨行遵照。再英佛如何情形，华若瀚并未提及，其非代作说客可知。臣不便稍露议和之义，是以亦未向询。至英佛受创之后，该国初次回信，总在十月十一月之交，俟有确耗，再行密奏。

何桂清奏(同年十一月初七日)

十月二十五日，据署苏松太道吴煦委员蓝雯禀称：探闻印度轮船于二十二日便到上海，英佛定见发兵前来，有英佛各一万之说。夷酋是否另换，尚无确信。二十六日复据禀报，探闻该夷等或云屯兵定海，又云夷兵到日，先停各口税饷。钞录香港新

闻纸驰呈。并接粤海关监督恒祺由轮船寄来之信云，英夷所调之兵渐次到粤，目前尚不见举动各等情。二十七日戌刻，又接吴煦等禀，二十五日英佛夷司税德都德往见该署道密禀，英夷水陆兵系由印度调来，因而较速，今兵头已到香港，不日前来上海。普噜嘶已接本国之信，昨夜传夷商密议，不知何事，诚恐碍及税务等语。该署道等答以普噜嘶在津，自取其辱，不知愧悔，复激怒该国王调兵报复，中国早有豫备，恐尔国徒劳无益。该夷无词可答。诘以夷兵何时到齐，何时赴津？该夷答以未知详细，至迟约在明年春初，但夷船亦不畏冰冻，许以得有确音，再行密报而退。将夷行探报禀呈前来。臣查阅探报，该兵头曼斯必带兵六千，已抵香港，核与恒祺函称渐次到粤之语，大约相符。

何桂清奏(同年十一月十四日)

前据署苏松太道吴煦、候补知府蓝蔚雯先后密禀：旬余以来，寄信轮船共到四只。十一月初二日，有三桅兵船一只，载兵六百余名，驶至上海。探系常在中国往来，现恐派令出兵，是以由日本驶至听信。英酋普噜嘶自得该国回信，因未派人接办，志气益骄。先经饬传夷商令其不必完纳关税，夷商等因华商曾经开导，即以有碍贸易，坚不允许。普噜嘶不得已，许俟兵船到后再议。并探闻英夷轮船前在天津北河一带探水，有相离北河不远之处，水势宽深，大船可以近岸。该酋初意一俟兵齐，即赴天津，由水势宽深处登岸，直抵北河炮台之后。因所调印度兵头内有以天津地势险窄，钦差大臣僧格林沁用兵神武，诚恐徒劳无益，不如将兵船分派通商各口，一律封港，不准中外商进出，较为省力。盖知中国战船无多，陆兵不利于水，即不打战，我已坐困，定能胁成和议也。普噜嘶亦以为然，是其计甚为险恶，又据咪夷可夫密报相同。英酋布尔布隆闻有撤回之信，其公使尚须另派。有新派之副公使梅尔登先自印度来，因咸丰四年该夷助顺协剿上海刘逆时，曾与吴煦、蓝蔚雯认识，于十一月初八日来见。据云伊国兵到，必先讲理，决不冒昧攻打。吴煦等答以尔国向本深明顺逆，此次既知计理，天下无不了之事，何必带兵？该夷则云事系英夷会办，不能不一同发兵，此系该国苦衷，中国必能见谅。吴煦等则答以天津事由普噜肇衅，中外共知，该夷亦深抱怨英酋而退。将译出新闻纸二件禀呈前来。臣查阅新闻二纸，一则英夷用兵之意已决，天津及通商各口，其患相同；一则隐约其词，似封港之说，不为无因，其患不在天津，而先在各口。揆核梅尔登情词，夷断难专主。其所称不即攻打，又与封港之意隐合，更难保非懈我军心。且英佛貌合心离，证诸新闻纸类，英佛不愿合兵以杜争功之语，亦属可据。现在金陵浦口军情同时吃紧，饷需军火，日不暇给，夷务又复纠纷，关税厘捐势必渐形短绌，海运更形棘手，容即会商抚臣另行筹议具奏。惟一线转圜之机，不能不属望于商人。此夷商寄信回国，群言普噜嘶之办理不善，该国王续得此信，不知有无变计？英夷梅尔登既与吴煦等阳为联络，英佛又互相猜忌，能否从中设法，臣已密饬吴煦等相机妥办，不可示弱，以致迹涉求和，而夷情狡谲，恐亦未必可靠。如英夷另派之公使，亦与梅尔登情形相仿，或尚易于商量。至前此探报内英夷所派兵头为曼斯必，现在新闻纸内又称系格兰，夷人名姓每有因翻译口音不同，致相径庭。而夷兵之陆续驶抵香港，又据

前浙江盐运使潘仕成禀报，接到广东来信，所言亦复相同。容俟续探确情，及兵到上海后，随时督饬吴煦等遵旨办理，另行驰奏。其咪夷船只吨钞，已蒙恩准照新章征收。查照道光年间一体均沾之例，英佛原可准其照咪夷完纳，此时英夷志在寻衅，既须维系商情，更须尊崇国体。若由我先发均沾之念，恐为各夷所轻视。前据英商援案呈请，吴煦等即谕令华商婉为开导，以各国船钞俱有新章，因英夷未经议定，不能照办。如援旧例声请，非由普噜嘶照会总督，奏请大皇帝施恩不可。普噜嘶知无可诿避，又为众商迫促，不能不降心相从，始有照会前来。佛酋布尔布亦援一体均沾之例，呈请照会，查核情词均不似密迪乐之谬妄，而每吨减征银一钱，并计亦数有限，正当笼络夷商及罗致佛夷之际，臣自未便拒绝。是以各复一文，以体恤商情为词，允其奏明请旨遵行。现已另折奏请训示，或亦息事弭兵之一助也。

何桂清奏(同年十二月十一日)

节据苏松太道吴煦、候补知府蓝蔚雯禀报：十一月十六日、十八日等，英夷续到三桅火轮兵船四只，各载夷兵一二百名不等，询系由香港或闽浙等省驶来，皆系常在中国往来者。嗣于二十八日午申等刻，先后驶到三桅火轮兵船二只，各载夷兵二百余名，二十九日午刻，又同来火轮兵船二只，一只三桅，约载夷兵二百余名，一船两桅，载夷兵百余名，探系由印度调至香港，派令先来上海。吴煦等督带通事上船查询，夷目是否来此议和？据云伊等只管本船夷兵听候调遣，是否议和，系公使兵头专主，不能深知。复询以既来上海，是否在此久驻，抑须他往？据云兵头尚在香港，守候后到之兵，伊等须待兵头到日，才定行止。三十日午刻，黄浦各夷船炮声络绎，探知英夷水师副兵头尊士者，搭坐公司火轮船行抵上海。旋有佛夷三桅火轮兵船一只随到。总计英夷轮船先后已到九只，约共夷兵二千数百名。佛夷已到一只，探明兵数另报。并探明英夷拟俟兵齐留兵二千五百名驻扎上海，又先在上海督造火药房二所。吴煦等现已派员并知会营汛饬密弁兵暗中防范，仍即示以镇静，俾免民心惊疑。至佛夷副公使梅尔登等前于十一月初八日来见后，吴煦等于十九日便道往答。据梅尔登云，该夷兵船已到澳门、香港两处，定可无事。倘俟兵齐再说，恐来不及。吴煦等答以天津之事，肇自英夷，尔国并未帮同打战，为中华大臣所深知。前在天津时，本拟奏恳大皇帝恩施，与咪夷一同在津换约，及公使随同英夷南归，可见并非中华相欺，此时不应自我言和？两江总督即是钦差大臣，何必另派？今尔国为英人牵制，调兵远来，中华亦早有预备，用兵则胜负不可知。若尔国情愿先行讲理，应由公使备文照会两江总督或江苏巡抚，请面为商定。即照咪夷之式，昆山相见，一切悉照咪夷办理，即在上海换约，亦无不可。该夷允与布尔布隆商酌再复。二十五日梅尔登复令翻译孙文典来见，以见言均梅尔登私见，尚未便向布尔布隆明告。况天津系伊国败绩，若先出文请见，显然求和，太难为情，总求钦差大臣设法措词，与公使见面。至面商之事，趁此时佛兵未到，只说先偿上次兵费，倘俟兵到恐须续加。将来应准公使仍从大沽进京换约，一切照前，并请先撤大沽防兵，乞为转禀等语。吴煦等当以尔国既不屑居求和之名，堂堂天朝，岂能转向尔国等求和？至尔国公使上次本因换约而至天津，带兵何为？既已带兵，自然有费，设竟进京换约而

返，试问费向谁索？自天津滋事后，自夏迄今，中华防堵兵费，共计千数百万，尔等亦当赔偿。若和议既定，应否仍由大沽进口，尚须斟酌。且英夷意见若何，尚不得知，岂能先行撤防。照此情节，断乎不可代禀，令其回复梅尔登，另作计较。将译出新闻纸内佛夷不欲与英夷共事，已属确凿。佛夷既已随同调兵，梅尔登复先以讲理之言屡来话试，其为貌合心离无疑。梅尔登、孙文典之语，句句愿和，欲处处逞强。且英夷新闻纸内，亦有允照旧章加还兵饷之语，是该二夷以兵协和，固为可恶。揆核情形，恐非急切所能就范。现在兵船到上海者虽共止十只，而新闻纸内开列英夷共调大小轮船七十余只，诸广东夷行贸易之人所寄上海信内之数，大约仿佛。佛夷虽无船数，所称起兵一万五千，恐亦未必尽确。而时已腊月，正当漕粮旺兑之时，诚恐兵船接踵而来，该夷等必有举动，此时惟有镇之以静，飭令照常办理，视其如何情形，随机应变，设法抵制。朱批：览奏已悉。该道驳飭梅尔登之语，尚属得体，然此时夷情虽骄，总不可使之远去，抚局难成，但能将偿费、撤防二层，暗为消弭，仍应作为佛夷并未助逆，先就范围，方为妥善。如能赴昆山面见更好，至英夷之狂悖，恐非言词所能化也。

何桂清奏(同年十二月十四日)

遵旨将咪利坚条约宣示海口，准该国在广东潮州先行开市，并照新章完纳船只吨钞。臣劳崇光接准移咨，当将该国条约通行宣示，并咨会粤海关监督准该国先照新章完纳船只吨钞，其余各项税则，仍照道光年间旧定章程征纳，不得与新章牵混。并准其查照原议，于本年十二月初九日在潮州开市。查潮州地方，粤海原设有分口，以庵埠为总口，汕头等处为子口，签派丁书征收内地海船货税，历年已久。现在咪国船只新来开市，虽与内地海船收税事例，微有不同，但该处原设税口，既由粤海关管理有年，一切事宜，可以驾轻就熟，自应归并粤海关援照广州大关征收夷税章程办理，勿庸另议更张，以归划一。惟开市伊始，必须添派委员前往会同该处原派委员妥为开办。关例扣满一年，汇数造报，仍由该监督随时设法，随时杜绝私弊，以裕课饷而肃樵政。该处分口，向来每年征额银二万一千九百余两，又缴米艇银约三万六千两，今夷船开市之初，每年征银多少，不能悬揣预定，应飭仅征仅解，核实造报，不准稍有欺蒙。俟一年期满，查看情形，分别奏明办理。至咪国使臣华若翰，已由上海来至粤东，到臣劳崇光衙门，臣当经接见，宣布皇仁，妥为抚驭。该使臣口称渥受大皇帝逾格天恩，通国人人感戴。查其情词恭顺，出于至诚。所请十二月初九日在潮州开市，现将届期，臣劳崇光既面嘱该臣委派领事前往，将该国商人、水手照料约束，慎勿稍生事端，一面由臣会同粤海关监督出示晓谕该处商民，一体遵照。其余未尽事宜，如有应行变通损益之处，再当随时酌核具奏。

何桂清奏(同年十二月十五日)

再臣前因外国商船有至登州、牛庄及沿海各处贩运洋药，甚至装豆南下之事，当即于接受关防后照会各国公使，并咨行各省一体飭止，附片奏明在案。嗣准盛京将军

奉天府府尹咨复照办，并准前任山东巡抚崇恩先后函咨，本年夏间，曾有外国商船十二只，在烟台海口停泊，近日愈聚愈多，颇有不肯通商，不肯遽去之意，由福山县知县余柏稟请咨飭各国查明何国货船，即由何国飭令回帆等因，复转飭署苏松太道吴煦照会各领事确查。兹据稟覆，佛领事伊担、咪领事士觅威良据复，并无船只赴东。英领事密迪乐则以登州口岸非由其所管，有无船只，实不知情答复。旋准崇恩来咨，九月十六日，有外国三桅商船三只，开驶南下，仍将未开之船设法催开等因。臣查前议条约，本与咪国无涉，今咪佛领事均称无船，英领事则称实不知情，而船只肩集烟台，经旬累月，任意去留，若非奸民与之勾结，私相贸易，不完税课，断无凭空逗留之理。就目下情形而论，该领事既不知情，则商船违禁妄行，在我不难设法驱逐。且条约未定，该公使领事等亦无可借口。而总以地方官先清内奸、自固藩篱为主。除咨明山东抚臣严飭地方文武协力同心，设法查禁，有犯必惩，并将商船一律驱逐出境。如敢私行交易，地方官失察故纵，即严行参办。

第五卷 咸丰(下)

何桂清奏(咸丰十年正月十八日)

据署苏松太道吴煦、候补知府蓝蔚雯先后密禀：咸丰九年十二月二十四日续到英夷兵船一只，二十八日又到一只，共载夷兵二百余名，连前到九只，共计十一只，并无动静。该国副水师兵头尊士于十二月十三日赴粤后，普噜嘶本月即日亦去之说，后因染患目疾，先遣翻译威妥吗代往，于十二月三十日驾坐送信轮船出口。并据探明，前报该夷停泊中华及左近属国洋面大小火轮船四十九只，内已到上海十一只外，其余三十八只俱已驶抵香港及广东、福建、浙江洋面。该夷又在香港招汉奸一千名，随往天津，以便挑运行李粮食，现已招得五百人。又佛夷有兵船十九只，现在安南，尚有五只已到广东。佛夷副公使梅尔登于十二月二十七日前赴宁波，濒行曾至苏松太道署告辞。据称往返不过旬余，如有商议之事，俟该夷返棹再商。该夷与威妥吗先后驶离上海，究竟是否实系前往宁波、广东，是否如期返棹，若合若离，行踪诡秘，无从探确。普噜嘶屡有拦阻漕船放洋之议，拟以兵船阻我出口。上海华夷各商纷纷传说，众口金同。其时头批米船虽已将次放洋，而情势汹汹，能否平安出口，尚未可必。臣一得此信，即会同抚臣徐有壬飞飭吴煦等嘱华商妥为开导，告以尔等离家万里，将本求利，设中华漕米稍有阻滞，必致先从上海闭关绝好，尔等运来之货即无从销售，内地之货亦不准转运来口，我们两国商人皆无买卖可做，必致绝尔我生理。华商以此传告，夷商咸以为然，密告华商云，普噜嘶之未经撤回，不过全其体面，实已无甚大权，必待该夷兵头曼斯必到后，始定如何办法。现在上海兵船不多，伊等情愿力阻普噜嘶不可造次。普噜嘶前既办理不善，此番或可不再执拗等语。普噜嘶始犹以阻运为策之至善者，迨经华夷各商往返辩论，喻以利害，普噜嘶知众怒难犯，不敢坚执阻漕之议。头批海运漕米，自十二月二十二日起，得以陆续放洋，并无阻滞。现在上海所雇沙卫等船，约计足敷江浙两省漕运之用。惟祝天气畅晴，并无风雨阻滞，则赶紧兑运，月内可以蒇事。一经全数放洋，沙卫等船吃水不深，沿边浅水内洋，为夷船所不能到，沙卫等船随处皆可驶避，纵不能因时抵津验收，亦不过耽延时日，盘剥蒸变，糜费折耗而已，尚不致束手无策。即使不能全数放洋，而头批已去，民心即定。此实仰赖皇上鸿福，非臣始愿所能计及也。江宁藩司薛焕驰回苏省，已于咸丰九年十二月二十九日接印任事，驻扎常州随时商办一切。并密咨钦差大臣僧格林沁，直隶总督臣恒福查照，一面会同江苏抚臣徐有壬、督饬薛焕、吴煦等查探确情，如有动静，或有可乘之机，即饬薛焕以他事为由，星夜驰往上海，察看情形，酌量办理。朱批：览奏均悉。

何桂清奏(同年二月六日)

窃臣前将探报上海夷情及海运头批漕米设法放洋日期专折驰后，江宁藩司薛焕以夷情叵测，海运堪虞，此事总须华夷各商设法转圜，因与吴煦等面为筹商。查有老成殷实与夷商素相契洽之华商徐昭珩、杨坊二人，堪以任使，当即密饬妥为办理。该

二商因与夷商中之怡和、广隆、宝顺、华记、公益、和记等六字号贸易来往，即以正大之词，反复开导，该夷商等已允相机行事。嗣据夷商窥测普鲁斯之意，由该夷商等公拟开列八条，恳为照准。内有天津原议五十六款，不能更改一字，及另贴银一百万两，布置一切。又带兵一二千至天津府城候旨，并请撤大沽防兵等四条，万难准行。其余如带兵仍赴大沽口外驻扎，事毕即返。又请中国钦差先行给予一文，嘱其弭兵息事。又约何时赴津，何时进京，请委大员同坐轮船前往。又兵费两不赔偿，夷商虽力为担承，普鲁必得以礼相待，方能照办等四条，诸多窒碍，亦不能行，复饬华商再行设法调处。海运二批漕米二十余万石，已于正月十二日起陆续出口放洋。旋据署苏松太道吴煦、候补知府蓝蔚雯节次密禀，英夷兵船两只于正月十一日等日先后出口，驶往极东深水外洋，或谓其前赴北洋查探情形，或谓其回东，无从探悉。英夷翻译威妥吗副兵头尊士，忽于正月十七日由粤回至上海。二十四日即有英夷兵轮船大小四只，由尊士督驾出口，探系前往山东直隶交界总隘洋面驻扎，预备拦阻漕船，滋扰天津地方。上海佛夷寓处附近空地，添搭棚厂五六十间，于十三日开工，据云不日兵到上海，藉以栖止。英佛两夷俱闻带有战马前来。英商费立盟认办英夷兵船面食，每日三万磅，计每百磅价银三两六钱。天裕夷商认办佛夷兵船牛肉，每日七千磅，每百磅价银六两三钱，久已立有承揽。并探闻英夷兵头脱兰即曼斯必有正月底二月初可到上海之说，然无行抵香港确信。又传闻英佛兵齐，即赴天津，断不侵犯炮台正面，必於大沽左近港口进兵，窥伺炮台后路。佛夷梅尔登即美理登于上年十二月二十七日前往宁波，探因该夷有船只来往定往洋面，托名护送商船，藉以索费。该处民人拿获，致相争殴，梅尔登前往调处未给，于本年正月十三日回至上海。旋据送到佛酋布尔布照会臣文一件，恳求清理此事，诚恐为将来藉口地步，臣已咨会浙江抚臣罗遵殿确查迅速办结，以免别生枝节。梅尔回沪后，即令该酋通事孙文典向吴煦等探询前次罢兵之议，吴煦等总令删去索费、撤防两事，另筹良策，尚无回音。伏查英夷兵船现有四只北驶，且与佛夷带有战马，添搭棚厂，豫备兵食，以见其必将用兵，恐即以拦阻漕船为胁和之计。虽经吴煦等叠次密谕华商转向夷商劝导，而普鲁所望甚奢，能否就范，尚无把握。倘有可乘之机，即饬薛焕以他事为由，驰赴上海，会督吴煦暗中筹商，相机设法办理。惟已经放洋之头二批漕米，是否不致阻碍，在后之米，能否跟踪出口，此尚难悬揣。臣仍会同江苏抚臣徐有壬督饬薛焕、吴煦等密探在后夷情，镇静图维，再行奏闻。

何桂清奏(同年三月三十日)

窃臣于咸丰十年三月初三、十四等日，承准军机大臣字寄二月二十四、三月初八等日上谕二道，并军机处咨会二件，当即缮备照会，钞粘咨文，饬发江藩司薛焕转给英佛二酋去后。伏查英酋普鲁斯其志本在报复。前此照会之文，该酋以为渠先讲理，如不允所请，再行动兵。适值杭湖警报频仍，松江一带相率戒严，上海人民迁徙，市井萧条，各夷领事翻译人等时至道署探讨消息，夷商亦向华商询问情形，普鲁斯从而生心，益思胁制。臣当即饬委薛焕以察看海运为由，驰赴上海设法办理。幸杭城于数日内克复，普鲁斯等静候回文，尚无动作。三月十八日接到臣钞粘咨会之

文，普鲁斯阅后，大肆咆哮，内北塘换约一层，尤为忿怒。邀同佛酋布尔布商议多时，十九日复集夷商先行责备，以此次劳师动众，糜费粮饷，所争只在大沽进京，尔等从前议立条款，总谓可以言和，兹复文此毫无愿和之意，可见尔等尽系谎言，惟有一意决战。夷商则以所请太奢，多方剖辩，普鲁斯置之不理。二十日华商复嘱夷商往询有无复军机处之文，据普鲁斯云，将来到京面言，此时无可再复等语。揆核情形，已将决裂。并探英佛两夷在日本等处买马千余匹，送至上海虹口地方喂养，一面赶制鞍辔，又令木工造叉式木架，钻有多孔，行用木人乘马，中藏火器，以为陆路冲突之用，不知是否确实。又闻前遣火轮船北驶，已于成山县之海山扎有夷兵，因成山对峙一山，中阔一百五十里，凡船只赴北洋者，均经此口。该夷兵专为拦阻漕船及商货船只而设。又闻普鲁斯之意，兵船到齐，概赴天津，并有附近数处，到亦侵犯。薛焕等因时势孔迫，密谕华商再行转告夷商，设法阻其北犯，无如该酋意颇坚决，总以不能由大沽进口换约及带兵赴津为憾。夷商又以中外用兵，不干我等之事，而拦阻漕船，不令南北货船往来，直是绝我生机，即中华商人亦不甘心，诚恐众怒难犯；普鲁斯悻悻而散。华商拟即邀集河船人等，与之讲理。据薛焕等钞录新闻纸三件前来，核与前浙江盐使潘仕成录送相符。臣查普鲁斯桀骜情形，实堪发指！自夷酋议拟八条以后，该酋意谓可以照行，经薛焕逐层辩驳，该酋复与布尔布备是照会，则以驻京、索费二事为主脑，尚系要求之惯技，及至军机处逐层指饬。该酋又因北塘换约一节，大为拂意，犬羊之性，难以理谕，果其决意报复，亦断非口舌所能争。臣惟有谆饬薛焕等会督华商拢络夷商，委婉开导，设法羁縻。至布尔布隆大抵悉听普鲁斯主持，该酋随附和而已。上海夷船自二月下旬后，往来无常，现在停泊上海者，尚有十余只。闻英夷兵头葛兰、佛夷兵头冒牛班，现已来至上海，该二夷兵船有三月抄闰月初到齐之说，为期渐近。虽夷商尚为我用，转圜实多棘手。除会同江苏抚臣徐有壬密饬沿海各县营妥为防范外，并飞咨钦差大臣僧格林沁、盛京将军、直隶督臣、山东、浙江抚臣一体备防，仍在密探情形，随时驰奏。万一不遵理谕，径行北驶，即饬薛焕遵旨驰驿北上。

何桂清奏(同年闰三月十八日)

再正在缮折间，承准军机大臣密寄闰三月初一日钦奉上谕一道，仰蒙圣主权衡操纵，指示周详，跪诵之余，莫名钦服！所有应行晓谕夷人之语，当即遵旨督饬薛焕等传谕夷商转告该酋等知悉。伏思夷情跋扈异常，此次官商设法羁縻，已唇焦舌蔽，而该酋等夜郎自大，全无人理，劝导既不能感悟，慑服似必赖兵威。一面仍饬华商以贸易之益歆动夷商，冀其不附该酋作祟，将来或可借以转圜。至目前事势虽近决裂，臣惟有会同抚臣仍督饬薛焕等妥为驾驭，如果稍有转机，必当在上海定议，然后进京换约，坚持前说，不敢稍涉游移。容俟探悉动静，随时奏闻。

薛焕奏(同年闰三月二十八日)

窃臣奉钦差大臣两江总督何桂清行知，承准军机大臣字寄，钦奉上谕：何桂清现筹

防剿事宜，等因。钦此。伏查夷情桀骜，蓄意称兵，暨节次设法化导情形，汇经何桂清先后驰奏在案。本月初二等日，夷人入定海厅城，连日饬探，尚无十分骚扰。续接署浙江宁绍台道梁恭辰报称，该夷在道头地方泊船，其城内散住者，约计五六百名。兹又由署苏松太道吴煦、候补知府蓝蔚雯探得夷船驶赴北洋窥测，以津沽防堵严密，港狭水浅，欲用兵船一二十只，虚攻大沽，牵掣我师。另觅得山海关以内有一海岸(不知地名)，计距大沽二百余里，距京师三百余里。该处港阔水深，可以登岸，约定各路兵船于外国六月二十五六即中国初七八等日，由此登陆，径奔都门。并雇有广东匪徒百名，内多熟悉直隶路径者，均令骑马前导，拟以北驶兵船分调一半前往，余泊沿途各港接应。此说甚秘，系夷兵船上所雇华人由北回汴，偶露风声。吴煦等又令华商密探，所闻相同。另由前浙江盐运使潘仕成所探，该夷使知大沽左右有盐田太深，可以泊船，有欲由此上岸直抄炮台后路之谣。伏思该夷自上年受创以后，天津兵威实闻而胆落，然由添调兵马，处心积虑，妄想报复，无非欲为螳臂当车之计。上海华夷两商素来相安，此时亦颇联络，均劝息兵，乃该酋一意独行，有必欲战胜而后止之说。英酋额尔金、佛酋葛罗虽尚未到，然观其目前举动，水陆驻兵，且窥探防堵虚实，测量水口浅深，谲谋诡计，总欲伺我间隙，一逞狂悖之行。察其最为注意者，似仍在天津炮台，至所言山海关以内海岸，臣未悉北地形势，无从照指其处。但该夷既有日期，欲由此登岸，尤不可不严为之防。臣面禀督臣何桂清、函禀抚臣徐有壬，窃谓现在夷情实属万分猖獗，理谕既无可复施，权术似在所必用。然假用权术，必赖兵威相辅而行。山海关一带，计已早驻重兵，更宜增兵层层布置，以备不虞。就津防而言，大沽军容已极雄壮，而内河要隘各处，亦须多筑营垒，添调兵丁，或以团练之勇充实其中，遍竖旗帐，作为疑兵，缘大沽壁垒精严，诚不畏其扑犯。第恐该夷使知内防兵力不厚，别无大顾忌，遂专心致志，力攻炮台，关系实非浅鲜！盖夷性多疑，使彼知我内河节节严防，自不敢狡焉思逞，即兵船驶至拦江沙外，亦当不至遽行跋扈，是内河增设疑兵，正为大沽炮台助力也。似此密筹胜算，然后开一线之路，冀其就我范围。但夷与人理相殊，谕令如何息事，彼必故意远拗，所有拟定办法，不必明向宣导，宜以旁敲侧击之法，引其自入彀中，得尺则尺，得寸则寸。如是则抚议或可易成，亦不至兵连祸结，且中国虚实，终不为其所窥，嗣后当可永期驯服矣。

薛焕奏(同年四月初九日)

窃臣于闰三月二十五日奉钦差大臣两江总督何桂清传谕，承准军机大臣密寄闰三月十八日奉上谕二道，臣跪诵之下，钦佩莫名。伏查英酋普鲁斯狂悖已极，不肯与大小官员相见，诚如圣训无庸再与该酋晓辩，转令彼持之愈坚。臣屡与署苏松太道吴煦等密函，暗属华商窥其动静，随夷商开导，总谓圣恩高厚，视天下如一家，中外商民悉为赤子，奈普鲁斯既不知感悟，又不悔上年之败，仍欲构兵，岂尚不知北省军威不可轻犯。因举钦差大臣僧格林沁前曾图剿逆匪林凤祥歼毙无遗之事，以生其畏。又言普酋如此妄为，早可闭关绝好，乃大皇帝不忍外国商民失业，仍准照旧通商。尔等幸蒙莫大恩施，如能劝令普酋悔悟，早日就抚，将来护利岂不更多，歆动

之以生其感。然此等理谕之词，但能笼络夷商，使其不附普鲁斯作祟，而该夷报复之念仍坚执不移。吴煦等探闻该夷既欲虚攻大沽，别由山海关以内登岸，遂分股抄袭大沽后路，均用马队前导。近又探得佛酋拟欲分扰山东登州、莱州一带，牵制我师，使我师应接不暇。又据候选知县黄仲畚钞闰三月新闻纸及各夷信译书英佛两夷船数兵数清单，具禀到臣，虽虚实皆未可知，而不能不严为之备。臣方谓额尔金即可到沪，应遵谕旨先责普鲁斯背约之罪，而以仍准议和，宣导天朝格外宽恕之恩。拟谕以条约之设，原以既经议和，即当不再用兵。上年天津之役，普鲁斯擅自带兵前去，其时中国不但不责其带兵即是背约，尚遣官馈物上船投文，实已曲加礼貌；乃普鲁斯却物不收，退文不接，硬肆兵船入口，悬挂红旗，毁坏防具，与我接仗，以致自取败衄。是普酋首先构衅，前约已不足凭，应另行会议妥协，方能永久。此说若额酋前来，即使未必听从，冀可借以删改约内窒碍之事。正在禀商督抚臣筹办间，适接吴煦等函称：据华商报额尔金自英国起程，道经佛国，拟约噶罗同来。佛夷国王谓女主忽战忽和，太无主见，只为各行其志。佛仍一意主战，现又添兵四千。额尔金以噶罗既不复来，亦回复该国女主不来中国，仍听普鲁斯主持，有兵船不日北驶之说。并钞译书新闻纸前来。查额尔金、噶罗原定四月初间可到，今忽中止。此次新闻纸乃上海夷馆闰三月二十四日卯刻，普鲁斯必另接有该国密信，不令人知，究竟是何诡谋？额尔金噶罗果否不复前来，殊难悬揣。惟现称夷船不日北驶，诚不可不豫为严防。至定海情形，臣接浙江宁绍台道梁恭辰来文，该夷渐肆无状，甚至强索钱粮征册，擅入监狱，夷兵约三四千名，轮流入城操演，夷目分股巡查，情殊叵测。请派熟悉夷务之员前往妥办，冀免决裂。据吴煦函称，接奉浙江抚臣王有龄函谕，已委署松江海防同知俞斌带华商杨坊前赴定海各等语。又风闻定海武营衙署堂廊及各城门，皆有夷兵盘踞。兹飭密查前去，俟得上海、定海两处动静容即随时驰奏。朱批：另有旨。该两国一欲战，一欲和，足征其实不欲战，碍难开口，此机关实不可失也。

薛焕奏(同年四月九日)

正在缮折间，续接吴煦等函称：普鲁斯及布尔布隆自三月二十三呈报照会督臣何桂清公文乞为代奏后，迄未来请看土谕。该酋等用兵之念，坚决异常，实堪发指！现闻夷商纷纷私议，英佛兵船本拟于五月初七初八等日齐集北洋，分路侵犯。若额尔金、噶罗不来中国，其用兵日期，尚要提前。吴煦等因令华商于有意无意之间向老成夷商密询，据云兵船现已由定海及各口陆续北驶，未必均来上海寄碇，其举动的期虽不能知，大约总在四月以内。另闻该夷雇募熟习直隶路径之广东匪徒甚多，并欲用牛只驼负木人冲突，名为火牛阵。旋据定海探报，亦言夷船之泊定海者，装有木人火牛等物。又有广东跣足匪徒一千余名，均戴竹盔，穿夷字号衣；轮流上岸，搬运器械。近日该夷广购喂饲牛马草料等情，由吴煦等密报前来。臣查夷人居心阴险，其用兵日期及设计冲阵未必肯自洩漏，诚莫窥其虚实，第既有所闻，自应备预不虞。

何桂清奏(同年五月八日)

窃苏州失守大局决裂，及臣何桂清前赴上海商办各缘由，于四月十六日恭折由驿驰在案。臣等伏查苏州危迫之时，江苏抚臣徐有壬焦急无计，升札新调苏藩司薛焕、苏松太道吴煦，请借英佛两国夷兵赴省救援，并准闾郡绅士韩崇、彭蕴枯、汪藻、潘仪凤等公禀，特委署苏州府知府吴云赍札催调。乃吴云甫经到沪，苏州据闻不守。臣何桂清于刘河舟次，接据吴煦遣捕盗局轮船飞请迅去商办，即于十七日晚间抵沪，询知吴煦等正饬华商与该酋会议，多方晓劝尚无端倪。迨臣何桂清接见英酋普鲁斯，复又百般譬解，阻其北驶。该酋总执上海无可商议之说，百折不回，并称和议事大，必先进京换约。从前天津原定五十二条及今春照会军机处所请四条，只须分别准、驳二字，准则仍归和好，驳则立即开仗等语。现闻该二国兵船，均由通商各口纷纷北驶。英船泊于山东成山洋面，佛船泊于成山对峙之朝鲜洋岛，总计兵船百余只，水陆夷兵四万余人，不日即有举动。先经吴煦等探悉该酋等密谋，欲别由山海关以内登岸，直趋京师，并分股抄袭大沽后路；又欲分扰山东登州等处，叠经奏报在案。惟津沽防御严整，断无可虞，而兵衅一开，不特处处为其牵制，抑且兵连祸结，恐无已时。近日苏浙在沪贸易各商，亦再四商恳该酋发兵，虽急于救苏，实可暗消北衅，该酋则谓情愿帮助。但伊国兴师动众，专为雪耻而来；若先为剿贼，何以转报国主之辞回答，其意固系以兵胁和。就目前情形而论，所可深虑者尚不仅此。现在东南要害，均为贼踞，苏省已无一兵一将，全境空虚，固已无从措手，纵有援兵四集，粮饷从何筹办？军火枪炮从何置备？思之焦灼如焚。值此逆焰猖狂，若侦知夷衅未解，势必重利啖夷，乘机勾结。该夷志在牟利，不顾顺逆，万一不为我用，转为贼用，一经与贼串成一气，势必水陆分扰，南北皆危。自粤逆窜踞金陵，该夷亦时时探询贼情，其中如公使夷官及正派商人，尚知粤逆实系盗贼，而夷类甚杂，良莠不一。昨经吴煦访知夷人刊传一书，标题《太平天国》，令人翻译，大略皆记粤匪举动，此即已通线索之确据也。即如上海一隅，本系夷人通商之地，昨经英佛二酋派兵巡防，系为保卫夷房起见，经吴煦设法羁縻，亦派营兵会堵，尚属相安。第现在贼势蔓延，四面围逼，此海滨一隅，何能独支？现在罢市已久，货不流通，关税厘捐一无所出；且大营广勇纷纷逃来，资遣不净；其所以不即变乱者，赖有速定和议借兵助顺一说耳！若并此不办，不待贼来，立即瓦解，非为贼有，即为夷踞，东南半壁，从此更难挽回。即欲来沪议和，亦无驻足之地。臣等若再瞻顾忌讳，知而不言，误国之罪更重，虽万死不足以蔽辜！为今日计，惟有亟为安抚夷人，坚其和议，俯如所请，使知大皇帝逾格天恩，动其感激之心，绝其勾结之念，乘势劝其助顺剿贼，于南北军务，或可稍挽危机。臣等非不知后患滋多，此时势急定议，必为天下罪人；然即不令该夷助顺，而夷兵北去，更遍肆扰。盖两害相形，则取其轻也。且查英佛二酋天津原立和约，本经桂良等奉恩旨照准，至今春英佛二酋各请四条，固在原议之外，半系逞其虚骄，不过为争气争脸起见。其赔费一层，果能代为剿贼，则偿费无殊犒赏，尚出有因，能保全大局，断不致尽东南之利也！臣等早夜密筹，成则冀有挽回，不成则南北局势曷堪设想？不得已沥陈实在情形，仰乞皇上天恩，逾格从权，可否准将赠旂二国原定天津条约及续请各四款，俯予照会，庶几两

衅可立时消释，所有该酋等进京换约事宜，即遵旨飭令薛焕迅速北上，由海道前进，妥为料理，以全大局，臣等不胜惶恐待命之至！

薛焕奏(同年五月八日)

窃臣于四月二十二日钦奉朱批：该两国一欲战，一欲和，足征其实不欲战，碍难开口，此机关不可失也。钦此。同日奉到四月初九日寄谕一道，伏思臣自四月初六日回沪，其时即值常州、无锡贼势猖獗，苏州又相继不守，通省人心惊惶，沪上商民无不携资远避，夷人耳目最近，一时几欲立起变端，幸吴煦妥为安抚，尚未滋事。四月十七日，督臣何桂清到沪，即同臣等接见英酋普鲁斯，该酋夜郎自大，所言皆无情理。何桂清与臣等反复开导，毫不悔悟。提及和好二字，彼则言并无和好，告以公事总须互商，方能有益，彼则云并无商量；如欲完结，只有前致军机大臣所索四条概予准行，否则打仗，另无二说。再向剖导，默然不答。佛酋布尔布隆不肯见面，但其副使哥吐嗜来督臣何桂清处，据称如有要言告知哥酋，即与面谈无异。及见哥吐嗜所言亦与普酋相同。而于驻京一说，尤坚决不破，告以上年天津之役，尔国并未附和，中国与尔素敦和好，哥酋则谓上年赴津换约，系遵国谕行事，该国并未带兵，何以英国到彼，尚有人送照会上船，独该国无人理之！是中国将彼比于属国，不肯以平礼相待，所以该国立意决战，无可商量等语。何桂清答以布酋上年赴津，直隶恒总督派人导觅，欲与接见，因洋面宽阔，未经寻获其船，并非轻待布酋。哥酋又称额尔金、噶罗不日仍来中国，立即赴津办事，断不在上海停留，外省大臣亦不能主持此事，词气狂妄已极！咪酋华喏翰现亦来沪，与臣等接晤，据称该酋亦要赴津，臣等告以尔公使业已办竣，向其阻止，而该酋则谓英佛既到天津，我亦必须前往。察看该酋之意，虽非有心作祟，亦不能代我出力。今英佛二酋既联为一气，又伺我军情万紧，胁和之念愈坚。虽经何桂清督同臣等面为开导，又暗嘱华商设法化解，奈夷情执拗，较前尤甚。明知我大营全军解体，恃彼兵力已强，肆无顾忌，任意要求，实非情理所能感悟。现探得英兵已陆续屯扎山东之成山，佛兵已扎成山对峙之高丽洋岛，一俟额酋噶酋到来，即同北驶。臣惟有矢尽血忱，相机设法，再随何桂清实力开导，总冀挽回一分，即尽一分心力，断不敢稍存倖卸，自外生成，以期仰副圣主廑念边防之至意。

薛焕奏(同年五月二十三日)

窃臣于五月初四日，将俄酋易纳学到沪日期并普鲁斯、布尔布主战愈坚情形，由驿驰奏。兹于五月初九日据华商杨坊等报称，本日有北回沙船，据云于四月二十二三日在山东成山以北洋面，瞭见北驶夷船三十余只，又山东庙岛烟台停泊夷船七只，奉天之金州滩停泊夷船三只，沿途抢有沙船三十余只，卫船四十余只，将各船货物抛弃入海，砍去船桅，每三只联为一处，带赴北驶。并探得额尔金、噶罗已抵香港，不日即可抵沪等语。并据前督臣何桂清面称，前日赴嘉定时，佛国副使哥吐嗜来云，伊国兵船已大半北驶，现在上海无可复议，并称大西洋国亦遣公使、兵船来沪

，欲立条约各等情。臣伏查该夷处心积虑，思欲北犯天津，而又不欲遽犯者，实因天津防范严密，该夷耳目最灵，谅有所闻，未必不生畏忌。自江苏军务败坏后，纠同大西洋与中国为难，俄酋来沪播弄。目前上海夷情，较前更为桀骜，种种愈形棘手。况上海华夷各商素无嫌隙，今则强抢海船，抛弃货物，致我海道不通，其居心尤不可问。现饬华商与之讲理，未识能否有济？然该夷主持进退，必视额噶二酋为转移。额尔金、噶罗不日到沪，想普鲁斯亦必怂恿用兵，为报复私忿，并掩饰其过之计。臣现已督吴煦、蓝蔚雯预为密饬华商杨坊等，一俟该二酋到日，先行探其意向，伺有可乘之机，即乘间而入，得有可阻之势，即力阻其行。密谕黄仲畚等劝其与臣相见，如该酋到沪后肯与臣见面，当反复引谕，曲为开导，晓以义理，动以利害，总以正大之词，折其鬼蜮之见，务期竭尽心力，先阻其用兵。至于挽回各事，惟有力矢血诚，旁敲侧击，能挽回一分，即尽一分心力，以冀稍纾圣主廑念边疆之至意！至大西洋于四月二十九日果有兵船二只到沪，该国从前本有奏定通商章程九条，今亦附和而来，俟该酋求见，臣等再行酌办。朱批：另有旨。此时办法，总宜以华夷构兵费出自夷商，由商力阻，并间其附和，方为釜底抽薪之计。

薛焕奏(同年五月二十九日)

驭夷之法，全在顺其性而驯之。现在英佛二夷两国合谋，带领多兵，盛气而来，其办法只有两端：一则激厉将士，痛加攻剿，使彼慑我军威；一则按兵不动，派员会议，使彼不能窥我虚实，皆为胜算。然用兵须操必胜之权，否则不堪设想。议和仍当借兵威之力，否则无所凭依。兹值我国家多事之秋，人人皆知以和为贵。而和若稍不审慎，则后患无穷。惟欲尽如我愿，审时度势，亦有力不能到者。臣连日与吴煦、蓝蔚雯并华商盐运使衔候选道杨坊等密商，以该酋等即不愿与外省督抚商办和局，若不量为变通，恐益滋决裂，惟有姑顺其性，以期抚议有成。应请皇上迅派大学士、尚书二员，畀以虚衔，重权作为钦差大臣，一办英国和议，一办佛国和议。如派大学士，则两国皆派大学士，如派尚书，则两国皆派尚书，以免该酋等借口。仍可暗地互为商办，尤须胆壮气盛，令彼一见先行心折，自易使之就范。一俟额、噶二酋到津，先由直隶督臣给二酋照会各一件，声明大皇帝已简派某人为大臣与英酋议事，某员与佛酋议事，并妥为接待，不日即可出京，尔等稍待数日，当来此相见，晤商一切。所有该国带来兵船，应停泊拦江沙外，如议论不协，再行接战可也。似此声叙，即不损我国体，亦可使彼折服。然与该夷议事之时，必须有熟悉该夷性情者周旋其间，以期事事得当，即公文字句，每多无谓之忌讳，往往因此小事，遂开大衅，亦当细心斟酌。臣现已派道员用候补知府蓝蔚雯带同候选知县黄仲畚及华商一二人驾坐上海捕盗火轮船来津，由北塘口上岸，听候直隶督臣差遣。应请皇上饬下直隶督臣恒福，如蓝蔚雯等坐捕盗轮船行抵北塘海口，不必惊疑，即令上岸，听候差遣。一面臣备文咨会直隶督臣交给该员等带投，以昭凭信而免舛误。

薛焕奏(同年六月初四日)

贼陷松郡，其未扰各县，现在万分危急。此次松江二战皆胜，皆因吴煦所带吕宋夷勇一百名以之作头队，兵勇随后接应，是以连战皆捷。奈英酋普鲁斯知中国募用夷勇，从中作梗，将带勇之兵头唤去，逼令立刻撤回。随由吴煦飭华商向该酋开导，谓中外两国，原准互相雇人作工，今吕宋人受中国之雇，亦是中外相通之道，与尔国雇中国及别国人使用无异，尔国何必出头阻止，且该逆窜扰中国地方，实与华商贸易有关，此举与尔国亦甚有益等词，由众商委婉向该酋开导，而普酋执拗成性，竟无可商量，已将吕宋夷勇唤回。并探闻该夷天主教之人，近有乘船入苏与贼目往来之事。

薛焕奏(同年十月十八日)

上海为夷人通商口岸，自该逆窜陷苏城，英吉利、佛兰西两国均派夷兵防守要隘，本有不与贼敌，不允贼来之说。七月十二日，该逆窜扑上海，先至徐家汇地方杀毙传教佛夷一名，及至午刻，贼逼城下，我兵与贼接仗，该夷兵亦上城从旁枪击，毙贼甚多。虽该夷为保护夷商起见，而其助顺去逆之意，臣亦不敢壅于上闻。惟英佛夷兵无多，贼逆麇聚甚众，臣知未可深恃，仍当督率在事文武分飭兵勇，昼夜严防，慎益加慎，不敢稍涉疏懈。

曾国藩奏(同年十一月二十五日)

窃臣于十月二十五日承准军机大臣密寄，十月十一日奉上谕：本秋间佛英两国带兵扑犯都城，等因，钦此。仰见皇上圣虑周详，无微弗至。臣就俄酋所陈二事思之，其请拨夷兵三四百名助剿金陵发逆一节，查大西洋佛英咪各国恃其船坚炮大，横行海上，俄罗斯国都紧接大西洋，所用兵炮及所技艺均并相抗，近始由重洋以通中国。该夷与我向无嫌怨，其请用兵船助剿发逆，自非别用诡谋。康熙年间进攻台湾，曾调荷兰夹板船助剿，亦中国借资夷船之一证。惟长江二千余里，上游安庆、芜湖等处有杨载福、彭玉麟之水师，下游扬州、镇江等处添造师船，为明年驶赴淮扬之用，是皖、吴官军之单薄，在陆而不在水。金陵发逆之横行，亦在陆而不在水。此时我之陆军势不能遽进金陵，若俄夷兵船即由海口上驶，亦未能遂收夹击之效。应请飭下王大臣等传谕该夷酋，奖其效顺之忱，缓其会师之期，俟陆军克复皖、浙、苏、常各郡后，再由统兵大臣约会该酋派兵助剿，庶在我足以自立，在彼亦乐与有成。佛兰西亦有此请，亦可奖而允之，许其来助，示以和好而无猜，缓其师期，明非有急而求救。自古外夷之助中国，功成之后，每多意外要求，彼时操纵失宜，或致别开嫌隙，似不如先与约定兵船若干只，雇价若干，每船夷兵若干，需月饷若干，一一说明，将来助剿时，均由上海粮台支应，庶可免争竞而杜弊端。至所称咪商领价采米运津一节，江浙各郡县地方沦陷既多，明岁新漕势难赶办，咪商粤商情愿领价采办台米洋米，由海道运至津沽，实亦济变之要着。俄酋既以此为请，似即可因而许之。除粤采办米应由该商自行经理，毋庸插用俄咪旗帜外，所有咪商采办运津之米，亦请飭在上海就近与该商订明，粤商领价，须取保户，咪商则听咪酋经理

，当可无误要需。为时局计，似亦舍此别无良策。伏乞圣明察酌行之。抑臣窃有请者，驭夷之道，贵识夷情，以大西洋诸夷论之，英吉利狡黠最甚，弗兰西次之，俄罗斯势力大于英佛，尝与英夷争斗，为夷所惮。咪利坚人性质醇厚，其于中国素称恭顺。道光十九年，英夷因鸦片肇衅之始，兵船闯入广州省河，咪酋曾于参赞大臣杨芳处遽禀，愿为居间调处。英酋义律施亲笔有只求通商，不讨别请等语，是并烟价亦不敢索也。杨芳曾以入奏而不敢专主其议，会官军烧抢洋行，误伤咪夷数人，其事遂寝，而夷患遂炽。咸丰三年贼踞金陵，闻咪酋亦曾于向荣处托人关说，请以兵船助剿，未知向荣曾据以入奏否？英佛两夷犯广东省城时，咪酋未尝助逆，上年天津击败夷船时，咪酋即首先赴京换约，并无异词。是咪夷于中国时有效顺之诚，而于英佛诸夷并非固结之党，已可概见。此次俄既称咪商情愿领价采米，似可饬薛焕与咪酋面订章程，妥为筹办，庶几暗杜俄夷见好中国市德咪夷之心，而咪夷知中国于彼毫无疑忌，或且输诚而昵就于我，未可知也！此次款议虽成，中国岂可一日而忘备？河道既改，海运岂可一岁而不行？如能将此两事妥为经画，无论目前资夷力以助剿济运得纾一时之忧，将来师夷智以造炮制船，尤可期永远之利。区区愚虑所及，合并陈明。

谕军机大臣等(同年十一月二十五日)

谕军机大臣等：前据恭亲王奕诉等奏接见俄夷换约各情一折，内有该酋面称，发逆横行江南，愿拨兵助剿，及明年南漕运京，或有阻碍，上海咪商粤商情愿领运台米洋米运津二事，当经谕令曾国藩、薛焕、袁甲三等公同悉心妥议具奏。嗣据袁甲三、薛焕先后复奏，所陈均有所见。本日曾国藩奏称：金陵发逆之横行，皖吴官军之单薄，均在陆而不在水，此时陆军不能遽达金陵，即令俄夷兵船由海口进驶，亦未能收夹击之效，应请传谕该酋，奖其孝顺之忧，缓其会师之期，俟陆军克复皖、浙、苏、常各郡后，再由统兵大臣约会该酋派船助剿，庶在我足以自立，在彼亦乐与有成。佛酋此请，亦可奖而允之，惟当先与约定兵船经费若干，一一说明，将来助剿时，均由上海粮台支应，以免争衅，与薛焕所奏大同小异。各国甫经换约，所请助兵、运米两事，意在见好中国。袁甲三谓借夷剿贼，有害无利，自是正论。但拒之太甚，转启该酋疑虑，果能因势利导，操纵在我，于军务漕运不无裨益。曾国藩所奏俟官军陆路得手，再约其水路会剿，似尚可行。惟所需兵船经费当与之先期约定，着恭亲王奕诉等悉心体察，酌议具奏。其请帮运南漕一节，据曾国藩请饬薛焕在上海与之订明，粤商取保领价，咪商听其自行经理。惟据薛焕所奏，桂良等前在上海议定，米谷等粮均不准运外国，但准夷商从此口运至彼口，仍完出口税银，似可令其照办运津，官为收买等语。咪商领价采办台米洋米运津，薛焕虑其将来借口漕粮归其运办，所见亦是。但官为收买，又恐有勒捐居奇之弊。若商运商买，是否可行，于仓储有无裨益，并着奕诉等详细妥筹，统俟议定章程，再与该国商办。曾国藩、袁甲三及薛焕折片，均着钞给阅看。

薛焕奏(同年十二月六日)

英佛咪三国新订通商税则第十款载明，通商各口收税，如何严防偷漏，应由中国设法办理，既已议明各口划一办理，任凭总理大臣邀请外国人帮办税务等语。查有英人李泰国在上海帮办税务有年，知洋商利弊，熟悉情形，一切均属妥协。经前大臣何桂清以条款内既有任凭总理大臣邀外人帮办税务之语，若各口所用之外国人皆由总理大臣选募，事多窒碍，如别口不用外国人帮办，又恐事不尽一，洋商必致借口，易启事端。是以何桂清札饬李泰国总司其事，名总税司，以明划一办理之意。并增给薪水，以酬其劳。凡各口所用外国人，均责成李泰国选募，如有不妥，谕令斥退，仍由各口监督主持会议妥办新章。李泰国既总司税务，即周历各口，帮同管理通商官员，妥办一切。兹据该英人面禀，此次开办新章，须于立法之初，格外认真，方能杜绝奸商偷漏。如无中国大臣札谕饬办，恐各洋商意存轻视，诸多掣肘。求臣转请钦差大臣和硕恭亲王发给该英人等札谕一道，饬令帮同各口管理通商官员酌量立法，严查偷漏等情。可否仰恳天恩，敕下恭亲王奕訢、大学士桂良、户部左侍郎文祥发给札谕一道，交李泰国收执。所有各外国通商一切防弊弭衅事宜，饬令该英人帮同各口管理官员筹办，并由恭亲王等咨行通商各省将军、督抚、府尹一体查照。惟募用外国人经理税务及置买巡船，其辛工经费，较中国为巨，亦应由恭亲王等咨饬各口，各就地方情形与李泰国会议妥办，总期敷用，毋许冒滥。似于慎重税务，俾归划一，并羁縻外夷之意，均不无小补。

薛焕奏(同年十二月六日)

查各国向仅五口通商，今则增添新口，并计十余处之多，沿江各省，几于无处不到。而中华岁销洋货，只有此数，一经分赴各口，上海关税立形短绌，此乃势所必至。又所征夷税，英佛二国各扣还赔款十成之二。以本年八月十七日预为起扣，截止十一月二十日，已属三个月结算之期，以前所征税银，均已动拨军饷，毫无余存。目前甫经奉文，即须筹还四成赔款，计数甚巨，一时措办极难。况自军兴以来，各处军饷，半借商货厘捐，现在既准洋商经入内地，不论何项货物，彼必任意贩运，除进口内地，计货本银百两照章纳款税银二两五钱外，不论程途远近，亦只完税一次，更不能向洋商另征厘捐。所增新税无几，所减厘捐甚多。其华商贩货往来上海，原应照旧完税捐厘，然中外一分轩轻，其中即滋隐混。华商固易假名偷漏，洋商尤必包揽牟利，一经互相勾结，定将牢不可破，碍及各处税厘，此亦势所必至。上海各种厘捐现在已为洋商出阻，一与争论，动以须遵新章为词，办理种种棘手。又如各省所销洋药，从前多在上海进口，再行转运内地。今则随处皆到，因而进口日少。其运往各省者，更不必再由上海进口，多此转折，以致华商应完洋药出口税，尤属有名无实。综计上海一年所入，短绌甚巨，此税厘两碍之实情也。伏查苏省全局糜烂，节经调兵募勇，水际堵剿，近则兵日以多，饷日以绌。又值各国开办新章，税厘大减，益觉难以支持，积成坐困之势。窃恐饷需不继，局势日形瓦解，臣与署苏松太道吴煦日夜筹维，寝馈俱废，除仍督同该道认真稽征，设法驾驭外，今将各国开新章后上海税厘两碍实情，附片密陈，伏乞圣鉴。朱批：现在各省厘捐，军食攸赖，应如何严定稽核章程，着户部议奏。

薛焕奏(同年十二月六日)

臣承准钦差大臣恭亲王、大学士桂良、户部左侍郎文祥会衔由驿咨发通商告示，并英佛咪三国条约汇订钤印刊本，并准户部咨发英佛咪三国新定税则汇订钤印刊本，又准兵部咨以又接准恭亲王等咨称：本年十月初二日，已与俄国将续条增约，彼此议定盖印画押，并将咸丰八年原约刊刻。所有原约续约，均应颁发通商各省遵照等因，咨会到臣，均即转行去后。兹据署苏松太道吴煦详报，奉发各国条约、告示、税则，业已分别咨行，所有各国通商应完江海关税钞银两，即于咸丰十年十月二十五日起，一律查照新章稽征等情前来，当即督饬该道核明新定通商条约及税则章程，悉心妥办。

薛焕奏(同年十二月三十日)

臣承准军机大臣密寄，十月二十日奉上谕：前据恭亲王奕訢等奏，俄咪国八年间所换和约等因，钦此。伏查咪利坚国书及原本条约税则既经遗失，应与俄一律概照通行刊本为凭，亟宜向咪酋预为说明，免致将来饶舌。飭据署苏太道吴煦查明，咪酋华喏翰业已回国，臣当即补具公文，作为承军机大臣知会到臣，照会华喏翰知悉，业经饬发吴煦送交咪国领官士觅威转递本国，仍令该酋照复，以昭凭信。

薛焕奏(咸丰十一年正月三日)

臣于十一月初六日在兼署两江总督任内，承准钦差大臣恭亲王、大学士桂良、户部左侍郎文祥会衔咨开：现据英国公使普鲁斯照会，内称续约第三款所定赔补一项，第一结应于本年十一月二十日在上海等各口完交，请札知各监督，将三个月以内外国纳税清单于结后五日之内亲交该领事官查验。监督与领事别具凭单，同列衔名，画押盖印。凭单缮妥后，其应交总数内二成，亦必亲交领事官手收。应归并办理，将小口应交之项，归入大口总纳，宁波送单上海，等语。除允准照复英国公使外，令臣传札各关监督并管关道员，妥速会同英领事按照办理。因咨行到臣，当即转行遵办去后。兹据署江海关吴煦禀称：十一月二十日，即据英国领事密迪乐、佛国领事伊担来文，均已现届第一结交还赔款之期，请将八月十七日起至十一月二十日止已征各国税银数目开单于五日内新交查核等情。即经查明江海关三个月内进出口各国商船完纳税银三十六万四千六百七十四两零。按照条约，英佛二国各应交还二成，银七万二千九百三十四两零，二国共应交还银一十四万伍千八百六十九两零。开列清单，于十一月二十五日亲交英佛二国领事，并面订是月二十九日会同赴关调查总散各部。惟英领事密迪乐面称，伊所奉英国公使普鲁斯来文，系于海关总收数内各扣二成，除洋商按课完税外，尚有外国商船所完船钞及海关所收罚充人官等款，亦应一并核扣。吴煦当以新定税则第十款载明各口设浮椿、号船塔、表望楼等经费，在于船钞项下拨用，且新章所定商船应纳钞课，一百五十吨以上每吨纳钞银四钱，一百五十吨以下每吨钞一钱，四个月期内，如赴他口，毋庸另纳船钞等语。是钞

课已较旧章减少，完数无几，随时拨抵经费，所收尚不敷用。罚充入官之款，有无多寡，本无一定。海关向章，均系随案充赏，由司税之英国人李泰国掌其出纳。亦惟李泰国能据理以议罚，使洋商不致偷漏，故税课得以稍旺。所罚银两，均由该司税分给在关办事中外人役查拿偷漏出力之人，并不收库，均已无可追回，何能再扣二成？奈该领事争之甚力，坚称普噜嘶来文系指总收之数。吴煦复以恭亲王等原咨，即系接普酋来文，但指纳税清单，并无船钞罚款字样，给与阅看，该领事转以新章须以英文为正义，晓晓辩论。再四开导，始允禀知普酋定夺，如必须照数总数核扣，仍就补交，所有现收海关税二成银数，亦不能先付收据各等语，禀情核奏等情前来。伏思英佛二国所索赔款，仰蒙圣主逾格怀柔，准予各关扣还。臣惟期仅数核扣，多交一两，即早了一两之事。断不任该关道稍事隐匿，今船钞罚款两项，实皆随时分别拨用充赏，该关道均系照章办理，委无短扣情形。英领事既经禀知普酋，势必据以饶舌，合无仰恳天恩，俯赐密敕恭王照章谕知英国使臣普噜嘶，毋庸分外争执，并令其通飭各口领事官一体遵照，以杜狡执而免借口。

薛焕奏(同年正月四日)

现在上海通商者大小十余国，英佛咪俄四国各有新章，余皆一律照办，内惟英国领事密迪乐最为刁诈。即如洋药一项，新定则税载明每百斤完进口税银三十两，只准在口销售；一经离口，即属中国货物，只准华商运入内地，如何征税，听凭中国办理。又英国和约第四十六款载，中国各口收税官员，凡有严防偷漏之法，均准其相度机宜，随时设法办理，以杜弊端各等语。查上海所设江海关，向分新旧两关，旧关专征华税，新关专收洋税。现值开办新章，洋药进口税系由洋商向新关投纳，若华商转贩出口，每百斤应完税银三十两，由旧稽征。唯新增通商处所较多，凡沿江沿海各口，外国商船皆可直达，华商绝少转贩，然其名不可不严。两关近在咫尺，进口出口，趋向不同，中外各完各税，亦复两不相碍。又自七年以来，华商贩运洋药，每箱交银二十两，拨济军饷之用，经前督臣何桂清奏准，照海疆例给奖，行之已非一日。此次各国换开新章，凡华商贩取洋药，仍飭照章完税缴捐，乃英领密迪乐出而阻挠，不准华商完缴。经署江海关道吴煦检查章程，向其开导，据该领事答云，现在洋商已完上海进口税，断不能重收税捐。吴煦复告以捐款乃华商报效军需，本非额税可比，一俟军务平定，即须停止。而江海旧关应征出口税银，乃系定例，岂能不征？况皆征自华商，与洋商毫无干涉。该领事总以碍及洋商贸易为词，坚执离口始能征税一语，争论不已，遂致华商互相观望，无从征办。适有私贩洋药之华商骆增美经吴煦飭差查拿，因该商寓居洋泾滨，英领事借称在伊租地界内，不能因此拿人。此外各项厘捐，又因新章准洋商运货径入内地行销，洋商并不另交厘捐，华商从中隐混，尤所不免。该领事种种骄肆，实属故意为难。据署江海关道吴煦具奏，禀请奏前来。伏念华商完交中国捐税，外国官员本不应过问，无如该领事密迪乐偏执己见，不近人情，动辄声称现改新章，在在借词挟制。而该领事不循条约之事，一与理论，非借端狡辩，即置之不论，直是无可理喻。且恐该领事捏称海关不遵新章，怂恿在津英国使臣普噜嘶出为妄辩。惟有仰恳天恩，俯赐密敕恭亲王随时

留心防范，倘普鲁斯转据在上海密迪乐之言，有所陈渎，即由恭亲王据理辩论，以杜欺蒙，大局幸甚！

薛焕奏(同年正月二十六日)

据苏松太道吴煦探得英国水师兵头霍姓现带大小火轮船五只，载兵八百余名，洋商数人，于五月初二日经由吴松口启碇，驶赴长江，声言前往汉口等处，察看通商情形。并称有夹板货船续开等语，由该道禀报前来。伏查汉口、九江两处，业准英国通商，是长江必有洋船出入。臣前奉密谕，遵经咨飭江面水师，一体钦遵，毋得滋生疑虑。惟恭亲王照复英公使普鲁斯公文，言明九江、镇江、汉口各口进出，应纳税饷章程，令该公使就近与上海关公同商定，即由上海知照九江、镇江、汉口，妥为办理等因。前经飭苏松太道吴煦照会英领事密迪乐知悉，迄今未据照复。普鲁斯现在津沽，尚未来沪商办。密迪乐亦未与吴煦商及此事。此次兵船驶赴长江，不先期知会，突然起碇开行，殊属任性自由，莫从理喻。再英国公使额尔金于上年十一月由沪赴粤，探明现已回国，合并陈明。朱批：知道了。

薛焕奏(同年正月二十六日)

英酋额尔金自换约出以后，夜郎自大，动称诸事均须在京商办，外官不能与闻。普鲁斯现在天津，臣前准闽省咨办通商公事，即经照章照会普酋会办，该酋亦不答复。其在沪之领事密迪乐又复事事狂妄。现英夷兵头开船驶赴长江，声言将往汉口等处。据苏松太道吴煦密禀，闻其路过金陵，欲见发逆，与之说明两不相犯，使洋船往来江面无碍，并欲与该逆互相通商交易等情。伏查汉口、九江皆在长江上游，金陵乃必经之地，该夷嗜得无厌，欲图便于通商，先与发逆交结，此说恐不尽无因，犬羊之性无所不至。倘该夷竟与贼匪另有勾通此后军务尤形棘手。又据吴煦禀称，数日前佛国兵头蒙斗班，遣其翻译官李梅面告该道，谓英夷将有往见金陵逆之举，不知是何意见？蒙斗班本欲派船偕往，因无小船在沪，只得派小头一人，附搭英船同去，察看动静。如英夷果与发逆私通，该小兵头即可设法通信。又言英夷不愿帮助中国，居心殊为叵测，请预为防范各等语。窃思英佛两夷，相助为恶，普夷所言，亦属未可尽信。惟此时在上海者，普夷似较英夷稍为近理，现飭吴煦密令华商密探该夷举动，如有见闻，即行驰奏。

薛焕奏(同年二月二十四日)

窃照咪国国书及原本条约税则，因海淀被焚遗失，将来遇有交涉事件，应照刊本为凭。臣于上年钦遵谕旨，知照咪国使臣华若翰，预与说明。缘华若翰业已回国，当时照会飭发苏松太道送交美国领事官转递。前经臣附片复陈，并录照会，奏奉朱批“知道了，钦此。”兹据苏松太道吴煦转据咪国领事官送来咪国使臣照会一件，衍列水师提督署理全权大臣司姓，据称华若翰告假，不在中华，委伊署理，接准臣文

，当查刊本业经通行中外，虽原本被焚，亦为无碍。况嗣后两国有交涉，和约税则内载事件，该使臣处存有原本可查，若欲备览，即钞誊校正送纳等情。臣查司姓所称，颇为近理，当即给以照会，令其照钞补送。俟送到，即行咨明礼部转咨总理通商衙门查照。

薛焕奏(同年三月十三日)

英国条约准在镇江通商，所有中外交涉事件，头绪纷繁。臣于上年预饬常镇通海道，俟有英船驶至，欲行通商，迅即禀明妥办。本年正月，英国兵船入江，业经臣专摺奏报在案。兹于二月初八日，据署常镇通海道江清骥禀称：正月初十日，有英国轮船二只驶泊镇江江面，该道在高邮粮台于十三日接据镇江府知府师荣光禀报，当即启程渡江，十五日行抵镇江。询据师荣光禀称：英国参赞吧嘎礼择定城外毗连云台山银山上下空地两段，用价租作该国官商建造署栈之所。吧嘎礼急欲前赴汉口，不及静候江清骥到镇江面议，即于十四日与师荣光暨署丹徒县田祚先行拟定租约，留副领事费竺士暂住城外甘露寺中，会议通商一切事宜。言明将来泊船在所定界内。吧嘎礼既定租约，即起碇驶赴上游，并称随后尚有船只到来等语。江清骥与费竺士接晤后，复亲往山地察看，核与交换租约所叙地界粮价无异。钞录呈送，并先据该府师荣光具禀前来。臣查镇江通商伊始，不特税饷章程应照上海画一办理，自租地以至开市，总当慎密和平，以相期无弊，当饬该道督率府县将一切事宜遵照条款悉心商酌，随时禀办。

薛焕奏(同年三月二十五日)

窃照布路斯国向与未立条约各国均在海口通商，兹有该国夷酋艾林波带同随员三人及翻译马吉士来见，臣询以何事前来中国？据称奉国王遣赴天津，与中国大臣立通商条约，先到日本，现来中国。臣告以臣即办理通商大臣，既因通商请见，自当一体善待，毋须前赴天津。况中国与英弗咪俄四国立有条约，此外无约各国，仍准照旧通商，均未尝另立条约，尔不必徒劳跋涉。该酋复称国王命伊径赴天津，若天津不与会商，尚须进京，伊不敢擅自更张，现因路过上海，特来谒见，以尽主客之礼，未便在此谈论公事，日内即欲北上。又言该国与英吉利分属姻娅之邦，此次仅带兵船三只前来，专立约和好，并无他意各等语。臣查布路斯国又名普鲁士国，界在英佛俄三国之间，从前本有他国驻扎上海之领事官兼理该国之事。咸丰九年，复有该国领事官阿化威来沪，曾据照会苏松太道，每年间有商船进口，与无约各国一律贸易。又咸丰十年正月间，据苏松太道吴煦禀，据咪国领事照会云：布路斯国现派使臣于伦白带领总兵官孙特华管驾兵船三只，前赴大清国及暹罗、日本等国，立约通商。有该国驻扎咪国大臣耆落知照咪国内阁札谕该领事察核襄办等情。该道据情禀经前大臣何桂清批令照复咪国领事，令即寄信阻止，并告以该国向来既在上海贸易，其完钞纳税等项，本照各国办理，惟循其旧，未办另立条约，由吴煦转复咪国领事在案。兹据翻译马吉士禀称，艾林波即于伦白，该酋既称由日本国而来，核于上

年咪国领事照会之文相合。是该国欲来中国立约通商，蓄意已久。闻英佛米俄四国新换条约，不免夸耀海外，每以有约为荣，该国因而歆美，恃有强邻，妄思仿效。溯查道光年间，英佛咪三国既立和约后，复有大西洋两国吁请另立条约九款，曾经奏准照议办理，刊布通行有案。今布鲁斯国夷酋坚欲赴津商立条约，显系欲效大西洋前事。臣向该酋剴切辩论，不惜舌敝唇焦，冀以消其妄念。兹复飭令苏松太道吴煦密谕洋商，再行妥为劝导，并转告英佛咪俄四国领事官，以此等小国，不能与尔等大国平列，一体立约，嘱其帮同拦阻。如该领事等不致通同一气，或尚可止其赴津。

薛焕奏(同年五月三日)

窃上海于道光二十三年开办通商，经前大臣耆英奏定解支禁革事宜条款内载“嗣后凡内地各商湖丝前赴福州、厦门、宁波、上海四口与西洋各国交易者，均查明赴粤程途，行过一关，即在卸货关口补纳一关税银，再准贸易”等因，历经循办，并将所收北新、赣州、太平三关税银随时拨还在案。伏查丝斤一项，产自嘉湖，内地商人贩运来沪，较为近便，而应补三关丝税征之。华本与洋商无涉，故现定新章内并未议及。惟新章已准洋商自赴内地贸易，并议加内地半税，发给凭照，逢关照免，不再重征，与往昔情形不同。是洋商自往内地买丝，只应照章按海关所收丝税数完纳一半，固无再补三关税银之理。而华商运丝来沪，若照补三关税银，未便另征内地半税。核计湖丝每百斤补完北新、赣州、太平三关税饷正耗，总共银三两五钱二分九厘六毫，内地半税须完银五两，是内地半税本重於三关。一经区别中外，华税转轻于洋税，倘令华商两款并纳，迹近重征，华税又重于洋税。既有轩輊，必致互相勾结，彼此隐混，无不避重就轻。审时度势，碍难并征。现据委管江海关事苏松太道吴煦核议，运丝到沪，不论中外商人，概完内地半税，免补三关税银，俾归画一，以杜隐混避就各弊。此项内地半税，系属笼统核计，亦毋庸分别拨还三关。业于三月二十三日督饬新关司税及南北卡舍人查照启征。惟查华商之货，尚应交纳厘捐，请发联单等事，自应悉仍其旧，不准借名取巧。其洋商自买之丝，本系先请执照，并有洋商行名可考。何商遇卡，仍以何商出口，非华商所得影射。设有故违，分别究罚。其余进出内地货税，亦应一律照办，以重税课而昭平允等情，详情具奏前来。臣复核无异，除咨户部暨浙江、江西、广东抚臣，并通商各口查照外，理合恭折具奏。朱批：户部速核议奏。

曾国藩奏(同年八月初四日)

窃臣承准军机大臣字寄，咸丰十一年五月三十日奉上谕：前因恭亲王奕訢等奏：法夷枪炮，现肯售卖，并肯派匠役教习制造等因。钦此。仰见皇上圣虑周详，安内攘外之至意。臣查发逆盘踞金陵，蔓延苏、浙、皖、鄂、江西等省，所占傍江各城为我所必争者有三，曰金陵，曰安庆，曰芜湖；不傍江各城为我所必争者有三，曰苏州，曰庐州，曰宁国。不傍江之处所用师船不过三板小划，尚无所施其技。断不能

容小火轮船，想在洞明圣鉴之中。傍江之城，小火轮船尽可施展，然亦只可制水面之贼，不能剿岸上之贼。即欲断其接济，亦恐地段太长，难于处处防遏。目下贼氛虽炽，然江面实鲜炮船，不能与我水师争衡。臣去冬复奏一疏有云金陵发逆之横行，在陆而不在水；皖吴官军之单薄，亦在陆而不在水，系属实在情形。至恭亲王奕诉等奏请购外洋船炮，则为今日救时之第一要务。凡恃己之所有，夸人以所无者，世之常情也。忽其所习见，震于所罕见者，亦世之常情也。轮船之速，洋炮之远，在英、法则夸其独有，在中华则罕于所见。若能陆续购买，据为己物，在中华则见惯而不惊，在英、法亦渐失其所恃。康熙、雍正年间，云南铜斤未曾解京之时，皆给照会商人采买海外之洋铜，以资京之鼓铸。行之数十年，并无流弊。况今日和议即成，中外贸易，有无交通，购买外洋器物，尤属名正言顺。购成之后，访募殚思之士，智巧之匠，始而演习，继而试造。不过一二年，火轮船必为中外官民通行之物。可以剿发逆，可以勤远略，谕旨期于必行，不得畏难苟安。仰见圣主宸机独断，开物成务，曷胜钦服！至于酌配兵丁及统带大员，应俟轮船驶至安庆、汉口时，每船酌留外洋三、四人，令其司舵司火。其余即配用楚军水师之勇丁，学习驾驶炮位亦令楚勇试放。虽不能遽臻娴熟，尽可渐次教习。其统带大员，即于水师镇将遴选。臣与官文、胡林翼商定，届时奏明办理。

曾国藩奏(同年八月初四日)

再王大臣等原奏内称：本省旧有船二只，询据赫德则称并非打仗之船，且已有一只败坏，是利器已废，未免可惜等语。伏查前督臣于美利坚租得火轮船二只，一名“土只坡”，一名“可敷”。其“土只坡”一只现泊上海黄浦江供护饷、护运用。赫德所称一只败坏，如果属实，想系名“可敷”者。闻得此二船，头尾两傍皆有炮位，若得人，未必不可以打仗。现在遵旨购买洋船，据原奏云：船炮配齐，须明年四月驶到。臣拟先调现泊上海之“土只坡”轮船一只，由长江上驶安庆一带，就近察勘试用，督令楚军水师将弁，预为练习，俟明年洋船购到，易收驾轻就熟之功。惟臣处缺饷日甚，该轮船驶赴上游，一切弁勇工匠口粮，仍照向章，在上海具领。其损坏轮船一只，如可修理，亦令速修完好，驶赴安庆一带。两船一上一下，轮替更换。遇有军务要件，臣与抚臣往返协商，数日可达，不致如现在文报阻滞，数月难通一信。相应旨飭下江苏抚臣薛焕，速派干员，克日押令上驶，以资演习。

薛焕奏(同年九月二十三日)

臣承准军机大臣字寄，咸丰十一年四月二十五日奉上谕：本月王有龄奏：宁波设立新关征收外国税钞一折。等因。钦此。当即恭录转行江海关钦遵。查详去后。据该关道吴煦查明：粤、闽、江、浙五口于道光二十三年奉文与西洋各国通商原系各归各口设关征收洋税，均无代收别关税钞之事。美国旧约第二十款载：外国人民运货进口，既经纳清税饷，倘欲运往别关售卖，检查货税底簿相符，验明实系原包、原货，并无拆动抽换情弊，即填入牌照，发该商收执。一面行文别口海关，查验符合

，免其重纳税饷，等语。通商各国本系一律照办。现又列入英国新约四十五款，法国新约大略相同，此条专为“货不重征”而设，并非征收别关税钞。各口历久通行，均照条约办理。乃洋商因有准给免单之条，近复贩运内地土货，在海关完纳出口税银后，亦或声明：船须复进别口，请发免单，节经据理驳斥。奈各国领事总以货无两税之词，且谓通商条约洋货改运别口，有准给免单之文，洋商转运土货复进别口，并无不准发给免单之文，借口巧辩争执。不得已从权照办，亦非代收别关税钞。粤、闽、宁波各口，皆系通融给发，不独上海为然。但事关税课盈绌，必须议定进口纳税章程，各关一律停给免单，方足以杜器争，而重权政。缘代办税务司赫德已赴天津，该关道是以详请办理三口通商大臣崇厚，就近与赫德面商定议，即由崇厚呈请总理衙门照会各国公使，分别饬知，以便各关遵照一律办理在案。兹奉寄谕：应即照会各国领事，停给土货免单，以杜影射等情，由该关道详复前来。正在核奉间，承准总理衙门先后咨行洋商置买内地货出口完税后，再运别口条约税则均无作何办理明文。现与英、法二国公使议定：凡洋商运土货出口，不准再发免税单，复进他口等因。并准浙江抚臣王有龄钞录原奏，咨会到臣。查洋货进口纳税后改进别口，即应照约填给免单。王有龄现奏，如指土货而言，则一切宜遵总理衙门与各公使现议章程办理。应同原奏所称认单一项，查系上海华商认完厘捐时发给，与洋商完税无涉者，均无庸议。

薛焕奏(同年十二月初五日)

奏据洋行通事探报：宁波本有英、法两国兵船数只，日前信息紧急，随又调到六只，保护通商之地。乃本月初七、初八日，逆匪攻城，该两国兵船袖手旁观，并不开放一炮。及该逆据城后，即有洋商入城游玩，与贼耦俱无猜。且有许售洋枪之说。初十日，有数贼渡江。北岸系外国租地，洋人亦不禁止。传闻贼与英领事相商，意欲立关收税，尚未定议。英国之参赞巴夏礼、法国之提督卜罗德均在宁波各等语。臣查探报原难尽信，而外国人与贼匪向日不免暗地往还，诚恐日久互相勾通，殊为沿海地方之患。臣惟有密加探察，随时随事留心防范，以期上慰宸廑。

薛焕奏(同年十二月二十七日)

窃自浙江省宁波府城被贼占据，上海等处地方颇为震动。迨闻杭城失守，人心更觉惊惶。臣竭力抚绥，申严守御，正在督率文武各员，并会同团练大臣周密布置间，据补用道候补知府吴云、候补直隶知州应宝时面禀，有江浙绅士，公议借调英、法二国之兵助剿，恳臣代为具奏。臣以前经准军机大臣密寄成丰十年十二月十四日钦奉上谕一道，仰见庙谟深远，无日不拳拳服膺。谨将流弊滋多，飭令该员等转致各士绅，详慎审度，未可冒昧举行。旋有江苏前詹事府詹事殷兆镛、浙江翰林院编修徐申锡等具呈到臣，内称：逆匪有一得杭州即图上海之说，亟应备预不虞。日前英国参赞巴夏礼，屡与士绅接见。该绅等邀同调兵协助官军保守上海克复宁波，次及江宁、苏州等处。巴夏礼深识大体，亦以贼氛肆毒为恨。惟云：事关中国大计，必

得据实陈奏。巴夏礼亦可一面稟商该国住京使臣，以便赶紧议办。是以偕同商民人等环求具奏，请旨飭下总理衙门，会商英、法二国使臣，拨兵会合进剿，以扫群丑而靖东南等语。臣面见该绅等，复加剴切开导，深以后患为虑。而该绅等皆谓大局安危，系此一举。下情若不上达，无以安定人心。臣以此事关系重大，所呈是否可行，札飭兼署苏藩司苏松太道吴煦、臬司汤云松督同吴云、应宝时，博采众论，迅速核议具详。去后。兹据该司道等复称：粤逆蔓延江浙，毒遍东南。近复窜踞宁绍，攻陷浙江省城，贼势猖獗异常，即图窥伺上海。巴夏礼与江浙绅士议论贼情，商及拨兵助剿，官绅商民，询谋僉同。似应俯顺舆情，详请据呈具奏。并据温葆深等致臣一函，迫切吁请前来。臣查逆匪既得逞志于杭，必将甘心于沪。惟当激励将士，督率军民，矢志同仇，殄除凶逆。并升咨督臣曾国藩，迅速派兵前来，会同剿办。惟现在臣与署提臣曾秉忠所部水陆各军，分防松江、上海、金山、奉贤、宝山各要隘二三十处，实有防多兵少之虞。而该逆数十万之众，凶焰方张，必须厚集兵力，以操制胜之权。该绅等所请借兵助剿，亦属万不得已之计。伏读密谕中有“若肯受雇助剿，只可令华夷、西商自行经理，于大局或可有利无弊。”本当钦遵试行，惟该绅等以巴夏礼必欲候臣奏明后，稟商该国使臣议办。似该国用兵事宜，必由全权大臣为政，非华夷、西商所得与闻。督臣曾国藩远在安庆，未得面商。可否即据司道等与两绅士合词吁请具奏。臣不敢壅于上闻。

第六卷 同治(上)

薛焕奏(同治元年正月初四日)

上海洋泾浜西、北两面，经英、法两国与署藩司吴煦会商，挖濠筑墙，以顾洋商贸易之地。此次办防务，察英、法文武各员颇为出力。惟贼势众多，若当危急之时，深虑其游移袖手，致蹈宁波故辙。查洋人生性好胜，喜争颜面。倘得总理各国事务王大臣一言，属其协助防守，必可壮我声威。前者，江、浙两省绅士与英国参赞巴夏礼等会商，借师助剿，臣已据情具奏，应候谕旨遵行。近日该绅士等因事势危迫，拟与该国官商设局筹防。上海本系通商地方，中外自应同心保护。可否请旨飭下总理衙门，与英、法二国使臣会商定议，并予温言奖励，俾各鼓舞奋兴。至松、沪各防军饷，以税厘为大宗，遇有仓卒要需，时向华洋各商借贷应急。现据吴煦禀，总计积欠，为数已多。旬日以来，各路梗阻，商贩裹足不前，上海市无贸易，以致厘捐丝毫无收，军饷来源已断。而华洋商人欠款无从筹还，以后更难与之挪借，不得不笼络洋人，使之乐为我用，庶于大局有裨。

薛焕奏(同年正月初四日)

十二月二十一日，大股贼由蕴藻河两岸直扑吴淞镇，北岸之贼窜至四塘口，南岸之贼窜至吴淞对岸之西摆渡，又由南面至对岸周塘之东摆渡。我军水陆夹击，轰毙马队甚多。该处系各国商船出口要路，本有法国轮船住泊，并在陆路建有炮台。该国兵头，见逆氛甚炽，同时水陆均开大炮。贼匪死者无算，始由江湾一路窜遁。

薛焕奏(同年正月二十七日)

连日迎旗浜、辰山、天马山等处之捷，华尔武功居多。查华尔系美理驾部落人。据称：向在本国曾任武职，嗣辞官服贾，于咸丰九年偕弟华德携资来沪贸易。十年五月间，松江失守，苏松太道吴煦访求知兵之人，记名道杨坊力荐华尔可任。吴煦见其人甚朴诚，即令随同官军收复松江，颇为奋勇。嗣又进攻青浦，受伤力战，亦著劳绩。上年夏间，该道因各营兵勇施洋枪未能娴熟，遴选壮丁，设局松江，练放洋枪洋炮，即派华尔前来教习，并演西洋各项阵势。半载以来，已教成一千二百名。此次叠经出队，能以少胜多。吴煦以华尔胆识兼优，颇谙兵法，所教洋枪兵勇业已著有成效。向来外国商民不隶领事者，均归中国官员管束。华尔曾在该道及美国领事处禀明，愿伍中国臣民，更易中国服色。似未便抑其倾心向化之诚，特将原委缕晰声叙，并请奏悬赏给四品翎顶，仍令在松江教习兵勇，协同官军剿贼，以资鼓舞，而裨戎行等情，具禀前来。臣查华尔产自泰西，来游中土，既输诚而内附，复树绩于戎行。可否仰祈俯予收录，赏给四品武职翎顶，以为慕义立功者劝。

曾国藩奏(同年二月初四日)

臣钦奉寄谕：洋人之在沪者，恐不足恃。其与我和好，究竟惟利是图。等因，钦此。臣于上年腊月初四日，接苏州绅士潘曾玮等信函，商借洋兵之事。臣比复函言：宁波、上海皆系通商码头，洋人与我同其利害，自当共争而共守之。苏、常、金陵，本非通商子口，借兵助剿，不胜为笑，胜则后患不测。目前权宜之计，只宜借守沪城，切勿遽务远略。谓苏、常、金陵可以幸袭，非徒无益，而又有害。既借兵守沪，则当坦然以至诚相与，虚心相待，不可稍涉猜疑。等语。函复该绅，并咨明抚臣薛焕在案。顷于正月十八日又接潘曾玮等函牒，业已设立公局，会同英法二国防守上海，并将助剿苏州语之。愚见借洋兵以助守上海，共保华洋之人财则可。借洋兵以助剿苏州，代复中国之疆土则不可。如洋人因调船已齐，兵费太巨，势难中止，情愿自剿苏州等处，我中国当以情理阻之，婉言谢之。若该洋人不听禁止，亦须先与订定：中国用兵，自有次第。目前无会剿苏州之师，即克复后，亦难遽拨驻守之师。事成则中国不必感其德，不成则中国亦不分其咎。英法二国素重信义，一一先与说明，或不因见德于我，而反致生怨。

薛焕奏(同年二月十六日)

臣因洋枪兵勇甚为得力，取名“常胜军”。札飭苏松太道吴煦，督带记名道杨坊，会同华尔管带，并续挑精壮兵勇，归并练习，以期日增多，均成劲旅。自正月初五初七等日，逆匪大受惩创，退踞天马山后陈坊桥等处。升用副将署提标中营参将李恒嵩，复于初八、初十等日乘胜攻破天马山后贼营七座，陈坊桥等处贼营九座。败匪退入青浦城中，松江情形稍松。惟浦东贼踪遍地，距沪城只一浦之隔。其大股盘踞高桥镇，意欲断我吴淞要隘。叠派官军分起进剿，均未得手。臣飭吴煦升调华尔带常胜军来沪。华尔先于十八日邀同水师提督何伯假扮西洋打猎商人，亲入贼巢，察看周围形势。归与杨坊同至松挑选奋勇五百六十名，驾坐轮船抵沪。二十三日黎明，直泊高桥之关镫港口。豫约英水师提督何伯、法水师提督卜罗德，各带枪炮队伍并炮船、轮船十一只，齐抵该处，以炮船排泊浦滨。华尔于辰刻率队登岸，首先冲入高桥，英法二国队伍列阵于镇之西路。逆匪在环镇各村分筑拒垒六座，西面一村为贼首巢穴，遂以常胜军径扑该村。贼闻枪炮拒敌，我军以洋枪连环轰击。副领队美国人白齐文，扑进贼巢，夺刀连刺数贼，被贼刃伤左臂，仍即裹创力战。枪队一拥直前，立毙五百余贼。华尔同时分攻镇东第二村，杀贼三百余名。转至第三村，贼党且拒且退，击杀尤多。尚有居中一大村，环筑土垣，炮台分列四门，内匿贼匪万余，凭险坚抗，叠开枪炮。即经英提督何伯带队驰至，与常胜军易地而阵。战酣之际，英法二国队伍各开枪炮。常胜军转至镇西，对贼之炮台隔濠力击，鏖战两时之久，我军间有伤亡。华尔冒烟直进，登时攻破贼营。与贼巷战，杀贼一千五百余名。该镇民居稠密，余贼分匿深屋，我军间段纵火，逼贼出巢，急以洋枪环击，毙贼尤多。凡系新掳短发男女难民，悉令聚立一处，派勇看管。一面转至镇北一村，该逆负隅抵抗。亦经常胜军立时攻破，杀贼匪二百余名，余皆奔逃。另有镇东一大垒，共屯三千余贼。因见各地皆破，贼势穷蹙奔逃。华尔督队，会合英法将士，向东南穷追，叠有斩获。追出三十余里，沿村搜捕，已无一贼。申刻收队，回至高

桥，查出被掳难民二千余名。酉刻约同英、法提督整队回沪。是役也，华尔与英、法两国提督所带兵勇不过一千五百余人，而敌悍贼二三万之众。攻破贼垒六座，炮台五十余处，杀贼三千数百名，生擒五百余名。并据所护逃勇供称：贼首吉庆元受伤堕马而毙。现称近浦各贼皆已闻风逃避。仍俟士卒稍事休息，再行规取浦东各城，以安民生，而保疆圉。

薛焕奏(同年二月十六日)

据吴煦禀称：华尔所带常胜军，有副总领白齐文，系美力坚属部钮要籍贯，来至中国贸易多年。前岁华尔带勇攻克松江，进剿青浦，曾邀白齐文帮办，极为出力。上年设局教练，本年攻剿迎旗浜、天马山等处，白齐文冲锋陷阵，勇往直前。此次高桥之役，又经首先冲入第一贼垒，夺刀连刺数贼。砍伤右臂犹复裹创力战，叠破贼营，实为教习中最为出色之人。查白齐文原系美国属部钮要地方人氏，向无领事在沪，应归中国官长管辖。今在该道衙门具禀立案，愿伍中国编氓。迹其平时举动，居心亦甚端正。由记名道杨坊具保，请援华尔成案，吁恳鼓励等情。臣查华尔与白齐文均系外国之人，输诚内附，宣力戎行，能否始终不渝，臣固未敢预必。惟是教练兵勇，以备御侮折冲之用，正须广罗材技，方能日起有功。华尔勇敢有为，亦深赖白齐文同心协助，当此用人之际，似应奖励从优。合无仰恳天恩，一并准予收录，赏给四品之职。

薛焕奏(同年二月十六日)

据吴煦禀称：正月二十二日有英国领事官梦华陀遣翻译官阿查理来道面称：岁前该国商人费理查由汉口雇船装货回沪，经由福山迤西三十里地方，被南岸逆匪所泊广艇截留。现经英水师提督何伯督带炮船驶往该处夺回货船，将贼船五只全焚毁，逆匪均已窜遁。获护逆首林朝光伪印三颗，送呈查验发还。并请速派兵船驻泊该处，何伯亦派炮船前往会同往来巡哨，以杜该逆侵犯等语。臣查长江本有水师炮船，防守要隘，只以地形延袤，该逆出没靡常，致有占泊口岸阻截商船之事。兹英国武员焚毁贼船，并愿派船协同巡哨，固为保护洋商起见，亦足见其助顺之诚。

薛焕奏(同年二月二十四日)

正月二十九日，华尔邀同英国提督何伯，酌带队伍由闵行渡江，查探贼营，周视萧塘镇。见该处贼垒坚固，挖濠两道，外濠坚排鹿角，内濠密布竹签，大路各筑炮台，小路砌墙塞断。该逆猜为诱敌，观望未敢出巢。华尔改作疑兵，从容收队而返。三十日选带常胜军七百五十名，复约英提督何伯、法提督卜罗德各带兵五百，车炮七架，轮船十一只，齐抵闵行镇。二月初一日黎明，渡过浦南，率队登岸，近逼贼卡。外国兵列于该镇西北，常胜军列于西南，对准贼营，火器齐发。贼众凭垒抵拒，枪炮子落如雨。华尔屡扑贼濠垒，受枪伤七处。该逆坚伏不出，相持两时之久。

幸英法车炮猛烈，西北贼势渐靡。华尔遂以副领队白齐文分路带队涉濠而过，登时攻破西南炮台。外国兵亦乘势扑入会合，与贼巷战，斩馘千有余名。另有贼党深匿民房，白齐文首先抢入，为枪弹击中右髀，斜穿小腹，透左胯而出，当即救回。华尔仍率队焚烧贼巢，踏毁炮台五座，杀贼不计其数。并阵斩助贼夷匪十余名。余贼再三回扑，常胜军以洋枪直前奋击。并先于东南路大屋中埋伏枪勇两队，齐起截杀，贼始大败而逃。我军追逐数里，收队回至萧塘，查点常胜军阵亡九名，受伤二十四名，英兵受伤二名，法兵受伤二名。该镇内外共毙贼二千余名，生擒七百余名，救出难民一千余名。当华尔冲进贼卡之际，有南桥众逆来援，李恒嵩等带队合力兜剿，擒斩甚多，余皆奔溃。华尔正与英、法将士会商进攻南桥，臣适接据松江、宝山各营禀报，该逆分股四出，扑犯泗泾、七宝、月浦、野鸡墩等处。各防出队迎击，连日均有斩获。又据金山县禀，嘉善、平湖之贼，水陆并进，意图窜犯洙泾。因令华尔率常胜军暂回松江，并饬各军均回原防，徐图进取。臣查萧塘镇贴近浦浜，该逆凶悍之党聚集于此，意在窜渡闵行，以逞其东窥上海西犯松江之志。此次痛加剿洗，立除肘腋之忧，贼胆既寒，军心亦振，实与高桥之捷，均于大局有裨。惟伪忠王李秀成处心积虑，觊觎沪城。辰下分途窜扑，牵制多方，欲使我军分顾各防，不能厚集兵力。势必续来大股，猝然豕突狼奔。所赖常胜军以少胜多，颇为该逆所畏。是以饬令养精蓄锐，备预不虞，庶可先声夺人，以挽危机，而当大敌。至华尔冲锋陷阵，奋不顾身，虽受多伤，仍不稍却，竟能扫平贼垒，实为出力异常。倘蒙纶宠褒，赏晋头衔，益当感激奋兴，力图报称。白齐文受伤甚重，现饬赶紧医调。

曾国藩奏(同年二月二十四日)

臣承准议政王军机大臣字寄：同治元年正月二十一日奉上谕：逆匪于宁波海口掳掠钓艇，等因。钦此。又正月二十三日奉上谕：昨据总理各国事务衙门具奏：购买外国船炮等因。钦此。仰见圣谟宏远，思患预防，敢不钦遵办理！惟查楚军水勇，多系两湖土著，距江近而距海远，所用师船，长龙、三板、快蟹之类，但能泛江不能出洋。上年七月臣复奏折内所称：俟轮船驶至安庆、汉口时，即令学习驾驶司放炮位，亦言用之于江面而非言用之于海中也。江与海虽同一水面，而风涛迥别，气候各殊。自崇明出口，绕至上海，非熟习洋面之人，即有寸步难行之势。臣去年复奏之后，尚未将学驾轮船之说宣示各营，盖有囿于风土之习，既迁地面弗良，而其疑畏洋人之心，尚扞格而难入。今强之试登轮船，或可劝诱为之，若强之遽出洋面则难矣。发逆所掳之人，多系江楚小民。以臣愚料之，必无遽能纵横海上之事。臣忝任江督，本有海疆之责，拨兵剿贼，亦系分内之事。无如所部勇丁，并非生长海隅，势不能遽于重洋用武，不敢不据实陈奏。

薛焕奏(同年三月初五日)

青浦大股逆匪，自二月初间窜扑泗泾各营，十三日包抄官军后路，连亘二十余里。参将李恒嵩等竭力督战，相持至十四日。适苏松太道吴煦、记名道杨坊，知会管带

常胜军四品顶翎华尔率领洋枪队八百名，于申刻驰泗泾，即由中路进攻。李恒嵩率守备张文朝等带队由东路截击，林业文等带队由西路抄击。华尔首先冲入贼阵，枪毙骑马黄衣贼目二名，夺取绣龙绸大旗一杆，逆众惊慌扰乱。常胜军一拥而上，连环竞放，洋枪子无虚发，毙贼无算，生擒一百二十余名。余匪大败，夺路奔逃，蹢断浮桥，淹毙尤多。中路之贼，靡有孑遗。华尔复助水军夺获炮船十二只，烧毁船百余只。李恒嵩、林业文各率所部奋力转战，将东西两路窜逆同时击退之，解泗泾之围，华尔即收队，仍回郡城。臣奖勉华尔增练常胜军，冀得多添精锐，为冲锋陷阵之用。

薛焕奏(同年三月初五日)

臣承准议政王军机大臣字寄：同治元年正月二十七日奉上谕：昨日据薛焕所奏，将美国人华尔赏给四品顶戴花翎谕旨一道。等因。钦此。当即敬谨节录，发明谕旨，行知苏松太道吴煦查明宣示去后。兹据吴煦详称：查华尔于咸丰十二年三月十五日具禀，愿为中国民人，声明已在美国领事处具禀等语。嗣于因公接见美国领事士觅威良，面询相符。现自本年正月，两次在松江剿贼大捷，又会同英国水师提督何伯、法国水师提督卜罗德，先后在高桥、萧塘等处攻剿获胜。何伯、卜罗德目击华尔勇敢出群，均极赞赏，屡属善为相待。美国使臣蒲麟痕亦知华尔已隶中国，打仗出力，颇为称诩。是各外国使臣均已深知，不致有所借口。当即钦遵将所奉上谕“薛焕奏洋人协同官军剿贼出力，恳请奖励，等因，钦此，”宣示华尔知悉。华尔甚为感奋。兹于二月十四日，又在泗泾剿贼，力解营围，实为异常得力。惟西人喜功好胜，每羨中国红顶，深以得此为荣。如蒙天恩赏给副将衔，以示破格奖励，则华尔喜如所望，必更欢忻鼓舞，以图报称等情。详请具奏前来。臣查华尔历次当先杀贼，实为一时罕见之人。当此用人之际，未敢拘泥成格，不揣冒昧，据情代陈，合无仰恳鸿施逾格赏给华尔副将衔之处，出自圣裁。

薛焕奏(同年三月初五日)

正月间承准总理各国事务衙门公函：轮船一项，或租或买，由臣斟酌办理等因。飭据苏松太道吴煦详称：外国轮船有兵船、货船之别。近因长江开市，又有宜江宜海之分。兵船为各国官物，向不出售，亦不能租。货船可租，然不允装兵击贼。其出售者，多系关捩暗损，或木质不坚，不适合于用等情。窃惟现奉寄谕，飭令购买，自可无庸议及租赁。第该道所称购买之难，闻诸各国官商，众口同辞，似非无据。查总理衙门原奏，询据赫德云：南省旧有二只，并非打仗之船。该税司所指，即系上海商置之捕盗轮船。伊既知此船不宜攻战，自必购致本国利于攻战之兵船，以践其言。臣俟赫德到沪，当先与之议定必须选轮兵船，庶可资以御敌。又雇募洋人驾驶一节，赫德言可用未经换约各国之人。查咸丰十年夏间，吴煦曾募吕宋洋勇剿贼，曾被英国使臣卜鲁士勒令捕盗船主美国人唤回。又上年夏间，署提标中营参将李恒嵩雇用各国洋人助战，亦被英国兵船唤回。前年尚在和约未换之时，去岁则兵官

任性过甚。赫德所谓，存心挟制，实能见到；而谓无约各国之人可以终为我用，征以前事，殊难尽信。且上海现有十余部落通商，亦皆设立领事，各口想当大略相同。虽此等领事，多系商人兼充，不甚有权。然该税司竟谓领事专系换约各国所设，亦非确论。又查善后条约后附美国使臣额尔金照会内，有未立条约各国，因有不归本国所属人民，诸凡作为，本国不任其责等语。伏思英、法、俄、美，雄长泰西，其于无约各邦，隐有制驭之意。及至滋生事端，则必又以非其所部，借词卸责。兹筹驾驶轮船，雇募配用，应否即用无约各国之人，谨当遵旨商令赫德相机办理。查条约载明，外国觅致华庶勃执工艺，中国官毫无限制禁阻等语。则中国雇用洋人驾驶轮船，外国官自亦不能阻挠。惟约内未有明文，恐致临时掣肘，似须先与各国使臣商议，中国雇洋人驾驶轮船、司放枪炮、出仗剿贼，及襄执分内工艺，外国官毫无限制禁阻，并当帮同约束，益敦和好。一切议有定章，始可惟我指挥。至外国奸商私售济匪，最为可虑。臣前函呈总理衙门，请与各使臣商定章程，得其照复为据。可否一并请旨，飭下总理衙门与各使臣定议，以期尽善无弊。御批：览。

薛焕奏(同年三月初五日)

据苏松太道吴煦禀称：年来发逆勾结外国奸商，潜购洋枪炮，节经知照各国领事，会同查禁，拿获多起。近日风闻该逆，又令奸商私赴美国购买轮船枪炮，有汇银十万两之说。适美国使臣蒲麟痕自粤来沪，据答称：此事亦有所闻，先经致函本国查询，现当谆属禁阻。其意甚为诚挚。管带常胜军之华尔，亦力请蒲麟痕速即发信，严禁私售。恐美国查禁之后，该逆或转赴英、法二国购觅。此事关系非轻，必须预行杜绝等情。合无仰恳天恩，飭下总理各国事务衙门，照会英、法二国使臣，令其行文本国，严禁贼匪私购轮船枪炮，实于军务有裨。御批：览。

曾国藩奏(同年四月初六日)

承准议政王军机大臣字寄，二月二十四日奉上谕：上海被匪窥伺，等因。钦此。又奉三月初二日寄谕：近复据英、法两国住京公使声称：贼匪与洋人构衅，等因。钦此。窃臣谬膺重寄，不能早筹一旅，达于苏境，致苏省士绅，迫于火热水深。为此不择之呼吁，皆臣治军无状之咎。诚使商借洋兵，即能救民之难，盖臣之愆，岂非至愿？然臣前此奏称：助守上海则可，助剿苏、常则不可者，盖亦有故。回纥助唐收复两京，当时亦赖郭、李诸军挟与征战。纵主兵未必优于客兵，要自有为之主者，与之俱进俱退，偕作偕行。以今日之贼势，度臣处之兵力，若洋人遽尔进攻金陵、苏、常，臣处实无会剿之师。如其先复城池，亦尚难筹防守之卒。上游如多隆阿、鲍超、曾国荃诸军，各当要地，万难抽动。下游如李鸿章一军，甫抵上海，新集之卒，只堪自守，不能远征。反复筹维，竟无大支劲旅，与之会剿。假使转战内地，但有西兵，而无主兵，则三吴父老，方迓王师而慰云霓之望，或睹洋人而生疑惧之情。至臣职分所在，责有专归。譬之人家子弟，应试科场，稍能成文，而倩人润色，犹可言也。若既不能文，又不入场，徒倩枪手顶替，则无论中式与否，而讥议腾

于远近，羞辱贻于父兄矣。臣所处之地位，与报名应试者无异。专借西兵，与倩人顶替者无异。故他人但作事外之议论，而臣则当细思事中之曲折。既以借助外国为深愧，尤以无兵会剿为大耻。谕旨以洋人与逆匪仇隙已成，情愿助剿，在我亦不必重拂其意。臣处搜获伪文，亦知金陵红逆，词意不逊，与洋人构衅甚深。洋人有必泄之忿，在中国为难得之机，自当因事利导，彼此互商，嘉其助顺，听其进兵。我中国初不干求，亦不禁阻。或乘洋人大举之际，我兵亦诸道并进，俾该逆应接不暇，八方迷乱，殆亦天亡粤逆之会也。惟地形有远近，兵势有次第。仍请飭下总理衙门，照会英、法公使，目前若进攻金陵、苏、常，臣处尚无会剿之师，庶几定议于前，不至贻讥于后。其或芜湖梁山一带官兵战守之处，恰与洋兵会合，臣当谨遵谕旨，加意拊循，胜必相让，败必相救，不敢稍乖恩信，见轻外国。

薛焕奏(同年四月初六日)

承准议政王军机大臣字寄，奉上谕：中国借外国兵力，原属一时权宜之计。等因。钦此。伏念臣自咸丰十年上海解围之后，训练兵丁，招募壮勇，年余以来，大小数百战，贼之不能直逼城下，未尝不赖有堵截之师。此增兵之计，实时事所万不容已也。自苏、浙绅士有借兵助剿之议，似将恃以无恐。兼署苏藩司苏松太道吴煦遂谓洋人之兵，为贼所畏，与其以饷养兵，不如以饷参夷。詎知洋人之向背，视我之强弱为转移。我之兵力不厚，则彼视我必轻，有欲借其力而不能者，宁波前车之鉴也。臣以为借助之说既行，则防范之师尤亟。张军威即以尊国体，正不憚与众议相违。兹蒙圣谕，指示深微。臣益当勉策诸军，努力自强，以冀外国之兵，乐为相助。至于华尔约同英、法两国将士攻破高桥、萧塘贼垒，力辞官军协助，意在独显其功。臣仍令各营出队，为之声援，截贼兜抄之路。及王家寺、龙珠庵之役，各营呈验俘馘及受伤士卒，均经查明属实。故法国提督卜罗德回军抵沪，曾为臣言在防兵勇不乏能战之人。华尔冲锋陷阵，实为诸军之冠。臣屡戒其恃勇轻敌，且每战必飭官军策应，以仰体保全护惜之鸿恩。其所教习之常胜军，初止二百余，以次增至千余人，操练实极认真。臣于未奉谕旨之先，已就各营兵勇陆续选派，吴煦亦有添募壮勇，一并交令教练，约计共得三千人。察其才力，亦止于此，过多即恐不能尽精矣。抑臣更有鳃鳃过计不敢不为我皇上敬陈之者：华尔系美利坚属部人，由吴煦与新授苏松粮道杨坊雇募教习中国兵勇，若第令练成劲旅，归我调遣，其法实为尽善。自本年正月，有迎旗浜辰山、天马山两战之捷，吴煦等以其原伍中国臣民具稟请保奏，臣思剿贼需才，猛将难得，是以叠经具稟，吁恳施恩。然臣窃窥华尔，近日渐觉志满气骄，隐然以常胜军为己所部，进止自为主持。每遇出队，不能如官军之令下即行，大有不受羁勒之意。且每战必求重赏，谿壑亦未易盈。外国人嗜利好胜，积习固然。但性与人殊，心尤难测。臣本不敢保其始终如一，惟当默为裁制，化其桀骜不驯。万一所部过多，恐有尾大不掉之患。

薛焕奏(同年四月初六日)

同治元年三月十二日，从上海英国领事馆内送到比利时国使臣包礼士照会一件，据称奉使抵沪，属臣约期会晤。臣随予以函复，订十六日相见。届期该使臣率同领事、翻译等官至臣行馆，复面递照会一件。据称拟即北上，议立和约，属臣先行咨明总理各国事务衙门查照。臣督同苏松太道吴煦与之接谈。包礼士自称：比利时国在欧罗巴部落，与英吉利为姻娅之邦。伊奉国主畀以全权，派至中华进京请照各国立约通商等语。当即答以臣系办理各口通商事务大臣，凡有中外交涉事件，职应商办。比利时国已在中土贸易有年，一切均属相安，现在应与无约诸邦照旧通市，固无须另立条约，更未便率请进京。该使臣谓衔命东来，未能专擅，事须入都定议，难以在沪共商。经臣开导再三，伊仍执前说。臣复剴切辩论，始促代为具奏，暂住上海，祇候谕旨。臣查该使臣之意，恃有强邻，颇存奢望。而辞气尚属平顺，不得不稍示羁縻。忆臣曾任苏松太道系咸丰七年，其时上海未有比利时国通商。八年，大学士桂良、前尚书花沙纳等在沪接得该国使臣怡姓照会。桂良等以现系专办英法美三国事务，此外各国，仍应由广东总办五口通商大臣奏请办理，当将原文由臣交英国领事转寄住粤之比利时领事查收。兹因使臣请见，飭据苏松太道吴煦录案禀复声明该国系于九年春间来沪通商，另录该国使臣怡姓照会一件，内叙道光二十五年六月曾奉粤省知会，准在五口通商，现又新增各口，请将天津所与英法两国之美举，暨日后获益之事，该国亦得与及，或另由全权大臣商立条约等语。此件未注年月日期，参核各案，似系咸丰九年二月递到。三月何桂清以甫经奉授为五口大臣，广东文卷未到，俟后查明通商原案，再给照复。札由吴煦先行照会该国在沪领事塔本转报怡使知照。九月复接怡使照会，以新开各口，该国应立新约，一体准行，各国复有受惠，该国亦应同沾。并指请三条：一系该国大小官员、商民、眷属、船只、货物均与别国同视。一系定立和约后以十年为度。一系和约议定须请用宝，在上海互换等情。何桂清以新开各口，美国虽已换约，尚未开办，新章英、法两国均未定议，应俟三国章程定妥照章开市之际，再当代为陈奏。请将该国仍照道光二十五年成案，钞发三国章程，在通商各口一律贸易，听候谕旨遵行，毋庸另立条约等语。查包礼士面递照会内叙奏请准与别国相同等语，复与何桂清照复怡使文稿不符，此与咸丰十年二月接到照会所称一切概行同例之语同义。想因外洋文字，以意翻译，致与照复原文歧异。该国使臣叠次来文，均以立约为请。何桂清允以奏请仍照成案钞发章程。臣复查粤省录送道光二十五年奏准比利时国通商原案，遵旨颁发英法美五口通商章程，自系英国之十五条，法国之三十五条，美国之三十四条。此次仍循旧章办理，俾在新增各口通市，尚待圣主恩施。惟各国新约内，有外国使臣住京内地游历通商等事，均未便颁发该国，殊觉事多窒碍。至该国前请三条，直自居于大国，故进京立约之念甚坚。包礼士经臣力阻北行，遂促代为陈奏，暂在上海候旨。

薛焕奏(同年四月初八日)

苏松太道吴煦、苏松粮道杨坊，前与副将衔华尔约同英、法提督商订会攻嘉定之举，因雨稍阻师期。臣先已分檄同知周士濂、副将熊兆周等各出队伍，会合进攻南翔，以为西兵先导，即令规取嘉定。另派参将姜德督队进攻罗店，参将李恒嵩督队进

攻青浦，以牵贼势。周士濂、熊兆周即于三月二十七日，会督将弁星夜拔队，驰抵南翔。贼众出巢迎敌，我军火器齐发，该逆登时败退。各将弁率队乘势冲击，逾濠而进。遂将贼营焚毁，并夺获贼卡一座，击毙发匪多名。追奔直抵镇外鹤楂山贼营，逆众死力坚守。英法将弁带兵行抵南翔，适鹤楂贼营出三骑至镇窥探，当即击毙两贼。二十七日，西兵赴鹤楂山进攻，炸弹开至五六十丸，而贼不溃退，亦不出拒。西兵以贼垒寂无声息，疑其先已潜遁，遂与官军齐进，直逼濠墙。该逆火器骤发，英国兵头一人受伤甚重，中国勇丁伤亡共十余人，当即鸣金收队，回军南翔。臣又派知府李庆琛等驰赴南翔督阵。三十日华尔带领常胜军。四月初一日西兵会同常胜军进攻贼垒，属李庆琛派队接应后路。该员当将锐勇、德勇及周士濂、熊兆周等所部分为四军，以次扎定。复策马新赴贼营之前见西兵与常胜军分为三队，频开大炮，毙敌无算，余匪弃营向西窜逃。官军即偕西兵鼓行前进，直抵嘉定城外，离南关三里而营。参将姜德三月三十日扫平罗店贼垒。臣现又升饬各将领会同西兵奋勇进攻，并添派弁兵，驰赴嘉定助阵。此次各营兵勇多已派出，上海颇觉空虚。幸福建延建邵遗缺道李鸿章统领劲旅已到四千余人，纪律精严，军威壮盛。李鸿章以此军甫经抵沪，尚未熟径途，暂为休息，现于南门外筑营。上海赖以保障，人心安定。

薛焕奏(同年四月初八日)

据嘉定随营委员候补州同葛绳孝等先后禀称：英法二国将士会同各起官兵并常胜军将嘉定县城四面合围，西兵攻南门，常胜军攻西门，官兵分次东、北二门，同时并举，力攻两时之久。西兵首先登城，遂于四月初三日卯时克复。西兵现在城中搜捕余匪，官军沿城分路截杀等情升报前来。臣即檄饬知府李庆琛等留兵勇守城，并各率所部乘胜进攻太仓，一面升饬李恒嵩力攻青浦，以期次第恢复各城。

薛焕奏(同年四月二十三日)

据苏松太道吴煦、苏松粮道杨坊会同禀报：进攻嘉定之役前该道等商令副将衔美国人华尔转约英、法二国提督举办。英国派兵二千余名，法国派兵八百余名，华尔派常胜军一千四百名，自三月二十八日起，先后进攻南翔，并调徐家汇法国兵官带领演习洋炮之中国兵勇助战。二十九日，赴该镇北市鹤楂山贼营攻剿，猝难得手，当即回军。三十日，华尔驰至，与英、法兵官往阅形势。见贼营墙坚濠阔，鹿角数重，逆万余守之，适阻进兵嘉定之路。四月初一日，华尔与西兵直逼贼营，连放炸弹大炮数十次。其始，贼犹坚匿，继则惊溃窜逃，立将贼营扫平。官兵追奔逐北，从此鼓行无阻，是夜进抵马陆驻兵。初二日中外各军直薄嘉定城下，于东、西、南三面各筑炮台，既高且广，初三日寅刻，英法二国之兵，环列南门迤至东门，常胜军环列西门，各开大炮轰城。该贼初尚回击，旋因炸弹猛烈，烟焰蔽天，贼遂惊惶，突开北门思遁。知府李庆琛先将官军各队豫为派定该员及同知周士濂等扎北门外，副将熊兆周等扎东门外，并各分兵按段设伏。贼之出城、越雉堞者，经李庆琛会督

各将领率队截剿，伏兵应声齐起，血膏锋刃，尸积郊原。维时英、法二国兵弁乘炮声接续，冒烟竖梯八架，从南门首先登城，华尔亦率常胜军从西门登城。见贼奋击，即开西门，令队伍入城，仍闭关堵守，在城搜索。计杀贼一千余名，生擒二千余名救出男女难民二千余名，起获军械、米粮、马匹甚多。城外官兵分路截杀，斩馘二千余级，生擒一千余名。嘉定县城即于是日卯时克复。英法将士之功居最，而常胜军亚之。各将领部勒官兵，在城外分路截剿，人人用命，毙匪甚多，惟复城功绩，自应归美泰西，庶使远人克坚助顺之诚，弥戴国家怀柔之德。

薛焕奏(同年四月二十三日)

臣钦奉寄谕：据奏：华尔勇往直前，异常得力。西人喜功好胜，以得中国红顶为荣。等因，钦此。伏查洋人华尔练成洋枪勇队，由松江出军两捷，苏松太道吴煦谓其愿隶中国，改用服色，臣诘以是否真情？该道力保华尔倾心向化，出力非常。稟请奏恳赏给四品顶翎，华尔仰荷隆施，尚未更易服色。据吴煦稟称：该洋人以一时骤改衣冠，恐为西人訾议，有“俟进兵苏州，必当易服而往”之语。微窥其意俟续请副将衔奉旨后，定即更易等情，具复前来。兹已钦奉谕旨。华尔仍未服戴，亦未剃发。该洋人克复嘉定后，即赴松江。臣责令吴煦察看，是否感激领受？据该道面禀，现苏松粮道杨坊会同俟该洋人来沪，再为开导。

薛焕奏(同年四月二十六日)

据西兵随营委员候补州同葛绳孝稟称：英、法二国将士与常胜军并各兵勇于四月十四日寅刻进薄青浦城下，连施大炮，卯刻轰开城垣，由西门攻入，随将县城克复等情，升报前来。臣当即檄飭李恒嵩等酌留兵勇驻守，并派水陆队伍前赴赵屯港口两岸扎立大营，堵截苏州、昆山逆贼来路，兼图进取，以期次第恢复各城。

李鸿章奏(同年五月初一日)

据浙江宁波人江苏候补知府楼一枝稟称：已革宁绍台道张景渠、署宁波知府林钧，由定海率领广艇乡勇进攻。于四月初八日攻复镇海县城，十二日进攻宁波，逆匪坚拒不退，开炮抵御，中伤外国根拨子船头洋人二名。外国兵船同开大炮，轰入城内，遂用梯登城杀入，贼始逃窜慈溪等情。前来。适英国水师提督何伯来臣处面称：宁波实于十二日经该国兵船克复，商请借拨华尔兵勇六百名，驰往协同英、法兵船防守，并请中国赶派官员驻扎筹防，洋人愿为帮助等因。除由臣谕令署藩司吴煦暂借华尔兵六百名前往协守，臧请督臣曾国藩转商左宗棠酌派文武大员由闽航海赴宁督办防务、经理关税外，伏乞皇上飭下闽浙督抚，迅速委派并拨水陆官军驻宁设防，以重口岸，而免后患。

李鸿章奏(同年五月初一日)

查青浦被贼窜踞两年以来，屡由此扑犯淞沪，巢穴甚坚。此次官军自四月初三日会商英、法两国克复嘉定后，复约会副将衔华尔商同英国提督何伯、法国提督卜罗德各挑劲旅，规复青浦。十一日何伯及卜罗德带兵二千余名，华尔带常胜军一千六百余名，直抵青浦城下，英法两国以炮轰击，十四日克复青浦县城。其诚悃甚属可嘉。应恳圣恩特颁天语褒奖，以致其感悦之忱。副将衔华尔屡著战功，拟请以副将补用。

李鸿章奏(同年五月十三日)

南桥之贼，凭恃该镇为浦东适中之地，负隅死守。环镇三里，筑垒浚濠，内设炮位四座，坚固异常。四月十八日英提督何伯、翻译官阿查理、法提督卜罗德共带西兵三千余名，副将衔华尔带常胜军二千余名，会同官军进剿。贼踞三道土城，更番施放枪炮，子密如雨。法提督卜罗德勇往直前，扑近城濠，挥军冒烟直入。贼众惊溃。卜罗德猝被枪子穿胸阵亡，余众亦有伤毙。西兵愤甚，叠用巨炮轰倒西面炮台，该逆犹于北面炮台开炮力拒。英法各兵跃濠而入，当将南桥镇贼垒攻克，贼且战且走。奉贤知县陈化鯤率团四路追截杀毙尤众，贼遂望柘林而遁。斩首千级，生擒贼目数十名，搜获伏贼二千余名。二十日，各军进抵柘林。该处本有城寨，逆众凭险负固。二十一日，英兵常胜军及炮勇营于城之西北，法兵营于城之西南。正在试炮间，金山冲突出逆党数千来援，沿途放火，直逼我营。西兵击走之。二十二日寅刻，各营开炮轰城，城中之贼以炮还拒。幸西兵炮无虚发，所攻城堞，与贼俱碎。旋将西门轰裂，大队拥入。余贼东溃，追杀不可胜计，登时克复柘林城。西兵议趋金山卫，以期一气扫荡。至是闻太仓失利，忠逆纠众数十万分扑嘉、青、宝三县，遂罢金山之攻，折回援剿。英提督何伯等复与臣面商，请臣将周浦一军调往南桥，扼堵浙西、浦东各贼回窜之路，以便抽调西兵回沪等语。臣允其所请，昨亲赴周浦遍谕将士，即日拔往南桥，相机堵击。英国兵官有巴兵白来渣者，督带炮勇，积受劳伤，于行营暴疾身故，亦属殁于王事，拟仰恳皇上温谕褒奖，并飭总理衙门议恤，以慰忠魂，而敦和好。

李鸿章奏(同年五月二十日)

嘉定克复后，旋被忠贼大股围攻。薛焕所派知府李庆琛规取太仓一军，四月十九日覆于板桥。于是宝山、嘉定、青浦各城，同时告警，嘉定之围尤急。臣所部湘、淮勇甫经派赴浦东，既不能仓卒回救，英、法两国提督方调军援嘉，意谓可以旦夕得手。嘉定守城官军，自四月十九至二十八日昼夜巡防，目不交睫。乃英、法提督忽于二十八日派队冲入重围，接护西兵及我军一同出城。其时该署县李克勤以未奉札谕为辞，副将熊兆周亦不允带兵出城，并悬洋人协守。无如该兵头等不受商量，硬将该文武及留防兵勇挟之以出。本系暂退嘉定境内之南翔镇，次日西兵全队复由南翔撤回上海，以致嘉定一城复为贼踞。臣正在筹兵接应，连接英领事梦陀两函，内称：现议嘉定所驻之西兵均行撤退，应请速将中国兵同即退出，以免误事。该提督

已请该邑知县及带兵官随营出城，诿固执不允。事不得已，止好用强拉出各等语。臣接阅之下，不胜骇异！五月初一日，英法提督领事各官偕至臣营。面诘其故，则谓嘉定贼众兵单，久被围困，饷运隔绝恐致吃亏。是以经将中外各兵撤回，保守上海。臣以我国军法森严，有进无退，守城官兵岂容轻撤？该提督等复再四央求，谓此西兵之咎，实与该文武无涉，请勿加罪。即令熊兆周、李克勤等退出之兵驻守法华，以扼沪西来路。惟嘉城复失，逆焰大张。西兵为贼众所慑，从此不肯出击。贼遂直趋青浦、松江蔓延数十里。前派驻守泗泾各营，全行溃散。该逆遂逼扑松城。华尔于初一日带火轮船两只，往解青浦之围。初二日用大炮轰进贼卡。不料至第四炮，忽然炸裂。贼二万余蜂拥而来，止得暂行收队。旋闻松江紧急，初四日赶回郡城，会商中外各军，布置严守。适贼众攻扑东门，华尔率洋枪小队轰毙百余名。初五日复将城外民房烧毁，使攻城之贼无可伏匿。青浦本系华尔常胜军分守，孤悬贼中，被围更急。该逆四面重叠筑营三十余座，无路进援，徒为焦灼。此因西兵退出嘉定，而青浦、松江两城危急支持之实在情形也。

薛焕奏(同年六月十六日)

臣于五月初三日与比利时国使臣包礼士会晤，告以该国已在各口通商，一切可循其旧，毋庸另立条约。包礼士言伊奉国主之令，系为进京立约而来，非此无以复命。臣复曲为开导，又告以现已奉有谕旨，飭令在沪商办一切，均可由臣主持，于北上一层，力为阻止，该使臣意似稍动，而请立条约，仍坚执不移。洋人情性难驯，不得不于辩论之中，仍寓羁縻之策，事非一时所能定议。五月初一日，该使递来照会一件，仍以立约为言，并拟送约稿一纸。查阅稿内所开，计有三条，大同小异。臣查比利时国本系西洋小邦，徒以通市中华，历有年所，联姻英国，倚作奥援。故立约之念甚坚，不无过存奢望。臣如拒之太峻，恐其激而赴津，许之过轻，又恐得步进步。诚如圣训该国换约与否，于大体并无增损，而不可稍为操纵，以防晓谰之弊。因令苏松太道吴煦再加开导，令翻译官转达，以作腾挪。包礼士谓臣尚未奉畀重权，上海不能主政，声称即须入都会商。臣思外国最重“全权大臣便宜行事”等字样。臣已钦奉谕旨飭遵，自应恭录照会该使臣知悉，冀其稍息北上之心。又令吴煦晓谕该翻译官，以国家既予通商大臣以便宜行事之权，谕令在沪办理，所以优待外国者甚重，包礼士自应在此会议。如果贸然北驶，则天津无人礼接，不能怨中国慢待使臣，意在据理折服其心，使不至遽行起碇。复查包礼士所拟三条，第二条系定约后以十二年为度，第三条系条约须请用宝，择地互换；均尚无甚窒碍。惟第一条有“该国大小官员、商民、船货，均与别国受益最优者同”之语，则包罗各国条约在内。臣如显加驳斥，彼必索之逾坚。因拟设法消融，亦开三条：一各口均令设立领事，并禁商人充当；一议商民禁赴内地游历通商；一议使臣不得赴京。明知包礼士未能一律允从，而寓此权术，冀于会商时借可互议增减。臣于五月二十三日备文照复去后，六月初一日接据该使臣照会，于臣所开之条，均未议及，情殊巧黠。惟由伊订其约臣会晤，似阻止赴京一节，渐将入我范围。总理衙门钞发布路斯国条款，臣仅与吴煦阅看，未经宣露。此次议立比利时国条约，谨当钦遵训示，不令大有出

入。

薛焕奏(同年六月二十二日)

六月初四日，臣率领苏松太道吴煦，又添派随员常州知府薛书堂，齐会公所。比利时国使臣包礼士，仅带英国翻译官阿查理如期来晤。初谈仍有北上会商立约之语，臣即告以此语毋庸再提。包礼士乃称：立约须允所递三条，不能更易。臣答云我拟三条，亦不能更易！该使谓：既两不能易，不如援照布路斯国条约办理。臣复与再三辩论，而包礼士强词夺理，晓谕不休，吴煦及薛书堂均从旁开导，乃言盍将彼此开送各条，先行逐层商议？该使谓臣所谓首条各口均设领事，次条商民禁赴内地，三条公使无庸赴京，均应删去。因与该使再加辩论，略予通融之路，引其入我范围。乃于首条议定添出或托有约别国领事代管一层，仍声明：如该口无比利时本国及别国代管之领事，则商民未便前往贸易，并禁领事由商人充当。包礼士于内地游历通商一节，索之甚坚，万难删去。现于次条载明该国商民准在通商各口照有约各国一体贸易。其商民在各口请执照入内地游历通商一节，亦包在内，均经议定。另添一条，载明该国商民应完税钞与违示罚及查办人犯、欠债均照有约各国章程办理。该使亦已允从。惟公使住京一节，为彼之所力争，亦为臣之所力辟，相持最久，彼此声色俱厉。旋经吴煦等参以闲谈，气各平和。包礼士将伊所递三条复议，内第二第三两条本尚甚窒碍，仍拟略为消融。臣思外国条约，经一次更改，即多一次要求。议令立约后永远遵守，暗中去“十二年为度”一层，该使先不遽从，嗣乃勉强应诺。换约之地，定在上海，该使亦诺。惟议删盖用宝字样，则包礼士坚不肯从。谓此乃国主之意，借为宠荣，非此无以复命。屡加晓谕，恳请如初。至住京一层索之尤力。臣又叠次驳斥，该使乃有援照布路斯五年后进京之请。阿查理在旁执笔，即具草稿。臣必欲其照臣原稿，令该国公使在上海及闽浙粤东各口住扎，毋庸赴京。包礼士意甚不悻，谓此节不如两议均罢，遂各抹去稿本。臣即称扬该使办事爽直，借以平其盛气，即令无从食言。迨最后之条，议删用宝字样，该使遂指臣声言：尔将我所递三条删削无遗，使我何以归对我主？如能允许住京，庶可删此一端。又言此次所议、太觉吃亏，应悉作罢论，另行订酌重议。臣察其情急词激势将前说胥捐。从来洋人不遂所求，决裂甚难收拾。会议垂成而散，后必更肆要求。又沪上为外国会集之区，更恐有怂恿分外需索者。至包礼士称：伊主以得宝为荣，尚是存心慕玺书。向有颁外国，似于体制无甚大出入。独住京一节，关系非轻。此次会议所争，惟此最为重大。殚心竭虑，幸得全无删去，实非初念所期。臣即与该使当面议妥。所有现议条约四款，敬缮清单，恭呈御览，伏候钦定施行。至总理衙门指示各节，该国主不得称“大皇帝”，体制所在，不得不争。然显令更改，彼必坚不听从。乃举英国、美国所称，询以孰同、孰异？包礼士不能置答。嗣复令其译出该国所称音义，则云：“与英国相同”。遂乘机议定，照英国称为“君主”。此事决于数言，差为顺手。臣又令于条约之首，叙明该国通商已久，道光二十五年又经奏准颁发章程在五口贸易，是以现在可立条约，使此后他国无可觊觎。

薛焕奏(同年六月二十三日)

洋人情性，拗执与反复相兼，且善得步进步。故与议办一切，事前宜用腾那，临事务求简捷。此次比利时国立约，大致业已议定。向来条约未经书押之前，惟字句或有尚未顺当之处，可以会商略为收拾。至款目则万不准稍有增减。包礼士于删去住京一条，大未满足其初愿。故当时该使有定期另议之言，事后阿查理亦有仍请准予住京等语，臣悉置之不理，断不能任其变更。惟恐该使日久悔生，另寻枝节。又虑奸夷代为设计，晓谕多端，似书押不宜迟延，庶免多费唇舌。现立之约，系为汉文定稿，尚须译出外国文字，方能缮清。臣未便自露机关，催令速办。因密饬吴煦旁鼓侧击，令彼自行赶紧翻译，以便早日书押，杜绝葛藤，借得迅速就绪。

李鸿章奏(同年六月二十六日)

钦奉寄谕：总理各国衙门奏：外国与贼接仗等因。钦此。臣查英、法两国退出嘉定、青浦情形，叠经奏报在案。该国提督先与臣议定：原派中国兵勇三千、外国兵三百协守嘉定，华尔所部专守青浦。乃援贼大股骤至合围，洋人苦守旬日，力不能支，乃挟中国兵遽行退出，并未及一一焚毁。嗣经臣督军击退援贼，该逆仍分守嘉、青二城，布置完好。如果被外国兵焚毁净尽，发逆亦不能再守，是其明证。闻上海洋商众议因嘉、青败退，颇损外国兵威，私相诟怨以英、法提督办理不妥，遂有秋后调兵大举之说。昨英国水师提督何伯过臣营探问上下游各路军情，臣即询有无秋后调兵成议？所调系何国之兵？据称八月以后，本国有兵万余来沪，再复嘉、青布置严守。然只在上海附近百里内攻剿，不便远征。该提督并称：本订于六七月回国换防，因此迟留等语。并未指明调印度兵。臣查洋人性情坚执，不受商量。其陆军不扎营垒，专恃炮火。故贼少则操必胜之券；贼多则生疑怯之情。中国兵勇先须扎营，自立脚步。与外国会攻，迟速进退，实难强与之合。臣俟此间布置稍妥，应遵谕旨移师镇江，行止未敢自定。且得力兵勇人数较少，若以孤军深入，有战无守，有剿无援，似非稳著。若须留沪进取，当另筹自强之策。洋人既调兵助战，止可曲意羁縻，仍须各打一路，方不至授柄于彼。细察详情，嘉、青复失，该提督等既深内愧，即秋后调集援兵，不过复二城以雪前愤，或不遽深入为患。再查阅英国六月初七日新闻纸内有云：汉口有地一处，英国要买，价未议定。但华官作事，不甚快速，最好英国代华官攻破一城，俟此地议定，再行交给城池等语，即此见洋人诡诈多端，未知湖北督抚曾否留心防备。

曾国藩奏(同年七月二十六日)

本年五月二十九日，承准议政王军机大臣字寄，五月十七日奉上谕：总理各国事务衙门奏，据崇厚函称，询据英国领事官吉必勋声称：青浦、嘉定二城等因。钦此。六月初九日，复奉五月二十五日寄谕：近闻洋人因官军进取金陵，拟拨轮船等因。钦此。伏查咸丰十年十月，蒙先帝垂询俄、法两国助剿之事，臣复奏以为当许其来

助，而缓其师期。本年三月蒙谕旨垂询英、法两国助剿之事，臣复奏以为同防上海则可，借攻内地则不可。洋人若先攻苏常，臣处无会战之师；若克复城池，臣处亦无派守之卒。定议于先，或不责怨于后等情。奏明各在案。兹复钦奉谕旨，以印度来兵，秋间大举，飭令会商妥议。臣函商左宗棠、李鸿章。兹据左宗棠复函云：青浦、嘉定二处，发贼麇至，夷兵遽遁。夷人之畏长毛，亦与我同，委而去之，真情毕露，断无起印度之兵助剿此贼之事。夷人借助剿为图利之计，借起兵为解嘲之词耳。兵头纵有此意，国主未必允许。印度纵有兵来，其未必能多。据李鸿章复函云：官军自二十一日红桥大捷之后，洋兵待我兵敬礼有加。提督何伯来营会晤，词意和顺。然窥其中若有不足者，青浦、嘉定之退，不免羞恚。自云：八月后调大英兵来恢复青、嘉，该提督始能回国，并无调印度兵来之说。臣查西人天性好胜，睚眦小忿，不肯干休。青浦、嘉定之挫，既羞见侮于发匪，尤虑见轻于天朝。其举兵前来报复，系属意中之事。惟英、法旧例，兵谋会议于众国，兵费征敛于众商，非一人所能为主。嘉、青一退之羞，不至遽触大众之怒，国主未必因此而大举，商贾未必因此而加征。其兵数必不甚多，亦可悬揣。而崇厚既有所闻，似宜由总理衙门与住京公使调查确实，然后伸大义以谢之，陈利害以劝之。中国之寇盗，其初本中国之赤子。中国之精兵，自足平中国之小丑。姑无论本年春夏连克二十余城，长江上下肃清三千余里，发逆无能久之理，吴越有可复之机。即使事机未顺，贼焰未衰，而中华之难，中华当之。在皇上有自强之道，不因艰虞而求助于海外，臣等有当尽之职，岂轻借兵而贻讥于后世？此所谓伸大义以谢之也。粤匪行径，本属无赖之贼。青嘉两城，尤属至微之事。英国若征印度之兵，为报仇之役，使印度军士支领英国之饷银，蹂躏中国之土地，上不利国主，下不利于英商。不如早议息兵，俾松沪免无穷之扰，即英、法省无穷之费。此所谓陈利害以劝之也。斯二者，总理衙门与住京公使，委曲商榷，如俱不见听，则亦别无阻止之法。仍当先与议定：西兵进攻内地，臣处无会剿之师，若克城池，臣处无派守之卒。区区鄙见，不得不重言申明。至于设法防范，殊乏良策。洋人语言不通，风俗迥异。彼以助我而来，若猜忌太深，则无以导迎善气；若推诚相与，又恐其包藏祸心。观于汉口焚船等案，片言不合，戎事立兴。嫌衅一开，全局瓦裂。臣始终不愿与之会剿者盖亦筹之至熟。与其合而复离，不若量而后入。倘我军屯驻之处，彼亦不约而来，实逼处此，臣当谆飭部曲：平日则言必忠信，行必笃敬。临阵则胜必相让，败必相救。但有谦退之意，更无防范之方。吾方以全力与粤匪相持，不宜再树大敌，另生枝节，庶几有容有忍，宏济艰难。

薛焕奏(同年七月二十九日)

比利时国通商事务，现拟条约翻出外国文字，用汉文、洋文合写，缮成二纸。臣谨于七月十三日率同苏松太道吴煦、常州府知府薛书堂齐会公所。比利时国使臣包礼士亦率同英国翻译官阿查礼前来会晤。臣偕包礼士将条约彼此核对，即于是日互相画押，并由臣盖用关防，包礼士亦钤图记。立约事宜，一切就绪。

第七卷 同治(中)

李鸿章奏(原稿末载月日)

查咸丰十一年换定条约，镇江准于一年后立口通商。正月间，由美国参将巴夏礼等勘定镇江西门外上下空地，建造署栈。前抚臣薛焕当委常镇通海道会同办理，并奏明在案。嗣因所勘新关地基尚未兴工起造，又改在焦山地方。该关所有修葺房屋、置备器用、雇用巡船等费，共银八百六十六两八钱三厘，又月需经费一百四十两九钱一分四厘，均在扬由关税项下随时垫用。上海总办税务司费士来复派林衮为副税务司，于十一年三月十七日带同外国扞手人等到镇，并由沪购买大夹板船一只，白壁壳船二只，另借捕盗局铁板火轮一只以备用，共银六千余两，其月需税务司俸薪及巡丁工食、巡船经费，约计银数千两，均由江海关按月先行垫给，统俟镇江收税渐旺，分别归款。该道并委员会同该司税稽查往来洋船，即于咸丰十一年四月初一日在焦山开关，一切发单收税事宜，均由副税务司林衮一手经办。自上年四月初一日起，至本年三月底止，统计一年共征收洋船进出口正税九千九百六十七两二钱六分一厘，内应划还英法各二成，银一千九百九十三两四钱五分四厘，余银五千九百八十两三钱五分七厘。适督办镇江军务冯子材咨拨洋税银六千两，因于四月分续征洋税项下凑银一千十九两六钱四分三厘，合成七千两，委员解赴冯子材军营。兑收济饷，仍移江南粮台核计。据管理镇江关税务前常镇通海道高长绅造册具详，并将往来船数目清册造送请奏前来。臣等复查各口现办章程，征收正税，系扣足外国三个月之期，作为一结，所交英国各二成银两数目，应按结详请奏咨；其征收船钞子税、土货半税，系不扣二成之数，亦应另详声明。该镇江关自上年四月开关起，至本年三月底止，所收正税内，交过各二成银两，应作为何结止，并未声明。昨据总税务司赫德申陈，开办该关结数，其第五结以前，虽有税务司稽查尚未收税，应自上年八月二十七日起，至十二月初一日止为第五结，至本年三月初二日为第六结，又至六月初四日为第七结，应交各二成银两，均注未付字样。乃该关所扣日期，与结数既不相符，而划还各二成银两，赫德均称未付，究竟该道曾否取有收单，亦未声明。总之，镇江设关伊始，虽收税无多，一切章程，茫无头绪，均须关道督同司税妥议，逐渐整理。该道高长绅远驻泰州，意存延诿，经臣等严札飭催，甫至焦山一行，旋即丁忧，草率具详，殊属玩视关务。臣鸿章前已附片奏参革职查办在案。臣维该关开设年余，尚未奏报，又准总理衙门咨催，若待往复驳查，再行具奏，转羁时日，应照该道所详大略情节，先为核报。现在汉口设关，镇江稽查，更宜严密。赫德回沪，复酌定镇关章程。臣已飭署常镇道赵炳麟驰赴焦山，察议妥办，会商副税务司林衮，将该关三个月一结之期，逐一核准结数，及交过各二成银两分结扣准，一律取齐收单，另行详核。并查高长绅任内有无侵亏款项，据实揭报。如应交二成果有未付银两，勒令付清，再当分别核办。除咨送总理各国事务衙门、户部并该关详送征收税数、往来船数各清册先行分送备查外，谨会同两江总督臣曾国藩、通商大臣薛焕缮折附驿驰陈。再，该关道请给关防，可否照江海关之例，飭部另铸镇江关关防颁发之处？恭请钦定，合并陈明。御批：总理各国事务衙门会同户部议奏

。

李鸿章奏(同治元年八月十六日)

七月初九日据苏松太道吴煦禀称：六月二十四日准英国提督领事等面称，保守上海，须环城建造炮台，前往逐一勘定，共计十八处，业已分别兴工，又南门至西门应另作新路一条，西门外有一高地，为徐家汇及英界至西门要路，应于西门内筑一坚固泥城，以资防卫，共需各工程经费银一万八千三百余两，另单开送，并绘具炮台图形，并称该提督先经函致驻京公使转致总理衙门。查前炮台各工，虽为防堵要策，第未准先行商定，业已逐一开工，现据交到绘图，催令速交经费，无从与之辩论等语。续据称英国官兵催送炮台经费甚急，已由五月分厘捐款内动拨库平银四千二百二十余两，解送会防公所查收，凑付申报前来。臣维英法提督从前不时来营会商事件，无不择善而从，如派兵教习以及开马路、挑濠沟等事，具经委婉酌饬照办，惟炮台一节，并未先行商及。适承准总理衙门公函内开实有此语。现据称工价每炮台一座由八十两至三千两不等，亦无从细与稽核。事关沿海州县添设炮台开销经费，臣未敢壅于上闻，除将原绘图形并录原交清单咨送总理衙门备查外，理合附片具陈。

李鸿章奏(同年闰八月十七日)

本年六月二十九日，据通州禀称：如皋属周家圩港口，访有洋人与广勇滋事等语。复据统带战船总兵李德麟禀报，与通所禀情节稍有未符。臣等即檄委坐太仓州知州方传书前往查明，据实报复。去后。旋准督办江北军务都兴阿咨会，周家港居民与洋人争斗一案，已奏请旨，将弹压办理未善致启争端之水师员弁先行分别革职摘顶，交黄彬从严查办等情。七月十八日，承准寄谕此次兴衅根由。等因。钦此。又于二十九日承准寄谕：都兴阿奏烧毁红单大船三只。等因。钦此。先后恭录咨行查办各在案。兹据委员方传书会同通州禀称，赴周家圩港明查暗访，该处商民，云有宁波钓船勾雇洋人随船销货来港，每日上岸，酗酒滋事，民人已忿忿不平。六月初一日，洋人酒后途遇粤勇，持棍乱击，该勇喊人捉拿，登时岸上百姓闻声齐聚，洋人见人众，畏惧凫水逃走，以水深淹死二名。旋经宁波船商捞尸棺殓，开船不知去向。十一日，忽来火轮船一只，洋人上岸，捉去广勇三名，即扬帆而去。十四日，又来轮船三只，声言入江捕盗，艇勇初不为备。洋人放火，将红单船三只烧毁，并放枪打死百姓一名。该尸主因洋人难与较量，并未报官相验。查此系宁波客商，勾雇洋人来港，或为保护货物，或为借抗厘捐，均未可知。而该洋人并无领事官给发盖印执照，本违条约，况屡次前来构衅。是否宁波船商从中播弄，自应传提该商，严讯确情，方知曲直。惟该商船业已远颺，无从提讯，而此船销货之行栈，闻开设如皋县城，似可根追交出等语。臣查该员等查核各情，与都兴阿附钞咨片奏，大略相同。该洋人违约妄行，始则酗酒滋事，继则毁我师船。洋人来沪，并未向臣等知会理论，其为曲在洋人，固无疑义。惟勾雇洋人之宁波船商，情殊奸诈，应即札饬

如皋县查访明确，将该商交出讯办。其六月十一日捉去广勇，查系三名，十四日广勇，查系十四名。据英国领事照会苏松太道云称：“本国兵船在福山江阴地方拿获盗船多只，内有盗四十五人，其船当即烧毁，有人言四十五人中，尚有良民，无从查悉，应请分别讯办”等语。据上海县讯明庐胜金等二十八名，均系客商及船户水手。庐胜金向管驾金有利广东艇船，装作宁波王源盛号，伙颜国栋等到江北卖米。六月十九日，行至通州周家圩对港江面，被外国人盘查，拿去衣物，烧毁船只，将在船之人一并拉上洋船，驶回解案，并无为匪不法。其陈式城等十七名，即系周家圩港两次被拿之人。陈式城供，在李德麟营内当勇，管带新福兴船一只，在周家圩港巡防，遇外国人上船盘查，将伊舱内火药撩弃水中，搬去衣物，烧毁船只，伊与水勇、水手等均被拉上洋船，驶回解案，并无为匪不法，亦无与外国人启衅别故。询以周家圩港一案，庐胜金、陈式城等金称并不知情。查庐胜金等均系船户客商，无干拖累，业经分别取保释放。而陈式城等既属水勇，在周家圩巡防，该处滋事之案，不能诿为不知，是否即系启衅之人，自应解回李德麟营内，归案质审。究系何人启衅，亦即责成李德麟惩办。惟据供烧毁之船，仅有一只，其金有利船又在江阴地方被毁，不在一处，何以该总兵等来禀烧毁红单船三只之语，应再确查。谨会同两江总督臣曾国藩、通商大臣臣薛焕恭折复陈。御批：总理各国事务衙门知道。

李鸿章奏(同年九月初九日)

华尔伤亡，所遗常胜一军，据苏松太道吴煦禀称，拟派华尔部将白齐文、法思尔德会同管带，英酋又欲另派兵官接管，经臣于本月初六日专折奏报在案。适英国水师提督何伯至自烟台，十四日同英国陆路提督士礼佛必携带白齐文来臣营晤商。何伯面称：白齐文材勇可任，无庸由英国派员接管，且无庸令法思尔德会带，以一事权。并与臣议明，克日会攻嘉定县城。臣查法思尔德现往宁波防剿，臣未见其人。白齐文亦初见面，均未悉其底蕴。既据何伯推诚相属，自应照准，此后果听调遣，以及得力与否，再由臣随时察看。据实奏闻。

李鸿章奏(原稿未记年月日)

闰八月二十八、九等日，英提督何伯会同新任水师提督固伯，带英兵一千八百余名，并法国官兵四百名，臣又调派三品顶带白齐文、参将李恒嵩、管带常胜军一千五百名，英法教练勇会防局炮勇千余名，分起拔队，复派知县李鹤章督带各营总兵况文榜等，各带所部，相机而进。沿途踏毁贼卡二座。九月初一日，直抵嘉定城外驻扎。初二日寅刻，分队进攻，当将嘉定县城克复。查嘉城为苏沪门户，我与贼所必争。英国提督何伯与臣再四会商，谋定后动。中外将士，同心辑睦，分路进攻，崇朝而下坚城。法国官兵亦奋勇争先。英提督何伯不日回国，尚为中国出力剿贼，忠勇可嘉，可否仰恳天语褒奖，以示优异。

李鸿章奏(同治元年十月十二日)

据浙江宁绍台道史致谔禀称：宁郡绿头勇即常胜军，向归副将华尔统带，初止二百名，陆续增至一千二百名。华尔阵亡后，归法思尔德管带，又经该兵头马淳科克等自行添募，至一千九百名，并未随时照会。其中多系本籍无赖之人，叠次滋事。该道及该统带屡行出示严禁，而各勇狃于积习，不能遵依。九月十二日，该道因公出城，有绿头勇二人于轿后喧闹，不服约束，当即带回责处，旋赴善后局发饷未回。突有绿头勇数百名喧呼闯入大堂内，将门窗什物打毁，并将存库关税茶税银两、助饷局之捐银钱，及委员董事人等衣物，全行抢去，当即照会该兵头前来弹压，直至夜分始散。十三日，该道会同英国总兵丢尔德克及领事税务司等严密查办。经丢总兵带外国兵入城，秉公处断，拿得曹良法等七名，讯明系曹得良、陈文炳二名为首，立即正法示众。至抢去税银六千余两、捐洋二千余圆、钱八百千文，及衣物一切，均无从究追。丢总兵议明，按月在该勇口粮内扣还归款，应请就此完案等情，具禀前来。臣闻之不胜骇异。查该勇本系中国人民，其口粮亦由中国发给，仅归外国人统带，乃敢依势肆行，藐法已极，现在宁郡军务稍松，法思尔德所带常胜军本归苏太道吴煦、前苏粮储道杨坊统带，应令撤回松江，严申纪律，饬将约束不严之外国弁目即行斥逐。其驻守宁郡者，止准选留一千名，交史致谔节制调遣。如再有不合法，准其尽法惩办。其抢去税银捐项，扣抵该军口粮。余勇即责成杨坊妥为遣散。理合会司通商大臣臣薛焕附片具陈。

薛焕等奏(同年十月十五日)

奏查上海所练常胜一军，自副将华尔战歿后，亟须妥筹接带之。英国欲派兵头接管，诚如圣谕，殊多窒碍。臣鸿章前据英国提督何伯面保华尔部将白齐文材勇可任，毋庸由英国派员接管，且毋庸令法思尔德会带等语，已于闰八月二十三日陈奏在案。白齐文、法思尔德均系美驾国人。法思尔德夏间在青浦被贼掳去复归，现在会带之说寝，可无庸议。白齐文既据苏松太道吴煦极力保荐，复经英国提督何伯推诚相属，此外又骤无可任之人，只得暂交接管。其能否胜任，以及就我范围之处，一时难窥底蕴，仍应随时察看。至华尔之在中华，系吴煦受丁忧苏松粮道杨坊力荐，任以教练兵勇之事，是以臣焕前在巡抚任内，奏明常胜军饬令吴煦督带杨坊会同华尔管带。其统率之任，本归中国大员。臣鸿章复经檄饬署江南提标中营参将李恒嵩，协同管束。现以白齐文接带此军，所有调遣铃制一切事宜，应仍责成吴煦、杨坊转饬遵照，不准原荐力保之人置身事外，倘有违令犯科一切情弊，亦惟吴煦、杨坊是问。李恒嵩协同管束，亦令暗中稽查，俟久与相习，再行酌办。又此军臣焕前奏约计三千人，旋即交卸抚篆。迨闰八月臣鸿章接据吴煦禀报，除前调赴宁波之外，留松江者四千五百余人。面询其故，则以华尔自行添募为词。查华尔初练，仅数百人，实称劲旅。嗣经逐次加增，则技艺不能尽精，习气亦渐犷悍。兹饬吴煦等督率，认真操练铃束，并就现在实数截止，不准再行增添。倘或不能得力，应如臣鸿章前奏，即次人数口粮酌量裁减。倘再任意添募，或有不遵调遣约束之处，应将吴煦、杨坊奏参治罪。再查法兰西公使愿将该国兵官勒伯勒东权受中国职任，听受节制，带兵防守宁波。总理衙门与之定义，奏奉谕旨饬办。查阅总理衙门原片，声明兵力

不敷从权办理缘由，俟将来抚臣左宗棠，一经克复金华，兵力足顾宁波一带，察看情形，遵旨将勒伯勒东撤回法国。所有现给该兵官札付，臣等公同筹议，应由左宗棠核发，以一事权，而资控制。惟抚臣驻师龙游，札付未到宁波之前，应由宁绍台道史致谔，体察情形，先行给予简要浑融照会一件，并将所练中国兵丁一千五百名应给饷项，即行按照旧章支放。当经臣等分别咨会左宗棠暨密札史致谔复办。并因法国原照会内，有宁绍绅士公呈宁波道移知上海道转请法国节派勒伯勒东前赴宁郡筹防之语，复经札飭苏松太道吴煦查核去后。旋据详称，该道衙门并未接准宁绍台道移文，适勒伯勒东从宁波来沪，该道传来面询。据称前在宁波经已革宁绍台道张景渠及宁波绍兴绅士，托为招勇教练，屡次出力，曾自行函致法国住京公使，情愿暂离本国水师参将，权受中国职任。至张景渠照会及宁绍绅士公呈，皆系递交法国住扎上海领事伊但核办，并未移知苏松太道等情。又准伊但函送张景渠照会及宁绍绅士公呈，并勒伯勒东一禀，由该道吴煦钞录申复前来。臣等会查勒伯勒东所禀词句格式，均似中国公牒，当有华人为之润饰。内称十年为期，及遵换服色两层，均为住京公使照会所无。此事系由总理衙门与公使定议，应以都中照会为据。其更服色一节，似可无庸深论。臣鸿章现复札飭勒伯勒东前往宁波，听候宁波台道转禀浙江巡抚关道节制调遣。业经遵旨密飭史致谔，于勒伯勒东所领之军及宁郡兵勇，赏罚功罪，禀报战守，均须秉公核实；支放钱粮，不得丝毫扣减浮冒。如遇该兵官筹商防务，果能深合机宜，务宜和衷共济，以保岩疆。至法国照会所称之立参将即买忒肋，前在余姚与广东勇构衅，中外官民皆咎其乖张任性，住京公使谓可以仍回上海，虽不肯明言其非，实已自知理屈。宁波艇船弁勇，先为买忒肋激变，现经史致谔与布隆布陆续招回，外国人亦相安无事，仍责令史致谔妥为调处约束。华尔旧属弁目近在宁波有劫抢官署之案，业经英国总兵丢乐德克从严惩处。臣鸿章复严札吴煦、杨坊将法思尔德所带常胜一军撤调回沪，申明纪律。其驻守宁波之二千余人，止准选留一千名，交史致谔节制调遣，余均飭杨坊妥为遣散。

薛焕等奏(同年十月十五日)

奏臣等钦奉寄谕：洋人前在总理各国事务衙门微露其词，等因。钦此。伏查副将华尔，虽称愿隶版图，迄未薙发易服，未免辜负叠次恩施；又意在牟利侵权，殊难绳以法度。且以洋人改隶中土，有功必赏，有罪难诛。前因吴煦力保其倾心向化，又称其勇往迈常，迫以时势之险危，臣等不得已据情具奏，仍随时随地加以防间。今华尔战歿慈溪，捐躯可怜，诚如圣训，自应奖恤优加。既衡以大节而无亏，即无庸追数生前之过。惟洋人习于本国衣冠，不乐更易中华法服，正不必强以所难。此后通商海口练兵，如有不能骤废洋人之处，或但令听受节制，不必虚假冠裳；或雇令充作教师，不必寄名版籍，因其旧俗，与为羁縻，庶几流弊渐冀减少。至洋人欲为华尔丰碑高冢，表扬事迹，或其国俗如是，容臣等酌度办理。

曾国藩等奏(同年十月十五日)

臣等承准议政王军机大臣字寄，同治元年闰八月二十九日奉上谕一道，并钞总理各国事务衙门奏：俄国现派兵船助剿，请旨飭下，妥筹办理缘由。原折暨俄国照会给阅。又由总理衙门钞录原奏密片二件函寄前来。伏查洋兵击贼，进退自由。节次议英、法二国助剿案内，臣国藩虑及洋人不听阻，臣焕忧其止之无术，臣鸿章谓其难与强合，以外国性与人殊，初非劝之能行，亦非辞之能止也。上海进口俄罗斯船只甚稀，伊国性情如何，未能骤悉底蕴。惟其都会跨居欧罗巴部落，或习俗不甚相殊。英、法在宁波上海剿贼，未始不为自卫货财起见，而流弊在所不免。俄国亦复派兵来助，且词气圆融，所不受雇价，以异域殊方之众，忽为同仇偕作之师，固未便过于猜疑，亦不敢遽行深信。飭据苏松太道吴煦禀报，俄国有兵船二只，尚在下海埔外洋面寄碇，未知兵数若干。该国水师提督颇福尚未抵沪，臣鸿章俟其来到，即当遵旨与之面晤筹商。臣等查阅该国住京公使巴留接克原递照会，系因贼匪窥伺宁波、上海海口，是以该国派兵前来助剿。窃查上海、宁波均属通商海口，本不能禁洋兵出入，英、法二国业经有兵助剿，俄国既称已派兵来，恐未必自行中止。颇福到后，似应令即在上海、宁波，与英法二国合力办理与巴留接克所请亦属相符。其果否呢就于我，容再随时察看密奏。至入江助守，似不相宜。若令稽查各国洋船，在彼未必肯为中华而市怨于邻邦，在我又恐因信俄人而启嫌于他国。诚如圣虑，不无窒碍之处。又溯查苏常太仓沦陷以来，两年有余，已经水陆将士，力固江北藩篱，良由统兵大员，本有专责。况自安庆克复以来，长江上下，肃清数千里。扬防一军，兵力有余。上游兵部侍郎彭玉麟等所统战舰，又与瓜镇以下水师声息相通。是堵截南岸逆匪窜渡，以保北岸膏腴腹地。江宁将军都兴阿、黄岩镇总兵黄彬，更当督率将士，尽力筹办，纾上宵旰忧廛。臣等所窃虑者，转在俄国提督或以带兵入江为请，臣等必当婉言阻止，倘竟坚不听从，万不得已，亦惟有与之约定，但许泊防现已通商之镇江口岸，毋庸驶至未经开市之沿江地方。如果该兵官能如巴留接克所称，无不遵从，良足为幸。

薛焕等奏(同年十一月初七日)

查荷兰一国，与通商各邦，同居欧罗巴洲，而与布路斯、比利时均属连壤。该国通于中华，久称恭顺。诚如谕旨，当可援照比利时国之请，准其议立条约。闰八月内，该国总领事方姓呈递臣焕申陈请将悬立条约一节，奏乞恩施，并请俟奉旨后，行知该总领事，以便报伊本国派委大臣前来议奏，等情。我国家示信远人，自应由臣焕给予札复。惟此时该国尚未遣使，似未便由中国招之使来。且外国情形，最易得步进步。议事之初，不据全行允许，迨彼再四恳求，乘机予以通融，乃可恰如分际。荷兰固称驯顺，仍宜豫加防维。臣等仰蒙谕飭相机妥办，钦遵会同密筹。先由臣焕发给该总领事札文，晓以荷兰在中国通商最久，甚为和好，现在比利时国业已立定条约，应俟互换之后，可将比利时国条约抄发荷兰国一体照行，俾商人有所遵循，荷国毋须另派大臣前来议立条约，以昭信睦，而求简便；且荷国商人久在中国贸易，虽未立约，彼此均极相安，一经立约，则各口均须由该国专派领事，不得由商人充当，该国亦多繁费等语。但该国既以立约为请，窃料终当遣使前来。此时所给

札文，明知该国未必听从，不过稍寓操纵，为将来互议条款时，杜其续请之计。

李鸿章奏(同年十二月初四日)

前派常胜军助剿金陵，因白齐文调勇迁延时日，嗣据吴煦等称，该道督带头队轮船，已于十月二十九日驶抵镇江，一俟大队到齐，定期进攻，等情。其时白齐文托病未行，臣又批飭吴煦、杨坊等严催后队轮船，克期上驶。去后，忽据署松江府知府方传书等禀称，本月十四日早间，白齐文由沪回松，将城门关闭，闻因饷银未发，欲率勇抢劫，该府同参将李恒嵩暗中设法劝谕通事勇头，许以发饷，各勇始一哄而散。复据吴煦禀，在镇株守旬余，兵不见到，不得已折回催队。十四夜驶至上海，询之杨坊，知齐文任意宕延，屡催罔应，核计九月以前之饷，早已放清，十月之饷，杨坊亦许为措备，告以一有起程的期，立即照付。詎白齐文不但行期无定，辄称不愿前赴金陵，请辞差使。杨坊责以大义，白齐文怫然回松。十五已刻，又带洋枪队数十人赶至上海杨坊寓中，将杨坊鼻额胸臆打伤，吐血不止，并将预备发饷之洋银四万余圆强行抢去，禀请速行查办等情前来。伏查外国人性情乖戾，威令不行，本难驾驭。前以白齐文原系常胜军弁目，曾请归中国版图，已受三品顶戴职衔，又经英国提督何伯保荐，吴煦、杨坊皆久与熟习，暂令接带此军。臣等实未深悉底蕴，是以迭次奏明，随时留心察看，将来能否胜任，及是否就我范围，再行酌夺奏闻。嗣经协剿嘉定等处，尚为出力，亦据实陈奏。偶来臣营谒见，每为切实劝导。方冀曲意笼络，俾为我用，不料其跋扈狂悖，竟至於此。自何伯回国后，英国驻沪提督、领事、翻译各官，均与白齐文交往亲密，白齐文恃有英国袒护，日渐肆横。此次逞凶滋事，经吴煦、杨坊知照英国陆路提督士迪佛立与之理论，士提督、麦领事亦以为非。邀至臣营晤商，据士迪佛立、麦华陀面称，已遵臣照会，转飭白齐文即日解去兵权，听候中国查办，一面谕令英国前派去帮同教练之兵官名奥伦者暂行接管，俟中外会商派定委员接替办理。臣闻奥伦性情偏执，未可专任，且叠奉寄谕，令派大员接管，自应钦遵妥办。惟常胜军人过众，犷悍难制。其带兵弁目百数十名，皆系外国人，与该勇相习已久。若管带官骤易生手，呼应难灵，转生事端。而各弁目素畏英国之强，内又有英国派去数人，当白齐文反噬之际，非英国派人暂管，不能令行禁止。万不得已，与士迪佛立等酌商，由中国与英国各派委员，会同接管。并议定外国所派之员，须与中国官员和衷会商，听臣调遣。其支发口粮，约束营规，裁减勇数，一切章程，应由中国主持经理，该兵官不得干预。并由臣照会士提督遵照办理。查升用副将署提标中营参将李恒嵩，与常胜军相处最久，人颇机警，臣因札委该员会同英国所派兵官接管，俟收回兵权，再飭陆续裁汰。至三品顶戴白齐文，既隶中国版图，违犯法令，应照中国之法治罪，以杜后患，而儆其余。业令吴煦、杨坊、李恒嵩等严密拿解。应否由总理衙门照会美国公使，转飭驻沪领事官一并严拿，勿任远飏，仰乞圣明核示。至二品顶戴苏松太道吴煦、二品顶戴前苏松粮道杨坊，带领常胜军，不能实力钤制，办理不善，应请旨将吴煦、杨坊暂行革职，仍令妥筹接办事宜，以观后效。如该军仍前犷悍，应责成吴煦、杨坊妥为裁遣，一手经理，不得置身事外，希图诿卸。

李鸿章奏(同治二年二月二十四日)

查常胜军本华尔旧部，其初不过千人，吴煦、杨坊等始意欲借以御寇，薪粮夫价及一切军火支应，视官军加至数倍，漫无限制，陆续增至四千五百余人，并长夫、炮船、轮船，经费月需饷银七、八万两。前次收复松江、青浦等城，未尝不兼资其力，遂日益骄蹇，渐成尾大不掉之势。臣筹思累月，久欲稍加裁抑，而事关中外交涉之端，未便轻于发难。此次白齐文逞凶跋扈，立即撤其兵权，事当更替之初，须求补救之法。英国提督士迪佛立初不愿中国官员会带，臣与之往复辩论，舌敝唇焦，始获定议。士迪佛立原立条约十三条，臣核加勘正，增为十六条，于十一月二十五日盖印，移交分执，并咨明总理衙门备案。其条约大要，如裁汰常胜军三千人，减定长夫额数口粮，删除病房及日用房费种种浮滥之款，即可以稍节饷需。又如中国派员会带，口粮由臣处派员经管，眼同外国官放，城内地方事宜，管带官不得干预；购买军火须有抚臣文书，管带兵不准私购，惩办诸勇，须听中国会带官主意各条款，亦可渐收兵柄。此次定约，庶以后办理，稍有头绪。至于白齐文逃匿不出，据吴煦禀称，该犯经士提督派兵官押解来沪，现由英国兵船看管，至今并未交出，系借口华尔、白齐文先后托买军火账未算清等语。复据英国领事请由臣处派员赴兵船会算帐目，臣查常胜军先前经用款项，从未禀报，臣衙门并无案据，未便会算代价，当即札饬吴煦、杨坊，自行清理。相应请将三品顶戴白齐文先行革去职衔，仍俟英国交出该犯，并责令吴煦、杨坊拿解臣营，照中国军法惩办。其常胜军先经议派英兵官奥伦会带，兹据英国定约，随后奏明交兵官戈登管带。该二人者，臣均未悉其底蕴。现在奥伦甫经接带，会同吴煦、李恒嵩赴松点验勇数，裁减冗费，粗立章程，似尚实心帮助。将来能否持久，有无执私见不致再生枝节之处，容臣随时察酌，妥办具奏。臣惟谆饬吴煦、李恒嵩核实整顿，和衷筹商，于调停笼络之中，仍寓裁制之道，以期协力保卫，仰副圣廑。

李鸿章奏(同治二年三月十日)

英国兵官戈登甫经接带常胜军，经臣以常、昭围急，福山兵单，谕令往助，该兵官即星夜带队驰往，与诸将士和衷筹商，并力攻克。英提督士迪佛立前为臣言，戈登奋勇明白，为驻沪英兵头之冠，臣初未敢相信。自会带常胜军，往来臣营，禀商调度，情词恭顺，亟思四出攻剿，迅扫巢穴，又以常胜军习气太坏，欲渐约束裁制，其志趣实为可嘉。去冬士迪佛立与臣定议，该国管带与中国镇道平行。戈登既为中国带兵，似应循照成案，请旨暂假以中国总兵职任，以使臣等节制调遣，俟其事竣回国，再请撤销。

李鸿章奏(同年四月十七日)

太仓境内一律肃清，总兵程学启督带所部，进逼昆山。拟借轮船大洋炮两尊，调齐水陆队伍，并力攻打。倘能得手，立即搭造桥渡过，奋勇拚死爬城。所有云梯桥筏

，均已备齐。戈登昨由松来沪，借英国炮火，亦约定两三日内带队前往会攻。臣惟有督饬各军，稳慎图谋，以期仰慰慈廑。

李鸿章奏(同年七月二日)

臣查九伏洲、下关克复，则江路已断，商舶不能贩运进城，金陵贼众粮少，实有坐困之势。惟接准曾国荃咨函，仍有火轮船停泊中关，用小船转运济贼，拟请杨岳斌、彭玉麟帅船查明拦禁，如不服拦阻可开炮轰击。臣已札知在沪各国领事官，通行谕禁。闻各领事亦不愿该国商船有此行为。将来即有停泊济匪船只，被官军炮火击伤，谅不能代为伸辩。现在苏州贼势亦蹙，吴江复后，我军进步较宽。惟白齐文回沪，闻已密投苏贼，招募外国流氓百余人，陆续偷往。并有代购外洋枪炮情事。英国文武各官，皆走相告。虽由札行美领事西华访拿解办，并商令戈登、程学启严为防备，通饬前路营卡一体查拿，而有此波折，自应益加稳慎。臣惟激励将士，同心竭力，以制狡谋，附片密陈。

李鸿章奏(同年七月十三日)

窃查荷兰国通商事宜，先经前通商大臣薛焕会同臣奏奉谕旨，准照比利时国条约即在上海与之商办。等因。钦遵在案。兹于同治二年六月二十七日，接据该国领事哥老司申陈，转递该使臣硃姓汉文照会一件。查阅文内，前叙薛焕去年所给与该领事札文，后叙该国特派大臣立约，乘驾轮船，护送抵京，现至上海，请即为转奏前来。情词尚为恭顺。其国名荷字，改用和字，似取音同之故。其去年申陈内称，伊主为皇帝，兹文内则称为君主。是此一层，不烦力争，而先已更易。将来立约，自当以该使此文为定。惟不肯从简便而惜劳费、，恐轻修好之典，且有失和国自主之体等语。或仅为遣使前来，自占地步，抑或别有要求，均未可知。且仅递照会，未来晤商，难保不以主命为词，乘轮船赴津，募直到京，则更无从拦阻。臣当即备文照复，先请其前来，面商一切，遵旨即在上海定义，谆切婉致。去后俟该使复到，如何约期商办，续行奏报。再通商各口立约，应请旨特派大臣办理此案。荷兰国援请立约，先经钦奉寄谕：著薛焕、李鸿章相机妥办等因。钦此。现在薛焕另蒙简用，臣接署通商篆务，是以不敢拘泥，迅即照复该使，权宜致词，实为挽留该使，免其进京起见。如其依允，臣自当申明比国成案，预将住京一节力为杜绝。如该使另存意见，臣亦无先往拜晤强邀之理，俟其到，饬回上海，或在天津议办。惟通商体制攸关，向系特旨派办之事，未敢擅专，应并声明，恭候谕旨定夺。

李鸿章奏(同年七月十三日)

自六月十四日克复吴江、震泽县城，比因天气酷热，常胜军于是日午刻后尽回昆山，戈登亦于十五日回舟。十六夜来上海，正与臣商议军事，闻白齐文先期带流氓洋匪二百余人投入苏城，戈登立即驰回昆城布置。嘉兴逆首纠众来扑，吴江苏嘉各处

大股四出狂窜，亘延数十里，连扑夹浦营盘，均经我军击退。该逆内有洋人施放开炮，叠次向营轰打。臣现商令英、法、美各领事，出示严禁，不准各国流氓偷入济匪，并准前路各营卡查拿捆办。或者枪炮军火接济渐少，白齐文党羽虽众，若外洋炮火难以运入，其计亦穷。

李鸿章奏(同年七月二十四日)

据前敌各营探称及生擒贼供，白齐文初募各国流氓二百余人，陆续投入苏城，屡告奋勇，攻打夹浦、吴江。既未得逞，复闻上海英、法领事出示，谕禁各国人偷往帮助，沿途营卡搜查私运军火，截拿无照洋人，益加严紧，白齐文党众渐已离散。英领事马安亦云，近日外国人由苏回者颇多。白齐文虽甘心叛逆，而各国公正官商不肯暗助，似尚无足深虑。惟戈登自闻白齐文投贼，心甚怕惧，以常胜军皆其旧部，虑其勾结为变，屡乞加增口粮，添雇洋弁。臣因事会所值，勉徇其请，亦不专倚该军。所幸太湖水师已到，兵力较厚，分布较宽，或可支持危局，力筹进取。

李鸿章奏(同年九月初二日)

钦奉寄谕：飭令中国员弁学习洋人制造各项火器之法，务须得其密传，能利攻剿，以为自强之计。等因。钦此。遵即在上海雇募英法弁兵通习军器者仿照制办，并令参将韩殿甲督率中国工匠尽心学习。现制开花炮弹、自来火等件，粗具规模，惟须精益求精，妥派好学深思之文员会同讲求，必期得其密传，推广尽利。查有同知衔江西候补知县丁日昌学识深醇，留心西人秘巧，前经督臣曾国藩奏派赴粤办理厘务。臣于本年正月间即咨调该员来沪，专办制造事宜。迭准晏端书咨会，以高州军情吃紧，奏请将丁日昌暂留提督昆寿军营，筹度攻剿，督办火器。臣又节次咨札交催。去后，兹据丁日昌来禀，在粤先后铸造大小礮三十三尊，大小礮子二千余颗，均已将螺丝引药配好，足敷应用，各兵弁逐日练习，施放得法，可期制胜等语。是该员妥办粤省火器，业经竣事，而江苏正在进攻省城，所需军火，刻不容缓。晏端书原咨，本有暂留二三月再令赴沪之语，相应请旨飭下广东督抚臣，速令丁日昌起程来沪，督将趲造，实于军需有裨。

李鸿章奏(同年十一月十三日)

苏州逆者郅云官等，歃血立盟，誓同生死。献城后，遂占住阊、胥、盘、齐四门，于街巷各口堆石置卡，隐然树敌。又添招苏城附近贼党，陆续进城，坚求准立二十营，并乞奏保总兵副将官职，指明何省何任。其挟众要求之状，种种堪虞。臣思受降如受敌，必审其强弱轻重，能否驾驭。在我若养虎貽患，苗沛霖、宋景诗皆其前鉴。即幸而如李世忠，至今滁州等城仍未退出。苏省财赋名区，岂容该酋等拥众盘踞，至貽无穷之忧。况郅云官积风世酋，在贼中封至伪王大将，其罪恶已不可赦。今围困始降，毫无悔罪之意，仍多非分之求。将来断不能遂其所欲，即断不能无反

复。因传令该酋等八人来营谒见，多方开导，冀其解散胁众，再为吁恳恩施。詎该酋等坚不应允。郅云官并未靡发，询其原由，则以所求各事，一一准行，即可靡发。维时忠逆李秀成尚在望亭，距苏甚近，郅云官等皆系忠逆党羽，诚恐复生他变，不如立断当机。万不得已，登时将该伪王天将等骈诛，派程学启督队入城搜捕逆党。于是降众二十万，咸缴军器，乞就遣散。臣复派妥弁挑留二千人，分置各营，其余陆续资遣安置。臣即于二十九日入城驻守，督率官绅，分投抚恤，人心大定。不谓戈登因臣先调常胜军回驻昆山，未得入城肆掠，忽生异议。先曾谓不应杀慕逆，声称即带常胜军与官兵开仗。经道员潘曾璋、总兵李恒嵩劝止。乃又招去纳逆义子郅胜鏊暨久从苏贼之广东人千余名，意殊叵测。又怂恿英国提督薄朗、翻译官梅辉立来苏辩诘。臣告以自督军来沪，先收南汇降酋吴键瀛，准带千人，次收常熟降酋骆国忠，准带二千人，均肯退出城池，谨受约束，故以战功保至副将，信用不疑，臣并非好杀降者。兹郅云官等所求太奢，欲踞省城，关系太大，未便姑容，养痍成患。且诛八酋而后，能解散二十万众，办法似无不是。戈登先期调回昆山，事在仓卒，未及商量。盖一商询，则彼必极力护庇，此事遂无了局矣。该提督则以英国不喜杀人，是使戈登无词以对外国。强派臣办理错误，臣姑勿深辩。惟其悻悻见于词色，据称申请公使与总理衙门议定，再将常胜军作何区处。其意殆挟该军与我为难耳。臣维戈登助剿苏城近来颇为出力，是以督同程学启曲意笼络，俾为我用，叠经据实奏报，仰恳恩奖。不料成功之后，既索重赏，仍生衅端。值此时事多艰，中外和好，臣断不敢销涉鹵莽，致坏大局。惟洋人性情反复，罔知事体，如臣祷昧，恐难驾驭合宜。设英公使与总理衙门过于争执，惟有请旨，将臣严议治罪，以折服其心。

李鸿章奏(同年十一月二十七日)

平湖县城收复，乍浦、嘉善贼酋，亦纷纷具稟投诚。常胜军现驻昆山。自臣发给犒赏洋银七万元，尚属安静。戈登招去从贼之广东人，闻已遣散过半。英提督薄朗已告明住京公使以后，戈登仍否帮中国带常胜军，俟奉复文，再行定见。戈登暂驻昆山，据称不归臣调遣。臣兵力可敷防剿，亦无须该军协助。惟仍虚糜月饷，静候总理衙门与英公使如何定义。如准戈登告退，须责令该军带队外国弁兵一百数十名，妥为撤回，该军叠次购买外国炮位，及现存外国军火，全行交出，臣再酌派中国武职大员接管。彼无所挟持，庶不敢背叛滋闹。如不得已，仍交英官管带，保卫上海通商口岸，则该军人数及一切浮费，均须大加裁抑，仍听督抚节制，或可渐渐清理。

李鸿章奏(同年十二月八日)

再钦奉寄谕：此次攻克苏城，戈登甚为出力，着传旨嘉奖。等因。钦此。除臣先已允给常胜军犒赏洋银七万元，饬关道黄芳于税项内提拨借放外，臣又于苏属饷捐局内筹银一万两，派记名道潘曾璋赍送昆山，宣旨嘉奖。戈登排队祇迎，免冠敬谢。

据禀称，以外邦小臣，叨沐殊恩，感愧交并，当此军饷支绌，不敢滥膺上赏，虚糜帑项，仍交潘道暂存等语。旋据潘曾璋、李恒嵩面称，该兵官因前杀伪王一事，既持异议，英提督薄朗令其静候公使与总理衙门定义，薄朗现往香港，未经会商，不敢擅收。惟该兵官感激之余，渐知悟悔，当约束弁勇，勿任滋事。俟薄朗回沪商准，或俟回国时赏作盘川，自应敬谨领受。臣当即函复戈登，以中国体制，有功当赏，不可固辞。至头等功牌，仿照外国宝星式样，飭会防局变通制办。并俟戈登事竣回国，再行传旨赏给，以示圣主柔远酬功格外优待之至意。

李鸿章奏(同年十二月八日)

上海华洋交涉事件极多。近来各国洋人，纷投并集，尤为繁难。缘通商大臣主持一切，关道有所禀承。臣既移驻省城，即偶回沪，未便久留。该道黄芳兼管地方关税各事，恐难独任洋务。查有候补知府应宝时办理会防局，与洋人共事两年，熟悉情伪，不激不随。臣在沪时，与外国人交接，每令该员从旁调停，悉臻妥洽。拟飭其帮同关道黄芳筹办洋务，即作为通商大臣衙门随员，仍兼管会防局。其有紧要事件，随时会同关道禀商臣处裁夺，或由臣抽闲往沪督办。

李鸿章奏(同治三年正月二十八日)

常州城大，兵数稍单，未能遽图合围。而贼势渐衰，亟须设法攻打。探闻李秀成仍欲勾洋匪赴沪，购夺小轮船，驶入太湖，以备窜扰。臣正在严飭查禁，适戈登与总税务司赫德自昆山来苏谒见，谓与臣解释前憾，再商协剿。先是臣叠准总理各事务衙门密函，以英公使初欲臣挽留戈登。嗣接戈登及英翻译梅辉立等来信，于苏城杀伤伪王一事，忿恨不平，属臣在外相机调处。臣深知戈登性情忿鸷无常，而急于见功。彼自克复苏城时，偶与臣意见参差，遂声称举兵构衅。臣处以镇静，置不与较。英提督薄朗属令常胜军驻昆山，不归臣处调遣，自是戈登不通往来两阅月矣，臣亦若无其事，该军月饷及赏恤杂支银两，仍竭力支应。彼见臣毫无掣肘之嫌，臣军又独克无锡、金匮、平望、平湖、乍浦、海盐、嘉善各城，并不借该军之力，未赏不感动而愧悔也。因赫德来苏之便，臣面属转致戈登，善为解说。戈登乃于十二月二十五、二十九日两次来谒。臣迎机开导，愿告奋勇，由无锡进剿宜兴。以扼洋人济贼之路，兼助官军攻常之势，自不得不允其请，借敦和好，而维大局。正月旬，英翻译梅辉立自沪驰书，责戈登以负约，将来薄朗由香港回沪，必不谓然。戈登竟不之愿，于正月十二日带队由昆起行，次日过苏城，谓臣曰：“如公使有信寄我，求勿速交，俾得专心打贼。”又请臣派提督郭松林一军并淮扬水师数营与之同进宜兴。臣当飭李鹤章调派郭松林所部六营、黄中元、滕嗣武五营与常胜军会合进剿。并属李鹤章、郭松林等曲意联络，俾为我用。

李鸿章奏(同年二月十二日)

奏臣派郭松林等营会同戈登、李恒嵩之常胜军，进剿宜兴，李鹤章又派总兵杨鼎勋合击。正月十九日，戈登会合各军至宜兴城下接仗。毙贼无数。二十二日，戈登、李恒嵩、郭松林等，分攻各门。二十三日，攻破东门外贼营。是夜，贼开西门而逃，戈登飞骑与郭松林等并力合击，于正月二十四日卯刻，克复宜兴、荆溪县城。戈登欲图自效，奋勇神速，所向克捷。俟常郡克复，再行汇案，请旨优奖。

李鸿章奏(同年三月二十四日)

权授江苏总兵戈登带队协攻常州，前月二十二日轰破南门城垣，未得爬入，弁勇伤亡多人，日夜与臣及李鹤章商筹布置，挖濠筑墙，安炮搭桥，虚衷和气，忠勇勤劳，允堪嘉尚。兹常州既克，苏省军事稍定，便欲辞返回国。因常胜军洋枪队近来老勇大半逃亡，逐渐新募，打仗不甚得力，欲将枪队调回昆山，妥为遣散以节糜费。暂留炮队六百人，并外国大小炸炮，送交臣处，派员接管。其所用外国弁目，陆续资遣，志趣似甚公正。昨总税务司赫德来常，业与臣议有眉目。除飭海关道赶紧筹借银两，预备支用，并派臣营务处委员直隶州知州丁日昌同戈登前往昆山，会同李恒嵩等妥筹办理。俟办结后再行缕陈外，查戈登奋勇勤能，立志为中国助剿贼匪，修立声名。自正月至今，诸事受商量，谨遵臣处调度，并与臣部将郭松林、刘铭传、刘士奇、王永胜、杨鼎勋等和好无间。彼属赫德与臣言，在中国办事只求得一体面，去年蒙大皇帝赏银一万两，断不敢领，或匀给该营洋弁遣散经费等语。此次协攻常州，殊为出力。可否请旨赏加提督衔，并由臣仿制表功旗职并外国金宝星式样，传旨送给，俾其回国后，借示宠荣。

李鸿章奏(同年七月十三日)

臣于六月初六日承准议政王军机大臣字寄同治三年五月二十九日奉上谕：总理各国事务衙门奏丹国换约，届期请派员互换一折。等因。钦此。并奉到摘录谕旨一道，当即恭录，行知李恒嵩、刘郇膏敬谨遵照，届时妥筹办理，并飭江海关道丁日昌帮同照料去后。惟于未奉谕旨之先，丹使已赴津候旨，旋即折回，并经赴苏习制洋火器之护军参领萨勒哈春，由津赍到条约各本，预飭刘郇膏暂为收，即于六月二十二日据丹国领事耆紫薇照会上海道，以水师提督贝立现经抵沪，请转致商定换约行台时日。续据英领事巴夏礼来函，订期换约。刘郇膏等查原奉抄折，丹使系名璧勒，今称系提督贝立，恐属两歧。询据通事称系翻译口音微有轻重，并无别故。惟贝立到沪后，尚未循例先来拜晤，未便遽定换约日期。当公同议定，在于上海城内通商大臣行馆举行互换，其日期仍候会同面商等语，先后备文，分别照复。贝立即于二十四日偕英翻译阿查哩前来藩署，李恒嵩、刘郇膏与之接晤，当将恭录谕旨给阅。次日李恒嵩等前往该使处，索看应换条约。内原定用印条约，另订成本；外备英字条约，另用大纸书写，装潢成匣，钤盖该国主印信，并无原定约在内。刘郇膏等当面诘询，据称系照英文原定条约缮写恭整，以示尊崇中国之意，并无别故。惟非原定印本，恐其中或有舛误，当即告以须得请示遵行。该使以该国军务方殷，再三恳

求。嗣又接据来文，请定于二十六日互换。刘郁膏等因该国现有兵事，该使急欲返棹，未便拘泥，再事羁滞，即备文照复允行。届时先约其齐赴上海道署，会同丁日昌，督同翻译，将该使所带条约，逐细校对，尚与英文相符，遂至通商行馆，与巴夏礼等公同复阅，属将原定用印和约，补订照缮和约，当场补盖。该副提督亦无异言，当即互换收执。惟该使此次到沪，溯计去年五月定议一年互换之期，业已逾时，深虑中国或有反复，极口以天津往返忧延为词。刘郁膏当以天朝素以诚信待人，既已议定换约，且迟延实属有因，决不以偶尔愆期，致失大信。该使欢欣鼓舞，额手稽谢而退。由李恒嵩、刘郁膏会同禀报，声明所换条约，随即赍送，除飭赶速钞录一分，豫备刊刻，其原本即专送来苏，俟有便员进京，委令赍送总理衙门查收外，兹据钞录往来照会来函并丹使等原文二件，先行递送前来。臣查丹国副提督贝立即璧勒，专为换约而来。因该国现有兵事，急欲事竣回国。李恒嵩、刘郁膏办理妥速，尚为得体。惟查布国上年在沪换约，备有会衔公文，载明处所时日，各执一分，即系刘郁膏与之辩驳删改缮办，前通商大臣薛焕奏明在案。究竟换约一事，以印本条约刊发通行为主，非以派换之员会衔公文为重。此次丹使既无饶舌之处，刘郁膏等自不必议及此项公文。诂于事竣后，巴夏礼复以凭单未立为言，似属从旁挑剔，实非本案紧要节目。如随后有申陈前来，再飭刘郁膏、丁日昌与之辩论酌办，随时咨明总理衙门备案。现在互换竣事，合将前奉寄谕旨一道，遵旨敬谨缴还军机处，并将李恒嵩、刘郁膏与该使往来照会文函共六件，钞录清单，恭呈御览。御批：览奏均悉，办理尚为妥速。巴夏礼嗣后有无申陈，仍酌随时酌办，不值与较，所缴谕旨，着留中，该衙门知道。

李鸿章奏(同年九月十一日)

上年有英国兵官马格里，由常胜军改赴臣营投效，当令教练西洋枪炮，随队攻剿，颇为得力。因于三月间，权行给予四品顶戴，以示奖劝。旋即设局，仿造西洋火器，委副将韩殿甲、知州刘佐禹会同马格里，悉心讲求。所制开花炮，无远不中，无坚不摧，得以克复苏州等城，厥功甚伟。该兵官欲得中国官职，以为荣宠。相应请旨，将英国人马格里赏给三品顶戴，俾于制造教练等事倍加奋勉，于军务不无裨益。

李鸿章奏(同年九月十八日)

据江海关道丁日昌另禀称，所有沙船壅塞情形，业经详请察核具奏，特其中尚有大可虑者。查江浙两省漕米，改归海运，向由沙船装载赴北，现在军务虽有端绪，而河运一时难复旧章，东南漕粮，必赖上海沙船起运；今沙船无资贩买，停泊在港者，以千百号计；内地船只以运动为灵，若半年不行，由朽而烂，一年不行，即化有为无矣；将来无力重修，全归废弃，海运从何而办？此事非特上海商民市面以及捐税攸关，于天庾正供，大有窒碍，长貽后患，何可胜言？不得不急为挽回，以期通漕运而裕赋税；惟此层关系，与彼族无干，未便形诸奏牍，使外国别生枝节等语。查该

道所禀，切中利害。非将上海一口运销北洋豆货之利，设法收回，则商船生意，断无转机，即海运关税，一切毫无把握。惟洋人趋利若鹜，该公使必多方狡执，总理衙门难以口舌相争。因系条约所不准行，威妥玛曾有俟贼平再行议办之语。臣不得不据沪上官商公论，剴切上陈，或可乘机转圜，于国计民生，均有裨助。御批：览。

李鸿章奏(同年九月十八日)

窃照北洋豆石开禁，经臣于同治元年夏间附片奏请，专将上海一口归内地商人运销，由总理各国事务衙门议复，俟苏松各属肃清，再与英公使商量，践守旧约，奉旨依议在案。兹据江海关道丁日昌转据船商郁森盛等联名禀称，上海一隅之地，沿海居民多借船业为生，自西洋各国议准通商，上海一口，最为繁盛。良由沙卫各船，群聚贸易，始得交易流通，商贾辐辏。若令内地商人均已乏本停歇，洋商亦岂能独获通商之利？惟沙船运销货物，向以豆饼豆石为大宗，舍此无可贩运。是以和约内有外国船不准装运牛庄等处豆石一条，虽为沙船留一养命之源，实欲保全上海市面，为各国通商经久之计。自同治元年，暂开豆禁，夹板洋船，直赴牛庄等处装运豆石。北地货价，因之昂贵。南省销路，为其侵占。两载以来，沙船资本亏折殆尽。富者变而赤贫，贫者绝无生理。现在停泊在港船只，不计其数，无力转运。若不及早挽回，则沙船停泊日久，船身朽坏，行驶维艰，业船者无可谋生。其在船耆舵水手，十余万人，不能存活，必致散而为匪，肆行抢掠，商贾难安。上海市面既废，即洋商贸易亦难。前曾禀求转详奏准照会英国公使，专将上海一口豆石仍归内地商人销运。旋据英公使面称，现因拨兵在沪防剿，恃此以济军需，俟贼稍平，再行议办，并蒙总理衙门复奏，俟苏松各属肃清，再与商量践守旧约各在案。现今江苏省均已肃清，英国防兵亦渐撤退。彼国以信义为主，公使既有言在先，定不失信。环求转详奏请飭下总理衙门，照会英国公使，仍守旧约，以全大局等情。并据该关道会同捐厘总局议称，登州、牛庄两口豆石、豆饼不准外国商船装载出口，天津新定条约载有明文。原因内地商船，南北经营，必有回货可装，始不徒劳往返。而登州、牛庄两处，惟以豆石、豆饼为大宗货物，舍此则无可装之货。是以申明条约，为船号各商各船水手人等特留养生之源。旋值北洋防务紧要，有资协卫，据英国公使节次声请，始奉总理衙门奏准开禁，以示宽大。从此两处豆货，一任外国商船及时转运。沙船自北回南，非不装豆，特其经历重洋，远不逮夹板洋船之迅速。进口迟而销路转隘，市价减而保本愈难，渐至资本亏尽。现在上海沙船，因无资本停泊在港者无数。税捐短绌，实由于此。将来船身朽坏。无力重修，势必日就废弃。各船商俱有身家，即能束手待尽，而水手人等借此谋生数至十余万人，别无恒业，至于生计尽绝，难保不铤而走险。万一剽掠横行，为害行旅，外国商人亦岂能安享其利？谚所谓“主富则客安，主穷则客困”。该船商等所禀，自系实在情形。夫以火轮夹板等船，往来外洋各通商水口，利权在握，无地不到，无货不装，即不转运油、豆、饼三件，亦无所损。而上海各项船只仅能驶赴北洋，又专借此以营什一之利，其关系实非浅鲜。既蒙总理衙门议俟苏省肃清，商践前约，英公使威妥玛亦有贼平议办

之说，现在苏省军务大定，正船号各商暨水手十余万众想望更生之日。惟有据情详祈奏请飭下总理衙门，照会英国公使酌量定议，请将登州、牛庄两处豆货查照前约，专归内地商船转运。似此量为变通，于华商生计稍留余地，而洋商互市亦可永远相安，海关税捐亦有裨益，各等情前来。臣查核原详所引主客之喻，最为透澈。上海为通商口岸适中之地。各国商船涉历重洋，会集于此，自必乐与中国商船彼此相安，而后主客共获美利。断无内地商船尽行废弃，而洋船可以独享其利之理。连年上海用兵，各船商于困苦不堪之时，竭力助饷，原冀贼平有日，复守旧章。今东南大定，英兵渐撤，若仍不议复前约，则船商自此绝望，水手十余万众无复生理。与言及此，可为寒心。且仅以上海一口豆货专归内地商船运销，于洋船生意初无甚损。而市面日旺，中外熙攘和乐，实于洋商亦有利益。斯通商立约之本意，非有所偏厚偏薄于其间也。伏乞敕下总理衙门照会英国公使，酌议施行。御批：该衙门议奏。

李鸿章奏(同年九月十八日)

前准总理衙门咨，钦奉谕旨赏给戈登章服四袭各件，总税务司赫德至上海交臣转寄，等因。当经札署苏松太道丁日昌俟赫德寄到前件，即代查收，就近转交戈登祇领，并恭传圣恩嘉奖及总理衙门优待之意，俾昭荣宠，去後。兹据该总兵官戈登申称，八月二十九日，准丁日昌委候补知府贾益谦赍臣札准总理衙门备寄钦赏章服六箱，另腰刀一口，当即在青浦县北竿山行营恭设香案，望阙谢恩，敬谨祇领。伏思戈登偶效微劳，叠承优保，已自饮水思源，乃复渥荷栽培，膺兹宠赉。似此异数荣施，实非弩下所敢承受。感衔之下，倍切悚惭。从兹永荷生成，益复难图报称，惟有铭心无既，没齿不忘而已。所在感切下忱，务求据情代为奏谢天恩等情前来。除咨呈总理衙门查照外，理合附片陈明。御批：该衙门知道。

李鸿章奏(同年十一月十二日)

查总税务司赫德经理洋税，接济饷需，用资战胜，即与宣力行间无异。戈登管带常胜军随同攻剿，每遇紧要机宜，赫德无不赞助。上年克复苏州时，戈登以郅逆等骍诛，颇有齟齬，经总理衙门王大臣函属该总税司从中调停，臣复推诚相待，戈登幡然悔悟，加倍出力。该总税司阴与维持，深明大体，实属著有劳绩。查海关现定会讯章程，遇有洋商应讯事件，该总税务司亦与闻听断，律以刑官之义，并借以压服各国帮讼之领事。拟请旨赏加赫德按察使衔，以昭激劝。御批：总理各国事务衙门议奏。

第八卷 同治(下)

恭亲王等奏(同治四年二月初八日)

再二月初二日，接准法国公使照会，内称：江宁地方早经肃清，此后须照续增条约第六款，将江宁地方安置埠头，为通商之所。望行知江苏巡抚，转飭地方官于本国总领事派员到日，务须帮同妥办，等因。臣等查法国条约，内载议定将江南之江宁准令通商，俟官兵将匪徒剿灭后，法国官员方准本国人领执照前往通商等语。现在江宁虽经肃清，一切情形，臣等未能悬揣。惟该使既请租地通商，自应照条约办理。应俟命下之日，臣等照复法国公使查照，并行文两江总督、江苏巡抚，转飭地方官斟酌妥办。总期于中外商民，两无窒碍，以副国家一视同仁之至意。再缮折间，又据英国威妥玛照会，请在江宁租地通商。与法国所请情事相同。相应照录照会，一并进呈。御批：“依议。”

×××等奏(同年五月初一日)

同治四年四月二十二日，由军机处交出江苏巡抚李鸿章奏，奉天等处杂粮米谷请准内地商船与北洋豆货并行贩运一折，奉旨该衙门议奏。钦此。英国公使卜鲁士照会，商请开禁。臣等力持以为禁不可开。曾与办理三口通商大臣崇厚往复函商，若万不得已，亦止可准其用内地沙船装载，由此口运至彼口，照章收税，仍不准出洋。然尚未肯遽行照办，一面仍向公使力为阻止。该使照会，始允豆石、豆饼照善后条约第五款专条办理。此事已作罢论。嗣因杭州、宁波相继失守，贼势鸱张，并有制造兵船潜谋入海之信。经江浙两省绅士公呈吁恳约外国助剿，内称两省群黎因在水深火热之中，切剥肤痛，待拯情迫等词。复据原任刑部尚书赵光奏，以贼情诡谲，北甯宜防。并称举大事者不计小利，若能借彼外援，攻克江宁、苏、杭三省，则海口各税，不妨概予蠲除，等语。适又接卜鲁士照会，以豆货解禁，则商民生意兴旺，各该国无不协力保卫，彼时上海洋商信息与该公使来往关通。卜鲁士之复请开禁，在江浙绅士请约外国助剿之时。因思洋人叵测，我若拒之过力，不独不为我用，且难保不转而与贼潜通。又以助剿之议，众论皆同，而赵光又有轻利之论，既欲资其协卫，防其通贼，不得不为宽大，以示羁縻。是以同治元年正月间奏明，请暂开豆石之禁，以结其心，而资其力。当经奉旨允准。复与该使议定，层层收税，豫留华商觅利地步。是臣等于请开豆石之禁，并未敢因赵光有海口各税概予蠲除之言，竟置关税商计于不问。嗣于是年六月经李鸿章奏称，沿海居民，生计壅阻。或各口豆石生意，准外国商船贸易，专将上海一口归内地商人运销。经臣等给英国公使照会，与之驳辩。旋准英使照复以宁波、乍浦之贼，未能备船驶北，皆因本国水师禁止。正在多方相帮，贵国又欲复设前禁，未免有失机宜云云。并据威妥玛面称，现在英国拨兵在上海剿贼，饷无所出，商人恃此款济军需，俟将来贼匪稍平，再行议办等语。臣因江南军务渐有端倪，恐执约力争，又复多生枝节。拟俟江浙肃清，再与英使商办。于二年十一月复奏亦在案。上年九月据李鸿章奏，上海沙卫等船，资

本亏折，船只朽坏，生计竭蹶。请仍照约禁止豆石出洋。等因。奉旨交臣衙门议奏。维时臣等以金陵虽复，沿海未见肃清，彼尚以洋兵防守口岸，所需兵费不资为词，未便遽与议及。是以先行咨复李鸿章再行办理。满拟军威既振，沿海荡平可期，不料贼氛远窜，而闽粤两省现又借彼声援。揆度情形，实难再与筹议，是以至今尚未具折复奏。兹李鸿章谗知牛庄等处豆货业准洋商贩运，以后能否挽回，殊无把握。请将奉天等处杂粮米石与豆油饼一律归内地商船贩运，以为补救之计。并称船商得利，税捐可期起色。海运沙船，不致缺少，于筹饷运漕均有裨益。臣等公同商酌，该抚所请奉天等处杂粮米谷准内地商船与豆等一同贩运一节，系为体恤商情，兼顾漕运起见，应如所奏办理。御批：“依议”。

李鸿章奏(同年五月二十一日)

臣派常镇道潘鼎新统领淮勇十营，内有开花炮队一营，由沪航海赴津，于五月初一日驰奏在案。此次许彭寿等请饬解开花炮，与臣所筹不谋而合。并据崇厚奏请调派戈登旧队，仍可邀同外国人帮同统领等语。查从前中国将弁，于洋枪、开花炮未谙施放，不得不用洋弁管带，本属一时权宜。挟制要求，既不能免，牢笼驾驭，亦未易言。总须主兵者兵力自强，方能操纵由我，用彼而不为彼所制。苟在我稍有把握，即不必假以重权。江苏之常胜军，原系外国人帮同统领。波澜迭出，糜费滋多。且与洋人交涉各事，均受牵制。嗣戈登去后，所存洋枪队千人，以余在榜、袁九皋两副将分带，而统于潘鼎新。其接手之兵官哲贝，止予以教练虚名，俾约束各兵头，不准干预营事。故两年以来，巴夏礼虽局外数数饶舌，哲贝等尚恪守规条。潘鼎新所部，另有开花炮队一营，上年攻拔晟舍、湖州等处，迭著成效。复逐渐添置炮具，朝夕操练，已臻纯熟。该营向募有洋人随营教习，由该道节制调换，粮饷均有定章，不至借口要挟，自无庸另派管带。其余在榜所带洋枪队五百余人，袁九皋所带三百余人，连余丁计共一千余名，即系戈登旧部，驻扎青浦之凤凰山。巴夏礼以人数太少，屡请增添，臣力持不允。亦以潘鼎新全军分驻松江、塘桥，本有轮换教练之议，今潘军既经北调，该处仅存此营，戈登、巴夏礼原议以此专防上海，若再抽调，不足以餍服外人之望，臣飞饬丁日昌体察情形，一面豫筹募补，一面妥商巴夏礼等，如何将余在榜一营交潘鼎新统带北去，兵力较厚。余在榜同该营兵勇，已熟悉洋人枪炮火箭用法，亦毋须洋弁管带前往，致难铃束。惟此项弁勇，因牵涉洋人，向须按月发饷，不能丝毫拖欠。若调令出省，未知能否照办。若再加以洋人所练枪队一营，正恐拨款难靠，必致误事。应请预饬总理各国事务衙门，会同户部逐细筹办，知照遵办。丁日昌到沪年余，情形愈晰，声望日孚。刻值臣军四出援剿，各路粮饷子药，转运接济，根本多在沪上。以及雇备潘鼎新赴津轮船，筹补凤凰山教练勇额，购办外洋军火，在在关系紧要，全赖丁日昌督率筹办，方无贻误，万不能离沪北上。其所设上海制造炮局，向由该员经理。潘鼎新此行约携带大小开花炮十一万余颗，苏沪各局存储尚多，仍可随后运济。北路纵有大战事，足供施放。臣尝与洋弁讨论火器，稔知巨炮攻城、劫营最力，而用子最多。至平原旷野，行阵自随，止须十二磅、九磅、六磅长炮及田鸡炮，较为轻灵。又苦不能及远，以之惊乱

贼骑，虚张声威，自可制胜。惟陆路转运费力，究不若水路之进退自如，则用亦必不能多。仍飭潘鼎新到直隶后，察酌情形，稟商崇厚等。如应设局制造，即妥议章程。再由臣飭商丁日昌，酌派该局熟练之员，带领匠役器具，由轮赴津，开局铸炸弹以资应用。容俟筹商定议，再行复奏。顷据丁日昌稟称，天津轮船雇价比前赴厦门较贵。匆遽之间，洋商居奇，未能定雇多只，臣仍督催筹办，俟稍就绪，即赴金陵接署督篆。

李鸿章奏(同年闰五月十九日)

臣于五月二十二日驶抵江宁省城，接署督篆。接常镇道潘鼎新、苏松太道丁日昌稟称：潘鼎新所部淮勇鼎字枪炮队十营，及续调青浦凤凰山余在榜洋枪队一营，陆续拔队到沪，连日搬运军装，配搭船只，二十六日已开驶轮船二只，其余各船尽于二十七、八日全数放洋，初二、三日当抵天津。各等因。臣于二十七、八日接奉二十一日寄谕：苏省洋枪队止有千名，仅敷留防本地之用。等因。钦此。钦奉谕旨之时，已在各营拔队登舟之后，无从撤回。臣先已密属丁日昌与英领事巴夏礼、兵官哲贝等妥议，如将余在榜洋枪队一营调往直隶，即照数另募一营，派久经战阵之候补知府赵宗道管带，仍驻凤凰山，交哲贝帮同教练，由丁日昌节制调遣。巴夏礼等初犹饶舌，嗣经丁日昌反复开导，并允于一月内募齐勇数，所有余在榜营中携去戈登原购之开花炮、洋火箭、洋枪等件，为之一一购还，巴酋始允。又欲令洋弁随往照料，该道等虑事后要挟，再三力阻。该营现无洋人随往。幸余在榜系潘鼎新旧部，恩信素孚，枪炮精熟，可期得力，实无须再添洋人，致受牵掣。又据潘鼎新稟称，该军十营饷需，业蒙奏请飭下直隶督抚按月各拨银一万五千两，诚恐两省分办，易致推诿，孤军远役，呼应难灵，又添调余在榜一营，因系洋人教练，在沪未缺一日之饷，到直后行营无定，若待苏沪接济，转折太多，势必鞭长莫及，若无可靠之款，缺望易生，终恐难得死力等语。朝廷但以兵力得用为望，臣等尤以饷项无著为虑。若无人管饷，则虽有用之兵，亦将变为无用。仍乞圣上复酌示遵。

李鸿章奏(同年七月初三日)

福州将军英桂等前奏缉获通贼洋人，并盘获古董轮船入官，请将税务司等奖励一案，经总理衙门议复，查明福州税务司美理登亲赴军营，拨借洋人炸炮，随同剿贼，尤为出力，请旨赏给头等金功牌一面，大荷包一对，小刀一把，火镰一把，细缎数卷，于同治四年五月二十日具陈，奉旨依议。钦此。臣遵即转飭苏松太道照造制办。兹据该道丁日昌备就一两四钱重中嵌珊瑚一等金功牌一面、大荷包一对、小刀一把、火镰一把、细段四卷，配装呈验。所需价值，在于洋税项下核实支销。将所给物件作为都中颁发，由臣咨送福建巡抚徐宗干会同英桂、左宗棠等宣示谕旨，转给美登祇领，以示宠异。御批。“该衙门知道。”

李鸿章奏(同年七月初八日)

窃漳州拿获投贼洋人白齐文等三犯，前经臣鸿章附片奏明，请旨飭下总理各国事务衙门议奏，以该犯罪不容诛，暂行严密监禁，听候严办在案。该犯被获后，即解福州省城监禁。嗣有解苏收审之议，当由闽省派委千总贺光泰、把总任尚胜随带护勇管解洋犯白齐文、克令及细仔三名，于五月初八日由闽起程，行至江山清湖地方，把总任尚胜因感冒病故，即由千总贺光泰率同护勇等押解前进。臣鸿章先未接准咨文，臣新贻于闰五月十六日接据署兰溪县知县江绍华禀称：闰五月初三日，准游龙县兵役护送福建委弁千总贺光泰带同护勇十名押解外国人犯白齐文、克令、细仔三名过境，当经照例分别点验，加派兵役雇船转解，以天气炎热，人数众多，添拨帮船一只，分坐前进，于初四日黎明一齐开船解赴下站去后。詎于是日午刻据长解护勇唐聚泰等回县报称：“行至离城二十五里汇头滩地方，其时东南风正大，滩高溜急，水势旋卷，又值大水之后，更加汹涌。犯船甫经下滩，忽被风水掀翻，全舟覆溺，同行帮船被水溜下，赶救不及。喊经就地居地渔船赶往救得护勇兵役九人，所有贺千总及外国人犯白齐文、克令、细仔与护兵役船户共十三人，同时随流飘溺。当赶拨船役，分头捞觅。即于滩下河岸并石壩边及施家滩等，先后捞获白齐文、克令、细仔尸身，分别验明，给棺封识。续于滩河下流各处，觅得护勇陈福堂、营兵王以芹、县役胡福并千总贺光泰各尸身，分验明确。经臣新贻委员驰往查明属实。臣宗棠亦接据禀报，飭将现存之勇丁唐聚泰等九人，咨送回营，先后咨会到臣鸿章。臣等查白齐文助粤西发贼谋害中国，按律久应诛殛，此次仍敢潜入漳州内地，投逆被获，本应立正典刑。即美国公使卫廉士，亦有“白齐文既经投贼，已失体面，美国不应庇护”之语，特以监禁听候严办。经臣宗棠等委解苏省收审。实因闽中贼匪未平，又距海口甚近，设有疏虞，关系非浅。不料行至中途，翻船溺毙，虽中国未申治罪之权，而该犯穷凶极恶，致伏冥诛，足见天道之不爽。克令、细仔二犯，前经闽省审讯，投贼是实，亦有应死之罪。既均淹毙，应毋庸议。其英人克令一名，前据英领事巴夏礼申陈，请照约交该领事惩办。臣鸿章本拟俟该犯解到，按约转交。今既与白齐文同舟覆溺，事出意外，止有付之命数。设该领事等闻信之后无理纠缠，臣等必当据理驳辩，相机妥办，随时咨商总理衙门完案。御批：“该衙门知道。”

李鸿章奏(同年八月十日)

查制造船炮军火各种机器，有通用者，有专用者。若买制齐全，须数十万金。雇觅中外匠工，采购外洋铜铁木炭等料，亦需费不资。臣处所设西洋炮局，其机器仅值万余金，不全之器甚多，止可量力陆续添购，以求进益。前由曾国藩派人赴英美各国探访该处船厂机器实价，臣并议及此物。若托洋商回国代购，路远价重，既无把握，若请派弁兵径赴外国机器厂讲求学习，其功效迟速与利弊轻重，尤非一言可决。不若于就近海口，访有洋人出售铁厂机器，确实查验，议价定买，可以立时兴造。进退之权既得自操，尺寸之功，均获实济。拟飭海关道丁日昌，在沪访购。如制器之器，已可购得若干，仍应添补若干，或宜另择妥口试办，容通盘筹议，略有端倪，方可入告。以上各情，均经节次函陈总理衙门，一面飭访购办。此臣处前此议

办铁厂机器之原委也。又去年十二月初九日钦奉寄谕：昨据御史陈廷经奏，绿营水师废弛，请飭整顿营伍、制造军火一折，著曾国藩、李鸿章会同商酌，奏明办理。等因。钦此。遵查原奏所议军火一折，大意以洋人巨测，恃有战舰之精利，逞其贪纵。然彼机巧之器，非不可以购求学习，以成中国之长技。请于广东等处海口设局，行取西洋工匠置造船炮，以期有备无患。等语。虽语焉未详，未得要领，而大致与总理衙门暨臣所筹议不谋而合。曾国藩平时亦持此论，自应遵旨商酌办理。兹据丁日昌禀称：上海虹口地方，有洋人机器铁厂一座，能修造大小轮船及开花炮、洋枪各件，实为洋泾浜外国厂中机器之最大者。前曾问价，该洋商索值在十万洋以外，是以未经议妥。兹有海关通事唐国华，历游外国多年，熟习洋匠。本年因案革究，赎罪情急，与同案已革之扞手张灿、秦吉等，愿共集资四万两，购成此座铁厂，以赎前愆。厂内一切机器俱精，所有匠目，照旧发价，任凭迁移调度。其余厂中必需之物，如铜铁木料等件，另值银二万两，由该关道筹借款项，给发采买，以资兴造。先行请示前来。当查唐国华一案，既情有可原，报效军需赎罪，亦有成案可援。此项外国铁厂机器，觅购甚难，机会尤不可失。批飭速行定议，禀候分别具奏。并飭该厂一经收买，即改为江南制造总局，正名辨物，以绝洋人覬觐。其丁日昌及韩殿甲旧有两局，即归并总局。一切事宜，责成该关道丁日昌督察筹画，会同总兵韩殿甲暨素习算造之分发补用同知冯煊光、候选知县王德均、熟谙洋军火之候选直隶州知州沈保靖，一同到局经理。所有出入用款，收发器具，稽查工匠，分派委员数人，各司其事，分飭遵照去后，旋据丁日昌等查造该厂机器物料件数清册，拟具开办章程，约有数端。一核计局用房租、薪水及中外匠工等有定之款，月需银四千五六百两，其添购物料多寡不能预定，大约每月总在一万两以外。一查原厂所有之洋匠，计留八人。其匠目科而一名，技艺甚属精到，所有轮船枪炮机器，均能如法制造。现拟于华匠中留心物色，督令操习。如有技艺与洋人等者，即给以洋人工食。再能精通，则拔为匠目，以示鼓励。现造洋枪器具尚未全备，已令匠目赶制。全副约大小四十余件，数月可以成功。如式仿制，节省功力。惟已制洋枪，则必需铜帽，又必需洋药，皆系相应而至之物，不容偏废。但闻制药机器工料尤为繁重，容再设法购求，俾可推行尽利。一查铁厂向以修造大小轮船为长技。此事体大物博，毫厘千里，未易洁长较短。目前尚未轻议具办。如有余力，试造一、二，以考验工匠之技艺。其铸钱、织布、挖河、犁田诸器，虽可仿制，但其法式同中有异。触类引伸，尚须考究。尤当权其轻重缓急，庶不致凌躐无序。一前奉议飭以天津拱卫京畿，宜就厂中机器仿造一份，以备运津，俾京营员弁就近学习，以固根本。现拟督飭匠目随时仿制，一面由外购求添补。但器物繁重，非穷年累月不能就，尚须宽以时日，庶免潦草塞责。一查本厂现在江口，每年房租价银六、七千两，实为过费。兼之洋泾浜习俗纷华，游艺者易于矢志。厂中工匠繁多，时有与洋人口角生事，均不相宜，应请择地移局。其他所议，如机器宜择人指授，工匠不令随意去留，费用实报实销，赏罚宜明定章程，以上各条均属切实。臣查此项铁厂，所有系制器之器，无论何种机器，逐渐依法仿制，即用以制造何种之物，生生不穷，事事可通。目前未能兼及，仍以制造枪炮，借充军用为主。月需经费，容臣随时于军需项下，通融筹拨。如将来各种军器，仿照洋式造成，取携甚便，即可省购买洋军火之费。上

海虹口地方设局，于久远之计，殊不相宜。稍缓当筹款另建房屋，移至金陵沿江偏僻处所，以便就近督察。曾国藩采办西洋机器，俟到沪后，应归并臣处措置。至前次派在丁日昌、韩殿甲两局之护军校达咙阿等四员、京营兵二十名，已飭入厂学习。其尽先参领萨勒哈春、副参领崇善等所带弁兵，本在苏州西洋炮局。该局机器与上海铁厂亦自同源，仍可互相观摩。惟此事形下不离形上，与规矩不能与巧。将来各弁兵所得之浅深，恐难以一例绳也。机器制造一事，为今日御侮之资，自强之本，总理衙门原奏，言之甚详，已在圣明洞鉴之中。抑臣尤有所陈者，洋机器于耕织、印刷、陶埴诸器皆能制造，有裨民生日用，原不专为军火而设。妙在借水火之力，以省人物之劳费，仍不外乎机括之牵引，轮齿之相推相压，一动而全体俱动。其形象固显然可见，其理与法亦确然可解。惟其先华洋隔绝，虽中土机巧之士，莫由凿空而谈。逮其久风气渐开，凡人心智慧之同，且将自发其覆。臣料数十年后，中国富农大贾，必能仿照洋机器制作。以自求利益者，官法无从为之区处。不过铜钱火器之类，仍照向例设禁；其善造枪炮在官人役，当随时设法羁縻耳。天下至奇至异之事，究必本于平常之理。如或不然，则推之必不能远，迁之亦不能久。陈廷经原奏以中国修造钟表，推之于机器，虽有精粗大小之别，可谓谈言微中。中国文物制度，迥异外洋，榛狂之俗，所以制治保邦固丕基于弗坏者，固自有在。必谓转危为安转弱为强之道，全由于仿习机器，臣亦不存此方隅之见。顾经国之略，有全体，有偏端，有本有末。如病方急，不得不治标，非谓培补修养之地即在是也；如水大至，不得不缮防，非谓浚川浚经田畴之策可不讲也。事无巨细，乐成固难，而图始尤不易。自来建一议，兴一利，劳臣志士，缠绵而经营之。及乎习之既久，相安于无事，或几不察其所自来。而追溯创议之初，于此中难易得失之数，几经审慎，曷敢卤莽而一试哉？臣于军火机器，注意数年，督飭丁日昌留心访求又数月。今办成此座铁厂，当尽其心力所能及者而为之。日省月试，不决效于旦夕。增高继长，尤有望于方来。庶几取外人之长技，以成中国之长技，不至见绌于相形，斯可有备而无患。御批：“总理各国事务衙门知道。”

李鸿章奏(同年九月初七日)

松沪军需案内，有长备军用款，及购买外洋军火枪炮，并英法兵官教练洋枪炮队薪工口粮等三款，皆为向来军务所无，均经前抚臣薛焕暨臣抵沪后先后随折声明。兹据原办松沪军需、前兼署苏藩司、苏松太道吴煦详称，督飭原办各局员将咸丰十年二月起至同治元年十月初六日止，经放华勇常胜军粮饷、购买外洋军火枪炮价值、并英法兵官教练洋枪炮队薪工口粮等款，逐一句稽，共计请销银二百五十二万九千六十四两三钱五分八厘四毫五丝，系于江海关税捐厘总局上海绅富等捐款内随时照数提拨；另开支款目，系与洋人交涉，无例可循。兹核该道开报各用款，委系实收实放，并无浮冒。仅缮清单附片具陈。御批：“该衙门知道。”

恭亲王等奏(同年十二月初五日)

窃照得咸丰十年英国续约第三款，内载赔价八百万两，在于津郡先将银五十万两缴清，应在粤省分缴银三十三万三千三百三十三两。查明粤省大吏经支填筑沙面地方英商行基之费若干，扣除入算，其余银两应在通商各关所纳总数内分结扣缴扣成。法国续约第四款，内载赔补八百万两，已收到去岁粤海关缴银三十三万三千三百三十三两零。其余银两，宜在中国各海关每年收税银若干，按五分之一扣归。又第七款内载在天津收银五十万两各等语。当于咸丰十年十月十九日在天津付法国银五十万两。嗣据两广总督劳崇光等奏报，粤东付过沙面经费，应归英国承认银十五万七千八百六十九两六分，于咸丰十年十月二十日粤海关交银十七万五千四百六十三两九钱四分，连前共银三十三万三千三百三十三两。又查，据粤海关监督师曾呈称，奉文赔偿法国银三十三万三千三百三十三两三钱，前监督恒祺任内送交银十万，前监督毓清任内送交银三十三万三千三百三十三两三钱，均经法国使司马殿按次收到，复关备案。至各关从咸丰十年八月十七日起，每届三个月一结，付交英、法国各二成银两。据上海通商大臣李鸿章咨报，南洋各关截至第十九结止，各付过银五百八十八万三千零二十两有奇。三口通商大臣崇厚咨报，北洋各关截止第十九结止，各付过银二十五万五千六百八十三两有奇。当经札交总税务司赫德复核，并饬酌议下余未扣银两，应否归并江海等大口接扣，去后。旋据复称，南洋各关漏未将台湾关即打狗口扣过二成银两算入，且淡水、九江二关，银数小有舛错。北洋各关惟东海关第十五结将两国共扣之银，报为每国所扣之数。虽有此不符之处，仍可以付过六百九十七万余两为算。查第二十结除淡水关尚未报到，其余各关共应扣银四十三万七千余两，第二十一结约计应扣银三十四万余两。自第一结起至第二十一结止，连天津、广东两款在内，约应有七百七十五万之数，未扣之银，仍有二十五万上下。拟请第二十二、三两结，每逢结底，闽海扣银四万，江汉扣银两万两，粤海关扣银一万五千两，江海关扣银五万两。以上四关两结共付英国银二十五万两，法国银二十五万两。第二十四结内，将各关实扣之银详细核对。其应找扣之银仍由江海关付清完案。似此办法，一面可得细算之暇，一面可免多付找回之烦。各等因。随经照会英国使臣阿礼国、法国使臣伯洛内查照。兹据各行照复前来，均愿照办。惟称未扣找回之银，请于第二十三结底会算清讫，不必俟至第二十四结再行找付等因。臣等伏查扣款一事，本系和约载明，按照外国月日，以三个月为一结。现在扣至中国十一月十四日，系外国十二月底，即系第二十一结底。止二十三结，系外国六月底，约计系中国来年五月中旬。总税务司拟令第二十四结底再行找清完案者，系因各关扣过银数，必须俟结期后数十日方能报齐。是以扣至第二十四结，再行会算找付，为期方觉从容。今英、法二国使臣既愿第二十三结底会算清讫，所争不过三个月之迟早。若各关先将第二十一结以前扣过银数再行详加核算，即可知下欠究系若干。其二十二、三两结，不问税收多寡，责江海、闽海、江汉、粤海共付英、法二国银各二十五万。应找尾数，即可预为核计。于第二十三结底，由江海关找清完案。数目既无出入，可允提前办理。除照复英、法二国令其饬知各口领事官照办，并由臣等札饬总税务司传谕各关税务司查照外，相应请旨饬下南北通商大臣，速行知会所辖各关，再将第二十一结以前付过英、法二国银数，详加复核，另行造具详册，注明每结会单一分，由关会同税务司核对清楚，送交领事复核画押，呈送该管通

商大臣汇齐。即由各该大臣一面查明复奏，一面备文将各关细册会单咨送臣衙门，以凭会算，而昭详复。御批：“依议。”

李鸿章奏上海裁撤会防局折(同年十二月十九日)

奏为上海裁撤会防局，仍练兵接防要地，恭折具陈，仰祈圣鉴事。窃据署苏松太道应实时稟称，咸丰十一年冬间，上海贼氛环逼，筹议中外会办防剿，经江浙绅士呈由前抚臣薛焕奏，奉上谕：江浙绅士请借英法官兵剿贼，上海为通商要地，自宜中外同为保卫，著与英、法两国迅速筹商办理，但于剿贼有裨，朕必不为遥制。等因。钦此。经前苏松太道吴煦与各官绅会商举办。先于十一年十二月十四日在洋泾浜设立会防公所，与英、法提、领事各官，筹商防剿之策。开筑濠墙，建造炮台。一面练炮勇，随同西兵四出攻击，并支应夫船粮草食物，以利军行。嗣又雇备轮船，迎接臣军东下。迨同治元年三月，大军莅沪，整兵筹饷，屡克名城。未及三年，肃清全省。即于上年四月间，遵札将洋泾浜会防公所停撤，仍留分局数处，并归苏松太道衙门兼办，以备支应。现在英、法在沪防兵，均已回国，会防分局，于本年十一月底全行裁撤。又吴淞口原有法国防兵驻扎，由该处团防局董事办理支应，本年七月间，亦将供应全停，裁捐撤局。计自十一年十二月开办会防，至今阅时四载。所用经费，悉在本局捐款项下支销，并未动用正项。合将会防撤局缘由，稟祈察核奏咨等情前来。臣查从前上海会防局之设，缘时势危迫，不得不笼络洋人，薛焕原奏内即已声明，只可谓一时权宜之计。究之中西兵弁，实不能在一路会剿，致受牵制。先是，西兵克复青浦、嘉定二县，旋得旋失，待官兵再举而复定。自嘉定复后，进攻苏属各城，惟戈登率常胜军以从。英、法弁兵总未离沪城一步。是以臣军抵沪数月，即经会防原绅冯桂芬、藩曾玮等呈请撤局。维时臣以战事方亟，上海系后路根本，西兵屯驻城内外，索应月粮房租夫价，需费甚巨，既相习为固，然未遽翻前说，致生他衅。因暂留会防一局，稍示羁縻。逮至苏、常肃清，金陵告捷，彼族无可借口。英、法驻沪之兵，以次撤退。自上年八月起，丁日昌、应宝时等与该提督领事再四商催，始将历年占住上海学宫、城隍庙园及大境青莲庵诸处，陆续让还。节经咨明总理各国事务衙门。从此沪城风气一清，界限分明。实皆仰赖朝廷德威所被，事机十分顺手。而会防局从容蒞事，亦得有始有终。殆非该局官绅始愿所及。计三四年来，动用经费，为数不资，悉就华商设法筹捐。臣于本年二月奏报军需清单案内，已声明此项应归外销。再英、法未撤兵之先，据英领事巴夏礼以上海系通商最要口岸，须由中国练兵接防。该公使复向总理衙门渎请，臣即酌留上海城南高昌庙法国教练勇四百人，凤凰山英国教练勇千余人，仍拣派英、法武弁各数人，分司教习，令由中国官统带。并派记各总兵郑海鳌带淮勇亲兵一营，赴凤凰山驻扎，兼统教练各营，会同上海道节制调遣。其勇丁口粮章程，改照楚军营制，按月由关税内拨给。外国兵弁，止管教习枪炮，不得干预营务。并与该领事等议明，此后该军进止机宜，与洋弁应否撤换之处，悉由督抚统兵大员主政，以重海防，而肃体制。所有裁撤上海会防局仍练兵接防各缘由，理合缮折由驿具陈。伏乞圣鉴。谨奏。

咨李鸿章(同治五年二月初七日)

查江宁还堂一事，上年十一月间叠据署两江总督李鸿章咨称，札飭江宁府知府妥为斟酌，能否于城内择地抵给，迅即妥办。嗣后该府禀复，金陵城内建堂，绅民不愿。如该主教不愿城外择地抵换，应令自来江宁，与该官绅面议。等语。即此案既经该署督妥筹核办，将来该主教能否来江宁与之议明，谅可完结。今该公使照会内，以并无完结之信为词，请以三个月为限。明知该省正在商办此事，而又恐该处绅民不愿，另生他议，遂故为此欲速之请，以坚其要挟之心。查该省教堂，该署督业经允议抵还，自应速为议结。能于城内择地抵换，固可彼此相安，倘该主教必欲在城内建堂，亦止可于城内另择一区，给与修造，以示怀柔。该署督向办理洋务，颇合机宜。此案究应如何议造之处，想已早有布置。应请飭令该署督，督率地方官赶紧妥筹完结，免致另生枝节。

李鸿章奏(同年二月初八日)

窃照通商各口征收洋税，自咸丰四年上海一关设立税务司，帮同经理有效，嗣后南北各口亦即次第举行，并添设总税务司名目。咸丰十一年五月间，赫德于署总税务司时，曾将每年应收洋税，约略开报。迨同治二年，议定税务司岁支经费案内，截至第八结长江开口，是年所征正税及半税及子口税，共有银七百二十五万余两，声明此后仍可较前丰旺。同治三年，臣因总税务司赫德，年来经理洋税，接济饷需，奏蒙恩准，赏加按察使衔。兹准总理衙门咨，据赫德申称，现值两国扣款将完，又值告假回国，将经手税务各款，比较总数，详细开呈。并称此五年中，各口税务司均悉心查办，任劳任怨，竭力襄助。内有税务司日意格、美里登、休士惠德，帮办巴德、好博逊、薄朗满、三德揭谟，业经各省大吏另案奏请鼓励，蒙恩赏给宝宝。此外尚有现任税务司吉罗福、费士来、马福臣、狄妥玛、威理士、麦士威，并粤海关扦子手头目鲍良七人，应如何一体奖励，咨臣酌核办理等因前来。臣查赫德总司税务，现呈比较总数清单，系将南北各口通年合计。除子口半税不计外，其进出口各项洋税，近已收至七百八十余万两，较之从前岁收总数已增数十万两。足为通商税课丰旺之征。该总税务司赫德，悉心经理，业蒙恩赏加按察使衔。其各口税务司，俱能不避嫌怨，竭力襄助。现值两国扣款收完，查单结数，均有劳绩，所有吉罗福等自应一体奖励，逐加查核，援照成案酌办，合无仰恳天恩，准将税务司吉罗福、费士来、马福臣、狄妥马、威理士、麦士威等六人，各给一等金功牌一面；粤海关扦子手头目鲍良，给与二等金功牌一面，以示奖励。俟命下之日，再飭江南海关，照式制备齐全，分别移送祇领。所需价值，即在洋税项下作正开销。至此内有外洋名字，译音参差，与档案册未符之处，应准由赫德随后查明呈请更正。除咨明总理衙门外，谨会同三口通商大臣臣崇厚恭折具奏。御批：“着照所请。该部知道。”

李鸿章奏(同年八月二十九日)

英国兵官马格里前在臣营教练枪队，设局仿造西洋火器，着有成效，当经奏蒙赏给三品顶带。该兵官感激思奋，讲求洋器，制造益精。在局四年，始终不懈。每慕圣朝，冀得一中国文职，俾可誇示同类，以远耀岛洋。查此克复湖北等城，破敌摧坚，颇得开花炮弹之力。论功行赏，该兵官亦应酌予奖励。可否恳恩准将三品顶带马格里赏加道员虚衔？以示优异之处，出自逾格鸿施。

郭柏荫奏(同年十月初二日)

臣钦奉谕旨派令将上年与比利时国所立条约，妥为互换。等因。钦此。并承准总理各国事务衙门来文：据英国公使知会，比国公使至迟九月初七日一准到沪。等因。查该使既有来沪确期，臣应即遵旨赴沪换约，以期妥速。当于九月初七日，亲赍用宝条约，带印起程。旋据江海关道应宝时稟报，比利时国公使金德于九月十四日来沪，照会该道，请为转报。等情。臣于十六日行抵上海，十七日，该使金德带同翻译官施维祺至臣行馆谒见，臣督同关道应宝时与之会晤。该使臣声称，仰蒙大皇帝鸿仁大度，准令该国与英、法各国在中华一体通商，同沾利益，从此永敦和好，共乐升平，曷胜感幸等语，词气极为恭顺。随即共同议定十九日在臣行馆换约。十八日臣往答拜。十九日该使臣金德偕英国上海领事官温思达及翻译等官，赍带彼国用印条约至臣行馆，臣当与江海关监督苏松太道应宝时、松江府知府李铭皖、署上海县知事王宗濂，按照向章，以礼相待。飭委应宝时恭读用宝条约与该使所带条约，督飭翻译官面同逐细校对相符，臣复与该公使共同复阅无异，当即写立凭单，彼此互换。该使等欢欣鼓舞，额手称谢，交出该国君王恭进大皇帝国书一件。询其大意，据称上年换约时，系其旧君在位，今其新君继立，上书大皇帝恭请圣安，并陈明传袭缘由，别无他事。臣告以西洋通商各国，从无恭进国书之事，碍难代为进呈。据称该国立约换约，新旧君主相继，共成此举，与别国情形不同，其新君主上书，恭请圣安，借表惓忱，坚求代达。并将国书译出汉文，一并送呈，以明无他。臣当飭应宝时同内地谙习西洋文字之人，重加翻译，与来文大致相同，尚无违悖字句。伏查从前不丹等国来沪换约，皆不免小有参差，颇费唇舌。此次比国使臣情词恭顺，除凭单之外，并无照会往来，亦无语言辩论之处。其恭进国书，因新君继立，陈情修好，出自慕义之诚，臣未便壅于上闻，转令心怀疑沮，亦不敢冒昧呈进，致与历届成案不符，已允其转送总理各国事务衙门，听候酌办。所换条约，应请旨飭下通行办理。臣现飭江海关道先行照录一本，详细校对，同上年九月该使臣与总理衙门议定各口领事办理不协，即行撤换。照会一件，附录于后，刊刻装订成本，恭候命下。即飭该关道将刊本申送通商大臣李鸿章，分咨总理衙门、三口通商大臣、各省将军督抚、各关监督，一体查照办理。其换到条约，另行遴委妥员，赍送三口通商大臣，转送总理衙门查收。所有前奉摘录寄谕一道，敬谨缴还军机处。所立凭单及译出国书，照录咨送军机处备查。其奉发条约副本及该使凭单，同所进国书，一并咨呈总理衙门核办，谨会同通商大臣臣李鸿章恭折由驿复奏。御批“该衙门知道。”

李鸿章奏(同年十二月八日)

准直隶提督刘铭传据统带炮营记名总兵毕乃尔禀称：该总兵本系法国兵丁，同治元年在上海投效，奉派在铭字军教练枪炮，嗣委管带铭军洋炮营，先后攻克杨库、江阴、芜湖、金匱、常州府县汛城，洊保今职，赏带花翎，并赏给法什尚阿巴图鲁名号。仰荷圣恩，甄叙微劳，不遗化外，矢以此生，捐糜图报。溯自昔年随营之始，即自陈愿隶版图，区区愚诚。五年一日，当于去岁十二月，具禀请示隶籍一事，奉批询愿隶何省何县，以便奉准立案。伏念毕乃尔孤身远寄，本无可依，缘主帅暨统将两人均系合肥县籍，乃尔在营日久，所识亦多淮军将士，前此随军西上，曾过庐州，乐其风土敦庞，人情朴厚，窃愿隶安徽合肥县籍，并于县境略置田庐，俾有因依，庶冀世世子孙，长为圣朝赤子。转请察核附奏，等情，前来。臣查上海用兵以来，洋将助剿立功，膺受中国官职者不乏其人，然事竣仍回本国，惟毕乃尔仓卒遇合，投袂从戎，当时即欣然有出谷迁乔之意，矢愿他日受廛为氓。察其向慕华风，实出至诚。经臣于二年八月克复江阴出力案内，随折奏明。钦奉上谕三品顶戴法国兵丁毕乃尔自随营投效以来，即已冠带 薙发，愿隶版图，教习枪炮，极为得力。等因。当恭录行知去后。该将益加感激，训练精勤，奋勇苦战。三年之内屡复名城，转战数省，而孤身子然，时以隶籍为念。兹自陈愿隶安徽合肥县籍，实因久在淮军营内，人与地均尚熟悉，得有照应。臣维历来番将立功，改隶中土，往往见于史册。即核诸现在通商条约之意，中外民人，携家就地居住，悉获安全，日久即系入籍，亦属情事之常。况毕乃尔自同治二年 薙发带冠，学为中国语言，旋又娶有妻室，势不能仍回法国，似应准如所请，以遂其归依圣朝之志，益坚其毕生效命之忱。该总兵朴讷谨飭，尚易驾驭。臣仍与刘铭传随时严加训诫，曲为保全，仰副皇上怀柔远人、爱惜战将之至意。御批：“着照所请。该衙门知道。”

署理巡抚郭柏荫奏(同治六年二月二十二日)

窃照比利时国使臣金德于换约时呈递国书，经总理衙门奏准，由军机处撰拟回给该国玺书一道，由驿恭赍到苏。查该使臣金德换约后赴汉口东洋一带，于同治六年正月二十七日至苏，二十八日赴臣署谒见，当即将恭奉玺书，面交该使臣祇领，并宣布我皇上嘉惠远人、敦崇信义至意。该使臣欢欣鼓舞，免冠额手，深致钦服感幸之忱。据称谨当恭赍回国，交彼君主接收，永敦和好等语。情词甚为恭顺。于二月初一日开船赴沪。谨会同署理三口通商大臣曾国藩复奏。

谕曾国藩等(同年三月二十五日)

谕：曾国藩等奏：拟援照成案，于上海洋商借银一百二十万两，由各关税项下拨还，等语。陕甘需饷孔殷，各省协解，恐不能如期。停兵待饷，于剿贼机宜，未免延缓。自应照该大臣所请，迅筹巨款，以期集事。即着曾国藩等督飭各海关监督，按照左宗棠所定数目，出给印票，发交道员胡光墉等向洋商支借，兑付山西解州，一

面将汇票解赴该大臣军营提用。所借银两，自本年七月起，分六个月于各关税项下拨还。仍飭各该省藩司，将应解甘饷，按月发交各关，以清款项。其余息银等项，均着照所议办理。原折着抄给曾国藩等阅看。

谕军机大臣等(同年九月十五日)

谕军机大臣等：总理各国事务衙门奏预筹修约事宜，请飭滨海沿江通商口岸地方将军督抚大臣各抒所见一折，前因原议十年修约为期已近，据该衙门奏请，飭南北洋通商大臣于熟悉洋务各员中每处选派二员，于十月咨送来京，当经降旨允准。惟前奏止欲于选派各员内，收群策群力之效，而于通盘大局尚待筹商。咸丰十年换约后，原因中国财力不足，不得不勉事羁縻，而各国诡谋谲计，百出尝试，尤属防不胜防。转瞬换约届期，彼必互相要约，群起交争。或多方胁制，以求畅遂所欲，均属意中之事。值此时势，惟仅恃笔舌以争之，此外别无可恃。各该将军督抚大臣受国厚恩，当此外患方殷，亟应合力齐心，先事图维，为未雨绸缪之计。着曾国藩、李鸿章、都兴阿、英桂、刘长佑、吴棠、瑞麟、李瀚章、郭柏荫、刘坤一、李福泰、马新贻、丁宝楨、曾国荃、蒋益澧通盘筹画，左宗棠、沈葆楨筹办船政事宜，于洋务尤有关系，并着悉心酌核，妥筹速奏。本年十二月，即英约前期六个月先行酌改之期，各该将军督抚大臣务于十一月内奏到，毋稍延缓。俟总理衙门密函条说寄到时，诸臣其审时度势，妥筹万全，以济时艰，而副委任，详细复奏，毋得徒托空言。原折着抄给阅看。

曾国藩奏(同年十一月二十三日)

臣于九月二十三日承准军机大臣字寄：同治六年九月十五日奉上谕，总理各国事务衙门奏预筹修约事宜。等因。钦此。仰见我国家推心置腹、博采广谏之至意，钦佩曷任！详绎总理衙门原折密函，层层商析，谋坚执固拒之辞，而又不欲大局之决裂，怀雪耻报讎之志，而又不欲彼族之猜疑，实属审时度势，苦心经营。臣于预筹换约一事，前接总理衙门四月之函，当飭各关查议，开列清单。经臣详细加签，业于九月二十一日，遴派候补道孙士达等二员由沪进京赍投，以备采择在案。兹复荷谕旨垂询，臣愚以为兴外国交际，最重信义，尤贵果决。我所不可行者，宜与之始终坚执，百折不回。我所可行者，宜示以豁达大度，片言立定。断不宜若吐若茹，稍涉犹豫之象，启彼狡辩之端。大抵洋人之在泰西数百年，互相吞并，无非夺彼国商民之利，然后此国可以得利。其来中国也，广设埔头，贩运百货，亦欲逞彼腹削之诡谋，隘我商民之生计。军兴以来，中国之民久已痛深水火，加以三五口通商，长江通商，生计日蹙。小民困苦无告，迫于倒悬。今若听洋人行盐，则场商贩运之生路穷矣；听洋人设栈，则行店囤积之生路穷矣；听小轮船入内河，则大小舟航水手舵工之生路穷矣；听其创办电线铁路，则车驴任辇旅店脚夫之生路穷矣。就彼所要求各事言之，惟挖煤一事，借外国开挖之器，兴中国永远之利，似尚可以试办，应宝时条约册内以为可行，臣亦加签从而韪之。其余如轮船、铁路等事，自洋人行之，

则以外国而占内地之利，自华人之附和洋人者行之，亦以豪强而占夺贫民之利，皆不可行。以上各节，使京师勉强应允，而中国亿万小民穷极思变，与彼为仇，亦断非中国官员所能禁止。中国之王大臣为中国百姓请命，不患无辞置辩。其至因此而致决裂，而我以求民生而动兵，并非争虚议而开衅，上可以对天地列圣，下可以对薄海苍生，中无所惧，后无可悔也。至请觐、遣使、开拓传教三事，臣派员查京册内，皆未议及。伏查康熙十五年圣祖仁皇帝召见俄人尼果赉事，其时仪节无可深考，然当日与俄罗斯议界通市，实系以敌国之礼待之，与以属藩之礼待高丽者迥不相同。道光、咸丰以来，待英、法、美三国皆仿康熙待俄之例，视同敌体。盖圣朝修德柔远，本不欲胥七万里之外洋而悉臣服之也。拟请俟皇上亲政之后，准其入觐。其仪节临时酌定。既为敌国使臣，不必强以所难，庶可昭坦白而示优容。遣使一节，中外既已通好，彼此往来，亦属常事。论者或恐使臣之辱命，或惮费用之浩繁，此皆过虑之词。似应令中外大臣，留心物色可使绝国人员，储以待用。不论官阶，不定年限，有人则遣，无人则不遣。权仍在我，彼亦断不至以许而不遣，遂启兵衅。顷准总理衙门咨，已奏派志刚等出使西洋，从此源源通聘，使事渐多。纵或有一二不能专对之臣，亦安知无苏武、班超、富弼、洪皓者流出乎其中？为国家扬威而弭患，此可慨然允许者也。至开拓传教一事，查天主教之始，专以财利人，近日外国教士贫穷者多，彼之利有所不给，则其说亦将不信。自秦汉以后，周孔之道稍晦，而佛教渐兴。佛教兴于印度，今日之印度，则多从回教，而反疏佛教。天主教兴于泰西，而今日之泰西，则另立耶苏教而改名天主教。可见异端之教，时废时兴。惟周孔之道，万古不磨。但使中国修政齐俗，礼教昌明，虽百计开拓，亦终鲜尊信之者。况各省郡县多立教堂，业已拓之无可再拓。将来修约之时，该国如于此条渎请不已，似可许以随时行文保护彼教，但不必再添条款，谅不至更肆要求矣。此数端者，其害稍轻，不特不与力争，并可有求立应。独至铁路、轮船、行盐、开栈等事，害我百姓生计，则当竭力相争。不设抵制之词，不用严峻之语，但以婉言求之，诚意动之，终始不可移易，使彼知恤民以保邦，乃千古帝王之常经，亦我朝列圣之家法。在今日中国多事，洋人方张，我不能因曲徇和议，而不顾内地生民之困。即异日中国全盛，洋人衰弱，亦但求保我黎民，而别无耀兵海外之心。彼虽倔强诡谲，当亦知真理不可夺，众怒不可犯，或者至诚所感，易就范围。区区愚见，是否有当，谨献刍蕘，以备采择。

丁日昌奏(同治七年七月十一日)

臣在苏藩司任内，接通商大臣曾国藩文开：同治六年九月二十日钦奉上谕：着派丁日昌将上年与义大利亚国所立条约，妥为互换。钦此。遵即驰赴上海，将奉发条约订期互换。适因该使臣骆通恩未携带原约，经臣变通酌办，另立凭单。先将用宝条约，与之互换，所附洋文条约，暂为折下，留在苏松太道衙门，限该使于六个月内将原约取到上海，交苏松太道查照明确，即由该道与之补换。详经前署抚臣郭伯荫于奏报事竣折内奏明在案。本年五月二十二日，据义国领事官霍锦士申陈，奉本国骆使臣札开，上年漏赍原约，已由本国寄到，申请互换。并据声称，骆使臣远在日

本，该领事申请如何办理。臣查道员本与领事平行，自可由上海道与之补换。惟此项条约，上年原限六个月取到，现在因何逾期，未据声明，飭行苏松太道查复。旋据应宝时禀复，转据霍锦士复称，条约到上海时，本未逾期限，因骆使臣适在日本，有事往返商候，是以稍迟。臣念其迟延尚属有因，且为日无几，即飭苏松太道应宝时查照上年所立凭单，就近补换，以广圣朝怀柔之德。兹据应宝时禀报：义国领事霍锦士、副领事葛治，邀同法国领事白来尼、副领事狄隆，于六月初八日同至上海道署，出视条约，确为五年九月所定，汉、洋文原本印押均齐。该道因将过去留下洋文条约与之互换，并照章犒以酒食。该领土霍锦士等无不感戴皇仁，欢欣鼓舞。惟洋文内译对有缮写舛错数处，虽该领事霍锦士自认错误，仍恐空言无据，经该道与白来尼、霍锦士三面议立凭单，以免日后翻异。该道与精密之中，能寓权变之义，办理尚为妥协。据将换到条约及另立凭单委员赍送前来。伏查历办换约成案，系将条约税则正副本校对无讹，照录一分，送由通商衙门发交关道，照录刊刻。惟上年换到正副各本，先由前署抚臣郭柏荫咨达总理衙门存查，此次应将补换原本由臣照录汉文一分，咨请总理衙门，将上年送存正副各本，校对准确，递寄到苏，再行发刊。御批：“该衙门知道。”

谕军机大臣等(同年九月二十七日)

谕军机大臣等：曾国藩奏新造轮船工竣，并陈上海机器局筹办情形，及请奖上海通商委员各折片。中国试造轮船，事属创始。曾国藩能不动声色，从容集事，将第一号轮船造成。据称坚致灵便，可涉重洋。此后渐推渐精，即可续造暗轮大舰。并陈制器设场及添建译馆各情形。足见能任事者举重若轻，深堪嘉尚。马新贻计抵新任，即可会同丁日昌，按照曾国藩、李鸿章筹办规模，悉心讲求，以期周妥。设局以来，各该委员等均属著有微劳。所有尤为出力各员，准由曾国藩会商李鸿章、马新贻、丁日昌酌量奏保。其上海通商委员，办理洋务，亦臻妥协，并着曾国藩等择优请奖，以示鼓励。

马新贻奏法使到九江关多方要求至湖口兵船搁浅片(同治八年二月十三日)

再，臣先于十月初八日钦奉寄谕一道，以法使罗淑亚有带同兵船前赴江西等处办理教案之语，当即钦遵谕旨，分别飞行各处，务于该使到时，按约以礼接待，遇事开解。等因。去后。是该使此次出京，其初意原不为安庆之案而来。迨经沪上各员与之接晤，察看光景，其入江之举，势难劝阻。经臣迭次咨函商催江、鄂二省各将教案迅速了结，免致借口。查江省有南康、新昌、庐陵、吉安等处之案，起数虽多，均尚易了。鄂省只有天门县一案，焚毁教堂及教民房屋，间数不少，赔款稍巨。接准江西抚臣刘坤一、湖北抚臣郭柏荫咨函声复，各已办有眉目。由臣先行分起咨明总理衙门，其如何办结缘由。江鄂二省，自必详晰具奏。窃意法使前往，亦已无甚指摘。兹于初八日接据九江关道景福禀报：罗使由皖驶抵该关，接晤之顷，查询已、未结各案，多方挑剔，任意要求。经该关道随机答复，颇能力持大体。该使坚以

进省建堂传教一节，必须面见抚臣商办，阻之不可，即于初六日起碇下驶。又据臣处派委护送之道员姚曦飞禀，云该使行抵湖口，兵船搁浅，不能前进，已换坐火轮小划船晋省。各等语。该使举动轻躁，到省后必仍有许多要挟。抚臣刘坤一自能按约辩论，妥为办理。现尚未准咨函知照。除将景福来禀，随咨先行抄送总理衙门查照外，谨附片具陈，伏乞圣鉴。谨奏。

马新贻奏按照通商新约派员预筹应办事宜片(同治九年二月十九日)

再，臣接准总理衙门咨送新修英国条约及善后章程税则各件刊本，并准公函预筹一切事宜。等因。当即查照新约议办各条及函开事理，分行南洋、长江各关，筹议稟商。内有通商律例一事，条约载明由两国会同商定，其应由何员在于何处与外国官员会商，临时当有明文。惟此事关系紧要，必须体察通商以来历年交涉情形，参合中外事例，先期熟筹，大致具有条理，方能于会商之时，办理得宜。且其中遇有关涉命盗案件，历系由关道移会臬司办理。所有通商律例，拟即派委江苏臬司应宝时、江海关道涂宗瀛会商妥议，为届时办理张本。已会同抚臣丁日昌檄飭遵办。新约又有允在南省之句容等处试开煤矿之议，亦经委员前赴句容县，会同地方官勘验情形。将来如可试办，所有酌雇洋工，置用机器，华洋商人购买煤斤，诸凡应议章程，亦属交涉之一大端，讨论不可不预筹。此外善后一切事宜，有为各关通共之条，有为各关专办之条，而其总汇不离乎上海。应宝时曾任该处关道，情形熟悉，且于试开煤矿之一事，平日尤留心讲求，应即责令逐款详核，会同涂宗瀛悉心商酌，以备将来如何开办，分别奏咨办理。除先咨会总理衙门外，所有派员预筹新约应办事宜缘由，谨会同江苏抚臣丁日昌附片具陈，伏乞圣鉴训示。谨奏。

谕军机大臣等总理各国事务衙门奏(年月日未载)

谕军机大臣等，寄谕各将军、督抚、南北洋通商大臣等：总理各国事务衙门奏：法国使臣，借兵要挟，渐不可长，请飭各省遇有外国案件持平速结，并请飭地方官于传教事件先事防维，列入考成，及请飭江苏、福建迅办英国未结各案各折片，览奏均悉。上年法国使臣罗淑亚因四川等省教案未结，自行出京，携带兵船赴安徽、江西等省，不过数月，各案俱结。该使臣现在回京，颇鸣得意。是其轻视中国官吏，已可概见。传教各案，牵涉人民，即系地方官分内应办之事，仍积习相沿，因循推诿，日久不结，致令该国使臣借兵要挟。此风何可渐长！倘各国闻而效尤，后患伊于何底？且恐奸民乘机簸弄，更形掣肘。而中国官吏办事泄沓之风，亦足贻诮外洋。着各该将军、督抚、通商大臣等，严飭所属，遇有中外交涉事件，即认真查办，持平迅结，毋得仍前延宕，致外人得以借口。况现在英国使臣威妥玛抄录上海新闻纸，以罗淑亚催办各省积案有效为词，则该国未结各案，岂可听其迁延？着文煜、英桂、卞宝第、马新贻、丁日昌，将台湾贩运樟脑等案克日办结，毋贻该国使臣口实。嗣后各该省遇有交涉案件，并着各该将军、督抚飭属勒限完结，以弭后患。至传教一事，流弊固多，而地方有司如能先事图维，经权互用，未尝不可杜其干预。着各该

将军、督抚大臣等，密饬地方官遵照前次总理衙门通行成案，悉心体察，预为经理。倘能办理妥协，即准其与催科抚臣一例考成，以冀挽回积习，用弭衅端。原折片单共四件，均著抄给阅看。

谕军机大臣暨沿海督抚等总理各国事务衙门奏(同年五月五日)

谕军机大臣等，寄谕两江总督马新贻、两广总督瑞麟、闽浙总督兼管福建巡抚英桂、江苏巡抚丁日昌、山东巡抚丁宝桢、福建巡抚卞宝第、广东巡抚李福泰、三口通商大臣兵部左侍郎崇厚，传谕署浙江巡抚布政使杨昌浚等：总理各国事务衙门奏：英国使臣威妥玛请于沿海水底暗设通线，谨将辩论各节据实密陈一折。洋人以贸易为本，时虑中国舟车迟滞，欲以外国之铜线诸法，试行于中国。上年议修英约时，英国使臣阿礼国即以此事屡次渎请，均经总理各国事务王大臣严词峻拒。现在该国使臣威妥玛复请由广州、汕头、厦门、宁波各海口水底，暗设铜线，通至上海。并称前议通线之法，俱系陆路明设，此次系在海底暗设，其线端一头在船只内安放，即在湾船埠口海面停泊，与从前所论迥殊，似与中国毫无亏损等语。内洋外洋，绵亘数万里，轮船往来，络绎不绝。倘伊不告中国暗设铜线，势亦无从禁止。该衙门现将“沿海水底暗设”数字揭清，并将“线端不牵引上岸，离口另设别法”数语，重言申明。该使声称，安线之处，如有民人损伤，地方官无须追偿修费，已由该使转饬局商遵办。是于变通转圜之中，仍寓检制防维之意。惟洋人得步进步，诡譎万端，经此次允办之后，难保不借端扩充，由海而江，由江而河，由河而路，駸駸乎渐入内地，不可不预为之防。着南北洋通商大臣暨沿海各督抚，密饬各关道地方官，先事预筹，严密稽查。遇有洋人安设通线之处，只准在沿海洋面水底，其线端只准在船只内安设，即在沿海埠口向来停泊各洋船码头之外近海处所停泊。倘有将线端牵引上岸，不遵定章办理者，即照会领事官立时查禁，以杜将来流弊，而绝他国效尤之渐。

谕宋晋奏江南设立长江水师事(同年六月十四日)

谕：据宋晋奏：江南设立长江水师，原以控扼海口，巡逻江面，近闻水师远逊于前，营制渐形疏懈，并不有不法水勇，假巡逻为抢劫。江南盗案屡出，行旅戒严，地方官不敢捕拿，恐日久肆行，转致贻害，请饬彭玉麟前往整理等语。长江水师紧要，岂容日久懈生。现在各海口岸及沿江地方，尤不可稍弛防范，使宵小从而生心。着马新贻、李瀚章、丁日昌、英翰、刘坤一、郭柏荫、刘岷，按照曾国藩所定章程，会同黄翼升，时加整理。务使士卒骁壮，号令严明。并一面檄饬各该地方官，遇有水勇抢劫案件，即行捕拿究办，不准互相容隐，扰害商民。黄翼升系专辖水师之员，责无旁贷。所有长江应办事宜，务须与沿江各督抚和衷商榷，恪守成规。其营弁兵勇，尤当随时稽查，更番训练。必得声威联络，远近慑服，方为不负委任。至水师创立规制，系彭玉麟与曾国藩等筹画而成。该侍郎计已病痊，刘岷接奉此旨后，即着催令该侍郎迅速起程，前赴江南等省，会同马新贻等实心整理，力除废弛情形

，以资控制。

谕天津滋事案(同年六月二十八日)

谕：天津滋事一案，前经派令曾国藩前往查办。据法公使罗淑亚屡次照会，欲将天津府县及提督陈国瑞先行在津正法。此事万难允准，已谕曾国藩、崇厚据理驳斥矣。本日据崇厚奏，并军机大臣呈递崇厚信函，内称法国水师提督都伯理，于二十五日午后到津，崇厚于二十六日与之会晤，所言与罗使无异，并据德翻译声称，如至次日四点钟时尚无切实回信，伊即进京，将在京之法国人带至天津，罗使即带同上船，前赴上海。崇厚当赴曾国藩处告知情形，该督旧症复发，呕吐大作，卧床不起各等语。事机切迫之际，曾国藩病躯未愈，恐难独力支持，而中外大局所关，又不能不急筹办法。丁日昌于洋务情形向来熟悉，该抚接奉此旨，即着克日起程，或坐中国轮船，或坐别国轮船，迅由海道驶赴天津，帮同曾国藩办理。该抚由海道赴京，据称尚须旬日，因先派毛昶熙前往会办。现值事势弥急，该抚务当兼程前进，不得稍涉迟误。丁日昌起程后，江苏巡抚着张兆栋护理。上海地方紧要，罗淑亚等如果前赴该处，正恐心存叵测，不可不预为之防。着张兆栋随时会商马新贻，妥筹防范，毋稍大意。

谕军机大臣等(同年七月十三日)

谕军机大臣等：前因天津民教启衅，谕令沿江沿海各督抚等，于各口岸严密设防，该督抚等谅已遵旨筹办。津事尚无头绪，罗淑亚多方要求，虽据曾国藩等据理驳斥，该使桀骜性成，未能就我范围，现又由津至京，能否不致决裂，未可预定。此时惟有先筹防守，以杜洋人窃伺之心。着马新贻、英桂、瑞麟、李瀚章、丁日昌、英翰、刘坤一、丁宝桢、郭柏荫、刘崐、李福泰、黄翼升、张兆栋、杨昌浚，于各省通商口岸迅速筹防。万一洋人兵船驶至，务须设法堵御，勿任其乘虚肆扰，或至占踞口岸。如有疏虞，惟该督抚等是问。所有沿江沿海水陆官兵，仍当懍遵前谕，力加整顿。并着将现办情形，详晰具奏。

丁日昌奏(同年七月十五日)

窃臣于七月初四日钦奉寄谕，近日各省民教仇杀之案，不一而足，洋人动以兵船恐吓等因。钦此。伏查天津民教互哄一案，在法领事凶戾性成，固属祸由自取。然伤毙彼族官民教士至二十余名之多，在罗淑亚虚骄矜张，难保不捏情虚报。而各国幸灾乐祸，觊觎将来得有优异，一体均沾，亦无不极力怂恿，从旁帮助，冀开兵端。即一意主抚，亦必先能守而后能抚。是则暗中防维一端，实为目前切要之举也。惟向来外国构衅，专以水战取长，而法人则兼长于陆。现在沿江沿海所设防兵，如长江外海水师，不过舢板、广艇之类。若在江海陡遇风涛，兵勇即颠簸不能站立，何况打仗？其制造局新造轮船，合江、闽二省，不过四、五号。身小力薄，以捕海盗则

有余，以御外侮则不足。而且船中多系洋人驾驶，设遇有事，发纵亦难如意。此沿江沿海口岸水师之实在情形也。迺来中原甫经肃清，西南军务，总未竣事，游勇会匪伺隙而动。论目前之事势，则宜以羁縻为万全。论事后之经营，则宜以自强为根本。臣前曾密陈绿营兵制，化散为整，并与曾国藩商及水师章程，亟宜改弦易辙。天下事穷则变，变则通。方今强敌环立，攻之之法，与从前不同，则御之之术，亦当与从前有异，故固民心则先当择循吏，练队伍则先当择将官，纾边患则先当改营制、精器械、练轮船、建炮台。然此皆当绸缪于平日，非能取办于临时。若毅然决然为力改因循之计，则今日虽弱，他日可强，今日虽屈，他日可伸。内则卧薪尝胆，外则虚与委蛇，诚如圣训，兵端不可自我而开。盖发之匪虽难，收之甚难，固不可不踌躇审重而出之也。臣起程在即，当属张兆栋密筹守御，不可稍涉懈怠。而苏省密迩彼族，尤不可过事张皇，致华洋疑忌日深，转成不可了之局。区区愚见所及，是否有当，谨遵旨密陈。

谕马新贻、张兆栋预筹备御事宜(同年九月十五日)

谕丁日昌奏密陈交涉大概情形，并预筹备御各折片。苏省华洋杂处，羁縻弹压，较他省为难。此时情形，尤属紧要，全在地方大吏操纵得宜，持以镇静，事前妥为布置，以备不虞，方可消弭争端，不至别生枝节。丁日昌现已起程赴津，所有江苏省水陆要隘及一切守御事宜，均着马新贻、张兆栋悉心筹画，务臻妥协，惟不可稍事张皇，免致中外两不相安，转生疑忌。丁日昌以洋人若决计用兵，必以上海为后路，请调李鸿章统兵由江东下，示以彼若决裂，则由上海捣其后路，此亦牵制洋人之法。惟李鸿章现已调赴近畿，丁日昌所奏各情，即着马新贻、张兆栋酌度机宜，预为筹备。将来如此慑以兵威，使彼有所顾忌，则天津之事，亦易转圜。是在该督等先期部署，庶临事方有把握。

谕军机大臣等曾国藩奏(同年七月二十三日)

谕军机大臣等：曾国藩奏遵旨函致彭玉麟等能否再出续行复奏等语。彭玉麟等受恩深重，当此国家多事之秋，自应力图报效。着曾国藩于接到彭玉麟、杨岳斌复信时，即行具奏，候旨简用。刘铭传勇往过人，治军有律。据曾国藩奏称，此次催令来直，可否稍示优异。着俟刘铭传到直后，再行听谕旨。曾国藩所陈，治海上水师与江上水师截然不同，苟欲捍御外侮，徐图自强，非持以一二十年之久，未易收效，然因事端艰巨，畏缩不为，俟诸后人，则永无自强之日。兹值闽沪两厂船成，即当于两处选将操练各情，所筹切中款要。近来内外臣工，往往遇事机紧急，徒事张皇，迨祸患略平，则又泄沓成风，为目前苟安之计。即使创立战守章程，而在事诸臣奉行不力，事事有名无实，遂使朝廷深谋远虑，均属具文。似此因循成习，何时可冀自强，何时可平外患？宵旰焦忧，无时可释。现在闽沪两厂，轮船次第告成。着马新贻、丁日昌、英桂、沈葆楨，于两处各择统将，出洋操练。无论有警无警，穷年累月，练习不懈，方可备不虞而操胜算。广东亦应筹备轮船，巡防海口。着瑞麟、

李福泰一体认真办理。以上各轮船，须均用中国人驾驶，以期缓急足恃。至各省将弁中，如有才具出众熟习风涛沙线者，着各该督抚随时保奏，以备擢用。即山林草野之中，有长于海战者，亦当随处留心物色，量才超擢。庶才能以搜罗而出，将士皆干城之选矣。此外如另有备御之策，并着该督抚等全权统筹，随时具奏。该督抚等均为国家重臣，务当实心任事，为尝胆卧薪之计，共挽时艰，以副委任。曾国藩原片，均着摘钞阅看。

谕军机大臣等马新贻奏(同年八月一日)

谕军机大臣等：马新贻奏筹防江苏省水陆大致情形一折，据称：江宁扼东南形胜，为长江有事之所必争，万一洋船进犯，惟有设法御诸下游，勿令驶过焦山，若进逼金陵，则力扼下关，不令驶入内河，如登陆攻城，即于沿江扼要处所，分路设伏。安徽、江西、湖北各省，以镇江为入江第一门户，金陵又为上游诸省屏蔽。江、皖以上戒严，莫如分兵下堵。上海为各国通商荟萃之区，不可稍涉疑虑，苏州虽切近上海，而自松江以达昆、太，港汊纵横，已密嘱李朝斌将海外内洋太湖各师船调集吴淞，以备缉海盗为名等语。所筹尚属周妥。天津之事，虽经总理各国事务王大臣与法使再三辩论，能否即弭衅端，尚难预定。江防仍应实力筹办，以壮声援。所有金陵上游沿江一带布置情形，与英翰日前所奏，大略相同。即着马新贻随时会商英翰，督飭在事将士，择要驻扎，力扼上游。并一面咨商黄翼升，将分汛各师船归并本营，排泊操演，毋令畸零散布。上海口岸紧要，务飭上海道遇有中外交涉事件，加意笼络，迅速办理，不得以各国现尚安堵，稍掉轻心。吴淞口及苏松两府，毗连形势，水陆要隘，既经李朝斌为布置，着即咨令该提督，将各营师船勤加操练，严密巡防，俾苏垣与上海两处，各有援应。仍密嘱张兆栋就近稽查，毋稍松懈上游诸省防守。并着咨商刘坤一、李瀚章，悉心筹画，遇有警信，即可首尾衔接，毋为敌有乘。此时江防筹备，惟当就苏省现有兵力，斟酌分拨。倘有意外之虞，总以扼住焦山，为防江第一要着。添募兵勇一层，自可临时筹度。该督素顾大局，务须处以镇静，弭患无形，慎勿先事张皇，致滋口实。

谕军机大臣等魁玉等奏(同年八月二十三日)

谕军机大臣等：魁玉等奏遵旨妥筹长江防范事宜一折，长江下游扼守事宜，现经魁玉、黄翼升公同筹议，拟于各处要隘安设炮位，并将分汛水师查照马新贻原议，暂各归并一处，排泊操练，另调炮船三十号驻扎金陵附近，为上下策应之需，一面与李朝斌联络各军，以资协助。所筹均尚妥协。即着魁玉等悉心区画，慎密布置，毋得稍涉张皇。办理事务大臣前已有旨令魁玉兼署中外交涉事件，魁玉责无旁贷，即着督飭苏松太道涂宗瀛等，加意笼络，弭患未形。

谕军机大臣等沈葆楨奏(同年八月二十五日)

谕军机大臣等：沈葆楨奏请简派轮船统领一折，据奏新设轮船，约束操演，以及稽查联络，其难较战船数倍，亟需知兵大员统率，借资训练。福建水师提督李成谋，前隶杨岳斌外江水师，叠著战功，着任为轮船统领。英桂、沈葆楨即传谕该提督，务当申明纪律，严加约束，以肃营规。兵船恃枪炮为声威，若技艺生疏，非特不能制胜，且临敌仓皇，将有自焚之患。近日轮船所用枪炮，多于后膛安放子药。非海外绝岛试之，则恐伤人。英桂等即责李成谋随时驾驶出洋，周历海岛，勤加操练，俾该员弁等熟习海洋风涛，悉成劲旅，不得性耽安逸，致令训练皆属具文，有名无实。轮船号数渐多，不能不分布各口，若彼此各不相习，势必心志不齐，难期用命。李成谋身为统领，当将各船联络一气，以壮声援。

谕军机大臣等总理各国事务衙门奏(同年九月十九日)

谕军机大臣等：总理各国事务衙门奏奥斯马加国换约届期请派员互换一折：奥斯马加国前立条约，声明一年更换，现据该国使臣嘉理治呈递照会，内称即日赴沪候办换约等语。着派恩锡将同治八年与奥国所立条约，妥为互换。其条约各本，俟李鸿章派员赍送至江苏时，即着恩锡祇领，届期前往上海办理。恩锡于换约一事，向未经手，着曾国藩添派熟习洋务大臣，帮同办理，以期妥办。本日谕旨一道，一并发往。如该使索看凭据，即着恩锡另行恭录。给与阅看，俟换约事毕，此旨仍交还军机处备查。

曾国藩奏(同治十年六月初十日)

前据苏松太道涂宗瀛禀：据同知陈福勋呈送日本官郑永宁五月初二日自东京来函云，使员本拟四月内起行，因原派全权大臣外务卿泽宣嘉本系现任，未得接手之人，四月二十八日改派大藏卿伊达，定于五月中旬由横滨乘轮赴沪北上。等语。并钞呈使臣外务大丞柳原致该道照会一件、使员名单一纸前来。兹又据该道来禀：日本使臣于五月二十六日到沪，搭坐四川轮船赴津，定于二十八日开行北上。等情。臣等查应宝时已据报于十四日抵津，业经直隶督臣李鸿章，饬将条约底稿，悉心斟酌。东使指日到津，当可从容定义。

曾国藩奏(同年七月初九日)

窃臣国藩上年在天津办理洋务，前任江苏巡抚丁日昌奉旨来津会办，屡与臣商榷，拟选聪颖幼童，送赴泰西各国书院学习军政、船政、步算、制造诸学，约计十余年业成而归，使西人擅长之技，中国皆谙悉，然后可以渐图自强，且谓携带幼童前赴外国者，如四品衔刑部主事陈兰彬、江苏候补同知容闳，皆可胜任。等语。臣国藩深韪其言，曾于上年九月、本年正月两次附奏在案。臣鸿章复往返函商。窃谓自斌椿及志刚、孙家谷两次奉命游历各国，于海外情形，亦已窥其要领。如舆图、算法、步天、测海、造船、制器等事，无一不与用兵相表里。凡游学他邦得有长技者，

归即延人书院，分科传授，精益求精。其余军政、船政，直视为身心性命之学，今中国欲仿效其意而精通其法，当此风气既开，似宜亟选聪颖子弟，携往外国肄业，实力讲求，以仰副我皇上徐图日强之至意。、查美国新立和约第七条内载：嗣后中国人欲入美国大小官学学习各等文艺，须照相待最优国人民一体优待，又美国可以在中国指准外国人居地方设立学堂，中国人亦可在美国一体照办等语。本年春间，美国公使过天津时，臣鸿章面与商及，允候知照到日，即转致本国，妥为照料。三月间英国公使来津，接见亦以此事有无相讯。臣鸿章当以实告，意颇欣许，亦谓先赴美国学习，英国大学院极多，将来亦可随便派往。此固外国人所深愿，似于和好大局，有益无损。臣等伏思外国所长，既肯听人共习，志刚、孙家谷又已导之先路，计由太平洋乘轮船迳达美国，月余可至，尚非甚难之事。或谓天津、上海、福州等处，已设局仿造轮船、枪炮、军火，京师设同文馆，选满汉子弟，延西人教授，又上海开广方言馆，选文童肄业，似中国已有基础，无须远涉重洋。不知设局制造，开馆教习，所以图振奋之基也。远适肄业，集思广益，所以收远大之效也。西人学求实际，无论为士为工为兵，无不入塾读书，共明其理，习见其器，躬亲其事，各致其心思巧力，递相师授，期于日异而岁不同。中国欲取其长，一旦遽图购其器，不惟力有不逮，且此中奥窍，苟非遍览久习，则本源无由洞澈，而曲折无以自明。古人谓学齐语者须引而置之壮岳之间，又曰百闻不如一见，比物此志也。况诚得其法，归而触类引伸，视今日所为孜孜以求者，不更扩充于无穷耶？惟是试办之难有二：一曰选材，一曰筹费。聪颖子弟，不可多得，必其志趣远大，品质朴实，不牵于家累，不碍于纷华，方能远游异国，安心学习，则选材难。国家帑项，岁有常额，增此派人出洋肄习之款，更须措办，则筹费又难。凡此二者，臣等亦深知其难。第以成山始于一篲，蓄艾期于三年。及今以图，庶他日继长增高，稍易为力。爰飭陈兰彬、容闳等悉心酌议复核，拟派员在沪设局，访选沿海各省聪颖幼童，每年以三十名为率，四年计一百二十名，分年搭船赴洋，在外国肄业，十五年后，按年分起，挨次回华。计回华之日，各幼童不过三十岁上下，年力方强，正可及时报效。闻前此闽粤宁波子弟，亦时有赴洋学习者，但止图识粗浅洋文洋话，以便与洋人交易为衣食计。此则入选之初，慎之又慎。至带赴外国悉归委员管束，分门别类，务求学术精到。又有翻译教习，随时课以中国文义，俾识立身大节，可冀成有用之材。虽未必皆为伟器，而人才既众，当有瑰异者出乎其中。此拔十得五之说也。至于通计费用，首尾二十年，需银百二十万两，诚属巨款。然此款不必一时凑拨，分析计之，每年接济六万，尚不觉其过难。除每年盘川发给委员携带外，其余指有定款，按年预发，交与银号陆续汇寄，事亦易办。总之图事之初，固不能予之甚吝，而遽望之甚赍。况远适异国，储才备用，更不可以经费偶乏，浅尝中辍。近年来设局制造，开馆教习，凡西人擅长之技，中国颇知究心。所须经费，均蒙谕旨准拨，亦以志在必成。虽难不憚，虽费不惜，日积月累，成效渐有可观。兹据选带聪颖子弟赴外国肄业，意识相同。谨将章程十二条恭呈御览。合无仰恳天恩，飭下江海关于洋税项下按年指拨，勿使缺乏。恭候命下，臣等即飭设局挑选聪颖子弟，妥慎办理。如有章程中未尽事宜，并请飭下总理衙门，酌核更改。臣等亦可随时奏请更正。御批：该衙门议奏，单并发。

李鸿章奏(同年八月初九日)

窃臣钦奉同治十年五月二十二日寄谕：李鸿章奏日本使臣将抵天津请派大臣在津会议立约一折。等因。钦此。同日并奉到谕旨一道，恭录行知江苏臬司应宝时、署津海关道陈钦，一体钦遵。洎日本国使臣伊达带同随员人等，于六月初七日到津会晤，经臣于六月初九日、七月初六、十五等日已将办理情形叠次奏明，钞录会议，拟定条规章程底稿，恭呈圣览，并先后函达总理衙门各在案。当即飭应宝时等，督缮条规章程各正本。而日本所备一分，系用汉、倭字体合写，又于汉文未甚熟习。至七月二十七日，始据缮完。订于二十九日在公所会齐办理。届时臣率同应宝时、陈钦，该正副使臣伊达、柳原暨翻译等到齐，彼此校对缮本，均无讹误，分别画押钤印，一律竣事。此案立议之始，系以修好条规为重。辅以通商章程，用汉、倭文分缮，合订二分，彼此存留一分，以备届期互换约本之用。今日本究属初办，两国税则，本有区别，故须分晰载明。除将存留一分封送军机处代为进呈，其税则即连同通商章程，附在条约订本之后，以便届期发交刊办。所有钦奉谕旨二道，另行敬谨封固，咨缴军机处备查。至此次议约，与历办西洋条约不同。前经函达总理衙门声明谨遵成案，于恭录谕旨之内，节存“条约”二字未录，以备该使臣索看凭据，免其有所借口。迨后即执定不同西洋之说，与之往返辩驳，卒以藏事，别无要求。惟立意欲求进京一行，拜谒总理衙门王大臣等，以致其奉使远来殷殷向慕之忱。经应宝时、陈钦稟商，以进京一节，已在条规中议定允行，未便阻止，且约事业经议定，无从更生异说，该使臣等定于日内起程。查有因公来京之江苏记名海关道孙士达，熟悉情形，臣已委令该员伴送前往，妥为照料。御批：“该衙门知道”。

曾国藩奏(同年十一月十八日)

窃臣于九月二十四日承准军机大臣字寄同治十年九月十七日奉上谕：总理各国事务衙门奏奥斯马加国换约届期请派员互换一折。等因。钦此。同日并奉上谕：著派恩锡将同治八年与奥斯马加国所立条约妥为互换。钦此。当即分别恭录行知恩锡钦遵。并查有新授湖南臬司苏松太道涂宗瀛，熟悉洋务，又所管江南海关，遇换约等事，皆须帮同经理一切，即经遵旨派为帮办。复派候补知县孙文川，随同办理。维时臣正值查阅营务，行抵苏沪面与该司道等商酌，查照成案，妥为经理。兹据该司道详称：十月初二日奥使嘉理治由津抵沪，恩锡得信后，于初五日自苏起程，初六日行抵昆山。适遇三口通商大臣直隶督臣李鸿章派员赍送条约前来，遵即敬密收领。初七日到沪。奥使订于十月十五日在公所会晤。恩锡、涂宗瀛带同随员补用同知候补知县陈福勋、同知衔候补知县孙文川、署上海县知县陈其元，并识奥文之人，前赴公所。奥使亦同该国署领事施利克、翻译官夏士一并到齐。彼此以礼接待。奥使嘉理治声称：大皇帝加惠远方，准予通商，本国商民，同深感戴等语。并索看凭据。恩锡即捧恭录谕旨，给与阅读。将条约公同展对。奥使捧出条约二本，缀有金色绳系金色圆盒。揭开盒内蜡饼，上有奥斯马加国君主所用印文。当将条约互相校对，间有奥文笔误，与华文不符之处，面令更正。奥使当以约本已由该君主用印，未

便擅改，必当行知本国政官，并同中国总理衙门商议改定，以归画一，缮立凭单照会收执。复据奥使云称：急欲前往东洋，可否本日换约。恩锡、涂宗瀛亦即应允。随将用宝条约正、副二本，亲交奥使祇领。奥使亦将带来用有该国蜡印条约正、副二本，交恩锡等接收。并照向章犒以酒食而散。恩锡于二十二日起程回省，将前派简谕旨并换到条约二本，及所立凭单照会，一并呈请奏咨。并据恩锡等询据奥使云称：奥斯与马加本系两国，一主统辖。是以奥斯与马加之名，现在凭单内并列开写，合并声明等情前来。臣查该司道恩锡、涂宗瀛，于此次办理换约事宜，详细校对，互换交收藏事，尚为迅速。其校出奥文内有与华文不符数字，业经奥使认为笔误，言明另与总理衙门商议改定。所立凭单照会，无误无遗，亦尚妥洽。惟条约互换之后，查照向办成案，应即请飭下由臣转发江南海关刊刻通颁遵守。今奥文约内即有笔误之处，应由臣转咨总理衙门，照会该国使臣更正，再行发刊，以归画一。御批：“该衙门知道”。

曾国藩等奏(同治十一年正月十一日)

窃臣等拟选聪颖子弟前赴泰西各国肄业，以培人材，业于十年七月初三日专折会奏在案。旋准总理衙门复奏，不分满汉子弟，择其质地端谨、文理优者，一律送往。每年所需薪水膏火，准于江海关洋税项下指拨。等因。知照前来。伏查挑选幼童出洋，固属中华创始之举，抑亦古来未有之事。所有携带幼童委员联络中外，事体重大。拟之古人出使绝域，虽时地不同，而以数万里之遥，需二十年之久，非坚忍耐劳志趣卓越者，不足以膺是选。查有奏调来江之四品衔刑部主事陈兰彬夙抱伟志，以用世自命。挹其容貌，则粥粥若无能，绝不矜才使气。与之讨论时事，皆能洞烛几微，盖有远略而于内心者。又运同衔江苏候补同知容闳，前在花旗居处最久，而志趣深远，不为习俗所囿。同治二年，曾派令出洋购置机器。该员熟习外洋风土人情，美国尤熟游之地，足以联外交而窥秘钥。以上二员，上次折内业经奏明，均能胜任。相应请旨飭派陈兰彬为正委员，容闳为副委员，常川驻扎美国，经理一切事宜。此时不敢遽请奖叙，将来办有成效，再由臣等从优酌保。至挑选幼童，应在上海先行设局。头批出洋后，即挑次年之第二批，又挑选第三第四年各批，与出洋之员，呼吸相通。查有盐运使衔分发候补知府刘翰，渊雅纯笃，熟悉洋务，业经檄令总理沪局事宜。所有驻洋及在沪两局中外大小事件，由陈兰彬等互相商办，各专责成。兹将臣等前奏所未及者，酌拟应办事宜，开列清单，恭呈御览，仰恳飭下总理衙门核复施行。御批：“该衙门议奏。”

谕内阁(同年二月十五日)

谕内阁：署两江总督何璟，着兼署办理通商事务大臣。

张树声奏(同治十二年正月初七日)

鳳凰山各營，始於同治三年上海洋兵會防之時。李鴻章因戈登、巴夏禮所請，量設三營，教練操防，以撤西兵，外示羈縻，內資控馭。辦理具有深意。迨留防日久，營哨各官屢經更易，流弊滋深。如本年正護兩營，借端索賞。後十一月初間，臣訪聞正營弁勇復有紛紛求去之事。雖無噪滋忱重情，究屬不成事體。即經嚴飭提究，並函商署撫臣恩錫，會派記名總兵樊政升馳往接帶，確查逞刁弁勇，分別重懲。似此積習相沿，若不設法更張，恐貽後日之患。惟事涉華洋，動多牽掣。從前曾國藩在兩江任內，曾經咨商總理衙門，有裁撤刪并之議，未及施行。茲擬詳查原案，密飭蘇松太道沈秉成，先與英法各領事妥商。應如何簡閱裁并，或移扎他處，由臣相機酌度。俟辦有端倪，再行專案具奏。

第九卷 光绪(上)

奕欣等奏上海英商就旧租马路擅筑铁路拟论辩禁阻折(光绪二年三月十九日)

为英商人在上海租地、擅欲开筑铁路，谨将臣等与英国使臣往返照会辩论情形恭折具陈事。窃查臣衙门于本年二月十三日接据南洋大臣沈葆楨来函，并抄苏松太道冯俊光禀件，以英商怡和行旧租马路地界并添租张华浜塘脚蕴草滨北岸地亩开筑铁路，英国领事麦华陀并未照会商办，仅据函称洋船运来铁器等件，备吴淞火车之用，请予免税。经该道函诘，并据《申报》所载吴淞铁路开工与兴筑各情，及事非条约所有，叠次驳辨，并将该商租地契据扣不盖印。领事坚执条约内并不禁止此事之说，相抵往返争论。麦华陀以详请英国领事示遵为言，又令将火车暂停一月，候信筑路一事，未肯停止。沈葆楨以为若不极力阻止，不特日后通商各口援案照行，且吴淞，宝山所辖，并非通商码头，其地为炮台海塘所在，均关紧要，咨由臣衙门照会英国使臣飭禁。等情。臣等查：开筑铁路，为中国未有之事，而为洋人久蓄之谋。利害固应通筹，行止尤应自主。今英国并未与中国商定，遽尔兴办，自应按约据理力争。当经臣等照会英国使臣威妥玛，以交涉事件当据条约为凭，不得谓条约所不载，即为条约所不禁，应即转飭领事严行禁止。旋据威妥玛两次照复，谓此事所有地段，皆按价值给置，核与条约无背。且牵涉云南、四川诸案，谓憎恶心术，复见一端。并来臣衙门面议，总执定租界为词，并云若在租界外修路，不待中国禁止。且谓铁路无损华民，转以该道冯俊光等为不合。经臣等谆切辩论，复给予照会，以英商在上海租住之地，仍属中国之地，此次铁路之举，领事并未照会地方官，该道有地方责任，阻勿使行，责所应尔。况火轮车路，中国诸多未便，未能允行。中国地方，中国有自主之权。条约所不载，地方上所难行，中国未便勉强相从，外国亦未便勉强中国等语。又因沈葆楨等函咨内称，上海道及领事前议暂停一个月火车之期，现在英商怡和行未届一个月，竟将轮车生火行运。等情。复由臣等照会威妥玛相诘，仍嘱其转飭领事关道，悉心商酌，毋稍偏执。威妥玛于此事，虽明知英商之非，而于飭禁一层，不但未允照飭，且谓专派彼国汉文正使梅辉立前往上海，与其本国水师提督协同办理。其照会亦有自行保全之说。晤论时，又有冯俊光以领事如不拦阻英商，他便自行拦阻，若果如此，本国必不甘心，要竭力保护等语。其情已可概见。臣衙门叠据沈葆楨及江苏巡抚吴元炳咨函，尚未议有定局。臣等往返照会辩论各情，亦经随时知照沈葆楨等转飭冯俊光遵照，以期内外一气，协力维持。正办理间，吴元炳来咨，据冯俊光禀称，美国领事晏玛太函称，虹口租界马路一条，工部局欲添地接长，请飭估价。经该道以欲租之地有碍民居坟墓函复阻止，恐亦为将来开筑铁路地步。亦经臣等照会美国使臣西华转禁阻。其有无异词，尚难预料。臣揆情形，英国既倡于前，难保他国不踵其后。在臣等，当与各使臣执理相争，尤在南洋大臣等，飭令该道酌度相机妥办。现据威妥玛函称，梅辉立业经出京赴沪，已由臣等函知沈葆楨转飭知照。除由臣等随时向英国使臣辩论禁阻外，应请飭下沈葆楨、吴元炳妥为筹画，并密飭冯俊光详酌机宜，悉心办理，务期力杜后患，而免衅端。谨奏。奉谕：“着沈葆楨等设法禁阻，妥为办理。”

总署照会英使租界免厘及存票限期定为三年(同年十月二十七日)

为照会事。案查北洋大臣李与贵国威大臣在烟台会议条款，前经本衙门于威大臣会议条款所载各口租界，作为免收洋货厘金之处，及发给存票，订明三年为期两节，与德国巴大臣先将上海租界内洋货不再抽厘，既发给存票期限，面议开办日期，开列于后：一、租界免厘。查新旧口岸，除尚未定有各国租界，应照条款会商划定，再行将洋货免厘一事定期开办外，其上海一口，已定有洋商租界。现议自光绪三年正月初一日起，凡有洋商进口真正洋货，无论卖与华商洋商，上海租界内不再加抽厘金。二、存票限期。查凡有真正洋货已完进口正税后，如欲运往外国，实系原包原货，并无拆动抽换，自光绪三年正月初一日起，核计进口之日，到该货船出口之日，在三十六个月限内，准其请领存票，并准该商将存票换取现银，听其便。其光绪三年正月初一日以前发给存票，不扣限期，准抵税银，不换现银。以上两条，除由本衙门照会各国大臣并通行南北洋飭属遵照办理外，相应照会贵大臣查照可也。须至照会者。

刘坤一奏球案宜速结日约宜慎重图维折(光绪六年十月二十八日)

奏为球案宜妥速议结，日约宜慎重图维，外杜纷纭，内严防范，遵旨密折复陈事。窃臣于光绪六年十月二十三日接准军机大臣密寄：光绪六年十月十六日奉上谕：据前总理衙门奏议结琉球一案，此事关系全局，自应博访周咨，以期妥协。着刘坤一悉心妥议，切实陈奏。等因。查球案与日约，本系两事。直隶督臣李鸿章与右庶子陈宝琛、左庶子张之洞所言，日约不宜更张附益，以免另生枝节，诚为有见。至谓球案宜缓，以及支展之法，无非欲俟中俄定局，勒令日本全退球地，重立废主，以张义声，而绥藩服，则似未将是非利害深维始终，权衡轻重也。夫琉球与高丽、越南、缅甸等国，同列外藩。中国之所以怀柔之者，亦略相等。究之该国之于中国，是否相关，既有名实之判；中国之于各国，能否兼顾，亦有难易之殊。盖外藩者，屏翰之义也。如高丽、越南、缅甸等国，与我毗连，相为唇齿。所谓天下有道，守在四夷。而高丽附近陪都，尤为藩篱重寄。臣屡函致总理衙门及李鸿章，与出使日本大臣何如璋，务劝高丽结好泰西，以杜日俄窥伺。该国万一有警，中国亦应明目张胆，遣兵赴援。为该国策安全，即为中国固封守，与英国之保土国情相同。即臣前在粤督任内，冯子材擒贼自效者，亦恐越南不支，必借师于法人，以后其为所制，而两粤之外障益隳。此外藩之必须极力扶植者。至于琉球，则与高丽、越南等国迥别。琉球臣事中国数百年，朝贡极其恭顺。向风慕化，诚属可嘉。然与中国远隔大洋，得失无关痛痒。且琉球臣中国，只假我声灵。琉球臣日本，实奉其号令。平日无端剥削，无故拘囚，一任日本所为。琉球未尝赴诉，中国亦未尝过问。一旦夷为郡县，指挥即定，而欲中国强与之争，务使日本俯首听命，琉球吐气扬眉，乌可得哉？如张之洞所言，中国闭关绝市，摈斥日本，不复与通，原为计之至善。沿海筹防有年，自不如前明之受其蹂躏。然谓此即足以制日本而复琉球，则未必然。如陈宝琛所言，中国声罪致讨，跨海东征，以今日之整练水师，亦决无元初复军之惧。

然以日本二千余年之国，此举未必扫穴犁庭。倘使设伏以邀我，固守以老我，彼熟我生，彼主我客，悬军深入，大属可虞。即使日本惧我军威，一战而败，受约束许复琉球，而琉球近在日本卧榻之侧，我能留兵守之否？归而复夺之，岂能再为出师，以蹈波涛之险？竭中国而事外夷，自古以为诟病，况今日中国之于琉球乎？我朝定鼎之初，经略西南各国，独置琉球于度外，今日乃为之致死于日本乎？张之洞、陈宝琛二策既不能行，则李鸿章所谓支展者，将来仍以口舌持之，或以虚声胁之，以日本之崛强，未必有济。且支展之法，日人未必不知，知之则必附俄，与我为难，势所必至。臣前在京邸，日本使臣来见，屡陈鹬蚌相持之戒，原有所为而言。然与琉球有骑虎之危，而于中国有夺牛之惧，不思铤险以纾祸。目前，俄得日本推波助澜，可以东西牵制。蜂虿有毒，曷若与之讲好释嫌，纵不拒俄，亦不助俄之为愈也。是支展之策，亦属无益有损。夫琉球之于中国，鸡肋可投；中国之于琉球，马腹难及，中外莫不共晓。第以字小之仁，不忍视同蛮触之争，听其湮灭。今我为索还南岛，俾有所归，以守先王之祀，亦足以对琉球而示天下矣。齐桓存三亡国，然于卫则迁之楚邱，于邢则迁之夷仪。今之南岛，亦琉球之楚邱、夷仪也。尚氏不能守先人成业，亡国之余，等于杞宋以图一线之延，尚何择乎肥瘠？臣前在两广任内，适琉球之重山五十余人，遭风漂廉州，护送到省，经臣传见该头目等，与之笔谈数纸，查看其人甚属循良，并闻悉其境长一百八十余里。如于该处择立尚氏，加以宫古之地，亦足以为附庸。现在泰西七十余国，有百余里、数十里者，南岛犹未为甚小也。传曰：疆场之事，一彼一此。尚氏果能发愤为雄，则夏之一成，楚之三户，失可复得，弱可转强。如其不能有为，只凭中国覆翼，即使尽复故物，亦若幕燕釜鱼。盖寇在门庭，而援在天末，何能有恃不恐？偶俱无猜，臣非欲弃球，实欲存球。顾以今日事势，无论中岛决不可得，即使得之，而有日本逼处之忧，不如退居南岛，尚可守此一片干净土地也。唯是新造之邦，中国之所做助之者，正非易易，且日人狡狴之技，必须先与申明。即以南岛重立尚氏后，日人仍由其君自主，并与共立保护之约。一面宣示尚氏与该南岛务期永远相安，各无翻覆。日本倘有异词，或尚氏不愿郁郁居此，而南岛亦无推戴之忧，中国受此南岛，如获石田。居不韪之名，受无穷之累，不得不作罢论。此则球案宜亟斟酌，不可稍涉犹豫者。如虑俄人覬觐高丽，诚所难免。然谓其视球案为进止，则法人之侵越南，英人之侵缅甸，亦何不可以借词。高丽立国不同琉球，高丽与俄亦不同琉球之于日本。以彼夙无嫌怨，俄人何出无名之师？即使突起兵端，高丽亦属有险可守，而我东三省马步诸军，星驰电赴，与之犄角，俄人亦未必垂手得之。中国之于高丽，向系视同内地，赈饥则不憚转输，讨贼则不靳爵赏，因非与琉球一例。现在强邻耽视，举国寒心，如何为之弥缝，如何与之联络，庙谟广运，是必迎机导之，借箸筹之。高丽在隋唐时亦称劲敌，今其土地人民犹是，但得中国左提右挈，使之整军经武，未始不足自固其圉，为我辅车。至于中日换约，自有定期，与球案毫无牵涉，球案如此议结，日本所获实多，岂可志在居奇，复图进步，据理与辩，彼复何辞？其利益均沾，与入内地一条，将来换约亦难轻许。万不获已，则如总理衙门大臣及李鸿章所议，必须一体遵守。彼亦以便于我者相偿，方为平允。届时或力持前议，或量为变通，自可彼此会商，期归妥协，不得与琉球一案相提并论也。倘日本贪求无厌，强我难从，不得已而用兵，沿

海各省似尚可以支持。唯台湾孤悬巨浸，福建督抚与船政大臣，应已预为绸缪。臣承乏南洋，自当力扼江苏。以固上游五省门户。虽长江深阔，洋船可以通行，不如天津之节节阻碍，然如圖山关、焦山等处，亦属天设之险。臣与前兵部侍郎臣彭玉麟等，逐一部署，以遏其冲，决不任其长驱而前，入我腹地，以撼东南大局。御日如是，即御俄亦如是。臣职在封疆，责无旁贷。第以修攘之术，论是非亦计利害。琉球即无恙，不如高丽等国捍我边陲。日本即逞强，不似俄罗斯国占我疆土。究其始终，较其轻重，则是竭华以争球，让俄而抑日，谓为远交近攻，取威定霸，非臣所敢闻矣。谨奏。

旨授曾国荃议和机宜电(光绪十年闰五月二十七日)

旨电曾国荃：法使巴德诺现在上海，已授曾国荃为全权大臣，克日前往与议详细条约。所索兵费恤款，万不能允，告以请旨办理。条约最要者，越南照旧封贡，刘永福一军，如彼提及，告以由我措置；分界应于关外留出空地，作为甌脱；云南运销货物，应在保胜开关，商税不得逾值百抽五之法。以上各节，均须切实辩论，均由电信请旨。需用翻译，前派福连在津，现令携带条约等件前往。曾国荃出省后，江海防务，责成李朝斌、李成谋妥办。如所议无成，曾国荃、陈宝琛即回江宁布置。切勿登彼船只，受其挟制。现在福州马尾有警，二十八、九已有开仗之信，曾国荃即无须赴沪。

曾国荃奏辞议和全权电并旨(同年闰五月二十八日)

国荃只知疆臣守土，应尽死守封疆之职，万不敢与闻和议。赫德所请江督至沪与巴使会商一层，荃性激烈，不善议款，即圣朝亦不可派战将与外人说和，乃免决裂。

闰五月二十八日，旨寄曾国荃：据来电云“不敢与闻和议”等语，自系未奉二十七日电旨。此旨业经告知法使，若不速往，失信于彼，为彼口实，万不可行。若谓疆臣战将，不应议和，李鸿章独非疆臣战将耶？着曾国荃遵旨迅速启行。一面照会法使，定期会议。前谕曾国荃等，如法议无成，即回江宁布置。并非以办理棘手之局，责该督以必行也。当此事机万紧，陈宝琛何得以期服请假！即着在沪，俟曾国荃到时，会商妥议，并会办南洋事宜。俟事定后，赏假二十日，在营持服。

曾国荃致总署定期赴沪议和电(同年闰五月二十九日)

现定初三日起行，初四日到沪。翻译福连已电请李相飭令速来。沪人惊恐，已派刘连捷、章合才五营前往驻扎，可望镇定。

旨寄曾国荃着赴沪与法议和兵费恤款不能允电(同年六月初一日)

旨寄曾国荃：所请派总署大臣酌带精于条约章京赴沪，或派锡纶等前往，均缓不及事，着勿庸议。昨谕陈宝琛，俟事后赏假持服，仍应遵旨会办。邵友濂尚谙条约，已将简明条约及往来文件照会发往。曾国荃，并即着初三日起程。兵费恤款，万不能允。中国照约撤兵，原为顾全和好，该国何得背约索赔？五条细目外，或如有要求，仍遵前旨，告以请旨办理，不得擅许。

曾国荃奏赴沪会议商约并布置前路战守事宜折(同年六月初二日)

为续奉谕旨定于六月初四日抵沪会商议约并布置前路战守事宜事。窃臣奉旨派驰赴上海，与法国使臣办理详细条约。等因。钦此。当因详细条约，关系重大。臣于中外交涉事件，向未究心学习，自觉毫无把握。恳恩添派总理衙门熟悉议约之大员，或派在津会商详约之三员来沪，会同臣与陈宝琛商议妥办，方免疏虞等情。奉旨：“法使巴得诺现在上海，着授曾国荃为全权大臣，克日前往与议详细条约，并派陈宝琛会办，邵友濂、刘麒祥随同办理。所需兵费恤款，万不能允，告以请旨办理。”“条约最要者，越南照旧封贡。刘永福一军，如彼提及，答以由我措置。分界一事，于关外酌留空地，作为瓯脱。云南运销货物，应在保胜开关。商税不得逾值百抽五之法。以上各条，切实辩论，均由电请旨。各等因。钦此。”先是，臣闻机器局各国工人有辞工之信，吴淞口炮台有法国窥伺之船，当派陈浞、章合才带勇八营前往吴淞、江阴，预备援应。旋闻上海人心惊惶，又派记名藩司刘连捷，率亲兵六百入前赴上海铁厂驻扎。计初一、二、三日等均可次第到防。兹奉电寄谕旨，训示周详，措置精当，臣与陈宝琛得所遵循。即可与巴使辩论，宣述圣谕，逐件皆有依据。无论巨细之事，陈宝琛与臣，自当随时电奏，请旨定夺。又有邵友濂、刘麒祥，奉旨随同办理，益资得力。至于江海防务，十分紧要。臣已录电谕责成李成谋、李朝斌妥办。并先后札饬陈浞、刘连捷，督陆师各将领，申明纪律，严定军法，准备战事。如该使所议无成，倘法船敢于冒犯吴淞口机器局及江阴一带，除李朝斌屯守内河松苏要隘外，臣与李成谋、陈浞、刘连捷，率同水陆将领，誓不与之俱生。臣虽衰老，尚可胜指挥之任，断不听其羞辱，足以仰慰圣怀于万一。署内日行公事，已派藩司梁肇煌，代拆代行。下关炮台，派李光久、吴隆海，增修扼守。会办南洋事宜，陈宝琛正在上海，臣到沪之日，即可预商一切。所调轮船，初二日可到江宁。臣率江苏候补道陈鸣志、龚照瑗、汤寿铭，记名道冯邦栋等，初三日登舟往沪，合并声明。谨奏。奉旨：“览奏已悉。所筹布置情形，尚属固密。着即督饬各将领严守要隘，预备战事，毋稍疏虞。”

曾国荃致总署请示和议办法电(同年六月初三日)

巴虽不见，荃既奉旨遵限初四到沪，请尊处详示如何办法。

会办南洋事宜陈宝琛辞议和会办电(同年六月初四日)

宝琛拙于辞令，不习洋情，筹防义不容辞，议和才实不逮。且彼意在索偿，不仅议约，非赴津会商之比。此次奉飭会办，本无示彼明文，谨与曾筹，不与巴接。是否，请电复。

曾国荃奏赴沪议约请添派会办人员折(同年六月初五日)

为遵旨赴沪议约，恳恩添派总理衙门熟习议约及在津之大员迅速至沪，会同商议，以昭慎重事。窃臣接上海电信称，赫德电请总署奏派江督赴沪。臣因愚拙，不善议约，沥陈下情驰奏在案。于二十八日接到上海转电信总理衙门电报：本日奉上谕：署两江总督曾国荃，着作为全权大臣，驰赴上海与法国使臣办理详细条约事务。钦此。伏念臣一介书生，仅娴军旅。此次谬摄通商篆务，畀以全权重任。闻命白天，悚惭无地。查议约必须明白交涉，尤贵有通权达变之才。如臣庸愚，曷克膺兹重寄？今已奉旨，何敢再陈异议。惟有不辞劳瘁，遵旨赴沪，与法国巴使会议。窃维详细条约，关系重大。臣于中外交涉事件，尚未究心学习，若竟贸然而行，实无把握。如独持己见，恐贻误滋多。惟有恳恩钦派总理衙门熟悉议约大员，随带司员，抱定成案，相与会商办理，方免疏虞。如重臣难以远行，或派在津与北洋大臣会商洋约之三员，早日赴沪。并留会办南洋事宜陈宝琛久驻上海，俾臣得与该四员面商一切，然后向法巴使会议。臣等仍随时电奏，请旨定夺，庶几有所遵循。顷已电请总署代奏请旨。恭候电复到日，臣即赴沪，断不敢稍涉迟延。除电上海道邵友濂转告赫德知照外，谨具恭折密奏。

曾国荃致总署请邀三国公议结束办法电(同年六月初六日)

赫德来，极言请旨邀三国公议为结束办法。可否，乞速复电。

曾国荃致总署与法使会议索费情形电(同年六月初八日)

巴已初来，辩至午正。开讲便及兵费，遵电力辩。巴出节略三款：一、革刘职拒不与联；二、索赔二百五十兆；三、交银地方、期限。口称速了，可减五十兆。革刘尚不着意，索费志甚坚。告以此大伤体面，非惟难允，并难代传。彼云：“此是法廷之命，如不允即另主意。”告以议员不应强以难允之事。良久，彼又云：“名目与数目，尚可通融。请妥商可代传之办法。”姑允其酌拟而散。撮要先电呈。

旨申斥曾国荃陈宝琛遽许偿银不知大体已请美使调停电(同年六月初十日)

旨曾国荃等：遽许法国抚恤银五十万两，虽系为和局速成起见，然于事无补，徒滋笑柄。法使尚言须听国主之命，中国大臣反轻自出口允许，实属不知大体。陈宝琛向来遇事敢言，乃亦随声附和，殊负委任。均着传旨申飭。现美使愿为调处，总署已电知曾国荃等，为期较缓。如法使愿将津约五条详细先议，曾国荃等即在沪与议

。否则曾国荃、陈宝琛同回江宁，许景澄即出洋，刘麒祥回京。美国公平评论，数日内亦必有信。闽省有无警信，均着确探定行止。

致曾国荃与法切勿议款待美调停电(同年六月十三日)

美国转圜，本有旧约，且亦较得体。巴既止孤拔，按兵候议，阁下只管设法与商细约，切勿议款，待美调停可也。

曾国荃致枢垣议和无人调处空言实难羁縻请示电(同年六月十三日)

连电未蒙复，彼情瞬息万变，愈延愈急。日来既无他人调处，此间复不敢与议。空言实难羁縻，无任迫切待命。

曾国荃陈宝琛许景澄致枢垣和议不成应否回宁电(同年六月十三日)

邵晤巴云：照会即绝书，法廷听孤所为，巴无商议权。荃等亦无从商。应否遵旨回宁、出洋，请代奏速复。

曾国荃陈宝琛许景澄致总署接巴使照称如不允偿将有举动电(同年六月十三日)

戌正接巴照会云：为照会事。照得凉山一役，我大法国索取赔偿，经于光绪十年六月初九日贵大臣面商所拟办法，本大臣即已转达本国知照核示。本国接到本大臣电报，于六月初十日电复，于今早始到。本大臣以贵大臣所拟，我国以为断非慎重办法，此原本大臣所能揣测于先时者也。缘贵大臣若能将此区区银数，迳云此项银两系贵国允赔之款，并无他说，则我国庶可以为贵国承认应赔之据。现在既有他说，实属令人万难照允。所有原定期限已展之故，本系便于和商起见，昨日续限即满。奉命告贵大臣：日后我大法国任凭举动，无所限阻，为此照会声明。第贵大臣先执和好商议之说，如实有此心，必能妥商办法，即于本日行知本大臣，使两国会同将一切不洽之处调处妥善，以期彼此有益。本大臣所愿望焉。须至照会者。等语。现未奉钧电，未敢擅复。已遣邵友濂与说，冀稍宕如何。

曾国荃致总署法拒美请因我不先商电(同年六月二十四日)

布告但使各国闻知，不能强其助我抑法，仍无救目前之急。顷北洋电称，福告丹崖四条，已报钧署。法实骑虎难下，非真愿构兵。圣心如欲息事安民，似可因彼求我之意，速派北洋酌办。目下基隆胜负相当，尚于国体无损。又赫德前议中法各请一国调处，顷据赫德言，法拒美请。一因我不先商，一疑美有私。今如以三国调停，当先询法愿否，或冀可从，似亦缓兵之一策。若二议均不允准，惟有坚持战计，更无羁縻之法。请代奏。

江督曾国荃致总署镇江印捕殴毙华人众怒毁房已妥为弹压电(光绪十五年正月初六日)

顷镇江电报：该处租界因洋捕殴毙平民，激成众怒，致有烧毁洋房之事。现已拨营派员，会同地方官妥为弹压料理，不致再滋事端。

总署致曾国荃英使称镇江焚领署请弹压并见复电(同年正月初七日)

英使云：接电信：镇江百姓滋事，领事署被焚，乞派兵船弹压。等语。此事谅必属实。即希赶紧设法弹压，免酿大案。并将起衅及滋事情形，先行电复。

刘坤一、刚毅奏(光绪十七年八月)

为江苏镇江等属各教案，分别办理议结，恭折具陈，仰祈圣鉴事。窃本年四月间安徽芜湖教堂被匪造谣焚毁后，江苏之丹阳、金匱、无锡、阳湖、江阴、如皋各属教堂，接踵被焚、被毁，派员前往查办。虽滋事情形，轻重不一，要皆由于匪徒潜窜，捏造无根之言，煽惑愚民，聚众滋闹，意图借端肆扰，乘机焚抢，以致造酿巨案。此外各属，以后谣言四起，并有张贴揭帖情事。臣等查各国教士在中国设堂传教，为条约准行，兼办育婴，设立义学，亦无非好行其善。该匪徒等，胆敢无端造谣，肆行窜扰。若不查拿严办，解释民疑，不独民教难以相安，亦实为此地方之害。据报后节经严札通飭各属，将境内所有教堂，务须实力保护。一面严拿造谣滋事匪徒，按律重办，并由臣坤一迭次剴切示谕。令飭各属传集地方绅董，各向就地居民传谕告诫，毋得轻听浮言，妄生猜忌。各该县未能先事预防，究属咎有应得。苏属案系由丹阳首先滋事。将该县查文清甄别参革，署无锡县刘树仁、署江阴县孙貽绅、阳湖县叶怀善、金匱县汤曜均摘去顶戴。代理如皋县莫炳琪，到任甫及三日，予以记过。并将该管汛弁，一律摘去顶戴示惩。钦奉谕旨，又经臣等分别详细出示晓谕。此等造谣滋事之徒，极为诡秘，行迹飘忽，缉捕较难。臣坤一复密派员弁，四处访缉，并令各州县清查保甲。数月以来，地方本已安谧，窃维筹办善后，以辑洽民教为第一要义。拿办匪犯，必须情真罪当，方足以昭折服，而安民教。据各属先后禀报，拿获各犯，讯系均只在场附和。飭令会同委员一再研讯，加以刑吓，矢口不移。现已各按情罪分别军流徒杖，从重定拟。各教堂毁失屋物，若待着追赔偿，势必稽延时日，无以安教士之心。已飭据常镇通道黄祖洛，督飭即委各员筹拨款项，与各教士分别一律拟结。并仍严飭该管道府，督飭各属勒拿首要各匪，务获惩办，以期仰副圣朝辑睦邦交绥靖地方之至意。除将办理情形，随时咨明总理衙门外，所有江苏各教堂查办议结缘由，理合由驿驰陈。谨奏。

江督刘坤一致总署报各国对中国情状并防沪口电(光绪二十年六月二十五日)

吴淞口为苏松要口，迭飭沪道筹备堵口。先后据电禀：英领事以上海商务英商为最

，请本国驻日公使商日政府作局外地。现接回电内开：执有日政府字样，如有战事，定不在上海及行进上海口岸等处用武。等语。英领事又劝停止堵口。照会前来，该道谓行进上海口岸者，即指吴淞而言。又据另禀：龚星使电：顷金外部云：见驻英日使，言龚使无望华开战意，日必欲战。我看华又大，从来与各国战，终无内损。以小敌大，汝思之。日使见龚不得已进劝言，金又告刻接驻日使电已立据，上海口岸及海洋商轮水道决不扰害等语。请转电南北洋飭沪道勿塞吴淞口。飭转云：事关防务，责有应尽。日虽有文与英，沪作局外，敌谋狡诈，究难尽信。查法事时将吴淞口门钉椿，中留航路，以便行船。椿旁用船载石，备临警沉塞。是现拟堵口，平时中流本留有船路，似无碍商船出入。应否照法事时筹备，或由钧署再向驻京英公使切实商定，以免临时贻误之处，乞示遵。惟英俄所议，仅指吴淞，上海包括在内。万一日船驶近浦口，图犯长江，吴淞炮台自不能不轰击防范，请并致各使，务为声明，以免事后枝节。所虑日人，诡谲异常，或冒用别国旗号，朦混暗渡，亦请转商各使，转飭严禁，以重防务。仍望由沪道属税司，派洋人在口，遇有各国商轮船严密稽查放行。甬日领事商请沪道，将在沪日商设法保护。沪道以华人在日，实繁有徒，现在日官作何保护办法？电询汪星使详示未复，亦请钧署会商日使复示。

张之洞奏(光绪二十一年十二月二十九日)

窃惟上海为中国第一口岸，其地处南北两洋之交冲，握中外各商之枢纽。欲振中国商务，必自上海始。上海为各国逼处，应行整饬防闲之事甚多。而今日急务，则莫如限制洋人于租界外占地一事为最要。若不亟筹堵截之法，则日辟日多，上海县城外及宝山县滨海地方，悉成洋界。流弊无穷，不堪设想。前据江海关道黄祖络禀称：英国拟自沪北泥城桥界外跑马场直达静安寺，沿苏州河而下至新闻，法人由八仙桥界外起到徐家汇止，均欲划归租界。较原订之界，大至数倍。闻该领事已详公使，当经电达总理各国事务衙门向该公使驳阻在案。查上海有英、法、美三租界。法界居中，其地略小，英、美居外，其地俱大。租界之中，洋商自用有限，转租华民以实之，户口已不下二、三十万。现在法界之地，无可扩充。惟南市一带，与之毗连，幸有十六铺桥为限。该处华民，不肯卖与洋商，坚持甚力。现经奏明由官自筑马路，正为力杜侵越。英、美两界地，既散漫四处可通，繁盛之区，市廛已满。而界线之外，仍复扩充无禁，起造洋房。按图英界以泥城桥为限，今则由泥城桥外，直达徐家汇等处十数里，皆有马路通行，此英界之所占也。美界定线最后，尤无限制。同治初年，所租九百余亩。嗣后，美领事西华不商关道，自画界限，将未租民地，圈入万余亩。光绪十九年十月，经本任督臣刘坤一，飭江海关道与美领事商议，将租界内东北一带未租余地收回二千六百亩，咨明总署在案。而于西北一带界外所占之地，未及清厘。查美国自立界石，虽在苏州河边，而该河里面之地，今亦起造洋房。此美界之所占也。又该河西岸大王庙一带，至万航渡等处十余里，与其中路由虹口达江湾，至吴淞三十余里，亦皆有马路通行。浦东虽无马路可通，近年洋房亦已不少。推其占地之由，必先筑马路，继则设捕房，挂路灯，编门牌，闹市渐开，未几而已成为租界。按烟台条约第三端之二内载：“各口岸已定租界，应勿庸

议。界线之外，但为洋人侨寓之所，不能以租界论。法约第十款虽有“各口地方，法人房屋间数，地段宽广不必议立”限制，然系指法人租地造屋，并非即言租界。今上海则不然。地方官或加诘问，则以索还马路经费为词，多方要挟。租界既成，缉匪提人之事，非照会领事协同洋巡捕不可。阻我抽华商之厘，而洋人工部局留为按月收捐之地。奸商避我抽厘，复挂洋牌，自甘化外。利权尽失，欲挽无由。推本厉阶，皆由于此。历年上海地方官但知素餐渔利，形同聋聩，以自辖境土，中国精华，一任外人侵据开拓，占尽地利商利，付之不闻不问。此诚可为叹息痛恨者也。又闻洋人谈论，以上海为各国商务最重视之区，遇有兵争，作为局外，以便保护。故不但洋人乐居其地，华人亦莫不然。地价之昂，势尚未已，则洋人之占地其势亦恐未已。尤可虑者，近西南一带，为由沪入淞江之要道。近北一带，为由沪入苏州之要道。西南有制造局，自筑马路，堵截尚易。其近北一带，万航渡以上，倘再听其接修马路，扩充租界，势必及于嘉定、昆山境内，将成不可收拾之势。窃思上海要区，华洋杂处，诸事洋人为政，事权旁落，隐忧已深。现经臣奏明筹开铁路于洋场东北，筑马路马头于洋场西南，正所以防其侵越。詎意竟欲将此繁盛之区，全作租界，占尽上海利权，喧宾夺主，实出情理之外。查租界之设，原为洋商建造行栈起见。果系洋商不敷居住，索地推广，尤为可说。岂知各国本有之界极宽，洋商无几。近二十年任意侵占，已逾原有租界甚远。乃又欲假租界之名，尽收沪上华民之利。漏厘捐，扰政权，实属关系大局。今日在我惟有坚持定见，断不许其再行扩充租界，并须力筹防微杜渐之法。凡界线之外，洋人已筑马路，约明不得再接。其未筑者，约明不得添设。民间亦不得以界外之地，私卖与洋人。如有私卖者，上海县不准给单。上海道不准转契，即将该民人严治其罪。并将该地充公，地价追缴入官，以示严罚。必须认真办理，则私卖暗占之风，方可渐息。一面责成苏松太道，随时防察。凡租界外洋人马路已到之所，即于其地接造马路一段，迎头拦截。彼自不能辄出范围。所需经费，准稟请筹给。所费并不甚多，而越界侵占之弊，不言而自绝，不令而自行，尤为善策。此事不惟有关中国管辖土地之权，实为要政。并请敕部严定处分。如以后洋人于上海吴淞等处租界以外，任意侵占，华民私行卖给，地方官不行稟明禁阻，一经查出，即将苏松太道及该管之上海县或宝山县，俱照溺职例，严行惩处。庶足以儆昏吏，而重海疆。除严札苏松太道转飭上海县并会丈局严密查禁外，相应请旨敕下总理衙门与各国公使议明，转行上海各领事知照。此举于中国约章、各国公法，均属不准逾越之端。如洋使必不肯明允，则由外间迅速力筹自造马路拦截洋路之策，彼谋自沮。惟有中外合力坚持，严予限制，大局幸甚。不胜屏营激切之至。御批：“该衙门议奏。”

江督刘坤一致总署沈敦和报据英将言中国联英联俄利害电(光绪二十三年十一月二十八日)

顷沈道敦和电：据英将言：风闻华政府聘俄员参军事，此言果确，俄必间阻联英，为华心腹大患。俄忌英，英亦忌俄。政府能鉴高丽覆辙，勿与俄权，急图联英救危之策，英亦乐从等语。英俄势均力敌。俄志在东方，俄得志不利于英，英必阻挠。

是以英俄相忌最深。中国邦交，如有重轻，诚如谕旨，适启争端。第念德、法世仇，均经联盟于俄，虽中亦联俄，而强弱异势。然中联英俄，系为自保疆土计。英将联交乐从之说果确，正可与之周旋。顷吴淞急电，英到一舰，泊前船旁，事机已迫，莫名焦急。现仍密饬加意戒备。乞酌裁电示。十一月二十八日奉旨：刘坤一两电均悉。两国相忌，必致交讧，此一定之理。现在英舰续到，正当问其来意，和平商酌。是亦联络之一法。如彼询及胶澳，不得轻让。如询俄船举动，则告以暂时停泊，以释其疑。该督务当慎重图维。俟有复音，再行电达。

江督刘坤一奏如将胶澳开作口岸利益均沾各国可相助电(同年十一月二十八日)

胶事顷奉电旨：饬令各抒所见。德借教案据胶，各国又借德事，互有举动，以阴遂其私。目下纷纷调舰，虽蓄而未发，实以胶案未定，尚在观望。若胶不速还，势必群相效尤，力图占据。以中国之财力兵力，一国尚难与较，更难与各国争持。若一味包荒，则要害全失，何以自立？以后局势，和战两穷。是胶之能归与否，实目前安危要着。胶可系保，则战争可息，不仅为一隅计也。辟口通商之议，既全国体，又杜狡谋，德能允从良善。惟探报德王弟督快船四艘、陆兵五千，于二十二日由包尔海口开行，尚有头、二等快船，明春来华。大小约十六号，水雷艇六号。是海靖电商外部之说，恐系推延之计。近阅新闻等报，胶事各报咸抱不平，特以事不干己，各国咸守局外。如开作口岸，利益均沾，当为各国所乐从。现在英俄虽各存分据之心，而一则以自保商务为名，一若万不获已，一则以协保旅大为说。尚若敦睦邦交，彼既未露阴谋，我即可迎机以导。为今之计，惟有迅商各国公使，示以断难将胶澳与德之意。并告德人，此举实违公法。与各国则联之以情，动之以义，推诚相告，勉为调停。在中国既免失地之虞，在各国仍可获通商之益。若各允相助，德必就范。如各国意涉游移，德又不允所商，与其失胶而启事局，致将来受各国之敌，不如今日与德坚持，尚合两害从轻之义。各国知我意在必争，将有兵事之碍商务，或能出为调处，事机得以转圜。愚虑所及，仍乞圣裁。现闻英舰有二十八在定海洋面会齐之说，坤一自当镇静戒备，不事张皇。如有意外占据之事，再行请旨办理。

江督刘坤一致枢垣英借债索款三端必不可许电(光绪二十四年正月初三日)

闻英愿借债、索款三端，此必不可许。英以轻利借我还日，权衡出入之间，似觉此胜于彼，然细思所索，实不利于我。全局攸关，不仅东南各省为其隐占已也。俄借德占旅大，英又借俄以借款图长江一带。今德闻英谋，又复翻议，欲吞山东。各国借端图占，步步痛逼而来。如借英款，不能不允其所索。英议既定，长江即非我有。法亦必相继续起，俄愿方奢，更非旅大能履其欲。中国局势，不堪设想矣！是去冬各国以德事为权舆，今则以英借款为机括。且日款未还之一万万两，原约本属从容。还款迟速，于国事无甚轻重。若以财赋之地，作抵押之据，还日本不急之款，启各国分占之心，利害显然，万难允许。为今之计，英借款与否，权固操之在我。我不借款作抵，彼即无辞。似宜婉言谢绝，以杜诡谋。纵因强弱异势，不无要求，或

许以添开口岸，尚合两害从轻之义，大局得以保全。至日本偿款，尽可与之熟商。默揣中日情势，当可从长计议。坤一与张之洞往来电商，意见相同。该督已另行电奏。愚虑所及，密切上陈。请代奏。

江督刘坤一致总署拟派藩司款待德亲王电(同年正月十八日)

沪电德领事照会：伊国亲王过沪迎迓之礼，宜制台接待，等语。各国于礼貌一事，絮长较短，易滋口实。前者俄亲王过沪，系派道员会同关道接待。今派藩司接待德亲王，已较优异。上海各领颇以为然。司、道平行，在我尚有可说。今若以要挟允其所请，在疆臣受恩深重，际此时艰，断不忍泥小节而误邦交，第彼族得步进步。稍予迁就，不独将来必有更甚于此，尤虑俄国以款待轩輊，转相诘难，亦苦无辞以对，事关中外大局。德使果有是说，务祈坚持勿允。且坤一近来多病，步履艰难，不胜此役，合并陈明。

江督刘坤一致总署沪道蔡钧既奉旨开缺应催李光久速赴任电(同年二月初一日)

苏松太道蔡钧奉旨开缺，应饬交卸。适英、美两领事请留办扩界，数月来尚未议妥。顷英、美、德各领事咸称不能与该道妥商，请另派员办理。既有违言，久留必致。已电皖抚，催李光久迅速赴任。

刘坤一张之洞电令上海道余联元与各国驻沪领事议定

东南保护约款九条(光绪二十六年五月三十日)

一、上海道台余，现奉南洋大臣刘、两湖督宪张电示：与各国驻沪领事官会商办法：上海租界，归各国公同保护；长江及苏杭内地，均归各督抚保护。两不相扰，以保全中外商民人命产业为主。

二、上海租界同保护章程，已另立条款。

三、长江及苏杭内地各国商民教士产业，均归南洋大臣刘、两湖省宪张允认切实保护，并移知各省督抚及严饬各该文武官员一体认真保护。现已出示禁止谣言，严拿匪徒。

四、长江内地，中国兵力已足使地方安静。各口岸已有各国兵轮者，仍照常停泊，惟须约束水手人等，不可登岸。

五、各国以后如不待中国督抚商允，竟至多派兵轮驶入长江等处，以致百姓怀疑，借端启衅，毁坏洋商教士人命产业，事后中国不认赔偿。

六、吴淞及长江各炮台，各国兵轮切不可近台停泊，及紧对炮台之处。兵轮水手，亦不可在炮台附近地方操练。彼此免致误犯。

七、上海制造局、火药局一带，各国兵轮勿往游弋驻泊，及派洋兵巡捕前往，以期各不相扰。此局军火，专为防剿长江内地土匪，保护中外商民之用，设有督抚提用，各国毋庸惊疑。

八、内地如有各国洋教士及游历各洋人，遇偏僻未经设防地方，切勿冒险前往。

九、凡租界内一切设法防护之事，均须安静办理，切勿张皇，以摇人心。

李鸿章刘坤一张之洞等奏拳匪肇祸敬陈管见折(同年六月二十一日)

两广总督李鸿章、两江总督刘坤一、湖广总督张之洞、闽浙总督许应骙、四川总督奎俊、福州将军善联、大理寺少卿盛宣怀、浙江巡抚刘树棠、安徽巡抚王之春、山东巡抚袁世凯、陕西巡抚端方等奏：为合词敬陈管见事。窃臣等恭读华洋电传，六月初三日寄出使各国大臣电谕，详示匪乱肇祸，外军相迫，及力保使馆情形。理直辞正，钦佩莫名。从此各国定知朝廷若非万不得已，不肯轻战之本意，自可愤情顿释，渐就范围。伏念此时各省，自应力筹战守，而朝廷必宜先伐敌谋。恭绎此次谕旨之意，拟请推行者四事：一、请明降谕旨，飭各省将军督抚，仍照约保护各省洋商教士，以示虽已开战，其不预战事者，皆为国家所保护，益彰圣朝如天之仁。且中国官员商民，在外国者尤多，保全尤广。一、请明降谕旨，将德公使被戕事切实惋惜。并致国书于德主，以便别国排解。并请致英、法两国国书，以见中国意在敦睦，一视同仁。一、请明降谕旨，飭顺天府尹直隶总督，查明除因战事外，此次匪乱被害之洋人教士等，所有损失人命物产，开具清单，请旨抚恤，以示朝廷不肯延及无辜之义。不待外人启口，将来所省实多。一、请明降谕旨，飭直隶境内督抚统兵大员，如有乱匪乱兵，实系扰害良民，焚杀劫掠，飭其相机力办，一面奏闻。从来安内乃可攘外。必先令京畿安谧，民心乃固。必先能纪律严肃，兵气乃扬。以上四条，均仰恳明降谕旨，并飭由各电局飞传各省，尤为有益。数日之间，四海遍传，各国自然感颂朝廷。并请于上谕中提明钦奉皇太后、皇上懿旨字样，令各国感颂皇太后、皇上圣德。此旨一降，则我国家既自立于情义兼尽之地步，各国无可借词，自然懈其愤斗之志，散其连合之局。此正古人所谓用兵攻心之法。即使逼至连战不休，更可表明非我开衅之实证。合词敬陈管见，伏候圣裁。再，此折系臣之洞主稿，往返电商，意见相同。谨奏。

刘坤一张之洞奏密陈大计以救危亡折(同年闰八月初六日)

两江总督刘坤一、湖广总督张之洞奏：为密陈大计以救危亡事。窃此次拳匪肇乱，中外构兵，驯致决裂不堪，实为千古所罕见。各国因听各驻使之言，归罪于误信拳

匪之王公大臣，必欲严速惩办，方可议和。臣坤一、臣之洞，每晤各国领事及经过洋员剴切开导，示以闰八月初二日谕旨，嘱其转达外部，催令开议停战。而各国以事未施行，疑系空言搪塞，固执前说，众口一词。观于德、日所复国书，及美总统之言，其情若见。若不迅速惩办，现在联军已抵保定，并闻将趋正定，似此深入不已，万一渐引而西，断非程文炳、董福祥等所能敌，亦非百二山河所能阻。不得不仰恳宸断，立将王公大臣分别治罪安置，毋令随扈，以平各国之愤，以释各国之疑，当可早日开议。该王公大臣误用拳匪，或出一时愚昧。惟各国啧有烦言，势将危及宗社，即应以身任咎。古来当国辅臣，每遇水旱盗贼，辄以佐治无状，自请罢斥。义固应尔，史册可征。况经开衅衅，乘舆播迁。该王公大臣，应以体谅及此。且由我速办，尚存自立之权，去可复还，夺可复与。若迁延日久，时局日非，深恐将来要索益坚，转非该王公大臣之福。此外各省有酿成拳祸杀戮无辜之员，应行重办，朝廷自有权衡。臣等自五月以来，惊魂欲断，血泪将枯。自维待罪疆圉，何敢妄预内政，第事关存亡大计，不得不冒死沥陈。谨奏。

江督刘坤一等奏请收回幸陕成命以安人心电(同年闰八月十九日)

两江总督刘坤一、湖广总督张之洞、陕甘总督魏光燾、署两广总督德寿、浙江巡抚刘树堂、山东巡抚袁世凯、湖北巡抚于荫霖、湖南巡抚俞廉三、安徽巡抚王之春、署江苏巡抚聂缉槩、大理寺少卿盛宣怀等奏：自拳匪扰乱，构衅列邦，京津相继失陷，辽东亦多失守，以致宗社震惊，乘舆播越，薄海臣民，皇皇失措。迭奉明诏：暂幸太原，剿治匪徒，议及亲贵。仰见我皇太后、皇上前者之苦衷，今者之明断，虽外人尚未满意，然已渐有转机，天下士庶，莫不欢欣鼓舞。方冀畿辅廓清，指日回銮。上慰九庙之灵，下遂兆民之望。乃昨日恭读电传谕旨：定于初八日，启銮西幸长安。等因。臣等颺颺过虑，有不得不直陈者。自古国家多难之秋，亦有迁都之举。然必其地敌人不能深入，即深入亦不能持久，始能立国图存。今日联军谋势众，实与古来强敌，情势不同。况陕西地方，古称天府，今匪雄都，又与甘肃为邻，素称回藪。较之京师，虽云完善，即就目前言之，各国方以新胜之师，联合图进，我既能往，寇亦能来。不畏数万里之海路，岂畏数千里之陆道？况京师根本重地，二百余年，邦基巩固，一旦弃之，不特失臣民之望，度亦非圣心所安。前者，各国合请退兵，不占土地。无论所请果否出于至诚，正可借回銮之说，以速其撤兵之议。倘西幸愈远，是折各国之请，而阻就款之忱。万一激变宗旨，洋兵不撤，京畿从此沦胥矣。辽东不复，陵寝因而阻隔矣。一国变计，各国争先。外而沿江沿海，处处侵占。内而纷纷攘攘，奸宄生心。瓜分之势成，糜烂之祸亟。人心愈摇，饷源愈竭。而朝廷徒局偏安，为闭关自守之计，不待智者已知其难。伏乞睿裁，收回幸陕成命。若乘舆已距陕伊迤，势难折回，亦请明降谕旨，布告天下，具言此次幸陕，亦系暂计，俟畿辅稍定，即行回銮。并由京简派王大臣致祭宗庙，恭谒诸陵，示天下以不忘宗庙社稷之重，断无终不回銮之理。一面仍飭令全权大臣，婉商各使。果其退兵，示以必返。庶足以安人心，而维大局。伏乞圣裁。

江督刘坤一致枢垣各国请疏浚吴淞若允

其派官商会办恐失主权请熟商电(光绪二十七年七月初五日)

全权艳电、有经泌电悉。和议总纲第十一款载明：凡通商行船各约，各国以修改为有益者，中国认与商议。更改吴淞挑沙，关系通商行船，各国视为要务。即不允海关办足值百抽五，及删除免费之例，彼援第十一款议办，我亦无从驳阻。各使因议条款，随商照送吴淞章程。就事而论，各国因吴淞淤浅，于大轮船出入阻碍屡请疏浚，前迭飭沪道办理，率皆半途而废。此次各使必欲派人，实有所不得已。尊处谓此事必应由华官主政，领事仅可派人稽查用款，立论甚正。然阅送来章程，派人次序，尚有上海道税务司居前，各领事在后，亦不可谓非关道主持。至沿岸田房抽捐，于理欠合。英德领事，既向尊处陈说，应请就近派员妥速商酌。此事不办，则公约必不成，洋兵必不撤。事关总结画押，议定乞即电知。船钞一节，已询赫德。据称恐不敷用。俟复到另电。至杰弥生前称，挖淤即可加税值百抽十二五之说，英使终未言及。且云：“杰语不可信”。并闻云，现复以艳电悉。民田民船抽费，英领面云，本未议抽及此。德领告局员，谓民船本不收费，前系误译。沿河边田，念小民苦，亦可免。昨德领函复云：“修理吴淞口，尊函解说：一、税司关道为督办，其余各员为参议。二、沿河边田及民船，无抽税。三、船钞须归北京作主。”业已禀驻京大臣。想和议画押，不致因此耽延。英领函亦云：“将函语呈公使，先回沪”。今日贝领偕英班领来晤。谓公使电：“全约待此应允方定。”告以黄浦江现已允开，除民船民田免税外，只有办事之权，不能不属海关。英总领又谓，由各国派员设局，奉萨公使电，只令告知，并未令其商议。复以既无可商，何须费词？英总领拟及返沪查派办。此事虽有关道税司在内，事由何人主持，究未声明。关道税司，均谓权不可失。纵开淤有关通商行船，在我只须允办，在彼不应揽权。况开淤以工程用费为要。今允由各国派官商会同商办工费。查考用费，并公举办工洋人，于开淤之事，已属切实办法。此外皆税司关道分内之事，自未便因循开淤一并干预。不独碍一口事权，且恐以后遇事援案，并南北各口自主之权亦失。此事仅告及敝处，不与会商，自应归尊处定义。惟其中主权所关，不能不请鼎力主持熟商。等语。谨闻。

刘坤一奏(光绪二十八年四月十七日)

为随办洋务人员异常出力恳恩分别奖叙，以示鼓励，恭折仰祈圣鉴事。窃查随办南洋洋务出力人员，定章二年奏奖一次，以十员为率，历经循办在案。自光绪二十四年四月请奖以后，扣至二十七年四月，又届三年期满。近来商务日辟，交涉益多。保卫调和，本已倍形繁重。光绪二十六年，北地拳匪事起，全局震惊。又有回天富有贵为各项票匪，乘机思逞。各国增兵调舰，声称保商护教，驶入长江。中外商民，互相疑惧，仓皇迁徙，一夕数惊，安危之机，间不容发。臣一面将水陆各营，密为分布，遇有匪徒蠢动，立即剿除。一面分派各员，与各国领事妥为联络，倡议互

保，巡防弹压。电牍纷驰。各该员不避艰危，相机筹办。吃紧之际，甚至彻夜不寐。坚忍劳苦，实属倍异寻常。用能化险为夷，地方得以安堵。臣待罪南洋，本有应尽之责。□局大定，尚蒙懋赏优加。各该员等，奋勉从公，臣实不忍没其劳勩。兹仍照向章保奖十员。内有勤劳尤著者五员，按照异常劳绩请奖。其余五员，仍照寻常劳绩奖叙。窃维论功行赏，斟酌再四，既不敢稍涉冒滥，亦不能不分别办理，期昭公允。谨缮具清单，恭呈御览。合无仰恳天恩，俯准照拟给奖，以示鼓励，出自逾格鸿施。除将各该员履历，分咨外务部、吏部外，理合会同江苏巡抚臣恩寿，恭折具奏。伏乞圣鉴训示。谨奏。奉批：“着照所请，该部知道。单并发。”

刘坤一等片(同年四月二十四日)

再前岁北方拳匪肇衅，东南谣诼繁兴，中外商民，互相猜忌，大局岌岌可危。臣与湖广总督臣张之洞，钦遵谕旨，相机审势，力保疆土。当经遴委江苏试用道陶森甲，及现任江苏淮扬海道沈瑜庆，驰赴上海，约会商务大臣盛宣怀，与各国领事，筹商互保之策。往返数次，得就范围。该道不无微劳足录。今臣等仰荷鸿施，优于奖叙。各国领事，并经臣等奏请赏给宝星。该道等在事出力，似未便令其向隅。合无仰恳天恩，俯准将陶森甲仍以道员留于原省归候补班，尽先补用；沈瑜庆交部从优议叙，以资鼓励。理合附片具陈，伏乞圣鉴训示。谨奏。奉批：“着照所请。吏部知道。”

江督刘坤一致外部请商各使即撤沪兵电(同年六月十五日)

津既即日交还，驻津之兵必撤。前因沪兵久驻不撤，曾电请商各使。得复电云：俟津事议定，再与申论。南洋前经敝处保护周至，非津可比，岂有津已还，而沪兵再延不撤？现津议已商定，乞钧处查案执理婉商各使，即撤沪兵。

江督刘坤一致外部日使请在沪议约应照办电(同年七月初六日)

沪歌电悉。日本日置益等，请在沪议约，自应照办。

江督刘坤一致外部华商在日纳税加多系违约请与辩论电(同年八月十八日)

沪电悉。现在华商在日，纳税加多，系属违约。尽可呈请驻使，向彼外部辩论，申明无须另添一款，向彼索议，领此虚情，转被索偿利益。乞裁。

江督魏光燾致外部黄浦事沪道拟商改办法尚妥电(光绪二十九年八月二十一日)

黄浦事饬据沪道复称，派员后种种为难，不如将附款有碍全河权利，请与各国公使商改。拟陈商改办法：一、由中国自筹全费，独力任办。二、聘外洋工程司，只承

办工程，工竣即辞退。三、沿江沿海各灯塔浮标、水巡引港一切事宜，向归海关经理者，悉仍其旧。四、拟请各使，免各商筹付工程一切捐项。至和约附件所定捐款，经刘忠诚函询各领，设商民抗不遵缴，按照各国定例，能否勒令照付？除英政府发有专条，英总领已勒令照缴，其余各领，均未声明是否有权。盖泰西各国设有新立捐项，未经议院核准，均无权勒令商民完缴。此次所立和约，未经各该国议院核明，致各领未能切实担保能否照缴，各国尚无把握等语。此事所关主权甚大。一经派员，即难设法挽回。刘、张两任，坚持至今已届三年。其三年修改之说，原约中并示声明，系指举办后而言。且各国商民捐款，能否一律照缴，各领尚无把握。乃遽迫我照办，殊欠公允。沪道所拟商改办法，不为未见。应请鼎力主持，会商各使，设法拟改，以保主权。

第十卷 光绪(下) 宣统

汭道袁树勋致日领日俄商船在中国沿海当一律保护照会(光绪三十年正月初三日)

此次日本与俄国开战，我国应守局外之例。业经遵照南洋大臣电飭，备文照会贵总领事，转致水师兵官不得将兵舰在中国沿海属地并口内停泊、采运及作为战争等事在案。至于两国商船非战舰可比。既在局外之国，往来贸易，我国自应一律保护，以符公法。昨与贵总领事暨俄国总领事先后面商，两国游弋师船，在扬子江口外及口内，彼此均不与商船侵犯，以免日后别生枝节，仰承一体照允。当经本道电奉南洋大臣复谕，深佩两总领事睦交之谊，飭在照会声明。除照会俄国总领事外，为此照会贵总领事查照，仍希照复备案。望速施行。

汭道袁树勋致俄领催俄舰“满洲”遵限退出华境照会(同年正月初三日)

本道前经备文，请贵总领事限令贵国兵轮“满洲”于本月初五日下午五点钟起，至初六日下午五点钟止，二十四点钟内起碇，开出中国管辖江海属境之外在案。此系恪守中立条规办理，毫无偏倚，定荷贵总领事原谅，转致贵国兵轮船“满洲”遵办。惟究于何时驶出淞口，合再照会贵总领事。请烦查明见复，勿再推诿，以便本道照会日本总领事立即转致“秋津洲”兵船，一律遵照期限驶出口外，以照公允，而符条规。望切施行。

汭道袁树勋呈外部请商俄使令俄舰出口电(同年正月初五日)

俄兵轮“满洲”，先由职道商令移泊江心，并查禁装运军需各情，迭经电禀。昨晚日领事照会：日俄开仗，贵国外部颁行中立条规，声明中外。俄兵轮停浦未去，于日本暨各国商务有碍，与条规限二十四点退出不符。日本兵轮“秋津洲”为防商务利益被俄兵轮胁迫。本日进口停张华滨，应俟俄兵轮“满洲”起碇，向中国管辖外开去，经一昼夜，并于“满洲”驶经张华滨之前，预行移泊吴淞长江上游，以示公允，而符条规。俄兵轮何日何时开去，二十四点钟何时预算？先知照。等语。职道商之税司，自应守定中立章程。会晤日领事，亦以俄兵轮宜速出行，迟恐生事。商之俄领事，以公使与外务部商定在先，必须请示后行。职道告以中立条规如此，未便违背，致日人有所借口。回署后，即备文限该兵轮本日五点钟起至明日下午五点止出口。拟候接复照办，即复日领事，转保“秋津洲”驶赴长江上游暂泊，过二十四点钟出江，以符条规。再日舰入口，恐俄兵轮“满洲”万一出口，该国商轮往来，虑遭不测，此亦实情，合亟禀闻，并乞钧部转致俄使飭遵。

汭道袁树勋致俄领请将兵舰战具由海关起存照会(同年正月初五日)

为照会事。接准来文，内开：“满洲”兵轮，俄日未战之前久在上海停泊，不得干

预各种战务。等因。查该兵轮业已漆成灰色为战时之用，并装有煤斤、食物各项军需。来文所云不得干预战务，实难凭信。现本道迭奉外务部、南洋大臣电飭，从长妥商，总期两无关碍。如贵总领事以该兵轮实系不干预战务，应请将所备战具由海关起存，或将汽机要件拆卸一二，以示不能行驶。俟战事完毕，再议给还。此系本道格外调停与驻京大臣原议相符，亦与公法不背。否则，仍请飭令该兵轮开往江海之外。望切施行。须至照会者。

直督袁世凯致外部据程璧光电俄艇官兵已抵沪电(同年十一月十二日)

据管带“海容”快船补用守备程璧光声称：光绪三十年十月初六日，卑船由烟台奉参谋水陆军务处叶军门电谕，即赴庙岛。方拟展轮，陡遇连日风雪迷途，只得移锚子午岛停避。初十日黎明，雪微风大，正在启行，瞥见俄国鱼雷艇一艘，突入内界下锚。卑船因速折回停轮，守备即驾舢板溯浪前赴俄艇。查悉该艇译名“拉斯打劳普乃”才由旅顺来此。切询行止，该管带答云俟午后回复。守备窃查中立条约内载：战国陆军如因败逃入中国境内，应收其军器，听中国官员约束，不得擅自行动等因。此次俄军败逃入中国境内，应即援照条规办理。以是一面报关道。守备迭赴俄艇询究，并无去志。乃令其随卑船仍开子午岛，是处风涛稍逊，即便卸交军械，所有官兵留住卑船。随经俄管带承允，守备遂复驾船停子午岛。不意延候至夜戌初刻，俄艇竟不至。亟乘小轮船环觅，亦复无踪。寻询税关指泊官，始悉该船才自炸沉。十一日早，卑船赶紧驶近烟台抛锚。守备即驾舢板访验：该沉雷艇尚有烟筒露出海面，经即派勇轮值看守。旋探悉先夜俄艇炸沉后，官兵等各持军械登岸。续闻日人即因是故，已暗集水兵数百名，分布陆地。诚虑夜间径攻俄领事署，再三切陈中立定章，必须核实从速照办。幸领事详告，该官兵等四十九名，相率允从。即于当夜酉刻前来卑船，先行检身上及行李，随令缴出军械，分别收管。由是丰给伙食，均尚驯服。并已令其签具再不干预战事誓状。嗣于十六日，接奉宪台电飭，装送俄官兵赴沪。卑船即于十七日启行，至十九日抵沪。该俄官兵于二十日由俄领事领去。已取具亲签收据，当经电禀在案。至该收据及俄官兵誓状各一纸，现已备送江海关道存案。其缴存军械亦已承照。关道面嘱送交江海关税务司汇存。理合申复，请咨外务部备案。等情。到本大臣。据此，相应咨呈贵部。谨请查照备案。

外务部致胡惟德俄兵砍毙周生有案希告俄廷交凶电(同年十一月二十七日)

俄船留沪弁兵，按中立条规，应归中国管束，不得擅动。乃初九日有俄兵在英大马路码头，将路过甬人周生有用斧砍毙，俄领迳交兵船收押，沪道屡索不交。战国逃兵在中立界内滋事，用兵国军律裁判，无此办法，自应照战时公例，不得以无治外法权论。即按约章，亦应会同华官审办。本部叠催，俄使强词不允，并称奉其国命。似此残杀无辜，非理争势，岂文明大国所应为？现在人心愤激，公论不平。务希切告外部，迅飭交凶会审，从严治罪。并申明约束。嗣后定立妥章，严飭俄兵遵照。以重民命，而昭公理。即电复。

外部致周馥袁树勋周案已电胡使力争拟归公断电(同年十二月初九日)

沪道来电，周生有案，俄领判定监禁四年，罚作苦工，该道不认。甬人定初九日会议，众怒所激，恐酿事端。此案相持不下，急切恐难了结。本部已电胡使力争。倘未能就范，拟仿英北海鱼船，归公断办理。国家慎重民命，必尽力所能为。俄方寻衅，意在破坏中立。务饬寓沪甬绅，切实开导商民，慎勿暴动，授人以隙。大局所关，该绅等必能体察也。再电中有未便宣播之语，弗将全电传示为要。

江督周馥咨外部据沪道禀拟约俄兵七条请照会俄使饬遵文(同年十二月十一日)

据江海关道袁树勋禀称：窃查俄船逃至沪上，拆卸机器、军火，不预军事，其员弁、水手人等，归我保护，例有应守之条规。入手之初，职道即与驻沪俄总领事阔雷明订定约束章程：一、查取奥斯科巡舰及格罗苏福鱼雷艇员弁兵丁等人数。二、另具非中国允准不得擅离上海切结，由阔领加印送道。三、艇舰停靠浦东东清码头。四、员弁水手每日准在码头左近道胜银行空地体操，并在浦滩散步，无得再到别处闲游。即偶至租界地方，亦应限定人数时刻，另派妥当之人巡察。函商面议，颇费经营。不图俄领虽已照允，各弁兵未尽遵行。先经职道访有酗酒滋扰情事。切商究竟，俄领犹复偏袒，讳莫如深。继因东洋车夫向俄水手索价争执。适有宁波人周生有路过，猝被砍伤，殃及无辜。如果派人随行视察，即可从中阻遏，何至肇此人命。且烟台先后送到船主、弁兵九十余人，未肯照案具结。始以已开人数、已给收条为推诿，继以烟台已经出结为词，终以请示公使为延宕。函驳面催，至今未到。遂有谣传俄弁兵暗中脱逃，为日本中途查获之事。若不趁此另定严切办法，不仅日本啧有烦言，恐启各国外交不测之问题。职瞻前顾后，连日与法官详加酌议，亟应与法官俄总领事重申禁令者又数条，敬详陈之：一、俄员弁、水手人等，既为军事犯，应恪守江海关道与俄领订定之章程行事。二、俄员弁、水手人等，只准在关道指定之地即浦东东清码头体操散步，不准他往。三、若俄员弁、水手人等，有潜逃偷渡出口，或往指定地界之外，准中国地方官随时捕拿。一经拿获，即作为有意败坏中立条款，迕由中国地方官审判定罪，无庸会同俄官办理。四、关道应向俄领事坚索停泊浦江各俄艇舰船主、员弁、水手人等衔名清册送道，随时派员按册点查。五、关道应与俄领事订明，准中国官员暨海关税务司、或海军、或陆路兵官，上船查察有无装配违法器械、汽机、军火、煤什等物，及船主、员弁、水手人等是否在船。六、关道应分别照会值年领袖总领事及法总领事，分别一体转饬工部局洋包探，严查界内有无员弁、水手人等。七、关道应稟请南洋大臣，咨请北京同文馆俄文翻译一员来沪，派充关道翻译官，俾资臂助。内第七条咨调俄文翻译谅蒙照准。惟第二、三、四、五、六各条虽经职道屡商俄领，总不便擅，种种刁难。然为此惩前毖后、中立切要之图，苟非切实见诸施行，仍前宽容姑息，危机所伏。窃虑俄弁兵在沪将来更甚于此，有不可措手者。职道为防患未然起见，拟请商明外务部，切商俄使饬遵。倘俄使亦不受商，则是有意败坏我之中立。请迕告以在沪俄船员弁水手人等，既不听我约束，我即弃置，不能再为保护。此后任凭日本便宜行事，我亦不能

以日本违背公法，侮辱中立口岸水道为言，宣布各国，以免日后之责问，危言耸听。俄或降心相从，自为转圜之计。祷昧之见，是否有当，仰祈察核，转咨酌办示遵。等情。到本大臣。据此，查事迭据该道电禀，均经本大臣电达贵部照会俄使飭遵，并经电飭该道就近与俄领妥商办理。无如该领事一味推宕，迄未照办。昨据袁道来电，该领竟以限装煤什，禁阻兵船移动修补，指为无端干预。其兵船水手滋事酿命之案，至今亦不交凶审讯。在我既有看守保护之责，若竟任其自由，不服查验，非特日有违言，且该国在沪弁兵人数众多，设再与别国酿出意外交涉，则诘责立至，我更无以为计。该道现禀所拟办法七条，系为预弭衅端起见。除七条咨调俄文翻译一节，应由本大臣查酌派委外，其余六条应请贵部迅飭酌核，照会俄使转飭遵办。除批示外，相应咨会贵部，谨请查照办理，示复施行。

周馥等奏(光绪三十一年)

再，上海通商日久，实为华洋辐辏之区。光绪二十一年经前署督臣张之洞奏准开筑南市马路，辟成华界，商民称便。惟地限一隅，不敷展布。二十九年八月间，准外务部咨议复商约大臣吕海寰条奏要务折内声明，上海已于租界外另设华界，应否再行扩充，应由南洋大臣酌核筹办。等因。经前督臣魏光燾，转飭上海道妥议禀办。旋据粤商陈绍昌等创议筹款，禀准于新闻滨北地方，建桥筑路，作为北市商场。复因费无着，仅造成洋式浮桥而止。现该商等金以财力不逮，请援照南市成例，改归官办。查商场本应由商捐办。但此时马路未筑，市廛未立，无从收捐，不得不借官提倡。且从前南市辟界，即系拨用官款，是北市亦应照办。约计开办伊始，一切购地、筑路、建屋、役捕事宜，需银二十余万两。查二十三年淞沪铁路圈留吴淞官地，本议在淞沪归并收回款内拨还偿银。嗣准前督办铁路大臣盛宣怀来咨，议将吴淞蕴藻滨北圈地留未用官地五十一亩零，缴还归官。又铁路购存未用民地三十八亩零，一并归官抵补。是此项地亩自应由官收回，迅速分别召变，所得地价即充作北市开辟商场经费，以公济公。据上海道禀，统计此项地价可变银二十三万四千两。惟蕴藻滨北官地正扼吴淞口门，请留为公家建造码头、厂栈、停轮之用，无庸变价。其余民地即行设法召变。已飭该道照办。以外滩地凡被民间侵占冒领，及应归官变价之产，均由上海道派员会县清查，酌收价值，给照管业。并将此款贴补北市修造马路之费。即以商民之款，办便商便民之事，实属一举两得。将来办有成效，可与南市联合一气。市面既广，商务自兴，挽回利权良非浅鲜。除飭上海道遵照妥办外，谨会同江苏抚臣陈夔龙附片具陈。伏乞圣鉴训示。谨奏。奉批：“该部知道。”

外部致周馥聂缉槩日僧游历护照勿写别项字句电(光绪三十一年正月初五日)

准尊处南洋十二月十八日文称：杭州关道准日领函送日本布教师紫云元范，赴杭、嘉、湖、宁、绍、台等府游历，考察佛教事宜，盖印给执。等因。查游历护照，向来只写“游历”字样，不得填写别项情事。上年鄂省于德人柯和游历照内，误填“查矿”字样，经本部飭令涂销，并声明只能作为游历护照，以杜影射在案。近来日

僧在闽、浙等省，借传教为名，干预寺产。此次紫云游历护照，有“考察佛教”字样，本与向章不符，尤恐借端生事。应照鄂案飭令涂销。知照日领，声明只能作为游历。并希通飭各关，嗣后游历护照，勿得填写别项字句，以免轸輻至要。

外部致胡惟德俄抵淞六舰不肯拆卸希告俄外部速飭照办电(同年四月二十九日)

宥电：查俄抵淞六舰，叶提督查询，船主自称军需运船，并愿扣留，昨已下旗，俄领仍执商船，不允拆卸，与该外部及署使所言相同，显系强词夺理。现俄战不利，又来淞运船两艘，且恐有续到者。各该船违章耽延，设有意外，我不任责。希再切告外部，速飭照办。

周馥附片(同年八月十三日)

再，准户部咨议复金陵关，勘定租界拨款修筑一案，内开：从前办苏州、杭州、长沙等关需用经费，均令各该督抚自行设法筹措，按开关后于所收税款内陆续归还。金陵关事同一律。所请拨动银十万两，仍应查照各关成案，自行筹措，按税收畅旺，陆续归还。且积存洋药厘金十六万七百余两，曾经奏准凑解赔款，何以此次又请动用？应毋庸议。等因。前来。臣查苏州、杭州、长沙三关埠经费，昔由各款自行设法筹措者，盖因其时苏、杭、等关尚未征税，无款可饬，不得不先行设法另筹，俟收有税项，再行归还。是所用者仍系税款。今金陵关征税已久，本有税款存储，自应即动本款，以符成案。至称药厘已经奏明凑解赔款一节，臣查金陵关每年应解赔款均系先尽洋税拨解，如洋税不敷，则在药厘内凑拨。故臣前次奏报，该关一百六十九结药厘收支案内，登明须凑解赔款之用。嗣因截至一百七十七结止，除拨解外，尚有存款，是以奏请照案拨用。于关税初无出入，赔款并无缺误。核与成案亦属相符，合无仰恳天恩俯准，照案饬拨应用，免误要工。除分咨外务部、户部查照外，理合附片具陈。伏乞圣鉴训示。谨奏。

外部奏修浚黄浦河道议归中国自办改订整理条款会同画押折并附条款(同年九月十二日)

为修浚黄浦河道议归中国自办改订条款与各使会同画押事。辛丑和约第十一款内载：“设黄浦河道局，经管整理，改善水道各工，所派该局各员，均代中国及诸国保守在沪所有通商之利益，预估后二十年，该局各工及经管各费，应每年支用海关银四十六万两。此数平分，半由中国国家付给，半由外国各干涉者出资”。等语。并附件第十七，开列详细办法三十七条。此事在当日虽明知于治理地方之主权，不无侵损，惟和议关系全局安危，未便因此一端，与各国断断争论。嗣经各使迭催派员开办。前两江总督刘坤一、署督臣张之洞均以此项条款有碍主权，坚持未肯派员。惟既载公约，势难作废。因建议不如由中国独认全费，改归自办。至上年，前督臣魏光燾复拟办法五条，电商臣部。事属更改公约，磋磨固非易易。而熟权利害，关

系非轻。臣等不敢不勉为其难。遂照会各使，请各国政府允中国独认全费，自办此项工程。即先据美使以美政府之意，中国已认全费，有无担保之据，来相诘问。臣等因转商户部，指定四川省及江苏徐州府之土药税作抵，以坚其信。嗣又据英使来照，以所拟办法五条，尚未详备，另拟十二条，于责成认筹全费担保工程各节，诸多限制。臣等复就其所拟条款，详加察核，或照允，或驳改，分别酌定，仍为十二条。一面与现署督臣周馥往返相商，一面与各使逐条辩论，必至无可再争，悉臻妥协，乃为议定。计前后四年，为此内外协力，坚拒婉商，始克就范。在中国认出经费虽岁增二十三万两，然原约所谓半由外国各干涉者出资，实系抽捐于沿江各地产及进出各船货，仍是取诸华人者居多。故全费较半费，其增减之数，本非甚巨。而借此以收回管辖事权，保全长江门户，于大局不无补救。兹已将订条款，于八月二十九日，由臣等会同各国使臣在部画押。谨将条款恭缮清单，进呈御览。并咨行户部，暨两江总督，查照办理。谨奏。

谨将改订修治黄浦河道条款开单恭呈御览：

辛丑和约所议，设黄浦河道局，及该局应办事务，并应收款项各节，中国国家现欲应定办法，自承其工，并认全费。经各国应允，商定办法条例如左：

一、所有改善及保全黄浦河道，并吴淞内外沙滩各工，统由江海关道暨税务司管理。其黄浦江面之巡捕，及卫生验疫、灯塔、浮标、引水等事，仍照旧章办理。

二、此项议定章程，画押后三个月内，中国自行选择熟悉河工之工程师，经辛丑公约画押之各国使臣大半以为合式，中国即可派委。其承办工程，倘开工后工程师或因事故须另换人，如其故经各该国使臣大半以为然者，则其选择委派各节，仍照前法办理。

三、凡立合同，全揽或分揽河工购买材料机器等事，均须招商公同投票，以最宜者得售。

四、每三个月，须将所办工程及所用各款，详细开送驻沪各国领事官备查。

五、凡新筑泊岸码头，并安设活码头及河面停泊趸船各事，须由江海关道暨税务司允准，方能举办。

六、凡已设泊船处所、器具，江海关道暨税务司均有取舍之权，并有权设立公共泊船之处。

七、浚河各工，须由江海关道暨税务司核准，方能开办。

八、凡改善保全黄浦河道各工，所应用外国租界以外之地，江海关道暨税务司有收买使用之权。凡有因改善河道之工须买地段，如系洋商之产，其价应由该地主之领事官，及江海关道与税务司，并领衔领事官三处各选择一人，会同议定。如领衔领事官即系地主之领事官，则第三人应由亚于领衔之领事选择。该三人如何公断，该地主之领事官应即保其遵行。如系华人产业，即由海关比照酌定遵行。

河岸地段，前如因改善河道之工增加淤滩，应先尽该河岸之华洋地主买受承租。其价，仍照前法分别会议酌定，或按情形由海关酌定。

九、河工全费，中国国家一律承出，并不向沿江各地产及来往船货征收税捐。

十、中国现指定四川省及江苏徐州府之土药税统数，以担保河工之全费。仍照辛丑和约每年支用关平银四十六万两，以二十年为限。如开办后，无论何年须购置材料、机器等物，用款较巨，中国可筹借若干款项，备具保票，即以上所指定之土药税为抵押。每年付还借款本息，及举办工程、养已竣之工，一切诸费，总以至少四十六万两关平银筹备。由该省管各官将此数按月均匀分开，交江海关道暨税务司手收。如以上所提之税不敷，则由中国政府应用他项进款，以补足所定之数。

十一、如此项工程办得有不见谨慎俭固之处，各国领事官大半可告知关道暨税务司，转语工程师，设法改良。或仍办理不善，各国领事官亦可请关道暨税务司，将该工程司撤退，另行选择委派，仍照第二款所言办理。如江海关暨税务司不允照办，各国领事官即可申详以上所指之各国驻京大臣核夺。

十二、此条议定画押后，即将辛丑和约第十一款之第二段，及附件第十七暂行停住。惟中国如不照此新章，每年筹拨足用之款，以致有误工程要需，或有遗漏，不照本章他项要端，则辛丑和约条款及附件十七即复施行。

光绪三十一年八月二十九日，西历一千九百零五年九月二十七日，在北京定立。奕劻。

署理两江总督山东巡抚周馥奏(同年无月日)

为上海商务日繁，商场日辟，亟应添办巡警以资保卫，并请援案开支经费，恭折奏祈圣鉴事。窃维上海为通商要口，冲繁甲于他省他埠，中外商人之懋迁于此者纷至沓来，难以数计。近日生意日繁，旅居尤倍于前。惟是人数既繁，匪类即因而溷迹。租界以内虽由工部局设立巡警，自为保卫，而租界以外之华商则一无戒备。上年据前升道袁树勋请将向驻之沪军亲兵，改为巡警，分派城厢内外，站街巡警，以资保卫，详经奏明在案。乃地广兵少，顾此失彼，疏漏尚多。况上海从前本驻有臣标奇兵营，抚标沪兵亲兵忠字、信字等营，总计兵多之时，约有二千二百余人。嗣经

陆续裁撤、归并，现在分防城外及各乡镇者，仅有抚标沪军五百名，奇兵营所改之巡防步兵四队，计兵夫五百六十名，不及从前兵数之半。设遇有事，不敷调拨，缓急实未可恃。若不将从前未经设巡之处，一律补办齐全，实无从保治安，而慰中外商民之望。现拟再行添设巡警五百名。其营制、饷章，照南北洋巡警章程办理。查原有驻沪军亲兵现已改为巡警者，每年约支关税银一万一千余两，有闰之年，约支银一万二千余两；又现存之抚标沪军，每年约支银二万七千余两，有闰之年，约支银二万九千余两。向在关税项下作正开支，均已按结入册、造报。此次再添五百人，约计每年应需饷银二万数千两，请仍照前案，在关税内动支汇报。将来如仍不敷分布，再由官绅商民另行设法筹解。非万不得已，不敢再请动支税款。据该关道瑞澄详请奏明立案前来。臣查租界外商务日繁，人众地远，仅添此数百名巡兵，实属万不可少之举。惟此项饷银除关税外无他款可筹。事关保护地方治安所系，需费无多，获益甚大，似应照准办理。理合会同江苏抚臣陈夔龙恭折具陈。伏乞皇太后、皇上圣鉴，敕部迅速议复、施行。谨奏。奉批：“该部议奏。”

周馥等奏片(同年十二月十四日)

再据苏松太道袁树勋详称：上海城厢，内外毗连租界，流氓、土棍，到处潜迹。向驻有沪军亲兵营额，设立官弁勇丁二百五十员名，与保甲各局弹压巡防。每年由关税项下动拨薪饷，湘合库平银一万一千二百两六钱九分一厘。近来松属地方，时有匪徒滋事。各该营局只能遇案拿办，究难先事防维。欲求正本清源，非举办警察难收实效。当经访聘日本毕业高等学生，就求志书院设警察学堂，先募资质聪颖气体强壮学生，认真练习。并将沪军亲兵营改为警察，汰弱留强，挑选识字壮丁二百名，分班入堂习业。即将原饷抵支，由上海县督率绅士妥为联络商办，于上年十月十一日开设总局。一面将城内原设保甲局饬撤，腾出经费凑作警察不敷之需。并将沪军亲兵营挑剩不识字勇丁，于本年正月内一律遣散。饬据上海县知县汪懋琨禀报：第一班学生二十名、壮丁一百名，于上年九月初一日开学，至十二月二十日毕业，先开东南两局。第二班学生二十名、壮丁一百名，于本年正月初十日开学，加习功课。至二月底毕业，续开西南两局，次第分段站巡，即将学堂裁撤。另于总局设立警察补习所，挑选壮丁二十名，照原定教法训练，以备充补缺额之用。学生派为助教，壮丁派为巡士。统计巡长兼监查、教习、书记、巡士，及伙夫人等，约共二百六十名。较之沪军亲兵营原额，已有增多。且警察须昼夜站街，劳逸迥异，非厚给薪资，难期振奋。每年约需库平银二万三千八百五十两有奇。除将沪军营饷及城内保甲局薪费尽数作抵外，尚不敷银九千二百九十余两，活支在外，闰月加增，由道另筹拨补。等情。详请奏咨前来。臣复查无异。除分咨查照外，谨会同江苏巡抚臣陆元鼎附片具陈，伏乞圣鉴，敕部立案施行。谨奏。

镇江关道陶森甲呈外部据日商稟赴镇江运木筏电(光绪三十二年四月初八日)

阳电谨悉。前准驻沪日领间敌罗函，据日商配利司稟：赴镇江设行，拟运木筏至年

圩套。等语。当查：运镇洋旗木植，只准在金山新河卸泊。其年圩套，即鲇鱼套，定章不准停泊。上年日本及美商请在该处运卸木筏，均已驳复有案。日商事同一律。即经照案驳复。

汧道瑞澄致西班牙领事请查示改籍华人姓名函(同年闰四月初三日)

启者。昨准来函：入籍华民，据报状签字为凭，注明入籍，前构讼情事，概不稟请管理等语，一律注销，碍难照办。等因。到道。查华民准入西籍，美国续议条约第五款原有明文。然此指远在外洋，人地生疏，愿听西官保护而言。若华人既在中国，自有地方官保护，何必舍本国之地方官，而转求别国之领事官保护？实于情理未洽。足见本道前文所谓“求倚恃而妄干非分之人”，并非苛论。乃贵总领事准其入籍，给照保护，究凭两国何项约章办理，曾否稟知贵国驻京大臣有案，现在经贵总领事给照保护之华民共有几人，是何姓名，原籍何处，以及入籍贵国年月日期，合行奉询。即祈贵总领事分别查明见示，以便核办为荷。

端方等奏(光绪三十三年四月)

为上海华界巡警关系重要，谨陈筹办推广情形，并请援案开支经费，恭折仰祈圣鉴事。窃维上海为通商要口，中外侨民日多，匪类即因而溷迹。租界有工部局巡警保护，华界则一无戒备。经前署督臣周馥会同江苏抚臣陈夔龙具奏，于华界添设巡警五百名，营制、饷章照南北洋巡警章程办理，每年应需饷银叁万数千两，在关税内动支汇报，将来如不敷分布，再由官绅商民另行设法筹办，非万不得已，不敢再请动支税款。奉部核准在案。兹查上海华界日见发达，南市而外，现议更辟北市。地段既广，匪徒尤多。迺来上海、宝山交界处所，及浦东地方，劫夺横行，肆无忌惮，中外咸有戒心。若不亟图挽救，诚恐养痍貽患，渐致蔓延。不独华界居民不能安堵，即租界亦必波及，殊非实力保护外人之道。现除认真推广巡警，别无善策。况此举为内治根本，早经钦奉明诏，飭各省普设巡警。是内地尚须广办，何况系江海要冲，华洋商民财产甲于他埠，尤不得不设法保护，计出万全。现以上海情形而论，原定添设巡警五百名，万万不敷分布。经臣督飭江海关道，将华界设巡事宜切实筹办。约计按段分区，周历勘定。凡未经设巡之处，固应补办完全，即已经设巡之处，亦应组织周密。核其人数，必须再行添募二千名左右，每年约需增筹饷银十余万两。值此时艰款绌，经费固不易筹。然有备无患，古有明征。与其貽焦头烂额之讥，不如为曲突徙薪之计。时势所迫，诚属万不得已。惟饷银较巨，除关税外，另无他款可筹。幸近年江海关税收较前畅旺，尚可勉筹济应。前项饷银，拟请援案每月在关税内拨银一万，充作巡警经费，仍飭照章造册，按年报部核销。经费既充，办事自有把握。至治法而外，尤贵治人。关道身任地方，固属责无旁贷。惟开办之始，头绪万端。加以关务殷繁，兼顾必难周到，亟应遴派明干之员，相助为理，以资得力。查有江苏候补道汪瑞间，任事实心，不辞劳怨。业经臣另片奏请，将该员改归江苏补用，拟即派往上海，责成专办巡警事宜，随时会同关道妥筹商办。按照

南洋巡警章程，参以该处情形，稍为变通，酌定办法，期于因地制宜。以下各员先由江宁选派巡官及毕业学生，交该员等量才委用。巡士人等，即就上海原设警察学堂学生分派站岗，一面续招训练，竭意经营，庶几警力渐充。该匪党等知犯法必无幸免，将始而革面者，且继而革心。需费虽多，获益甚大。合无仰恳天恩，俯念上海治安关系中外全局，准如所请，敕部施行。地方幸甚，大局幸甚。除咨部查照外，所有筹办上海推广巡警情形，并请援案开支经费各缘由，谨会同江苏抚臣陈夔龙恭折具陈。伏乞皇太后、皇上圣鉴训示。谨奏。

端方等附片(同年四月)

再，据苏松太道瑞澄详：据上海县绅耆士商曹骧等禀：城垣之设，原所以卫民，道路之修，原所以便民。然仅有卫民之具，而不求便民之方，则地方终嫌闭滞。绅等世居上海，西人互市以前，城厢街道窄狭，居民安于俭朴，以步当车，原无所谓马路。及至互市以后，洋人经营租界，开筑马路，数十里内车马驰骤，四通八达，商市日见繁盛，始觉毗连之城，相形见绌。于是数年前，有马路工程局之设，而筑沿浦马路一条。去岁总工程师复在城内筑路数条，遂觉眼界一新。然欲与城外交道，则非添辟城门，并将现有之城门放大不可。伏查上海本只六门，同治初年添辟新北一门，迄今该门以内市面日盛，此为辟门有效之明证。今拟于道署东辕门东首城根开辟一门，名曰新东门；守府署西首城根辟一门，名曰新西门，九亩地大境北首城根开辟一门，名曰小西门；福佑路东首城根开辟一门，名曰小北门。又在外城根筑造马路一周，并将城内不通之淤河填筑马路。其原有之小东门及新北门，加宽、加高，以便车马往来。绅等询谋僉同，都人士亦无异议。绘具图说，呈祈转详。如荷准行，即当筹措经费，陆续兴办，以期地方益增繁盛。实于国计民生，均有裨益。等情。由该道转请奏咨立案前来。臣复加察核，该绅耆士商等所议填河、筑路、辟门、各层办法，均为地方公益起见，自应准其照办。除咨部外，理合会同江苏巡抚臣陈夔龙附片具奏，伏乞圣鉴训示，敕部立案施行。谨奏。

端方奏推广巡警添拨经费折(同年七月)

为上海推广巡警筹议开办情形，并援案添拨开办经费，奏明立案，恭折仰祈圣鉴事。窃查推广华界巡警，曾经臣会同抚臣陈夔龙奏派候补道汪瑞间前往会商江海关道瑞澄妥筹办理，并奏请援案每月在关税项下拨银一万两充作巡警经费，仍饬照章报部核销。钦奉朱批：“着照所请，该部知道。”钦此。钦遵在案。查上海推广巡警，关系重大。开办伊始，头绪纷繁，必须择要施行，庶几纲举目张，办事可渐收成效。经臣督饬该道等切实筹议，现在亟需举办各事，约有四端，谨为我皇太后、皇上明晰陈之：一、总局亟宜建造也。推广巡警非建设总局一所，不足以立基础而壮观瞻。目前租赁民房，只一时权宜之计。员司等分科治事，实不能容。华界又绝无宽敞房屋可以迁徙。揆度地势，应即在北市适中处所择地建设。参用中西形式，举凡办公、裁判、拘押各所，均须全备。局基约需四五亩。惟闸北并无官地公产，购

买民基，价值不免稍贵。然以每年裁节之租金计之，虽似费而实省。此建设总局之不容稍缓者也。一、学堂亟宜分设也。上年曾由关道瑞澄创办巡警学堂，暂就城内求志书院设立，仅招练警生一百六人，今年二月毕业，派赴北市、浦东各区局分段站岗，稍著成效。现既筹办推广，自非多招学生，分班授课，限期卒業，不为功。拟就城内原有学堂，先招学生一百三十名，选派教员开课训练，限期三个月卒業，分酌站巡。一面酌分地段广设学堂，招练警生，及添置制备。一切赓续经理，庶期警力渐充，得以分途而并进，成功较速，不致旷日而废时。此分设学堂之不容稍缓者也。一、区局亟宜扩充也。上海城内原设巡警，现只须照章编改，划分区局五处。其城外华界近已添设。北市两区局，曰北市东北区，设正巡官一员；曰北市西南区，设副巡官一员。浦东一区局，曰浦东第一区，设正、副巡官各一员。先就去岁招练毕业警生匀拨各段。惟既须实力推广，非将华界界线以内逐渐添设区局，加派岗位，不足以昭周密。现已飭令测绘，课员履勘丈量，迅将道里方向详细绘图，以便酌配岗位之多寡，定添招警兵之数目。一经测绘成图，即当经营布置。此扩充区局之不容稍缓者也。一、马巡亟宜添练也。北市毗连租界，地极辽阔。浦东则与川沙、南汇、宝山三邑接壤素为梟匪出没之区，劫夺横行，肆无忌惮。所虑者，现在招练警生尚须时日，此匪党伺隙勾结蠢动，随在堪虞。仅恃此少数之巡警查缉，断难周匝。查上海租界捕房章程，设有西捕马巡，昼夜轮流巡察，洵足辅捕巡之不逮。而于北市、浦东仿行，尤为相宜。兹拟迅速设立马巡一百名。参订南洋陆军章程，遴员教练，以之分拨北市、浦东各处，顾要逡巡，期捷呼应而壮声势。应需马匹及鞍鞴等件，即行派员分投采购，一切务求全备，以便克期兴办。此添练马巡之不容稍缓者也。以上四端，均属急切应办之事。此外如设消防队，及办理清道各事宜，亦须次第规划。所有开办经费，核实估计，约需银八万两。核计原拨推广经费按月动支银一万两，只抵放员弁巡士人等薪饷及局用活支。马匹、干粮名项通盘筹算，开支尚虑不敷。则此项开办经费，万不能不另行筹拨。事关治安全局，且为外人注目之区，若不组织完全，必致贻讥苟简。拟仍援案在江海关税项内如数支拨银八万两，充作开办经费。俾得悉心经画，迅观厥成。一面由臣督飭该道等分别考察，撙节支用。总期款不虚糜，功归实际。将来仍照章详细造册，报部核销。如或款尚有余，即当悉数拨入常经费，汇册支销。万一不敷，再随时察酌办理。臣为保护地方，消弭隐患起见，除咨部查照外，所有上海推广巡警，援案添拨开办经费，奏明立案缘由，谨会同江苏巡抚臣陈夔龙恭折具陈。伏乞圣鉴训示。谨奏。

江督端方致外部请宣布蒲拉他岛为中国属岛电(光绪三十四年八月二十九日)

安帅简电、大部二十七日电，均悉。查此事自上年九月奉大部飭查复：当以宜先查明确据，再与日人交涉，方昭慎重。嗣据驻宁日领所言经纬度考之，知即是碧列他岛。因此查出粤刻新译之《中国江海险要图记》及英国洋文《海图》并南洋派员所绘海图，均有此岛。所谓薄拉他士岛，即碧列他岛音转字也。当将查出各图，于十月二十一日由文报局函送钧部核办。兹据广州英领函文，首言中国海内，继言每年中间有中国渔船驶到，隐示此岛明属中国。后乃以英政府拟设灯塔为词，属询中国

：“此岛是否中国属岛”？是盖明知该岛为日人占据，见中国并未诘问，故为此旁敲侧击之词，暗为提醒催我宣布。详加筹度，此岛之属中国，广雅书局译刻之《中国江海险要图志》即系英国海图原本，彼既列诸中国海内，其非我之私言可知。似可即由大部据此图志照会英日，宣布此岛为中国属岛。或先派员持图面晤英使质证明白，再晤日使与之质证，看彼如何答复，再商办法。彼果皆无异词，然后再与日本交涉，请其将据岛之日商撤回。此时未与说明，遽派员往查，恐别生枝节。俟西泽撤回后，如果该岛应设灯塔，自当由总税务司转饬粤海税务司勘明建设。若欲于收回后加以布置，为善后之防，应请安帅就体察情形酌办。届时需用南洋大号兵舰，一俟接待美兵队事毕，当电萨军门派舰赴粤应用。统祈钧部酌夺、示遵。

端方等奏片(宣统元年三月)

再，上海内地向无自来水，光绪二十三年因与租界毗连，虑被侵越，经前任江海关道招令商人公司，集资承办。维时风气初开，安设水管无多，售水有限，且当经营伊始，所定水价，未敢取盈，因而获利甚微，招股不能应手。其购机建置，全由借垫而来。虽已竭蹶图成，而入不敷支，未能推广。其原办之商又相继物故，积欠累累，势渐不支，迨至上年冬间，沪市银根紧迫，该公司几有倾倒之危。闻将添招洋股，另行组织。设为外商入，则交涉易起，利权尽失，所关匪细，自不能不力为维持。当饬江海关道蔡乃煌，督同地方绅商，公同筹议。拟自本年二月十五日起，先由官担任借款，从权收回，暂行经理，以便清理水价。并将招股添机还款各事，次第筹商。仍俟规模大定，即交由工程局绅董接收，按照商律公司章程，另举总理协理，改为地方自办。惟查该公司原置地产、房屋、渠池、桥塔、水井，以及机器、水管各项物业，除折减外，现已估定作价规银一百二十五万两。内除该公司原欠大清银行及各商号、益善堂、书院所存公款，共约银九十八万余两，暂仍认息接借，约尚短银二十七万余两。拟由道库在于商部生息款内酌提银二十万两，改存该公司照旧生息。下余不敷之款，即由工程局绅董另为筹集。先将全业收回，俾免私行招顶，别生枝节。其一切调度，均责成江海关道督率各绅妥为经理。俟股款集有成数，欠款陆续还清，再将官督名目撤销，专归公司筹办，以一事权。据江海关道蔡乃煌详请核奏前来。臣查上海地方市面繁盛，居民栉比，自来水为日用必需之物，苟能经理得宜，非无余利可图。乃原定水价过廉，设管又少，承办之商力薄势涣，以致一蹶不振。今议设法改良，暂由官督绅办，一俟整顿就绪，即交归地方自办，既收众擎易举之效，且免主权旁落之虞。惟股款一时骤难招集，该道拟请由官担任，并请将商部生息之款酌提借给，系为暂济急需起见，自应照准。除批饬遵照，并咨部外，理合会同江苏巡抚臣陈启泰附片具陈，伏乞圣鉴，饬部查照立案施行。谨奏。

江督张人骏等奏浚浦工程已饬商税司照约办理片(宣统二年三月二十九日)

再黄浦第一、第二段收狭河道工程，由营造司奈格购料自办，四年以内，估需用款

银一百六十八万两。除已付银一百十余万两外，尚应续付银五十余万两。此次各国使臣，遽以额款将罄工程未竟为言，是意在延工浪费。狡谋已露，不可不防其渐。殊不知全工经费估有定额，既经订入专约，彼此均应遵守。就使事阅数年，江流形势，容有变迁之处，亦只能责成奈格详细研究，将原订合同以内不甚冲要之工程酌量减少，尽此额内应拨之余款移缓就急，完善其事而已。臣等已飭江海关道会商新任税务司，督同奈格测勘筹议。容俟稟复到日，再由臣人骏复飭遵办，另行奏报。复查浚浦专约第九条，本声明河工全费中国一律担任，并不向沿江地产往来货船征收税捐。然此指额内应拨之九百二十万两而言。今额款按数拨足，公约、专约，效力已尽，本无未了之事，各国使臣倘竟得步进步，多方要挟，为不遂不休之计，则是彼自违约，即属另一问题。万不得已，惟有要求各国令浦江进出口商船担任船货税捐。就款办工之法，庶几操纵在我，不致遗累无穷。所有臣等预防支节设法抵制缘由，谨附片密陈。伏乞皇上圣鉴训示。谨奏。

邮部咨外部日商戴生昌请添展清江浦至正阳关航路与约不符文(同年六月初五日)

为咨呈事。船政司案呈：查本部驳阻日商戴生昌行淮一案，当经咨行外务部、南洋大臣、安徽巡抚，并抄录内河招商轮局，与日商原订三公司合同，及镇江关道复日总领事函稿，咨呈外务部存查。各在案。兹准南洋大臣咨开：据镇江关道刘燕翼稟称：日商戴生昌请添展清江浦至正阳关小轮航路一节，前奉邮传部并宪台及安徽抚宪先后电飭驳阻，业已据约函请驻沪日本总领事有吉飭阻。嗣准函复：接华历四月十一日来文：日商戴生昌添展航路一事，查《内港行轮续补章程》非奉中国政府允准，不得由此不通商口岸之内地至彼不通商口岸之内地专行往来，载入日约附件。今日商请展清江浦至正阳关航线，既奉邮传部电飭阻止，即系政府不允，应无庸议。等因。查日商戴生昌添展小轮航线，系援照《中日行船章程》，及续补《内港行轮章程》，并光绪二十九年外务部核定《内港行轮暂行试办章程》办理，毫无不合。现利淮公司及招商局各商小轮既畅行无阻，该日商事同一律，何故独加阻止？极不公允！况邮传部出而阻止，更不可解。请分别详办施行，以便日商一律行驶。等情。到道。理合报祈转咨核办施行。等语。到本大臣。据此，应请查照核办。等因。前来。查《中日通商行轮章程》第五款内开：如日本船违章到中国别口，非系准行停泊之港，亦非准通商口岸，即将船货一并由中国罚充入官。《中日续补内港行轮章程》第七条内开：内港行轮风气未开，内地居民宜令少受惊扰。故凡内港其向未经轮船行驶者，须审查商民之便，方可开驶。第八条内开：非奉中国允准，不得由此不通商口岸之内地至彼不通商口岸之内地专行往来。光绪二十九年外务部核定《内港行轮暂行试办章程》第一条内开：凡内港轮船，欲前往轮船向未行驶之内港，或欲专作由此不通商口岸之内地至彼不通商口岸之内地贸易者，须俟政府允准后，方可发给专照前往，各等语。详译约章，均定明洋商行轮不通商口岸之内地必须中国政府允准方得开驶，其未经政府允准者，自难通行。且有非准通商口岸即将船货一并由中国罚充入官之文。今清江浦至正阳关一带，系属由此不通商口岸之内地至彼不通商口岸之内地，理应据约阻止。又况中外通商，自当体察该地情形，果无窒碍

，始能允准。否则商民抵抗，万一滋生事端，殊不足以尽邦交而资保护。故《中日续补内港行轮章程》第七条内所开于此节不憚再三声明，用意至为深远。此次日商行淮一案，本部业经迭接该处绅商电禀力争。如上年八月初十日据盱眙秦尔炽等、五河许家骏等电禀：洋商突然欲入淮行轮，破坏挖河公益，沿淮士民不服。八月十三日又据凤台学商李华翰等电禀：日商竞争航路，群情愤激，恐生交涉。八月二十五日，又据盱眙农商学各界六十人联名呈称：淮北连遭水患灾歉频仍，经上下游之绅商学界集股挖河，以通淤塞，不独有益商旅，且可永谈水灾。倘外商入淮将来必有冲突，吾淮风气尤其愚直，倘有事端，挽回不易。九月初二日又据镇阳关商务总会呈称：日商戴生昌派福建小轮窃探长淮，殊出情理之外。伏思职等竭尽心力，创办公司，开挖淮河，为淮民生命财产永远之计。即试行小轮，不过于淮水泛涨之时，权济行旅。淮人素性强悍，岂能忍受？设酿成交涉重案，恐公益未兴，公害又起，后患何堪设想！各等情，均经禀求阻止。到部。是该地绅商农学各界对于日商行淮，咸称不便，群情惊扰。核与中日续补《内港行轮章程》第七条相符。又如该地非准通商口岸，核与《中日通商行轮章程》第五款相符。本部业经据情电飭阻止，即系政府未经允准。核与中日续补《内港行轮章程》第八款，及外务部核定《内港行轮章程暂行试办章程》相符。所有日商戴生昌请添清江浦至正阳关航路一节，按之约章，既属不合，体察民情，尤多危险，碍难准行。除咨复南洋大臣并咨行安徽巡抚外，相应咨呈贵部查照可也。

江督张人骏咨外部日领言高濂行使伪钞已惩办文(同年七月初八日)

为咨呈事。两江洋务局王瓘禀称：现准日本井原领事函开：日本人高濂庄司、中尾宇造两名，前在芜湖行使伪造钞票，现经本领事查明一切，按照本国法律，判断高濂一名处以十年惩役之罪，中尾一名处以六个月惩役之罪。业已日历六月二十九日定规，现已送至上海总领事署执行其刑。等因。合即禀闻。等情，到本部堂。据此，查此案昨准皖抚部院请咨照约办理，当即咨请贵部查照核办在案。据禀前情，除分咨外，相应咨呈。为此咨请贵部，谨请查照施行。

张人骏奏片(宣统三年二月十六日)

再，上海北市地方，市面日渐繁盛，汲水不便，与英公司订立合同接管网水，请在商部存款项下拨银五万两，当经附奏，并飭江海关道会同绅董筹办在案。现据该道等称：正在与英公司磋商水价约期签字间，忽闻公共租界工部局从中干涉，无非为觊觎推广租界之意。乃于本地绅商再四妥议，金谓接管原属从权，自办乃为善策。当邀内地水厂洋工程司思杰尔偕往吴淞江边一路测量。查得广肇山庄北首水深而清，该处有地一方，约二十余亩，可以设厂。先从简便办法，造高水池一个，清水池一个，向外洋订购每日夜抽水六十万加伦之机器两副，并加购发电机一副，附电灯二千盏，以备闸北一带路灯及铺户装用。约计购地、造屋一切在内，需银十万。连前议安设水管之十万两，共银二十万两。昼夜工作，八个月可以出水。较之接管，

有利无害，成为一劳永逸之策。至加添银十万两，请仍在商部存款项下借拨五万两，另再由道担保商款五万两，连前合成二十万两。按月生息七厘。限于出水后一年招股，分别提还官商借款。如一年内股本不足，官商两款未能一律偿清，应将部款本利尽先归还。如再有不敷，即在每年开支余利款内凑数归清。详请奏咨前来。臣查上海北市以水源不洁，有碍卫生，屡致外人借口。与英厂接管购水，究属权操外人，莫若自办，免其外人觊觎。所请续借商部存款并利息按月七厘计算之处，合无仰恳天恩，敕部通融照准，俾得及早兴工。除咨明外务部、农工商部、度支部查照立案外，谨附片具陈。伏乞圣鉴。谨奏。

张人骏奏片(宣统三年四月二十八日)

再，上海北市以水源不洁，有碍卫生，屡启外人借口，初拟与英厂接管购水，续议设厂自办，请拨借商部存款，暨由沪道担保商款，先后共银二十万两，节经奏明奉旨交部议准，转饬分别遵办各在案。现据江苏苏松太道刘燕翼详称：据闸北自来水公司总董李钟珏以领款后购定地亩，测量、绘图，并向德国著名之厂购定机器锅炉，一面招匠估计包工、造筑水池，现已工程过半，大小水管亦已由制造局造齐，动工安设。一俟机器装齐，即可出水。惟查开办之初，因外人借口闸北地方不讲卫生，觊觎推广租界，故急谋建设，以图抵制。费欲其省，约估款目原极简单。开办后，时有洋人来场参观，询问办法。据洋工程司思杰尔一再考求，有须扩充者，有须增异者，有约估时未经开列者。再四商量，有不得不添之工程，即有不得不增之款项。现查全厂告成，约须银二十六万数百两，照原估增银六万数百两。此项增出之款，本当设局招股，无如沪市迭次恐慌，钱庄不通往来，金融十分呆滞。无论招股一时难集，即挪借亦无可商。现在工程已过六成，不敷之款，亟须应付，自应早为筹定。查有宣统二年四月间因开办官米平价局，奉饬由沪关借拨银八万两，作为购米成本。现该局业已办竣，正在催收造报。此项借款，除耗费外，尚存银七万四千余两。可否恳请即在此款内暂移银六万两，俾自来水得竟全功。一俟出水，招集股本，即将续借与前借之款一并归还，以重库储。等情。经该道委员勘验相符，复查无异，详请奏咨前来。臣查沪市银根奇绌，一时招股确有为难，所请以前借官米局平价项下收回米价七万四千余两内，移借六万两，接济前项自来水工费，无非期其速竟全功，克日出水，借杜外人侵占起见。合无仰恳天恩，敕部通融照准，俾得及早完工。除咨明外务部、农工商部、度支部，查照立案外，谨附片具陈。伏乞圣鉴训示。谨奏。

第十一卷 上海租界

光绪二十五年，上海开会议论推广租界事，议决要求北京各公使请其向清廷磋商。然清廷则以法人迫让墓地，有所芥蒂，不能遽允。而法公使则力主推广，非特欲西至徐家汇，且欲至黄浦江右岸，而英人抑之。法总领事赴宁与江督就商开辟租界事，英人以军舰二艘随之赴宁，助刘坤一与法人争。适卑尔司福亦低宁，痛陈法人要求之过甚。英公使复得其本国训电，命其勿允华人推广租界，苟不获已，则允法人推广至徐家汇，以为和解地。法人亦恐操之过急，转不得推广，乃拟得徐家汇地，以为收束之计。且知英人必不干涉其西行也，因西向开辟公馆马路，以防他国侵入。复筑宝昌路，直达徐家汇。而法租界所得之地转广，是诚非初愿所及。时租界面积，已三倍原数。盖初只一万六百零八亩，而今则增至三万二千一百十亩矣。时德人方要求另辟租界，后见租界日广，遂与他国杂居。万国公共租界，即于是始。

公共租界，面积计共三万二千余亩。俗所谓英租界、美租界是也。惟英界、美界，为前清光绪二十五年以前之名称。至是年西辟泥城桥以西至静安寺路，东北辟虹口迤东之地，以迄引翔港，由各国公使议决，将旧时英、美租界并东西新辟之地，统名曰“公共租界”。此租界名称之沿革也。

法工部局巡捕房之编制及组织，与昔日之英、美界，现在之公共租界，尚无大异。其界内行政及工部局议决章程，大致亦多模仿公界。如租界停止烟间，公界以两年为限，每半年抽签一次，停闭四分之一，而法界则缩短期间，以半年为限。若抽签及同时停闭尽净，则一也。烟禁以十年为限。上海广东为条约上最后禁尽之地。兹公界于五年夏间，将土膏各店按照停闭烟间办法，分期抽签。法界则于前数日接踵举办。此两界行政之互相规仿也。至去年推广新界，当道有鉴于旧界之几同割让，于新界约中颇能注意。又特别加入华董两名，俾华人有参预界务之权。然亦只限于新界。若旧时之法界一切界务，则华人仍无权过问。

上海市政，分内地与租界为二。内地市政，又分南市与闸北为二。就现制论，工程及捐务，统归工巡捐局主政，而警政则归淞沪警察厅节制。至租界市政，现时只有公共租界与法租界两界之上海市制，为吾国内地之先导。民国五年之冬，公共租界办理选举。各国以参预界务之故，颇有选举竞争，而住沪日人报纸之鼓吹尤力。盖日人于上海租界，历史上本无特别势力，故工部局董事员额向无日人。甲午以后，国际地位骤列一等。欧战骤起，协约国方面思有以剥夺德人在沪之权利。爰于工部局董事中，撤除德人原有之额，而以日俄当选人代之。独我中国以租界之主人翁，何反不能与于选举与被选举之列？按租界之有工部局，犹吾国城镇乡自治之有自治公所，管理租界行政事宜，固完全为民选机关也。局内有总董一员，董事十一员，分配于英美德三国人。而英员占多数，次美，次德，若其他各国，则合得一员。此为光绪二十五年合组公共租界时所定之章程。当从前英、美两界未经合并之先，两国各有分组之工部局。然近于私人间之集合，不遇自治刍形耳。闻当时界内举办各事

，悉由选出之董事，自行集款筹办。及效力已著，则复由董事以私人名义售归局中，而收其余利。此为从前工部局内部之组织。及公共租界成立，工商流寓日以繁殖，收入增加，规模大备。今则全界电灯厂，且该局营业。至华人退出市政范围之外，历史上尤有特别原因。当英、美界分立之时，市政组织既完全为自治性质，外人本无摈斥华人之意。惟彼时大多数华人心理，以闭关主意为原则，故于彼方私人及团体间之行动，吾人乃漠然无所动于中，一由政治观念之谬误，不屑参预，一由政治观念之薄弱，不知自治为何物，与选有何权利。迨光绪中叶，工部局之组织日有进步，势力愈见膨胀，而华人知识亦较前稍进。彼时中西情势虽仍隔膜，尚未情见势绌，故双方有互相提携之必要，工部局于是有华董名目之设。该局董事，在西人间有规定之国籍员额，尤有繁重之选举手续。而吾华人列名该局之董事，既非由正当之选举，且对于该局之性质责任，仍属不明。则偶任华董，不过视为名誉之荣事，借以增加若干商业上之信用而已。其不能称职可断言也。洎公共租界成立，局务扩充，规模逾进，而华人则完全退处于无权。

工部局会议，以法定人数多半之意见取决。及议案确定，公布实行，即成为界内一种法律。盖以公意所在，除服从外，无反对之余地。昔年工部局创办界内电灯厂与商办之自来火厂，有绝对的利害关系。且自来火厂总经理某即系工部局之议董，乃绌于大多数之公意，仍赞同局办之原案，置私人营业于不顾。此一例也。

租界收入，无过于捐项。公共工部局将租界电灯厂收归自办，则为公营业之一种。提蓝之西牢，创于一九零五年，其款即由新辟租界年捐盈余项下拨用。现时工部局进项，仍以捐项为最巨。捐项种类以时计算者，有月捐、有季捐、有年捐(三个月为一季。此公界之例。若法租界，则每两个月为一季，故每年收季捐凡六次。至年月以阳历计算，则与公界均同)。以物类计算者，有地皮捐、码头捐、房捐、各种营业执照捐。积久奉行，亦尚相安。

公共租界工部局之预算，分岁入、岁出二项。而二项之中，又分为经常与临时：

一、经常岁入与经常岁出：一九〇五年度，岁入三九四七五七〇两，岁出三六一三五七五两。

二、临时岁入与临时岁出：一九〇五年度，岁入九四一一一〇两，岁出九三八二二五两。

经常岁入之科目：

(一)地租；(二)房捐；(三)码头费；(四)营业费；(五)公有财产使用费；(六)市营事业之收入；(七)其它。

经常岁出之科目：

(一)义勇队费；(二)消防队费；(三)警察队费；(四)卫生费；(五)土木费；(六)教育费；(七)杂费；(八)其他。

临时岁出之科目：

(一)架桥费；(二)护工程费；(三)排水费；(四)土地；(五)建筑费；(六)游园地；(七)道路修筑费；(八)其他。

公共租界警察，一年约费八九十万两。干部为英人，下级多采印度人及华人。虹口有日人三名，充通译兼侦探。

中央警察署、在工部局内，属于参事会。捕头为英人。据一九一四年之报告，西捕二百八十四人，英人占多数；印捕五百七十二人；华捕一千一百八十七人，此外华人之充书记翻译者二百四十人。本署三课：(一)监督课；(二)交通课；(三)搜索课。

前记各项职员，分布于左列各警察署：

(一)中央；(二)北四川路；(三)老闸；(四)虹口；(五)西虹口；(六)汇山；(七)杨树浦；(八)戈登路；(九)哈尔滨路；(十)静安寺路。

此外会审衙门因执行警察事项，派西捕十二名。

警官员额，于一九一二年末为一千九百四十五人。约计对于人口，每二百七十八人为一人。

法租界警察属于参事会。总捕房即本部，在洋泾浜大自鸣钟桥。又东区在小东门，西区在宾昌路，卢家湾在斜桥，宝建路在徐家汇。监督署附属卢家湾。职员除总巡、副总巡、总稽查、侦探长各一人外，巡捕六十人，安南捕二百名，华捕二百五十四名，法探七名，华探五十名。

公共租界及法租界内之中国人数：公共租界共有华人六十二万零四百一人，法租界共有华人十四万六千五百九十五人。今将公共租界内人数，分省列表如下(一九一五年)：

江苏 230402人 浙江 201206人 广东 44811人 安徽 15471人

湖北 7997人 直隶 7211人 福建 5165人 山东 5158人

江西 5353人 河南 2481人 四川 3244人 山西 2135人

湖南 2798人 贵州 944人 陕西 1424人 广西 1464人

云南 1025人 甘肃 926人

按公共租界分中、东、西、北四区。所寓华人，以北区为最多，计十五万一千五百六十二人。次为中区，计十四万一千四百二十三人。又次为东区，计十三万八千九百五十六人。末为西区，计十万零七千二百七十四人。尚有八万一千一百八十六人，则分布于洋行、厂所、村庄、茅屋、轮船、小艇之间。兹将今次及前五次所查总数罗列于下，以资比较：

一九一五年 620401人

一九一〇年 488005人

一九〇五年 452716有

一九〇〇年 345276人

一八九五年 240995人

一八九〇年 168129人

公共租界与法租界之各国侨民总数(一九一五年)：

国 籍	公共租界	法租界	总 数
-----	------	-----	-----

日 本	7169	218	7387
-----	------	-----	------

英 国	4822	699	5521
-----	------	-----	------

葡萄牙	1323	29	1352
-----	------	----	------

美 国	1307	141	1448
-----	------	-----	------

德 国	1155	270	1425
-----	------	-----	------

俄 国	361	41	408
-----	-----	----	-----

法 国 244 364 608

西班牙 181 4 185

丹 麦 145 33 178

奥 匈 123 27 150

意 国 114 55 169

土 国 108 2 110

瑙 威 82 27 109

瑞 士 79 35 114

瑞 典 73 10 83

荷 兰 55 23 78

希 腊 41 7 48

波 斯 39 39

高 丽 20 20

比 国 18 32 50

罗 国 16 2 18

埃 及 8 8

阿美尼亚 5 5

腊丁美籍 5 4 9

孟 国 2 2

布 国 2 2

印度 1109 18 1127

杂类 13 364 377

总数 18519 2405 20924

上列总数，较前五年增多五千九百十二人。其中所增最多者为日本，共增三千九百二十一人。查一八九〇年日人寓公共租界者仅三百八十六人，一九〇〇年为七百三十六人。相差十年，数已加倍。此后来者日众。近十年内，增多三倍有余，亦云速矣。英人以近五年内，约增千数百人。然因年来归国从戎者逾五百人，故当调查时，仅增七百三十一人。此外美、德两国，各增四百余人。所减之国，以法、葡为最多，各一百五十八人。法因欧战影响之故，葡人来者不减于前，特以多向他国领事署注册，故反较少。此外增减者，九十人至数人不等。按公共租界之华人，前经宣布共六十二万四百零一人，加以外人一万八千五百十九人，共六十三万八千九百二十人。法租界共有华人十四万六千五百九十五人，外人二千四百零五人，合计之为十四万九千人。故两租界上年所寓外人民，共有七十八万七千九百二十人。若加以遗漏之数及华界户口，则上海一埠居民实数，当在一百五十万人左右也。

《密勒报》云：美国圣教书会海克司博士近在洛脱俱乐部演说，谓于一八七三年莅沪，当时租界上西式房屋仅三百九十间，一九一五年，增至三千九百二十九间。二十三年以来，租界上房屋新造者，约有十万间。一八七三年，租界上西人一千六百六十六人，华人七万五千人，今日华人约增至八十万。又一八七三年英法租界城内及浦东等处，统计华人约二十五万人，今日陡增至一百六十万云云。

上海租界(以下录王揖唐《上海租界记》)

宣统元年，外人扩充租界之意初未中阻。闰月初一日，租界纳捐之外国人于午前十时续议年会未了各议案，首议第八条。此次会议时须准工部局将铁路与苏州河间之地，由广肇山庄起至虹口公园止，一律圈入租界，请纳捐之地权，权与工部局，力持一到底，勿令稍松。工部局董事兰德尔君宣言：“推广租界一事，非以扩充租界为主义，实因无数之困难，逼令吾人出此。但此事非工部局之事，乃吾等政府驻京公使与政府之事，当案一八九九年推广租界之法办理。查当日推广租界之时，本由南洋大臣刘坤一将界线定妥，允准推广之后，始宣布于年会，前非由纳税西商列入年会案之内者。今诸公须知工部局并非专以图谋推广租界为事，工部局实不欲以此事逼我驻京大臣等。知此事为上海公众赞成之急务，而使工部局为之者。今诸公对此案立论之前，注意此次所谋推广之地两段，举其面积核之，实为极小之地耳。如第一段所谓闸北者是也。其地参差不一，围于租界三面，至第四面侧为沪宁铁路，围租界参差不一之界线，已见沪宁车站之处。至于第二段，右角上为虹口公园，虹口公园起，必能觅得极好之界线。铁路之东，毗连北四川路之间，所推广者亦属有

限。至于推广租界之原因，如前列之第一段即闸北者，现由华官管理。其法中西参半。虽设警察，并以新式之军械给巡士，奈此等巡士素少训练，均不胜巡士之职。工部局捕房巡捕，时与冲突者，因起于此等不称职之巡士也。今上海一隅，行政之权，已分为三，即公共租界、与华界是也。今华官经营闸北，分行政权为四处。察其原意，无非欲限外人扩充租界之外交。若其官于卫生及警察等事，办理不善，于租界极险。总之欲去目前不合理之事，及推广租界一切之困难，请诸公同心合意，赞成此事。请由各国驻京大臣向华政府交涉可也”。闻者鼓掌称善。慕沙君起而赞成兰德君之言，于是定议。

上海绅民及寓居上海之各省绅商，自闻西人决计欲推广租界后，即于闰二月二十一日齐集明伦堂会议此事。公推叶棣华君为临时主席，王行才君演说。略云：“英国既推广租界向北，法国必推广租界向南。外人势力日广，不但上海一隅受其影响，且沪宁铁路归入租界，将来赎归之后，必蹈胶济铁路覆辙。且从此蔓延长江流域，所谓天险将尽失矣！”嗣经张醒石、唐子瀛、陆松侯各抒意见，均谓亟应极力抵制。复经沈缙云宣告：“顷据某君报告，驻京公使于推广租界一事，催外部答复甚急。并有愿于租界内给与华人议董权利之说。并闻外部曾将此意电询江督，幸江督端氏深知华董之万不足恃，租界之万不可再推广，电复外部。恐外部于华董之果能有权利得公益与否，尚未深悉。吾等今日当先撮大概电陈外部，然后痛切辩论，备一公牒，专差人都呈递，务期达此目的。诸君如以为然，请举定起草员先拟公电，大众磋商。将来应如何为政府后盾，尚可从容缓议。总之，此事为我江苏全省关系，即为中国通国关系。我等当静候外部主持。诸君以为然否”？众皆赞成。当举姚子让、沈信卿为起草员，遂散会。

附主席报告稿：今日因推广租界问题，特开大会。查上次推广租界，早经前江督刘忠诚公声明，不得再行推广。乃几何时，复有推广之意。考其所据理由，无非以租界相接之华界卫生、警察，种种不善为言。其言之不足信，已由沪道辩驳。即如所言，租界无论推广至何地步，必有与华界衔接之处。上海除东距大海外，其南、西、北、三面，无一非人烟稠密之地。将来处处可以借口，推广二字，有何底止？且此次之所谓推广，浑称沪宁铁路南首、西首之地圈入租界，漫无限制，尤骇听闻。且默窃其意，直欲如俄国东清路线管辖旁地之例，以处沪宁。则其覬觐者，又不在此区区租界而已，六属皆将受其影响者也。工部局既以此怂恿驻使，驻使竟以此要求政府，至所谓租界之急欲推广者，系公众要求，非若向中政府要求物件，可以他物更代云云。不成理论之语，肆然形诸笔舌。此为可忍，孰不可忍？我外部驳拒于前，意必能坚持于后。但闻近日驻使催外部答复甚急，并有愿于租界内给与华人议董权利之说。关于本年西历三月二十九号工部局第二次答领事函中“无论何种意见，能与本地华人公共有益者，本局自当加意谨慎研究”数语，可知此说实非无因。甘言为外人惯技。历年外交失败之故，靡不由此。万一外部为所摇惑，稍一松劲，后患何堪设想！微论所谓议董权利云者，不过哄我之虚言。即令实行，而以大易小，亦殊得不偿失。诸君勿谓租界在上、宝两邑界内，仅上海与宝山有关系也。租界逼近车

站，将来沪宁铁路之后，扼吭受制，亦成废路。此种关系，实为江苏全省之关系，亦即中国通国之关系。事机急迫，稍纵即逝。除两次电求外部始终坚拒外，吾国民当各竭心思，设法对待。须知租界所及，主权尽失。利害攸关，不容坐视。方今预备立宪时代，万事取决舆论。苟我国民确能为政府之后盾，众怒难犯，政府既显有所恃，即外人隐有所惧，当不致挽回无术。但究应如何文明抵制，如何力戒暴动，此实今日所宜急急研究之事云云。

附录公呈外务部电

英使要求推广公共租界，业由上海绅商电请力拒。今日沪上开会，见报载有数华董，无补万一。而目前所议推广之地，适当沪宁路之起点，为全省主权关系，亦为全国利害关系。非坚持到底，后患甚巨，务请大部始终力争，以保主权而慰众望。除具呈外，合亟电闻。上、宝绅民暨旅沪各省绅商等稟。

照录沪人最近发表之《修正租界章程》(草案)

第一款 划定租界四址。

上海公共租界，于前清光绪二十五年即西历一千八百九十九年，两江总督刘所派之委员暨上海县，会同工部局首董商订推广之四址为：

北：苏州河(即吴淞江)。自小沙渡接连泥城浜处之西约七十码地方，由此处朝北到宝山、上海两县之界线，由北界线一直至相连虹口港地方，由此处朝东，至顾家浜口。

东：黄浦江。自顾家浜口到洋泾浜口。

南：洋泾浜。自洋泾浜口至接连泥城浜处，由此向西南大西路长浜之北首处路，并向此处路直接静安寺镇后面之五圣庙。

西：自五圣庙一直朝北，至苏州河小沙渡地方。

虹口租界四址，于前清光绪十九年五月十三日即西历一千八百九十三年六月二十六日，中国地方官与各国领事官所派之员，会同商订上海吴淞江北首虹口地方之租界四址如下：

自苏州河(即吴淞江)北首，即二十七保及二十五保交界地方，立第一号界石。再由此处朝东直线至西穿虹浜，立第二界石。再由此处朝北，从相连第二副号界石起，沿西穿虹浜南岸，至第三号界石，即在锡金公所之东南角。再由此处直线向东北，

至第五号界石，即在相近界浜地方。再由此处沿向外之湾弓式线至第五号界石。再由此处向东，直线至第六号界石，即在界浜南岸，齐北河南路之西边。再由此处向东，穿过北河南路，沿宝山、上海两县之界线，立第七、第八、第九号界石。其第九号界石，系在美国领署注册第五百九九号地之东南角。由第九号界石起，向东直线至第十号界石，即在美国领事署注册第一千八百八十五号地上。再由此处从相连第十一号界石之第十一副号界石起，直线向东南至第十二号界石，即在虹口港之东岸。再由此处直线向东，至第十三号界石。再由相连第十三号界石之第十四号界石起，直线向东南，至第十五号界石，即美国领事署注册第六百十七号地上。再由第十五号界石相连之十五副号界石起，直线向东北，至第十六号界石，即周家舍村并相近东尽之处。再由相连第十六号界石之第十七号界石起，直线向东，至十八号、第十九号界石。其十九号界石，系在圆通寺前小浜之东岸。再由相连第十九号界石之第十九副号界石起，直线向东南，至第二十号界石，即在马风浜之北岸。再由相连第二十号界石之第二十一号界石起，直线向东南，至第二十二号界石，即在西薛家浜村庄之东北尽处。再由相连第二十二号之第二十三号界石起，直线向南，至第二十四号之第二十五号界石起，直线向东南，至第二十六号、二十七号、二十八号、二十九号界石，系在相连英国领事署注册第一千九百十一号地之东北角。再由相连第二十九号相连之界石第三十号界石起，直线向东南，至第三十一号、三十二号、三十三号、三十四号界石。其第三十四号界石，系在徐家宅村庄北首杨树浦港之西岸。再由此处沿杨树浦港至黄浦江，再由此处沿黄浦江至苏州河口，再由此处沿苏州河北沿止。

以上两段租界四址，由上海交涉使会同领袖领事，于订约后三个月内详加厘正，绘图列说，以凭遵守。上列租界之址与中国境毗连之处，应筑界路一条，由中国警察与租界共同管理。其未筑成之界路，由中国之工巡捐局会同公共租界市会筹款建筑。其跨河之桥梁亦同。

吴淞江(即苏州河)不在租界之内，归中国地方官遣派水警管理。所有南北岸之线，将来测勘河身，会同划定之。先修建驳岸或码头，不得填出河外，淤塞河身。

租界之内不归市会管理之地，开列于后：

一、中国国家公用之地，及春申庙、天后宫、下海庙、鲁班殿、静土庵。

一、与中国有和约各国专为国家公用之地。

第二款 市会之权限及纳捐人会议。租界之内，设立市会。其办事权限如下：

一、抽收马路、码头、房地以及各项之捐。

二、与造租界内各项应办工程，及常年修理之事。

三、租界内各项应办工程，整治清洁，设立路灯，储水洒地，开通沟渠之事。

四、租界内教育事务。

五、租界救火、防疫、检毒、卫生等事。

六、租界救贫事业。

七、设立警察，稽查街道，清查户口。

八、筹备市会公用基地房屋或租或买等事。

九、筹措市会应行延请雇用之办公上下各项人役月支公费。

十、筹设公众娱乐及游戏之公园。

十一、发行市公债。

增加市民之负担及应办各项事务，须由市会董事制定预算决算，交纳税人会议，以纳税人会议出席过半数之通过，方能施行。其未经通过者，按照上届预算办理。

纳税人会议，于每年三月间由市会定期召集。但须于二十一天以前登报广告。

纳税人会议职权如下：

议决公共租界内一切单行章程。

议决界内之预算及决算。

议决市税。

议决市债之募集及市会有负担之契约。

第三款 市会董事权限如下：

一、有行使本章程所规定各项职权。

二、有提议预算决算及各项章程之权。

三、有召集纳捐人临时会之权。但须将应议事件，于十日前登报声明。

第四款 市会董事之选举。

凡市会董事，应由各执业租主、业主及有权议事人，照第二款会议按后开章程选举之。董事额设十五员。

第五款 董事之预选与决选。

凡例得有权议事之人二名，可预选合格者一人为市会候选董事。预选人须在预选票内署名签押，并取具候选人之应选书，于选举董事期之日以前送交市董选举委员接收。市会于收票限满之次日，将预选候选人名登记清册，榜示于公众共见之处，并刊入中西新闻纸内。市会派委员六人，专司选举之事，在择定收票处所设定，接收选举人决选授票。此项决选票刊入预选候董事姓名，由市会委员按照选举人名册，发给各到场选举人，就票载候补董事人名加圈决选。每票加圈人名，不得超过十五名之定额。并各在票上署名签字，投票入匚。

投票事宜，限两日办竣。每日自上午九时起，下午五时止。于限满之日，由市会另派开票委员十二人，开匚检查票数。以得票最多者十五名为当选董事，榜示公众。以次多数之十五名，为候补董事。

一、住居租界华人或外人，具左列资格之一者，均有选举权及议事权：

(甲)所执不动产，价满五百两以上者。

(乙)每年所付房地捐项，照市会估算满十两以上者。但各执照费不在内。

(丙)赁住房屋，照市会估算，每年租金在五百两以上，而付捐者。

一、住居租界华人或外人，具左列资格之一者，有被选举为董事之权：

(甲)每年所付房地各捐，照市会估算，满五十两者。

(乙)赁住房屋，每年租金照市会估算，满一千二百两者。

前项所载执业付捐均须自己出名，而名下应付各捐毫无蒂欠者，始为合格。

凡有选举权、议事权者，每一公司行号或一居户，凡数家合租一屋，不得以一居户论，不得过一权。凡有选举权及议事权者，由市会于每年十二月一日起详悉调查，编造名册，并宣示公众。如有差误，于十日内函请更正。

第六款 市会董事任事限期。

市会董事任期一年。在任期内经手帐目，于年会核准报销后，将任内一切收支款目，移交董事接收。新任董事于第一次会期，即公同选举总董、副总董各一人。一年为期。凡会议之时，正副总董缺席时，由各董事公推一人为临时主席。

第七款 董事会议。

董事会议之时，可否相等，则以主席之票加入。

凡有过半数之出席。方可定义施行。

第八款 纳捐人临时会议。

遇有特别事故时，凡执业租主、业主及有权议事人一百人以上之同意，均得随时订期召集纳捐人临时会议。会期及议案，须先期十天宣示。临时会议时，租界执业租主、业主及有权议事人，至少须有三分之一以上到会，方可开议。有权议事人离境时，得给据托人代办。

须有到会人过半数同意，始得决议。议事时，临时公推一人为议长，决议必由议长交市会董事执行。

第九款 决算。

市会凡一切收支款目，应遵本章程第二款所定，年会时交纳捐人会议通过方为有效，仍将决算清册用华、英两种文字刊供众览。

第十款 公布收支款项。

市会董事须将一年中经手收支各款制成清册，于年会十日前公布公众，但所有应收应支各款，不得逾年会议决及临时会议决者。

第十一款 任用员役。

市会员役受市会董事之指挥，办理应行事务。其名额薪工，均照预算案支給。任免

之权归诸董事。

第十二款 市会职员被控之责任。

市会董事及一切办事人等，因办理市会事务确系遵章而被控者，其一切责任不归于本人，因而需用款项，均由市会公款内支付。但非遵章而被控者，不在此限。

第十三款 市会诉讼及特别公堂之组织。

市会可为原告或被告，均由市会总董出名，或用上海公共租界市会出名。所有诉讼人应享之权利，应尽之义务，市会一体享受之、负担之，毫无区别。惟将应受之责任，专归于市会之产业，不与经手之董事及总理人相涉。

凡控告市会及其经理人者，由有约各国领事官及中国审判官，会同组织特别公堂受理之。由呈诉人呈请本国官长，一个月内邀齐各国领事及中国法官，推出三人组织特别公堂审理之。但呈诉人国之官长，必须推出一人。

第十四款 租地及购地之法。

凡在所定租界限内，有人欲向中国业户、西人租户购买或转地基、置买房屋者，须遵照章程后开规则办理。西人永远租地，或华人自行购地，必查无关碍，方准原租主、业主商定价值。西人禀明该管领事官，华人禀明上海道尹，呈出原租主、业主所写永远租契或卖契，一式两纸，绘图一纸，画出地形，详载四址。领事官即据与转送上海道尹衙门，查明所购之地事俱妥当无碍，然后加盖印信，移还给执。其华人买主迳呈道署者，即核明盖印，迳行给执。该地价值，即可照数付清。若所租或所购地基内有墓坟厝柩等情，或迁葬，或搬让，必须临时商办。因中国例，此情节不写入租契或买契之内故也。

第十五款 租地、购地及典押地产，均须注册。

凡遵照以上列章置业立契，事竣后限一年内西人租主持赴该管领事衙门，华人业主持赴上海道尹衙门注册。以后如有典押各情，亦须于一月内赴该管官署注册。

第十六款 转契亦须注册。

凡转租、转卖地基，须在该契原注册领事署或道尹衙门呈明。其得主亦须赴该管衙门注册，并由领事官或道尹通知市会。

第十七款 立分界石碑。

凡租地或购地之四至，必经中国官员、该管领事督率办理，竖立分界石碑。将编成号数，用英、汉文字合写，刊刻明白确实。预订日期，届时由该管领事或道尹，派人传同执业租主、亭耆、地保、原业户等偕往，查与道路界限均无违碍，方准将分界石碑竖立，以免将来因此争论，致启讼端。

第十八款 限期完纳年租。

凡中国业户自行执业或租与西人之地，于中国宅地税法未施行前，每亩应完纳税银或年租银币大洋一圆五角，限于十二月十五日预将明年地租全行照完。如有迟延抗缴等情，即由上海道尹函致租界公堂或该管领事官，向执业之人追缴。

第十九款 建造房屋之取缔。

市会设定造屋条规，以便稽查新造房屋之墙垣基地、屋顶烟囱，是否坚固、足以御灾、留出空地，清气能否流通，沟渠坑侧及堆于垃圾处所是否合式，至不宜居住之屋，或应永闭暂关等事。各租主建盖房屋，须先将图样交市会查阅，工作时派人勘视。如造屋违式，可以飭令拆去，或改造式样。

第二十款 坟墓。

租界以内应行专择合宜地方，为西人建造坟墓之需。至西人所租基地内，如有中国原业户坟墓，非与商允，不得擅行迁去。所有未迁之墓，亦准原业主随时查视，届期祭扫。总之，租界以内，不准再行于基地上埋棺厝柩。

第二十一款 让出公用之地。

凡在租界以内已经业主、租主让出作公用之地，如道路涨滩之类，专作公用，不得另作别用。即将来置买新地内，如有涨滩，亦必凭照此章让作公用，以备推广开筑公用之路。由市会于每年一月拟定所开新路，交由纳捐人会议议决。

转租基地内，如有续涨滩地，及应开道路之地，必由承租人照章让出，作为公用。

凡照章让出及作公用之地，除由纳税人会议议决，允将该地给还原主收回者外，不得由原主自行收回。

凡市会拟作公用公路之地，应绘图样宣示。各该业主、租主于图据未宣示以前已经管业，或虽已承租而尚未管掌者，限三个月内准时将详细情形及不应遵让之处，函报市会，或诣会面陈，或托人代诉，听候市会核断。倘逾限已四个月及图样宣示一年内，并已将该业主、租主所陈核定，而仍行抗争，即由市会函请后开选立勘估之

地值地产董事公同核断。估给地值及屋价，如再不遵，由该业主、租主向特别公堂呈控。勘估地值之地产董事，须选立三员。一员即于西历每年正月十五日以前由市会会议派充，一员由纳税人在每年纳税十两以上各业主、租主互选，一员由房租每年在五百两以上各户互选之。即与选举市会董事之日投票选举。于选举前七日，由纳税人纳捐人二人各推候补地产董事宣示大众，俾可投票。以得票最多者为当选之地产董事，次多数者为候补之地产董事。董事均于每年出捐人会议之次日莅任办公。一年满期，须将任内经手未完事件料理清楚，方可交卸。凡在公局支领薪水之人，不得选派为地产董事。董事公费，由公款内提给。酬劳之项，由市会预定，或照办事久暂核付。

第二十二款 违背租界章程。

违背租界章程者，其罚例有二：一、罚金不得过三百元；一、羁押不得过六个月。如系外人，市会送交该管领事核办。若系华人，或无领事管束及无领事裁判权之国人，有违章情事，由市会交由会审公廨核办。如所犯之罪在违背本章程以上之刑事案件，及民诉讼应归上海审判厅办理者，会审公廨不得讯判。

第二十三款 控追欠捐。

倘有人不肯付捐，即照此章所收之各项捐款，□及不遵缴罚款，即后附规例内各犯例之罚款，□由会或所委之经理人投该管官署控追，俟奉准后按律施行，以便将欠捐追回。若欠捐人系属货主，无从查寻，市会即诉该管衙门，判决后即将该货□另行设法，将欠捐追回。若查系房地业主，即酌取其产业名下若干，以足抵其欠捐之数为止。

第二十四款 追缴规例内罚款。

凡违背附规例内应罚各款，或不付执照费，市会均可投票该管官署控告。该管官署查明属实，即饬犯例之人遵缴。或付出罚款，或存项充用。并饬将讼费付出，即公局控追犯例人罚款所费之项，或云堂费。均由该署按律办理。至按此章之□现在已定将来酌定□规例内一切罚款等项，均登记簿上，以资充裕，而便照章支用。

第二十五款 修改章程。

此项章程。将来如有更改、增添，或所载语言所给权柄等项有可疑惑之处，即由各领事或中国官厅会同商拟。必俟各国公使及中国政府批准，方可规定。

第二十六款 用语释例。

本章程所称执业租主，指外人租地者而言，业主指华人原业主或新购地产者而言。纳捐人，指第五款有选举及议事者而言。称租主，有时所指第八款有权之义。本章之上海道，即指现在之上海道尹。及以后继承该项职务之衙门而言。又本章之上海审判厅，即前之上海县衙门，及今上海地方审判厅，或将来继承该项诉讼之衙门而言。本章所称工巡捐局，即现在办理工程事宜之局所，或将来继承该局之机关而言。

自开商埠

自开商埠，为变相之租界。不过租界为外人之原动，而自开商埠则我国之原动耳。原动力既异，则办法亦不能无异。中国租界以上海为最巨，租界中外人政治上之权力亦最大。行政事项，均由外人主持者无论矣，即司法方面之审理词讼，名为由华官主政，除革命后公堂内设立检察处长，管理行政事宜，华人以民事涉讼，亦均由各国领事派员观审，且名为观审，实际无殊会审，为民国新例外。即在前清传提各票，非由领袖领事签字，不能在界内捕人。而违警案及刑事案，一律归捕房解解请究。开庭时，由英、美、德三国领事轮流会审。人但知外人在中国有领事裁判，不知在上海租界并有混合裁判权。中国租界不止上海一处，固未可以上海租界概之各处，然而租界政权之落于外人，则全国一而已。若自开商埠，则差胜矣。论其性质，本无异于租界。故外人得以开设商店，而各国亦复派驻领事。惟领事之权，仅限于裁判本国驻埠之侨民，至此外商埠中之行政及华人相互事宜，外人概不能有所干预。简捷言之，租界政权在外人，自开商埠则政权尚在本国也。此与租界相异之点也。其与吾国原有商场相异者，则有最显著之二事。一为原有商场不设海关，一则原有商场不准外人营业。即条约所载“内地不准开设行栈”。内地云者，其初不过对于租界而言。自有自开商埠之一例，则内地又别于通商口岸而言。盖租界与自开商埠，均为通商口岸，则均非内地可知。此与自开商埠异者一也。海关为经征国际货税之机关。论商税之原理，国内通过，自无科税之可言。然自前清咸同间以兵事筹款，国内创办厘金迄今未知能革，于是国内输运之货，其由轮路装运者，稽征之权，亦委之海关。然其初亦限租界也。自开商埠之例行，以兼容外人之故，则必有土客各货之输进输出，而稽征之海关，因亦建设。原有商埠则无是也。此其与自开商埠异者二也。盖从积极方面言，日本当互市之初期，欧人东来者，何尝不以威中国者威日本？故日本在昔之居留地，即我国之租界然。试问今日日本尚有租界乎？以何种政策而达取消之目的乎？余曰：“由自开商埠始”。则自开商埠，宁非收回治权之一大动机乎？更从消极方面言，则中国自开商埠，处于被动而非主动，名为自开商埠，实则保全领土之代名词耳。故中国自开商埠愈多，就第一时期而言，则外力侵入之地愈广，就第二时期言，则国际均势之局愈危。领事裁判权，非有特别条约，无由发生。故各国之有领事裁判权于中国者，俄以雍正五年之《恰克图界约》（见该约第一款），英以咸丰八年之《中英续约》（见该约第十五款），美以咸丰八年之《中美条约》（见该约第二十七款），德以咸丰十一年之《中德条约》（见该约第三十九款），日以同治十年之《中日修好条约》、光绪二十二年之《中日通商行船条约》第二

款复声明之。往昔中国原有领事裁判权于日本，以《马关条约》而消灭焉。欧美诸国，在日本之领事裁判权，均经日本先后订约收回。日本之收回领事裁判权，先例具在。顾手续程序搜采故实，尚未得其翔实。兹先就日人某氏所著之《撤回历史》译述如左。倘有当于参考，亦有佞所厚幸也。

新条约实施之结果，废止居留地制，领事裁判权同时撤回，内外人民均支配于日本法律之下。所谓领事裁判者，居留人民不服其所在国之法律，由该国所派领事裁判之谓也。此领事裁判权，实三十年来我国法权至大之伤害。及新条约缔结，各国始撤回此不正当之领事裁判权。其规定于《英日条约》者如左：自本条约实施之日起，所有两缔盟国间嘉永七年八月二十三日(即一八五四年十月十四日)约定、庆应二年五月十三日(即一八六六年六月二十五日)缔结之政规约定、安政五年七月十八日(即一八五八年八月二十六日)缔结之修好通商条约及一切附属诸约定，诸条约及诸约定，一概作为无效。大不列颠国于日本帝国所执行之裁判权，及关于该权又其一部分大不列颠国臣民所享有之特权无豁免等，自本条约之实施之日起，不另通知，完全消灭。至裁判管辖权，本条实施后，由日本帝国裁判所执行之。

日本之先例既如彼，考暹罗国之设国际法院，亦是收回过渡时代之最良办法。此项法院，原为该国北境有英籍、法籍各人族而设。英政府已将英籍之原、被告全归该院审理。所有法官，不但由暹罗政府选派，且即以北省审判厅兼任。惟遇有英国当事人案件，得由英领到案陈述意见。近为收回领事裁判权之进行，已将该法院推广及各行省。其在北省之法人，无论原告被告，亦归该院审理。盖法国已承认暹罗上告院有管辖法国人不论原被告之案件，即系将法国一部分领事裁判权退还暹罗。至一九零七年条约，又进一步竟将法国籍之亚洲人诉讼，完全归暹罗审判厅审理。最近中美新闻社译《密勒评论报》云：中政府与外交团关于收回上海会审公廨，及推广租界两问题之谈判，现已停顿。中政府必欲公厅主权完全无条件收回，而闸北一部分划入租界，亦不承认，故此两问题迄未解决。上海中国商民要求租界内参政权，前派代表来京，向外部陈述意见，请政府予以赞助，不达目的不止。否则，将拒绝纳税。现此等代表甫返上海。又据沪电称：租界商民拟乘朱尔典公使莅沪之机会，公推代表谒朱陈述一切，俾朱表示同情，使上海《地产章程》得以改革。假使外交团允许上海华人得于工部局参预政治，则公廨、租界两问题，或得早日解决，未可知也。记者请乘此机会，略述会审公廨之历史，或为读者所乐闻乎？查公廨之设立，发起于哈雷巴克斯爵士，时在一八六四年。公廨原设在英领事署内。前清时正会审官由中国政府委任，审理一切华人民事案件。其牵涉洋商之案，则由该管领事派员会审。其刑事案件关涉利益者，亦由洋员会审。先是一八六八年订《洋泾浜会审章程》，规定租界内一切法律事件之办法，另有关于手续之章程十条。惟施行既久，渐失原旨。一九零四年北京外交团领袖奥国公使提议修改，亦无结果。一九一一年，革命事起，全国骚乱。上海外人之意，以会审公廨新旧当局均不措意，恐机关停顿，领事团遂以维持现状为名，宣言暂将公廨接管。随又委任华人谏员，修改《洋泾浜章程》，改组公廨内容。凡华人案件、华人外人混合案件，不论民事、刑事

，均由谘员与洋员会同审判。判决之后，不能上诉。前中国银行洋员巴西利一案，即因华员与意国陪审员意见不协，尚未解决也。自领事国接管公廨后，中国外部即令驻沪交涉员提出抗议。领事团以民国未经列强正式承认，未便与华官交涉为词，拒绝不理。迨一九一三年冬间，民国政府经各国承认，外交部即与驻京使领袖朱尔典开议，同时上海交涉员亦与领事团开谈判。朱使允为尽力，并议先派员至沪调查。一九一四年六月，朱使以外交团领袖名义致照会于外部，略谓彼之同僚愿以公廨主权交还中国，但须中政府允许保留一九一一年后领事团所行公廨一切改良方法，并以正式公文表示此意。至所谓改良方法之要点如下：(一)谘员四人，由中政府任命，但须先经领事团同意。正会审官之职位，等于高等法庭之裁判长。凡属纯粹华人民事案件，亦须许洋员会审。(二)一切刑事案件，公廨得判决监禁五年以上之罚，并有权判决死罪。死刑执行地，设在租界之外，由华官监视行刑，并由谘员与会审洋员协同验尸。(三)公廨所有监狱及拘留所，均归巡捕房管理。公廨发出命令传票及牌票等，由巡捕执行。关于旧时差役之章程，一概废止。(四)华洋混合案件，倘道尹及领事意见不协，则仍照公廨原判执行。(五)公廨行政及经济事务，应归外国监查员及其书记员管理。公廨所有职员，均归外国监查员节制，并监督财政事务。监查员及其书记员，由领事团指定，归中政府任命之。关于以上五条件，讨论甚久。外交部以其不仅与旧章不合，且妨碍中国主权，故不能承认，提议仍用《洋泾浜会审章程》。而于公廨收回后，逐渐加以修改。外交团则谓公廨一切手续既经改良，旧章不能仍视为有效。朱使并告中政府，谓他国公使所拟办，较彼所拟之五条，尤于中国主权有损云。外部旋于一九一四年十月修改上述五条，答复如下：(一)公廨谘员，当然由中政府任命。任命之后，只以其姓名通告领事团。正会审官，由外交、司法两部合荐，请总统任命。其职位等于一高等法庭之裁判长。公廨一切职员，均归正会审官节制。纯粹华人案件，审问时无洋员陪审，且须以中国法律判断。(二)一切刑事案件以至判五年以上监禁之案，可由公廨处断，惟依中国法律及《洋泾浜章程》。监禁十年以上之刑或死刑，应呈请司法部核准。倘司法部不同意，应说明理由交公廨重审。第二次之判决，仍呈报司法部核准。凡经司法部核准在处死刑之罪犯，应解交华官执行死刑，由谘员及陪审洋员会同验尸。(三)照办。(四)对于道尹及领事上诉之旧章，仍行保存。倘道尹与领事意见不协，应会同请一第三国之领事，与彼等协同审供而公判之。(五)公廨总务及会计，应归秘书及其书记员管理。秘书对于节制其用人及监理财政，应有全权。秘书及其书记员，由中政府聘任之。外交团于是年十二月二十八日答复，谓第一条谘员姓名，仅仅通告领事团一层不能同意。至于第四条请第三国领事公判一层，与条约规定不符。又第五条中应用“外国书记”字样。至于《洋泾浜章程》，朱使谓彼前复文中并未提及，该章程系当时公使所拟，只借试用一年，目下公廨一切办法，既早已与旧章不符，勿庸再提。并谓提及《洋泾浜章程》，无异重提一九一一年以前之公廨情形云。中政府于一九一五年八月答复朱使，允于书记之上加“外国”字样。惟前于上诉一问题，不能同意。谓道尹与领事不同意时，仍执行公堂原判，则不足保护案内中外人之利益，而与上诉原则不合。惟中政府为调和起见，将第四条修正如下：道尹及领事复审制，仍保存道尹及领事受上诉后，应先请公堂换一谘员重审。该案原陪审之洋员，

亦酌量更换。倘二次判决后，原、被告均不满意，可再上诉于道尹及领事。倘道尹与领事意见不一，然后照第二次公堂原判执行。以上各提议，以后谈判甚久，欧战开后，谈判中止。查此项交涉最大困难，系领事团对于谘员之任命要求同意，而中政府只肯于任命后将姓名通知。至于其他条件，并无十分齟齬之处，可以互让解决也。一九一七年，伍廷芳为外交总长时，又提议公廨问题得最后之解决，并经国务院通过。惟当时欧战正酣，有某某数国以公廨收回之后彼等亦不能乘机图推广租界之利益，故不愿实行，遂又停罢。迨距数月以前，公廨问题复活，当局从事秘密谈判，表面则时时否认之，不使人民预闻。惟上海领事团对于谘员任命一层仍执前议。有某公使愿代中政府出力，劝其同僚允许，仅由中政府以谘员姓名通告。但此时形势与前大异，中政府又不仅承认如此办法。一则商民经欧战之教训，既闻西国许多大政治家之名论，知爱人及自决等主义为天经地义，以后国际断不容有侵略行为，上海租界华人七十万向无参政权，而上次由战地回申之外国军人所需奖金，则取给于华人非常不平，故必欲取得租界参政之权，会审公廨亦必须无条件收回。再则司法部对于公廨主权不全收回之办法，亦加反对。有某高级法官云：一国之主权，以司法之独立表示。故领事团对于谘员同意一层，决不能承认，此点已决无可商量云。至于公堂与租界两问题，显无关系，而今则并为一谈。有一素以公道待中国之使馆谓此两事实应分别讨论。据该之意，公堂之收回，却宜令领事团仍有发言权，以免司法腐败，有碍租界治安。租界问题，则应另议。惟其他数使馆极注意于租界之推广者，则显欲以公廨之收回，为租界推广之交换。然口头不能言明。盖一经说出，则俨然自认以一九一一年所强行取得之物而交换别项利益也。目下租界问题亦难解决。一九一七年，中政府本已决定租界推广至闸北，惟因外交团纯粹私利目的之结果，致迟未实行。倘当时即行推广，由中政府作主，已成之局，人民不致反对。今则不然。北京不能不俯从民意，否则恐酿成大反抗。外人谓华人既喜居租界，何以反对？推广之后，闸北地价可以增涨。此说固然。惟华人之答词，则谓租界已成盗贼渊藪，不良分子均以租界为乐土。而毗连之华界，虽卫生行政不及租界，而安静则过之。至于租界娼妓一切恶弊，无不包容犯罪之人，只须有律师为之辩护，即能幸逃法网也。上海各界人物，现纷纷打电至政府，反对推广租界。谓政府如从领事团之议，则将用罢业排货及其他和平方法，从事抵制。大约华人中除少数具有私目的者外，赞成推广租界者绝少。政府目下对于此问题，极为棘手。有某外人提议一解决法，谓宜以中外各半数之法官组织一部办理公廨司法事务。此等外国法官，从欧美各大国选出，中政府聘用须为著名公正光明之人物。如此则公廨可得三良果：一为公断租界案件；二为训练华员，俾有相当资格，假定于三年以后，调往他处；三则供给先例及材料，为修改中国法典，废除治外法权之预备。惟中政府以为此等外国法官，势必服从其本国政府之意旨，而于中国无利益。且如有一法官退出公廨，而代以一不良之陪审员，则将引国际纠葛。故此项办法殊未必能成也。若据一般有思想之华人意见，则最好由领事团抛弃其主张，完全将公廨归还中国，而推广租界之举，亦暂时不提，并许界内华人得有参预市政之权。关于收税事，必须取得华人同意。此项开明公道政策，实行若干时后，华人自觉满意，则再提推广问题，必易于解决矣。若此时强迫为之，则甚为危险也。今华人已向朱尔典公使请愿，求

其赞助，谓此举若成，可为朱使在华数十年荣誉历史之结项。吾人拭目以观其结果矣。

太平战役之英法美洋将

外人助李文忠剿太平者，法则阵亡军官三人，以卜华德为最著，美为华尔、白齐文。除白齐文始请人我国籍，继而反投忠部，为德不卒，不足齿数外，若华尔则亦因枪伤，病歿于沪上。惟英将戈登为文忠所信任，而功业亦较著。案戈登，英苏格兰北方人。生于一八三〇年。少习军事，毕业于某陆军学校，又研习工程科。于一八五五年英军出发于俄之司体脱海口。是战也，戈实预其役。厥后乃走远东。会中国洪杨之乱，始为苏抚薛焕留于上海。后得文忠之援引，假以军职，浸至总兵官，训练华工攻取浙江一带城池。文忠奏稿曾历叙其功绩。计历大小战事三十次，克服地方，颇奏功效。事后，辞去清室原给廉俸，且赐金钱珍物，一概谢绝。锐身回英伦之某地方，尽瘁于工程事业。复借暇晷以救济贫苦，安集流亡，用为乐事。数年之后，乃改赴非洲经营工程，开始行汽船于埃及之某湖。一八七七年，遂受命为苏丹总督，开拓疆土。又三年，因事告退。未久，以非洲匪乱，从事远征，在某地方为土人所杀。其一生所积资财，曾于未死之日即指建一工科学学校于苏格兰之扼北淀省，今即以戈登名其校。生徒六七百，为北苏有名工程学校之一。华人人此校者，颇不乏人。欧战起后，此校之学生投袂从戎者，络绎不绝。北苏地方，在若干年前即有义勇队之组织，作沿海防卫之用。隶此军籍者，半为大学学生，并无年俸。岁时招集演习枪术，并不妨碍课期，行之有年。因戈登为此地历史上有名之人物，又著武功，故即名曰北苏义勇军云。见某西报。

金利源码头之筑造

法界沿浦滩之金利源码头及货栈，延亘将及里许。地形有似凸出于黄浦江中。为招商局之不动产。招商局创自光绪初年，主其事者为盛杏蓀氏。以沪上无适当之码头及栈房，因就黄浦江中筑地为之。彼时法人亦有违言，盛以地从江中填出，与法无涉，故该地得完全保存。光绪三十年，盛交卸，继任某君拟将该地售出，半作添购海轮之用。盛移书上之，将该地交涉情形电达当道。

跑马场中之华人坟墓

上海自辟租界后，地价大涨，地皮纠葛亦愈盛。沿浦滩仁记路之某隙地亩余，泥城桥西惯作马戏场之大隙地，讼案数十年未结，此其最著者。此外零星地亩，业主无权过问，一任地贩从中播弄，负纳税之义务，而不得享使用之权利者，全租界中不知若干。而尤为奇特不可究诘者，跑马场内尚有各业户零星地亩是也。跑马场为一种营业公司性质。当该场开辟之始，公司中收买各地，间有一、二倔强不肯出售或祖宗坟墓所在不愿脱售之各户，介于其间。该公司无法，就各户不出卖之地四面包

围，务使该地无进出之路。今则从跑马场东南角即俗所称南呢城桥于篱落间微窃，中有垒垒负土而起者，则某姓之祖坟也。章程虽云“不禁华人祭扫”，然亦空谈耳。西人裘雪司著《上海通商史》，内载海关沿革颇详：“当咸丰三年刘丽川踞城戕官后，上海秩序大扰，各国商轮莅沪，均不按照商约缴纳。当局者以内乱方炽，不欲同时与外人开严重交涉，于是北关几废。当时以江海大关为南关，亦称旧关，而海关则称北关及新关。嗣由香港总督仗义执言，主持正论，各国无可非难，乃亦相率缴税”云云。此事不见于中国记载。偶询之海关中司事华人，据称闻之某税司言，亦仅云海关历咸丰三年以迄太平军之灭亡，中经各种变故，关税迄未减短者，实得英人之助力。至英人以何方法助我，不仅中人无知之者，即该税司亦只知其大略。惟王韞《瀛壖杂志》颇详此事。志云：“咸丰三年红巾之乱，北关几废。英国驻扎香港公使包伶以为例当输纳，于是复设如初，而延西人为司税，正副各一人”云云。则与裘司所著正合。惟此云红巾之乱，系误刘丽川而为太平军者。然自刘踞城后，即由某西人为之通款，称臣于南京太平王府，则称之日红巾，亦固其宜。香港于道光念二年割让于英。所云香港公使，实即香港总督，王氏所称名偶误。至海关延用西人，亦始于是，尤可补中国官文书之缺略。识此以谕研究海关故实者，包伶确系公使。盖英公使于驻北京之前，均驻节于香港，包伶之前已如是。见薛福成《四国日记》。

五口通商以前之掌故

上海为东南重镇，海通以前，为出海要区。明之倭寇，清初之海盗张元子窟宅于沿海一带，而上海实为其必争之地。迄通商之局既定，上海滨江带海，久为西人所垂涎。而约开之五口，上海实居其一。五口均在长江以南。闻当时定约，英人并索山东之登州、直隶之天津，计共七口，嗣以畿辅重地，未便自撤藩篱，且鸦片战争亦仅及广、闽、江、浙四省，故允许口岸，亦以四省为限。该约虽定于江宁，然草约实于广州议定之。盖彼时所有洋务，统归两省总督主政，犹同光以来以江督兼南洋大臣也。厥后商务蒸蒸日上，重以国内历次内乱，绅商多迁避于此，于是上海又为国防的商务的重要地点。有此原因，前清政府对于上海，乃亦有特别之设置，驻江苏提督于松江，筑炮台于吴淞。此为海通以前之设置，亦于后来国防上有关。通商以后，钦派通商大臣坐镇其间，特别委任沪道兼理海关事宜，并移驻海防同知管理界务，其下复设理事一员，以资佐助。此为海通以后之设置，尤与商务上有关。最后则苏松太兵备道名义，虽与各道无殊，而事实上乃不啻为政府特派之外交官。盖国际上之关系，愈以密切矣。

太平军之待英人法人

太平军起，英香港总督达汉乘汉姆司亲至南京，谒太平军首领。其首领号称天王，既见达汉，自称教主，并谓英国为其属地，英王为其陪臣，并询达以圣母马利亚是否尚有姊妹足以配之？语甚荒诞。而达汉则仍以守中立之言，谆谆然告诸天王。天王

不置可否。自是达汉信任太平军之心稍懈，目之为匪。厥后，法公使庞逢龙亦至南京谒天王，大受揶揄。美公使马喜尔亦拟人谒。至之夕，太平兵特杀前所拘获之江督以示威。盖欲速西人之去，而苦于无术，又迫于中馁，故假杀江督以慑之也。自是太平兵之凶悍，渐为各国所公认，而西人所以反对之者，亦于是始。

上海守卫华军入租界

咸丰三年西四月八日，各国领事开会讨论上海守卫事宜。英领事爱尔可克宣言：“无论乱军、官军，皆不得入租界。而各国居留之人，亦不得因国籍之异，而生两歧之意，致防御疏忽，为匪所乘”。法领事首赞其议，乃与英国水军合力防范。英、美亦同时组织义勇队，选举代表，统率水陆军。并于租界四周筑栅，外掘深沟。故租界防范颇密。而上海城中则寂然无声，毫无准备，匪因之散布城中。与太平军通款者甚众，最著者为三合会，次则小刀会等，咸蠢蠢欲动。而华官束手无策。九月七日朝曦甫上，太平军小金子(即刘丽川)攻城至北门，杀守兵而入，焚县二署，大掠城中。时知县方往行丁祭，遇匪于途，遂被害。又有华官数人，皆自经死。沪道吴健彰自北城缒而出，匿于租界美人。时避难华人，群聚租界以求保护。各国战舰亦遣水兵登陆以助之。太平军以粤、闽及甬人为最多，徒众咸蓄发，衣服华美，头裹红巾，举动粗野，不谙礼法。上海既陷，即布告示，略谓太平以驱满复明为职志，凡汉人须一律投诚，外人亦赦而不杀。其首领亦亲至各领事馆见各领事，申告以并无仇视洋人意。

工部局成立月日

七月十一日工部局成立，英领事爱尔可克遣代表宣布防范政策，谓保护之责由华人任之，各国无实行保护之权，惟有协助之责，英美水师当协济陆军之所不及，而不侵占华地，且以军法约束华人。英领事复于十六日开第三次讨论会，实行中立，以消除华洋恶感，而阻太平兵杀戮之祸。卒之中立未成，而租界亦波及，直接受其损失，无辜华人咸葬身于炮火刀枪之下。

乱时西商纳税问题

方太平军破南京之时，上海惊惶万状，争向各商号提取存款，商业不可问。而驻沪英港督复力主中立，不愿与闻战事。故各国舶来货之堆积，陈陈相因，难以数计，数月不得销售。于是西商要求暂不纳税，俟兵事稍平，然后缴纳。英领事爱尔可克许之。未三月纳税额积至十六万八千余两。中政府以军事需饷，向海关索取税银。英港督佐治达汉颇韪斯议，反对英领暂不纳税之策。于是英商店十三家联名诘问，达汉仍力持前议，且谓英商无要求废约之权。矧中国内乱正剧，需款方殷，西商要求之事，益难承认。于是西商不纳税之议，遂以中止。当太平军军兴之时，上海为私贩出没之区，海关如虚设。私贩苟能贿赂海关中人，咸得来去自如。而商人之不

谙此诀者，百计勒索，多方留难。英领病之，日欲革其弊。会刘丽川等据上海，乃大掠海关而毁之。华官星散，海关管理乏人，商舶自由出入，几无纳税之事。至一八五三年九月九日，英领事通告各商人，略谓上海虽遭兵乱，然亦不能以此而废条约，商人仍当遵约而行。乃订立暂行各商号出货办法。其进出口税，须于英领事署缴纳现银或期票。美副领颺之。而法领事宣言，谓华政府无正式海关，法商舶皆不能缴纳进出口税。左袒法领之议者颇众。沪道患之，拟于旧海关处重建海关。不果。乃于苏州河北岸暂设海关以课税。而德、奥、西班牙等商舶，皆听其领事之训令，抗不纳税。英商亦反对英领通告，倡议不纳税。沪道不得已，允其纳半税。自此例开始，西人亦间有纳税者。而贿赂之风，遂与内地厘卡勒捐相仿佛。凡进出口货，必经数次之捐税，毫无限制。因而美公使宣言：“美商亦当效各国而不纳税。”至是英领不得已，亦取消暂行之例。距其宣布之日，只五月而已。于是英人所纳期票，悉不付款。华人因以诘问英新督约翰濮林，不得已以期票返之西商。先是，沪道屡欲于前毁海关处重建新屋，辄为英水军所阻，乃于苏州河畔设海关以课税，虽得英、法、美领事之承认，仍无成效，而英、美复创自由贸易之说，于是海关依然虚设。数月以来，各国商舶咸出入自如。沪道力争，终归无效。既而，英领倡议中国海关使西人管理，以清积弊。初拟以法领事署之随员为之，厥后沪道与英法领事等商议，使每国各派一人以为监督。于是英派威德、美派嘉尔。各国遣员既定，乃于一八五四年七月十二日正式建立于南京路江西路转角处(今普鲁华书馆地)，以课进出口货之税。至是贿赂漏税等积弊，稍稍刷清。是为中国江海关建设之始。

外人尊重中国主权之建言

光绪初年，有某英人漫游至上海。见领事干预诉讼，及其他侵权举动，及以六事上书英政府。其三即谓商人不归地方官管理，而以领事自理，袒护不公。洋洋数千言。一面上书，一面集合彼中禁烟会会员，尽力鼓吹，冀达目的而后已。并以书稿上之我国驻英公使，旋以婉言却之。彼都新闻纸得此消息，著论讥评，以为与远东人办理交涉，切不宜推心置腹。大乱事平，有某华商负欠某洋商丝款若干万，商控于上海道衙门，上海道委员提讯。则被告华商力诉，因乱事损失，一时实无力偿还。供毕大哭不止。嗣委员以讯供情形转禀沪道，沪道立提该华商到案，谕之云：“尔之负欠既系因乱事损失，惟尔能对外国领事同声一哭乎？如能，本道将送尔至领事处一讯，则此案便可了结矣”。该华商一一遵谕而退。嗣沪道即将全案人卷移送领事署，领事果将前欠开除，且悯该商穷无所归，并给银洋数元饬令还乡。见某西使笔记。此等事，即领事裁判权之导火线也。